

41 ~~X~~. 10. 53

**APOLOGIA**  
P R O  
**Circuitione Sanguinis.**

Qua respondetur  
**ÆMYLIO PARISANO**  
Medico V E N E T O.

---

AUCTORE  
**G E O R G I O E N T I O.**

---

Rara temporum felicitas, ubi sentire quæ  
velis, & quæ sentias dicere licet. *Tacit.*  
Hist. l. i.

‘Αἰ δύνωσι φρονίδος σπουδῆσι. Eurip.

---

*Editio altera, auctior & accuratior.*

---

**L O N D I N I,**  
Typis M. F. Impensis Gualteri Kettilby ad  
Insigne Capitis Episcopalis in Cœmeterio  
D. Pauli. MDCLXXXV.



17413100



---

**NOBILISSIMO**

**ATQUE**

**AMPLISSIMO VIRO**

**D. THEOPHILO CLINTONO,**

**Equiti honorati Ordinis Balnei,**

**& Comiti LINCOLNIENSI,**

**I**N excelso fastigio positi, ver-  
tiginē corripī solent, si sub-  
jecta longe telluris loca despecta-  
verint. Metuerem similiter, Co-  
mes amplissime, ne animo tuo  
summis negotiis occupato mole-  
stia aliqua obveniret, si ad scvra

hæc Musarum sacra descenderet :  
nisi Te hujusmodi studiis delectari  
scirem ; & volupe esset, gravibus  
Reipublicæ negotiis pene con-  
fractum animum ad ociosam sui  
ipsius contemplationem transfer-  
re. Debebatur autem Tibi, no-  
bilissime Comes, hujus qualif-  
cunque libelli dedicatio ; tum a-  
liis nominibus plurimis ; tum e-  
tiam, ut, si *ingenium* in opere de-  
esset, laudaretur *saltem* in dedi-  
catione *judicium*. Feci enim hac  
in re, quod in arte nostra fieri  
assolet ; ubi linguæ aut oculis  
ingrata auro tegimus, ne displi-  
ceant : sic ego pariter obscuro  
huic opusculo Nominis tui splen-  
dorem præfixi, ut gratiam, quam  
à semetipso demereri non pote-  
rat,

rat, à dignitate tua mutuaretur.  
Deus Te, ac nobilem tuam Fa-  
miliam diu incolumes fervet, Si-  
bi, Patriæ, Amicis, Tibique adeò  
ipsi. Quod ardentè vovet

*Amplitudinis tuæ*

*Cultor observantissimus,*

Georgius Entius.

---

...a digne ...  
...a digne ...  
...a digne ...  
...a digne ...  
...a digne ...

I  
t  
t  
n  
t  
r  
J

---

---

CLARISSIMO  
ATQUE  
ORNATISSIMO VIRO  
D. GUILIELMO HARVÆO,  
REGIÆ MAJESTATIS  
Archiatro dignissimo,  
ET  
Collegii Londinensis Anatomico celeberrimo.

**N**IHIL unquam, præclarissime Vir,  
inter homines æquiore sorte distributum est, quàm de rebus, præsertim Philosophicis, judicium. Quo licet multi plurimum destituantur, unusquisque tamen potiorem sibi partem obtigisse arbitratur. Illudit nempe animis nostris falsa rerum species; nubemque albicantem pro Junone amplectimur. Præcipuè autem illi  
B sen-

sententiam suam mordicus tuentur, qui eandem à priscis sapientiæ patribus ad nostram usque ætatem deductam nòrunt. Quasi verò sola antiquitas veritatis tessera sit; & effæta mentes mortalium nequeant ultrà quicquam eximii parere. Quod de se Priapus apud Horatium:

Serm. l. 10.  
sat. 8.

Olim truncus eram ficulnus, inutile lignum:

Cùm faber incertus, scamnum, facerétne Priapum;

Maluit esse deum: deus inde ego.

*Hoc ipsum de multis in Philosophia & Medicina sententiis verè dixerim; magni illæ æstimantur, quia magnis viris, earum fabris, sic visum fuit: & turpe ducitur, eà possessione suâ exuere velle, quæ multis jam seculis imperii potita sunt. Ita primi ducunt sequentes: dum magis querunt homines quid dicatur, quàm quid verum sit. Inde ista pro suscepta semel sententia penè cruenta certamina. Frivola, inepta, ac putide mentis commenta audiunt, quæ huic flumini sese opposuerint: quin etiam digitus aliquando hac in re scenam agit, notatque transfugam. Quasi verò non liceat sapere sine plebiscito; aut tanquam res agatur in foro, ubi suffragia; non autem*  
in

*in theatro Philosophico, ubi argumenta pen-*  
*sitantur: usque adeò hodie Veteribus ulla*  
*in re adversari, piaculum habetur. Pa-*  
*rum autem esset, si Philosophorum vulgus so-*  
*lum erroris hujus affine esset, & non magni*  
*nominis viri quoque eàdem culpà tenerentur.*  
*Enimvero quis non miretur, Bartholomæo* In off. exa-  
*Eustachio, docto sanè viro, hoc excidisse:* minc.  
*Magis expedire, decerèque putandum est,*  
*Galeno duce errare, quàm his illisve ma-*  
*gistris hodie erudiri; ne dicam, cum iis*  
*vera sentire. Qui autem verecundiùs agunt,*  
*nihilque sibi ipsà veritate antiquius prosi-*  
*tentur: si tamen ab aliquo nostræ ætatis*  
*res nova adinventæ fuerit, eadèmq; ar-*  
*gumentorum robore probè munita videatur;*  
*parant tamen invidiæ aculeos, eandèmq;*  
*vel à veteribus jampridem indigitatam;*  
*vel malè, aut mutilè saltem ab Auctore*  
*novo excogitatam atque illustratam clami-*  
*tant. Id ipsum tibi, Harvæe clarissime, in*  
*præsenti negotio contigit. Edidisti jam-*  
*pridem de Circuitu sanguinis librum (sine*  
*cerussa dicam) verè aureum; quo Metho-*  
*dicæ sectæ fundamenta confirmasti, & Dog-*  
*maticæ novam faciem prætulisti. Miraban-*  
*tur certè Medici æquiores, tam illustrem*  
*veritatem tandiu in Democriti puteo deli-*  
*tuisse. Possumus enim nunc cum Trygæo*  
*Aristophanis dicere.*

Pace v. 309.

πρὸ τῆ μὲν ἐν  
Εἰσαλαρῶμεν ἐν σκότειν τα πρῶτα  
Νυνὶ δ' ἅπαντα πρὸς λύχνον βελεύσωμεν.

—haecenus qui  
Tenebris in ipsis mente res palpavimus,  
Nunc ad lucernam cuncta pensitabimus.

*Quamobrem tua fama meritò per Orbem ce-  
lebrata est,*

Martial. l. 5.  
cp. 13.

Quòdque cinis paucis, hoc tibi vita dedit.

*Verùm ne integra tibi esset hæc gloria,  
repti sunt, qui (sive ut ruinis tuis sibi  
laudem aliquam constabilirent, vel senten-  
tiæ dudum à se propalatae, quam hæc tua  
sanguinis περιπόλῃσι jugulabat, vitam de-  
nuo restituerent) eandem labefactare ag-  
gressi sunt. Et cùm rationes tuas legitimo  
Marte expugnare nescirent; famam tamen,*

De Hermetis  
Ægypt. &  
Chem. sapi-  
entia, l. 2. c. 8.

*veluti per insidias, suggillârunt. Olaus  
Borrichius ait, Fridericum Bitiskium cre-  
dibile reddere, circulationem sanguinis Pa-  
racelso olim cognitam fuisse, atque etiam  
cordis αἱματοποιήσιν. Alii dicunt, rem*

\* L. 7. anat. eandem à \* Columbo, Spigelio, atque  
† L. 3. de † Hofmanno, aliisque prius excogitatam  
Thoracc. c. fuisse: quæ tamen, nisi plurimum fallor,  
II. illis



illis nunquam in mentem venit ; licet de sanguinis per pulmones transitu vera scripserint. Neque Andream Cæsalpinum, etiamsi motui sanguinis, è dextro ventriculo per pulmones in sinistrum, Circulationis nomen indidit, quicquam amplius sensisse arbitror. Existimat enim, sanguinem partim per medium septum è dextro ventriculo in sinistrum transmitti. Nec aliter, opinor, judicabunt ; qui (inter plurima alia) ad hæc paucula ejus dicta animum adverte-  
 rint. Si venæ, inquit, omnes ad cere-  
 brum tendentes in collo interciperentur, Quæst. Perip. l. 5. qu. 3. pag. 121. a. non amplius ex corde virtus fluere-  
 ret in nervos. Canales enim venarum cum nervis continui sunt ; quanquam, ob vasorum exilitatem, in dissectione ostendi satis nequeant. Deinde ineptè nimis arbitratur, Ibid. qu. 4. p. 123. a. tumorem arteriæ, in systole, desiderare, ob  
 sanguinis continuè transitum in nutritum partium : non autem, quòd is confestim in venas derivetur. Alibi ait : Cum calidi Quæst. Med. l. 1. qu. 5. p. 180. pr. innati fons sit in corde, necesse est, pri-  
 mum in corde oriri, deinde per venas & arterias diffundi in totum corpus, aut in plurimas partes, aut in principalissimas. Et aliquanto post : Spiritus, qui in cere-  
 bro est, & per nervos fertur sine sanguine, non est subjectum febris : verum is solus, qui ex corde per venas & arterias  
 fertur.

*Ib. l. 2. qu. 15. fertur. Utque tandem desinam: Non est*  
*pag. 229. b. mirum, inquit, solis arteriis carotidibus in-*  
*terceptis, soporem nequaquam subsequi:*  
*nam calor ex corde transire potest per*  
*venas jugulares. Communicant enim of-*  
*culis venæ cum arteriis, ut sanguis trans-*  
*fluere possit, & spiritus per anastomo-*  
*sin. Aded ut nihil juris in eam senten-*  
*tiam doctissimo alioquin Cæsalpino attribui*  
*debeat. Carolus Fracassatus ait, Italum*  
*quendam hoc inventum ante Harvæum ex-*  
*coluisse. Is nempe est Pater Paulus Servita,*  
*quem Joannes Walæus etiam in scenam*  
*protraxit, Circulationisque hujus primum*  
*auctorem prædicat. Nimirum nec lux est*  
*absque umbra, neque gloria sine invidia.*  
*Istius autem commenti fabulam jampridem*  
*à te mihi narratam memini. Nempe, Le-*  
*gatum Venetum, ad suos reditum paran-*  
*tem, libro tuo de Circulatione sanguinis à*  
*te donatum fuisse; eundemque postea Patri*  
*Paulo legendum exhibuisse: Indèque Vi-*  
*rum hunc celebrem, memoriæ causâ, plus-*  
*cula transcripsisse; quæ, ipso mox defuncto,*  
*in hæredis manus inciderint: creditumque*  
*postea multis, eundem scripti hujus aucto-*  
*rem extitisse: haberéque te literas à Patre*  
*Fulgentio, ipsius Sodali, ad te scriptas,*  
*quæ rem eandem clarè exprimerent. Pro-*  
*fecto sic sit: raro admodum Sol nitidè splen-*  
*dens*

In Epist. præ-  
 liminari ad  
 Malpighium.

Epist. 1. ad  
 Bartholinum.

dens exurgit, quin mox vapores nebulæve  
exortæ claritatem ejus offuscaturum veniant.  
Inter alios autem sententiæ tuæ adversa-  
rios, Æmylius Parisanus in arenam pro-  
diit. Cujus liber cùm mihi primùm in  
manus incidisset, cæpi diligenter expendere,  
num, quæ ab illo allata essent, sententiam  
tuam funditus, uti præ se ferunt, everte-  
rent. Reperi autem nihil minùs factum esse:  
sed famam gloriàmque Inventi adeò tibi non  
abstulisse, ut etiam adauxerit: Longoque  
verborum ambitu antiquam fabulam denuo  
protractam in proscenium. Quamobrem quod  
temporis mihi ab aliis curis supererat, pla-  
cuit insigni huic velitationi impendere: &  
quàm liquido possem, argumenta ejus refel-  
lere. Idque vel eo nomine libentiùs ad-  
nixus sum; ut tibi animum adderem, re-  
liqua tua præclara cogitata, in publicam  
utilitatem, edendi; nec tuum alios juvandi  
studium ab oppugnantium nimio fervore  
sufflaminaretur. Opus hoc jampridem ab-  
solveram, animique interea anceps hærebam,  
numnam intra privatos cancellos detine-  
rem, an verò publici juris facerem. Me-  
tuebam enim, nè, cùm multa hîc à me  
σχεπτῶς disputata essent, crabrones exci-  
tarem, qui mihi in posterum suavem stu-  
diorum meorum tranquillitatem turbarent.  
Verùm cùm multa indies de hac lite à vi-

ris doctis disceptari cernerem ; statui unū  
cum aliis fortunæ aleam experiri ; atque  
hunc ingenii mei qualemcunque fœtum doc-  
torum judiciis exponere : illorum, inquam,  
qui, sine fastu aut præjudicio, quid res sint,  
non quid vocentur, expendunt. Statuebam  
etiam, finito hoc opere, in Animadversio-  
nes Primirofii, qui primus sententiam tu-  
am oppugnatum iuit, advertere. Sed cum  
argumenta ejus plurima ab iisdem machinis,  
quas Parisano opposui, labefactata cernerem ;  
scirémque alios etiam Medicinæ consultissi-  
mos hanc cum illo litem agere ; inter quos  
Henricus Regius insignis Philosophus vali-  
dissimos ejus arietes nuper retudit ; muta-  
vi sententiam, placuitque ab ulteriore con-  
tentione desistere. Hac autem meâ operâ  
si quid luminis præclaræ tuæ sententiæ at-  
tulerim, erit profectò quòd gaudeam. Sin  
contrà, dum interdum novum iter ingredior,  
tenebras eidem offuderim, laudémque tuam  
ingenii culpâ detriverim ; Tu, spero, pra-  
saluta tua humanitate, benignè condonabis.

Ad

Ad Ornatissimum Virum D. GEORGIUM  
ENTIUM Equitem Auratum, Medicinæ  
Doctorem, Collegamque dignissimum.

Ἀντίπαλος λόγος ὅστι λόγῳ· ἡ δ' ἐπλετο γαῖα,  
Περὶν γὰρ ἀκάντη, τ' αἵμα τε ἡμέτερον,  
Ἐιλείται νῦν ἀμφοτέρων κύκλοισιν ἀπείροις,  
Ἐν τε τροχῷ πάντες, καὶ ἐνὶ πᾶσι τροχῶς.  
Ἀλλὰ σὺ καὶ τοῖσδε σὺν ἐπὶ πλείω ἐπιβάλλεις  
(Φίλτατε) ἐν σφετέρῃ δόγματι καὶ νὰ Βίβλω.  
Καὶ μάλα μὲν πιθανῶς διὰ παρὰ πᾶσιν ὀνήσεις  
Ἡ οἷς εὐμαθίας, ἢ κομάτοιο κλέει.

BALDUINUS HAMÆUS.

In Lampadem Vitæ, à clarissimo Viro  
D. GEORGIO ENTIO ingeniosè  
excogitatam.

Lampade inextinctâ splendebat fœtilis urna  
Tulliola, & mediis radiabat flamma tenebris,  
Delituitque diu, solus sibi conscius ignis:  
Sed rupto tumulo, patuit focus ille perennis,  
Et subitò periit, tenues resolutus in auras.  
Sic corde humano fulgebat vivida flamma,  
Delituitque diu Medicorum cognita nulli:  
Donec felici conamine claustra recludens  
Abdita, & occulti referans penetralia cordis,  
ENTUS secretos ignes detexit, & alma  
Lumina nascentis vitæ, & nova pabula flammæ,  
Sed semel effractâ periture lampade vitæ,  
Heu brevis in tenues lux hac dissolvitur auras.

In amicitie pignus posuit,  
JOANNES GREAVIUS.

AD



---

A D

ÆMYLIUM PARISANUM

Medicum Venetum

PRÆFATIO.

**P**erfæ olim, clarissime *Parifane*, de arduis Regni negotiis deliberaturi, juvenes unâ cum senibus in senatum advocabant; ut horum meticolofam & circumfpectam nimis tarditatem, illorum ad rem gerendam ferociores animi temperarent. Pariter ex hoc nostro, licet difpari, congressu, quo ego juvenis tam periti Senis argumenta impugnatum eo, aliquid fortaffe commodi in rempublicam Medicam proveniet. Fateor equidem id tuo incommodo accidiffe, quod eâ tibi in arenâ pugnandum fit, ubi vinci turpe fuerit; & viciffe, inglorium. Maluiſſem certè, *Æneæ* magni (quod *Turno* & *Mezentio* honorificum fuit) *Harvæi*,  
in-

inquam, dextrâ cecidisses : Ita enim causa tua, quæ non nisi levia forsitan à me vulnera accepit, æternùm jugulata foret. Verùm illi (ut video.) majoribus negotiis districto, non vacat levibus hisce velitationibus operari. Quinetiam semper abhorruit animus ejus ab arena gladiatoria : nec unquam libuit Retiarium agere ; aut τοῖς Βατράχοις ἀντικοιῶν. Quamobrem licet

Hom. Od. b. Λευγαλέοι τ' ἐοῦμεθα, καὶ ἐ δίδακτός τις ἀλκήν.

placuit tamen in tam luculenta veritate ejus vicem agere, & rationibus tuis, quibus præclaram ejus sententiam expugnatum ivisti, respondere. Qua profectò in re id seduiò operam dedi, ut nullius auctoritati adstrictus, veritati uni militarem : quantumque potui, Naturæ ductum sequutus, quod res ipsa suasit, fidenter asserui. Atque in pauculis minoris momenti, ipsi *Harvæo*, quem defendendum susceperam, sum refragatus. Neque enim *Hy-*

Plin. l.4.c.12. *perborei* sumus, qui discordiam nesciunt ;  
Solinus c.16. in cujus solius manu aurea veritatis poma

habitare meminimus. Quinetiam interdum, datâ occasione, paradoxa quædam, à præsentī controversiâ aliena, proposui : idque eo fine potissimùm, ut cotis vice fun-



fungens, præclara ingenia ad abdita Phi-  
 losophiæ & Medicinæ mysteria porrò eru-  
 enda acuerem. Nam licèt culpanda sit  
 contradicendi prurigo, atque illa ingeni-  
 orum superfœtatio, quâ semper portenti  
 aliquid abortiunt: laudanda tamen inqui-  
 rendæ veritatis libertas; præsertim, ubi  
 leniter, haud præfractò animo, omnia ven-  
 tilantur. Nihil certè infelicius iis ingeniis,  
 quæ mordicus sentiunt, majores nostros  
 nihil ignorâsse. Fallax quippe illud *Aver-*  
*rhois* enunciatum, *Famosum impossibile est*  
*esse falsum*. Profectò ætas multa docet  
 etiam hebetiores, quæ sapientioribus An-  
 tiquis incognita fuere: nec Natura rerum  
 sacra sua simul edocet. *Veniet tempus,*  
*ait Seneca, quo ista, quæ nunc latent, in* Nat. quest. l.  
*lucem dies extrahat, & longioris ævi dili-* 7. S. 25.  
*gentia: Posterique nostri tam aperta nos* Sen. Epist. 65.  
*nescisse mirentur. Multa egerunt, qui an-*  
*te nos fuerunt, sed non peregerunt. Pere-*  
*gerunt? quàm abest? multum adhuc re-* Lipsius.  
*stat operis, multumque restabit: nec ulli*  
*nato post mille secula præcludetur occasio*  
*aliquid adjiciendi. Quæ autem à me hîc*  
*illic* *παραδόξως* *disputata sunt, haud tanti*  
*facio, ut, spretis melioribus judiciis, ea*  
*pertinaciter retineam. Talia tamen visa*  
*sunt, ut, si minùs ipsam veritatem attingant,*  
*saltem umbram ejus cominus se-*  
*quantur.*

quantur. Sanè res ardua est, novitatem aliquam ab omnibus scrupulis sartam tectam extruere: illudque Scaligeri in mentem venit: *Sapientum sententias oppugnare, paratius est unicuique, quàm suam tutò alienis committere iudiciis.* Quod ut mihi in præsentī negotio evenerit, idem tibi quoque obtigisse arbitror. Quapropter haud graviter, spero, feres; si, quam tu tibi meritò sumpstisti, eadem ego quoque contradicendi libertate usus sim. Rem itaque ipsam aggredior.

---

S E C T.

## S E C T. I.

**Q**Uòd te subtiliter subtilem fore polliceris, velim dicti illius *Petrarchæ* De remed. n. triusque fortune, l. I. dial. 7. memineras: *Nihil sapientiæ odiosius acumine nimio; nihil verè Philosophanti molestius, quàm Sophista. Ideo invisam Palladi finxerunt Veteres araneam, cujus subtile opus, ac tenues telæ sunt, sed & fragiles, nullique usui. Ut mucronis ergo, sic ingenii acies sit; non penetret modò, sed subsistat. Validissima omnia, si ad ultimum extenuentur, infirma sunt. Ita robur omne tenuitas atterit. Similiter Seneca: Nihil est acutius aristâ, sed nec futilius.*

Liberaſti autem promiſſi fidem: adeò enim intortè perplexèq; interdum loqueris, ut *Oedipo ſit conjectore opus, qui Sphingi interpretes fuit*; ſententiæque tua refelli faciliùs multò, quàm intelligi queat. Plautus in Pænulo.

*Harvæus* dilucidiffimè pariter ac breviffimè ex trita vulgò opinione, quâ aerem in arterias diastole recipi, atque expelli systole arbitrantur (quæ eadem munia pulmonibus quoque conveniunt) hoc verè subintulit, *Plerosque Anatomicos supponere,*  
cum

*cum Galeno, eundem usum esse pulsûs & respirationis; atque unâ re solùm differre, quòd ille ab animali, hæc autem à vitali facultate promanet. Ait enim; Arteriæ, dum distenduntur, per orificia, quibus cunctem adeunt, exteriorem aerem in corpus attrahunt: atque id tribus de causis; ut refrigerent, ut ventilent, utque spiritum animale gignant. Dum contrahuntur verò, quicquid in ipsis fuliginosum, fumosumque creatum fuerit, id expellendo elidunt.*

*L. 8. de placit.  
cit. c. 8.*

Ad quæ tu, parùm appositè, plures pulmonum usus causaris; eosdèmq; etiã formandæ voci inservire ais. Ubi profectò acumen tuum nimis hebes est: quasi nempe id *Harvæo* ignotum sit, aut ab eo negatum unquam: qui hoc solùm pertendit, primariam pulmonum operam, quâ aerem attrahunt, arteriis similiter ex vestra sententia competere; cùm tamen ipsius arbitrato, idque verissimè, arteriæ duntaxat deferendo sanguini spirituofo destinatæ sint.

Patrocinium, quod *Galeno* affingis, parùm subtile est. In arteriis, ais, nihil naturâ continetur præter sanguinem: videlicet, per se, primò, sui gratiâ, necessariò, simpliciter, pro nutrimento ad vitam. Quo certè distinctiones acumine, quispiam prævos humores in vasis, & sæces in intestinis

nis contineri negaverit. Quia scilicet *non insunt per se, primariò, sui gratiâ, &c.* item *non diu continentur*, ergo non omnino.

## S E C T. II.

Si cor, immerso in balneum corpore, majorem aeris copiam per pulmones accipit, quidni hi ultra solitum distenduntur? Aut quorsum arteriæ sub aqua, aut oleo pulsant? An, ut aerem in cor admissum alio itinere per corporis habitum excludant? Quem autem in finem ex corde aerem mutuuntur, qui jam in eodem ultra modum incaluit? Aut quidni bullulæ in aqua excitantur à jugi hoc aeris profluvio? Quomodo etiam tam subito, spatio nimirum unius diastolis, aer arterias omnes sanguine plenas transvolitat? Idque etiam adversus sanguinis motum; qui (si tibi credimus) è liene per easdem arterias ad cor tendit. Fortasse, quibus cutis tota ulcerosa est, & scabiæ, aut elephantiasi laborant, hoc pacto per pulmones in cor, non autem per cutem in arterias aerem alliciunt: Etenim quod illic Natura non potuit, hic non debuit; ne scilicet à sordidis cutis inquinamentis, tota spirituum Oeconomia fœdaretur.

Est quidem, fateor, animalibus (non fecus ac plantis) interiore aeris ingressu opus: non autem in illis per cutem is instituitur, quæ compactior, densiorque est, quàm ut ipsi transitum concedat; sed trans pulmones in corporis penetralia diditur. In quem autem finem id fieri necesse sit, adhuc in tenebris latet, neque hactenus inventus is *Hylas*. Ego quidem ob *salem nitrosum* aeri commixtum id fieri suspicor, qui rebus animatis ceu *anima mundi* haberi queat.

### S E C T. III.

*An non aer in cutis poris, & intrinsecus arteriarum oribus semper præsto est? Certè non est: neque enim aliter faciliè causam dixeris, cur strangulati intereant; si aer tam expeditè per cutem ac carnes it, reditque.*

Quidni enim, ut pulmones suprà in balneo arteriarum munus expediebant, hîc arteriæ similiter pulmonum vicem expleant? *Nunquid, & quâ ab arteriis? Nequaquam profectò ab iis trahitur. Nec tu unquam, opinor, tractionis illius modum explicueris. Tibi autem ea de re li-tem necdum moveo: id commodiore loco posthæc fiet. Deserturque vi & fugâ vacui.*

*cui.* Nullus hîc vacui metus. Quinetiam nego, motum aliquem institui ob vacui fugam: atque hac etiam de re postea fufius dispicietur. *Exploditur, quemadmodum & fuligines.* Miror equidem, *Parisianum*, qui Naturæ opera tam subtiliter rimatur, crassas hæc fuligines admisisse. Enimvero, per *Apollinem*, quomodo ex nuda cordis agitatione ( ut censent ) *fuligines* toties memoratæ exurgant? At enim à motu & calore sanguis fit *halituosus*. Esto; ergone & fuliginosus? Blandi certè & lenes calores non solent terrea excrementa profundere. Transudat, fateor, per corporis habitum sæx quædam sanguinis & humorum: illam autem sub halitûs aut vaporis specie singulis diastolis turmatim avolare, id præfractè pernego. *Quoquo-versus ingressus egressusve datur. Quid impedit?* Ipsa cutis, & cuticulæ densitas: quæ eo quoque fine talis à Natura extracta est, ne spiritus rapidè avolarent, corpûsque genio suo defraudaretur. Quantò magis igitur aeris ingruentis noxa hoc munimine arcebitur? Vesicantibus, aut aliter abrasâ cuticulâ, quid damni ab aere frigido accedat, omnibus notum est. Quod certè non fieret, si aliàs etiam eandem tam facillè penetraret. Vulnera, etiam minora, haud facillè consolidantur, nisi aeris ad ea

ingressus prohibeatur. Obstat etiam, in obesis, pinguedo, quâ tota ferè eorum cutis subter obsepta est: pingua enim aerem respuunt; eoque nomine liquores ab aeris injuria oleo vindicamus. Aqua cutem faciliùs penetraverit quàm aer, qui magnam partem est aqua dilatata & expansa magis. Videmus, ova recentia, igni admota sudorem veluti exhalare: &, si fortè rimulam alicubi egerint, citò vitium contrahere. At licèt pullum in ovo pipientem audias; non fit isthuc tamen ab aere inde foras emigrante; sed ab aere externo, à corticis tremulo motu percusso, adque aurem transmissio. Similiter dolium, musto plenum, rupturam minatur, nisi respiramen aliquod concesseris: cùm interea liquoris aliquid per rimulas egrediatur; aeris autem vaporosi, (qui distentionis illius causa est) ne hilum possit. Satiùs itaque quis dixerit, Jove pluvio, sanguinis penum ab aquei humòris vectigalibus increescere: siquidem constat, aquam faciliùs, quàm aerem, loca angusta subingredi. Eiusdem commatis est illud apud *Plutarchum*:

6. *Symp. 3. Multi, cùm non bibissent, sed tantùm lavissent, acri fame liberati sunt. Quippe humor extrinsecus subiens, succulentiora facit, adque nutriendum aptiora, quæ sunt intus. Miretur profectò quispiam, hæc Aquapendenti,*



*dentì, eximio sanè Viro, excidisse : Per De Respirat.  
 respirationem aer ad cor non pervenit, sed*<sup>pag. 27.</sup>  
*in palmones duntaxat : at per pulsum in cor  
 attrahitur. Cuinam autem fidem fecerit,  
 aerem spongiosam pulmonum substantiam,  
 & vasorum latera penetrare non posse ;  
 cùm tamen ( ex ejus sententia ) in habitu  
 corporis, densam simul cutem, atque ar-  
 teriarum latera permeet. Cedo autem ; in  
 quem finem aer in arterias attrahitur ? an  
 non, ut sanguinem in iisdem refrigeret ?  
 At verò ille, priusquam ad profundas ar-  
 terias pervenerit, incalescit. Et si sanguis  
 ab ingrediente aere frigescat ; quì fit, ut  
*spiritus animales* non perinde in externis  
 arteriis, atque in cerebro ipso fabricentur ?  
 ut hætenus voluere Medici. Censent qui-  
 dem aliqui, aerem non minùs in *arteriis*,  
 quàm in *corde*, unà cum sanguine, fabri-  
 care *spiritus vitales*. Adeóne autem su-  
 bitò ? & in quem finem ? an ut protinus  
 excludatur foras ? Durum profectò aeris  
 fatum ! primâ diastole in nobiles spiritus  
 efferri, ut proximâ systole, unà cum te-  
 tris fuliginibus, in communem auram effle-  
 tur. Deinde, si *arteriis* id officii à Na-  
 tura concessum est : cur non potiùs in su-  
 perficie corporis constitutæ sunt, & tenui-  
 ore tunicâ vestiuntur, ut promptiùs hoc  
 munus obeant ? *Aristoteles* meritò repre-*

*De Respirat.* c. 5. hendit, quod in *Timæo* dicitur : Spiritum nempe ore efflatum, propellere aerem circumfusum corpori : & cum is aer nihil vacuum reperiatur, subire illum per raras carnes ; ut concalescens deinde effletur : Sicque continuò inspirationem, atque expirationem fieri. Inanis labor actus in orbem.

*L. 16. de usu* Galenus quidem negat, in cute ullas esse  
*Part. c. 14.* arterias. Verissimum certè est, maximam earum partem in imo delitescere. Quapropter si arteria providè à Natura in profundo posita sit, & crassiore tunica induatur, ne spiritus (quos igneos esse postea ostendam) celeriter avolent ; quomodo, quæso, aer & fuligines, iis multò crassiores, easdem tam perneciter penetraverint ? Et in quem finem, obsecro, aer arteriarum extrema subingrediatur ; cum sanguis illic plus justo algeat : eoque nomine sit in venas, corque ipsum, adverso licet flumine (ut novum calorem nanciscatur) denuo reducendus ? Malè etiam sibi olim consuluisse, qui, valetudinis gratiâ, corpora oleo, imò & ceromate (quod ex oleo, pulvere, & cerâ constabat) inungebant : quippe eo pacto aeris in arterias ingressum præclusissent. Accedit miles ferentarius : Quomodo in arteriarum *systole* fuliginosus aer expellitur ? siquidem tunc temporis (ut volunt) arteriarum tunicae constrin-

guntur

*Mercurialis*  
*de arte gym-*  
*nast. pag. 35.*

guntur aliquatenus, & coarctantur. Facilior certè fuliginibus illis pateret exitus in earum *diastole*: apertis nempe, ob dilationem, meatibus. Tandem, quidni venæ similiter pulsant? Opinor enim, te velle, pulsum cieri ab animæ facultate; quæ, ob aeris ingressum, egressumque, eundem instituit. An non harum calor quoque (præsertim in febribus, ubi humores computrescunt,) ventilatione indiget? Expeditius omnino aerem admitterent, fuliginésque (si quæ adessent) expellerent; utpote cuticulæ viciniore, & tunicis tenuioribus donatæ. At *venis* à noverca facultate tam præclarum privilegium denegatum est.

Quo autem argumento persuasus, corpus animalium tam patulum voluisti, ut aer & fuligines illud quoquoersum transvolitent? Nimirum *σύμφοια μία, σύρφοια μία, καὶ συμπαδεία πάντων*. *Conspiratio una, corrivatio una, consentientia omnia*. Quæ verba *Hippocratis* perperam intellecta, multis errandi ansam præbuerunt. Huic enim fundamento innixus *Victor Trincavellius*, ait, *L. de venæ initio pleuritidis venam secandam esse in* <sup>scilicet in pleur.</sup> *adverso brachio, ob revulsionem. Nam et si* <sup>scilicet</sup> *ad venam respicienti, inquit, videatur æqualis utriusque brachii intercapedo; tamen non solum per venas ipsas, dum sanguis*  
C 4 *mittitur,*

*mittitur, aut medicamentis corpus purgatur, moventur humores, sed per membrorum occultos meatus, secundum dictum illud Hip.*

*L. 7. meth. c. pocratis. Simile est illud Galeni: Nullis extantibus viis à vesica ad alvum; vesica tamen multo & vitioso succo referta, commodius multo per dejectiones, quàm per uri-*

*Anat. Sambu- næ meatus expurgatur. Martinus Bloch- ci. pag. 165.*

*witius etiam eidem errori affinis, ineptè arbitratur, Oleum ventriculo inunctum ver-*

*minationi prodesse; quòd scilicet spiracula vermium occludat, eosque sic enecet. Qua-*

*1. Probl. 62.*

*si verò, si respiratione illis opus esset, aeri per anum haud facilius pateret aditus. Nec laudabilior est sententia Alexandri Aphro-*

*disiensis, quâ rationem reddit, cur oleum*

*epotum lumbricos interimat; Insecta, in-*

*quit, cum habeant pusillum calorem, sit fa-*

*cile, ut oleo obstructa eorum corpora omni*

*perspiratione priventur, & consequenter mo-*

*riantur. Inconsultè sanè sese oleo inunge-*

*bant Veteres, si quidem hoc pacto tran-*

*spiratio impediretur. Memorabilis ad hanc*

*In 9. Rhafis.*

*l. 8. de rerum*

*varietatè.*

*c. 44.*

*rem est historia, quam Marcus Gattinaria*

*& Cardanus referunt, de quadam puella an-*

*norum octodecim, quæ anno 1481. passa est*

*superfluum urinæ profluvium; adeò, ut sin-*

*gulis diebus urinæ libras circiter triginta*

*& sex emitteret, cum tamen ex potu & ci-*

*que*

que hoc sexaginta diebus perseveraret; emisit, ultra cibi & potûs quantitatem, libras 1740. Est etiam apud *Petrum Servium* De Admirandis. exemplum *Monialis*, quæ per aliquot septimanas supra ducentas urinæ libras quotidie mejeret. Causam hujus symptomatis statuebant Medici fuisse aerem, qui in arteriis ubique continebatur, quique in aquam conversus fuerit; cui continuò alius aer successerit. Quemadmodum nempe *Aristoteles* aerem, in montium cavernis latentem, in vaporem primùm, mox in aquam (fontium originem) transire credidit. Ecce pro tua sententia præclarum testimonium! mirorque sanè neminem hætenus repertum, qui *hydropis* causam ad egregium hoc dogma referret. Ab eodem fonte profluxit consimilis error *Pauli Zacchias*, Medici Romani, qui, libro de *Affectibus Hypochondriacis* Italicè edito, causam quærens, cur sæpe in Hypochondriacis, etiã parcè & exquisitè viventibus, sæpiùsque purgatis, continuò tamen magna humorum copia abundet; hanc ejus rei rationem reddit: *Hypochondriaci calore præternaturali æstuentes, porôsque corporis propterea apertos habentes, plurimum aeris per corporis habitum attrahunt; qui cum reliquis pravis humoribus commixtus, corrumpitur & ipse, condensatur, & in similes*

*similes humores abit.* Vides, quàm facile sit, per hæc tua Phænomena, dubiis etiam maximis responsiunculam adaptare.

Remora, quam *Harvæo* objicis, nos non retinet: transitus enim sanguinis ex arteriis in venas, per viscera, & corporis habitum, nulla post se trahit incommoda; uti ex dicendis luculenter constabit.

#### S. E C T. IV.

Expectabam hîc idem responsum, quod suprà de balneo attulisti. Nimirum embryonem aquis undique circumdatum, per os (idque ex *Hippocratis* sententia) trahere aerem, quem per cutem non poterat; adeoque cor arteriarum vicem supplere. Verùm tu cordi ejus motum nullum concedis, quo ille in mediis undis sese aliquantulum oblectet. Ac propterea etiam multo refrigerio opus esse negas; aeremque è *maternis arteriis* mutuatum sufficere, ais. Et jure quidem optimo. Cùm enim (ut existimas) nullus calor, nisi exilis, & per longa arteriarum diverticula debilitatus, ad embryonem pertingat, nec larem proprium (ex tuo decreto) domi habeat, unde incalescat: quorsum pauxillum illud caloris ab acri frigore extingueretur?

Sed

Sed dic fodes, si in unaquaque diastole aer etiam ab intimis arteriis exploditur; quifiat, ut ullus saluus ad embryonem perveniat? Arteriæ matris in utero desinunt, neque embryonis arteriis continuantur: an credibile est igitur, aerem ultra suos terminos per impervia quælibet transvolitare? Aut quomodo aer protruditur, & jam nimis calidus excluditur? an non pulsus ipso arteriarum? At verò matris arteriæ ultra uterum non pulsant; siquidem, ut dixi, in eodem terminantur. Quod etiam *Galenus* experimentum, de ligatura arteriarum fœtus, clarè evincit.

Dictorum oblitus, ais, *Cor embryonis* *ociari*. Cui tamen *Contactu* primo ipsemet <sup>l. 6. de usu part. c. ult.</sup> (idque verissimè) motum asseruisti. Quicquid verum est, inquit *Aristoteles*, oportet <sup>1. Prior. 33.</sup> sibi omni ex parte consentiat. Tu autem <sup>Eusebius l. 14.</sup> *Arcefilam* agis, qui nunquam idem bis diceret: neque enim putabat ingeniosi esse viri, in eadem sententia diu persistere.

Quia autem hîc, alibique passim, calorem cordis ab ejusdem motu deducis; libet in eam rem aliquantò altiùs inquirere: idque faciam sequenti digressionem.

## DIGRES-

## DIGRESSIO. I.

*An motus sit causa Caloris ?*

**E**GO quidem potius censeo, calorem esse causam motûs. Quæstio autem non est, utrum casu aliquo id eveniat, corporaque ignea attritione, aut excussione aliquâ è rebus exiliant; sed an ignis, qui non aderat, ab ipso motu producat? Primum faciliè concessero: quod non tam caloris productio, quàmeductio est: alterum autem pertinaciter nego; faciâmq, donec firmiora in contrarium argumenta, quàm quæ hæctenus videre licuit, objecta fuerint. Profectò nisi atomi caloris effectrices contineantur; nullus est motus, qui vel minimum concitare calorem possit. Quia enim aqua, v. c. destituta est ejusmodi atomis; agita illam quantum voles, aut agita tam per varia præcipitia considera; Et agnosces, quàm ipsi nullus per motum imprimitur calor. Proinde miror, sententiam hanc magno Scaligero excidisse: Aquam frigidam, inquit averfatur equus: itaque etiam ungulis disturbatam calefacit motu. Imò verò id ab eo potius fit, ut frigidæ aspergine

Gassendus  
tom. I. pag.  
395. col. 2.

In hist. de  
animal. l. 8.  
c. 29.



gine ventris æstum moderetur. Alibique  
ait: *Omnis aqua calorem concipit agitatio-* In Theophr.  
l. 2. de plant.  
pag. 129. c. 1.  
*one; aeris enim haurit multum. Ex æsti-*  
*vis extractam puteis cum jumentis potui-*  
*damus, ne frigore suo noceat, aut tormini-*  
*bus, aut anginâ; vexatam prius baculo*  
*exhibemus.* Miror, ubinam id factitetur.  
Certum quippe est, si lagenam, vini, al-  
teriùsve liquoris plenam, vasculo aquam  
in se habenti indideris, bacillumque fer-  
reum ab igne candens, remotè aliquantu-  
lùm celeritèrque circumduxeris; reperi-  
vinum inallescere plurimùm. Tantum  
abest, ut à solo motu insigniter incales-  
cat. Ita pariter, æstuosis temporibus, fla-  
bello ventulum excitamus, refrigerandi  
causâ. Nec minùs hallucinatur, ubi exi-  
stimat, *aerem in celeri sagittæ trajecti-* Id. exercit.  
16.  
*one ignescere. Idem namque efficitur, inquit,*  
*rectâ productione unâ longâ, quod brevi fre-*  
*quentique iteratâ confricatione.* Quod ab  
*Aristotele* desumpsit, qui sagittas plum- 2. De celo  
l. 6.  
*bo cuspidatas ex rapido aeris trajectu*  
*accensas liquefieri prodidit. Ita Lu-*  
*cretius:*

— plumbea verò

*Glans etiam longo cursu volvenda liquefcit.*

Et

Et Ovidius :

*Non secus exarsit, quàm cùm Balearica  
plumbum*

*Funda jacet: volat illud, & incandescit  
eundo,*

*Et quos non habuit, sub nubibus invenit  
ignes.*

Similiter Virgilius,

Secundùm vulgarem opinionem, ait :

*Æn. l. 3. v.  
525.*

*Namque volans liquidis in nubibus arsit a  
rundo,*

*Signavitq; viam flammis, tenuésq; recessit  
Consumpta in ventos.*

Item Lucanus.

*Inde faces & saxa volant, spatiòq; solutæ  
Aeris, & calido liquefactæ pondere glandes.*

*Nat. quæst. 2.  
c. 56.*

Imò Seneca Philosophus ait: *Aerem motus  
extenuat, & extenuatio accendit. Sic li-  
quescit excussa glans fundâ; & attritu æ-  
ris, velut igne, distillat. Falso huic fun-  
damento innixus Claudinus, cùm cerebro*

*De sede fa-  
cult. princip.*

*motum attribuisset, aeris quoque ad illud  
perpetuum ingressum concessit; ne cere-  
brum scilicet à continuo motu inflammare-*

*Sen. nat. qu.  
l. 1. c. 1.*

*tur. Eadémque videtur Stoicorum opinio,  
qui ex nubium mutuo concussu tonitrua*

&

& fulgura excitari somniarunt. Hinc quoque elementum ignis sua traxit incunabula; nempe quòd aeris suprema pars, utpote rapido cœlorum rotatui vicinior, in ignem transierit. Mirum equidem, toti etiam aeri idem in turbine non contingere. Eleganter sanè ad hanc rem Gilbertus noster: *Qui diurnam revolutionem*, *Physiolog. l. 1. primi mobilis esse existimant, non terræ;* *c. 7. propter velocitatem motûs circularis, calorem in ignis elemento somniant. At aer etiam circulariter movetur eodem motu (ut putant) & frigidus sentitur; nec cœlorum sphaeræ incalescunt. Sed illud evadunt malum inveteratâ stultitiâ impatibilis naturæ. At quomodo aerem tuentur, (quem dicunt calidum & humidissimum, ideòque & inflammabilem) ne illico accendatur; in quem etiam à sideribus proveniens calor immittitur. Hippocrates quidem videtur hujus* *L. De ver. erroris teneri, ubi ait: Si quis præ æstu medic. p. 29. ventilet, studeâtque sibi ipse refrigerium hoc modo conciliare; huic decuplo majorem æstum ardoremque oboriturum, quàm idem non facienti. Eidemque calculum adjicit Lindanus: Sanè, inquit, experiuntur matronæ, quem (inter decambulandum) æstum muscariis æstata discutere satagunt, cum se sufflare & accendere magis sufflammando, ventilando dicere voluit, profectò debuit.*

( Nescio

(Nescio quid apud eum eveniat: nostratibus certè aliter contingit.) *Etiam diaphragma vegetare potius abdominis calorem, quam reprimere, hoc argumento doceor, inquit, quòd frequentato ejus motu incalescimus, & multi protinus sudant zonâ, seu parte, cui illud alligatur. Nempe ob pinguedinem ibi loci copiosam. Num autem quietè canentibus idem usu venit?*

*Ophthalmogr.*  
*L. 4. c. 21.*

Similiter Plempius, quærens, cur interdum fulgores & scintillationes in oculis percipiamus? respondet, id fieri, quòd spiritus, compressione coarctati, impetant sese mutuò: à qua mutuâ collisione quasi ignescentes, flammulas vomunt. Rémque ita se habere, confirmatum it, quòd non continuò, presso oculo, lumina illa refulgeant, sed post aliquantulam moram: postquam scilicet aliquot incurfionibus se invicem accenderint. Ego verò splendorem fulménque illud non ab alia nube, quàm ipsius oculi vibratâ celeriter concussione profilire arbitror. Motum nempe retinæ imprimit consimilem ei, quem in eâdem res fulgurantes concitare solent: idque eodem temporis momento, quo coruscatio contingit.

*Anat. L. I. c.*  
*34. pag. 308.*

Nec multò sanior est Diemerbroekii sententia, ubi existimat, partum debito tempore fieri; non quidem ob cibi depravationem, aut defectum; aut excrementorum

re-

*redundantiam : sed ob refrigerii, siue respirandi necessitatem. In principio (inquit) exiguus est embryonis calor ; tandem vero adeo augetur, ut ventilatione & refrigerio indigeat : quo denegato, incipit fœtus à nimio calore paulatim magis magisque angī, & propter molestam anxietatem, sese tandem acriter movere, ac calcitrare ; sicque forti isto motu uterinos humores ad validam effervescentiam, irritatione molestam, incitare ; ac sibi exitum, & liberio rem aerem quærere. Profectò etiamsi embryoni (ob rerum imperitiam) culpa ejusmodi, modò eam admitteret, ignoscenda esset ; non tamen facilè condonandus Auctor hic, ob tam insignem ἀβλεψίαν. Tantùm enim abest, ut fœtus in utero, circa partitùdinis tempus, nimium æstuet ; ut in matribus tenellis probo sanguine adeoque spirituum copiâ defectis, plus satis algeat ; neque tamen solitum nascendi tempus tantillum protrahat.*

Porro, si solius motûs eâ vis est ; quidni procellosi maris undæ, etiam hyeme, incalescunt ? cur non, frementibus ventis, nives in montium verticibus liquecunt ?

Quidam certè autumant, *ventum seu flatum intra terræ viscera conclusum, ibidemque agitatam, atque aquis subterraneis incumbentem, eas calefacere.* Atque hanc

D

etiam

Gaspar.Scot-  
tus Anat. Hy-  
drostat. l. 6.  
c. 3.

etiam ob causam Bodinus ait, *Mare esse calidius, quàm flumina.*

L. 2. de Element.

Si verum est, inquit Cardanus, aerem ex lapidis attritu accendi; quidni pariter ex omnibus lapidibus, præsertim duris, ignis producitur? At verò ex collisione marmorum ignis nullus accenditur, imò ne porphyritidis quidem. Et si aer in causa est; quidni vertitur in flammam potius, quæ sursum ascendat, quàm in scintillas, quæ deorsum ferantur? Quinetiam mirum videtur, aerem omnem non accendi, semel arrepto fomite, si adeò idoneus est, qui in flammam abeat: quemadmodum aliis combustilibus contingit; quorum aliquâ accensâ parte, integra continuo strues comburitur. Addo etiam, eâdem ratione adstrui posse, herbas virides contritas, manûve fortiter perfricatas, humorem nullum de se fundere; verum ab aere intermedio humiditatem illam omnem profluere. Quid multa? Si quispiam veris & ex natura rerum depromptis rationibus, elementorum illam toties decantatam transmutationem demonstraverit; desistam ab actione, herbamque illi libens porrigam: atque ut galli gallinacei devicti solent, demissis alis, è prælio aufugiam. Scio quidem, quæ vulgò in hanc rem afferantur; sed & falsitas eorum mihi pariter non ignota.

nota. Amplior hujus rei disquisitio aliam arenam postulât. Verba *Baptistæ Portæ* duntaxat assuam: *Ipse, ait, sexcentis exper-* L. 4. de aeris transmut. c. 23.  
*rimentis neque feci, neque ab aliquo factum*  
*audivi, qui terram in aquam transmutave-*  
*rit, aut aquam in terram. Si puteis vel*  
*cisternis pusillum pulveris addideris; non*  
*in aquam abit, sed multis seculorum turbis*  
*semper terra erit, & in imum aquæ abit.*  
 Quamobrem miror, eundem reliquorum elementorum μεταλλάξιν concessisse; cùm sit consimilis experimentorum fallacia. Argumenta autem *Cardani*, quibus probatum it, ignem in lapide prius non delituisse (nempe, quia ignis ureret lapidem, & rursus lapis tangentis manum; & facile accenderetur; & alimento indigeret) docent quidem, nullum ignem ibidem actu nidulari: fatendum tamen, atomos igneas ibidem latitare; easdémque, vel alterius ignis accessione, vel rei solidæ conspectu, vel pressiore attritione, compedibus suis liberari, & in actum elici. Illæ autem si abfuerint, nullo modo ignis producet. Quod ajunt, sagittæ plumbum motu liquescere; manifestò falsum est, & contrarium sibi compertum esse, *Canevari* testatur. Quid opus pluribus? Nemo nescit, glandes plumbeas celerrimo bombardarum ictu per longum etiam aeris spa-  
De Aërament. descript. 1. Cæf. Magarus de vuln. scilop. insit. c. 1. Paræus, l. 11.

tium trajectas, ne pulverem quidem pyrium (si in eum inciderint) accendere. Et vulnera, ab iis inflicta, non curantur ut ambusta, sed ut contusa solent. Ex iisdem quoque magna interdum sanguinis copia profluit. Quod non fieret, si glans ignita esset: adurentia enim ἐκδέχων inducunt, & sanguinem profluentem compescunt.

Et hæc quidem à me vel eo nomine fusiùs explicata sunt; ut supinam illam tuam, aliorumque sententiam erroris accerferem: quâ nimirum arbitramini, spiritus sive calorem, qui cuncta animalis vivificat, à simplici cordis motu proficisci. Interque alios, *Albertus Kyperus* nuper, sanguinis caliditatem, ab illius attritione in corde factâ, ex parte deduxit.

*Anthropolog.*  
l. i. c. 15. §.  
22.

## S E C T. V.

Hæc tua responsio eodem tempore & risum mihi movet, & nausæam. Quæ enim hîc ab *Harvæo* afferuntur, veritati ex asse respondent. Negat quippe, cetaceum omne genus, reliquosque pisces in profundo maris, arteriarum suarum diastole & systole, per immensam aquæ molem, celeri pulsuum aerem assumere posse, & emittere. Quid autem ad hæc *Parisanus*? hæret scilicet, ut vulgari adagio dicitur, ὡς περ μῦς ἐν πύλῳ,



*mus*, veluti mus in pice. Occlamat ta-  
 men, *Piscibus aere opus non esse, quoniam*  
*non respirant.* Quid audio? tunc phocis,  
 balænis, delphinis ( ab *Harvæo* memora-  
 tis) respirationem adimis? Et ut maxima  
 piscium pars pulmonibus destituta; ~~est~~;  
 aeris tamen beneficio ne illi quidem diu  
 carere possunt; quem, super aquam emer-  
 gentes, identidem asciscunt. Aer enim,  
 quo apud nos est modo, in aqua minimè  
 continetur; non posset enim rarior aer  
 non ascendere. Crediderim tamen, vir-  
 tutem illam nitrosam, cujus potissimùm  
 causâ aerem haurimus, in aqua etiam ali-  
 quatenus contineri, eadèmq; pisces vi-  
 vere. Cùm enim aer maximam partem  
 (ut arbitror) nihil aliud sit, quàm efflu-  
 vium aquæ spiritibus terræ imprægnatum;  
 qui, dum roris specie delabuntur, plantas  
 vivificant, animalibûsque, inspiratione hau-  
 sti, vitalem auram præstant; rationem  
 nullam video, cur non aquæ etiam pars  
 eorum aliqua insit, unde pisces vivant.  
 Tantula tamen ea est, ut non sufficiat, nec  
 salubris sit, nisi perpetim à superiore aere  
 suppleatur, ac ventiletur. Ideoque in an-  
 gustioribus vivariis, si pisces sæpe subsili-  
 ant, & summum petant; indicium est de-  
 bilitatis, quàm mors plerunque comita-  
 tur. Hinc etiam fit, ut, si aqua glacie

circumundique operiatur, pisces moriantur. Ac propterea in frigidis regionibus, effractâ glacie, spiracula quædam aperta servant : ad quæ pisces agmine factò adnatant, aeris novi appetentes ; quos simul adplantes anates prædantur. Branchiis autem hoc commodi hauriunt, dum arteriis nihil moliantur.

S E G T: VI.

Nihil hîc dignum tam serio prosphone-mate. Ratio enim *Harvæi* (si quicquam intelligo) est firmissima. Quippe ait : Si per cutis & carnis poros aeri & fuliginibus pateant transitus ; quidni spiritus quoque, illis multò subtiliores, per eosdem avolant ? Respondes autem, *Spiritus à Natura retineri ; utpote qui summæ utilitatis sint, & quorum causâ cor ipsum fabricatum.* Subtile equidem commentum, & Coræbo dignum ! Docuisses autem vellem, quâ echeneide spiritus, aliàs quoquoversum avolaturi, sistantur. Naturæ namque id muneris adscribere, à subtilitate nimis remotum est. Probè certè nobis à Natura consultum foret ; si in summis inediis, animique deliquiis, spiritus retineri possent, quorum potissimum causâ (ut alibi dicitur) victum sumimus. Quid enim, obsecro,

cro, perpetua illa caloris effluvia sunt, nisi spiritus in corde geniti? Exemplum à te allatum minùs appositum est. Planè enim constat, unà cum pravis humoribus ipsum quoque chylum rejici, si simul in ventriculo morentur. At dices, opinor, spiritus simul cum aere & fuliginibus contineri in arteriis. Præterea ventriculus à bile, aliisque acribus humoribus ad vomitionem irritatur: at verò arterias ab aere & fuliginibus similiter vellicari, haudquaquam dixeris.

## S E C T. VII.

*Non currit ( fateor ) quatuor pedibus ; neque enim bruta est similitudo. Attamen non malè quadrare eandem, fateberis ; si, quæ suprà ab Harvæo dicta sunt, memoriâ recollegeris. Arteria, inquis, vulnere læsa, & sanguinem ruentem pleno ore effundens, aerem attrahere nequit ; quia intus existens prohibet extraneum. Atqui arteriæ sanguine semper repletæ sunt : idèoque nullus locus recipiendo aeri reliquus est. Aut si fuerit ; quidni is, ait Harvæus, per flatum aut sibilum egreditur ; ita saltem, ut manus, objecta vulnere, præsentis aeris indicium ferat ? Idque præcipuè statim ab inflicto vulnere ; cum omnia*

alias in arteriis ex Naturæ lege fese habent. Et licet juxta ipsum vulnus, ob proruentis sanguinis impetum, aer ingredi nequeat : num propterea in reliquo etiam arteriarum tractu is ingressu prohibebitur ? Qui si uspiam admissus fuerit, certè facilius per apertum foramen emigrabit, quàm per cæcos arteriarum & cutis meatus. Præsertim, cùm aer (ex tuo decreto) longius interdum iter emetiatur ; & è matris arteriis in embryonis congenere vasa transvolet. Exemplum *Democriti* prorsus jejuna est : nec video, quid ad rem præsentem faciat.

#### S E C T. VIII.

Etiam si tota arteria non sit vacua, oportet tamen aliquam ejus partem non impleri, ut aeri recipiendo idonea sit. Et quâ (precor) vi, præterquam inspiratione & expiratione, sive diastole & systole, arteriæ aerem hauriunt, & expellunt ?

#### S E C T. IX.

Arteriæ (ait *Harvæus* appositissimè) in eum finem a Natura constructæ sunt, ut spiritum vitalem, sive cordis calorem, quo cuncta in animali vigent, vegetantur, florent,

rent, per universum corpus diducant. Quorsum igitur aeris frigidi accessus; quo calor ille, tantopere ad vitam necessarius, retundatur? Argumentum ejus frigide admodum diluis: nempe id fieri, *ne spiritus vitales à motu, & igneo cordis calore nimis ferveant*. Itane verò in frigidis etiam & pituitosis constitutionibus, in quibus calor iste naturalis propemodum extinguitur? Námque in his etiam perpetua diastole & systole. At fortassis spiritus isti tui, *Demophonti* (mensis Præfecto *Alexandri*) similes fuerint, qui ad umbram incalcescebat, in apricis locis rigeat plurimum. Aut quidni potius, (pro egregia Naturæ providentia) in calidioribus animalibus, cor languidiùs & rariùs pulsatur, ut non opus sit accersitâ hac aeris ventilatione? Et quid, obsecro, illud est, *Spiritus à calore cordis fervere*? Credebam equidem (& de hac re postea dicetur amplius) spiritus vitales, & calorem cordis, unam eandemque rem esse. Quomodo igitur calor à motu fervet? Forsitan eâ ratione, quâ febrem vulgò ineptè definiunt, *esse calorem in corde accensum*. Quomodo autem motus caloris causa dici possit, jam antea ostendimus. Quod de infuso temperato calido ais; ego, ut liberè dicam quod sentio, quòdque opinor, res est;

Diogenes La-  
ertius in vita  
Pyrrhonis.

est ; nullum actu calorem in animali agnosco, qui non à vitæ fonte, sive ejusdem corde promanet, perpetimque in motu existat.

### S E C T. X.

At verò sanguis, calore vitali destitutus, nutrire desinet. Quamobrem hujus cura habenda erat ; nec debuit ab ingruente frigore obtundi.

### S E C T. XI.

Quæ hîc narras, ad *γενώδεις μύθους* aniles fabulas releganda censeo. Leve enim incommodum graviore alio amolendum putâsti. Non videbatur verisimile, spiritus è corde, & aerem forinsecus, eadem arteriæ diastole attrahi posse. Tu tamen his superaddis sanguinem à *splene*, & aliunde, contrario itinere eodem tempore repedantem.

Quomodo systole spiritus, per diastolen acceptos, porrò protrudat, fateor equidem me non intelligere. Arteria namque successivè non clauditur, sed integra simul. Vel, ut veriùs dicam, arteria in systole nequâquam coarctatur ; sed motus duntaxat tremulus, à sanguinis è corde in  
eam

eam illifione excitatus, tantisper cessat. Pulsus enim arteriarum, non est causa pro-  
trusionis sanguinis; sed à sanguinis in ar-  
teriam illifu ipse pulsus constat. Ideoque  
fabulosum, aut nugatorium arbitror, quod

*Alexander Rhodiensis* narrat, *Medicos sci-* La Mothe le  
*licet in Cochinchina pulsus omnes trifariam* Vayer. tom. 2.  
*dividere*: quorum pars prior caput respi- pag. 815. ibid.  
p. 816.

ciat, altera stomachum, tertiâque ventrem  
ipsum: atque ob eam rem, admotis tribus  
digitis, solere eos *pulsum omnem explorare*.  
*Herrera*, etiam ait, *Medicos Chinenses* ex-  
cretorum naturam parum attendere; pul-  
sum verò discrimina diligenter scrutari;  
quorum septuaginta agitationes diversas  
agnoscant.

Nugatur profectò (ut sæpe solet) *For-* Ac qto quas.  
*tunius Licetus*, ubi ait: *Pulsus arteriarum* per Epist. c.  
*potissimum fit* (ut ait *Aristoteles*) *propter* 15. pag. 62.  
*calorem vegetiorem, attenuantem sanguinis* de respirat.  
*materiam in substantiam vaporosam*; c. 15.  
*Et hu-*  
*jus attenuatæ continuam deinceps evapora-*  
*tionem*: quia statim, genitus vapor disten-  
dit arterias: eoque mox dissoluto, illæ con-  
cidunt in sese. Qui calor ut longè major est  
in arterioso sanguine, quàm in venoso; prop-  
terea pulsant evidenter arteriæ, venæ au-  
tem obscurissimè, & ferè insensibiliter.  
Verbo dicam. Non existimo, pulsus esse  
elationes & collapsiones arteriæ; sed ictus  
solum,

solum, sive incurfiones sanguinis in aortæ orificium, ejusdémque interpositas qui-  
etes.

### S E C T. XII. & XIII.

Bellatula hæc tua distinctio quantum ponderis habeat, jam suprà vidimus.

### S E C T. XIV.

*Implicat* quidem (ut ais) aliquid in parte aliqua progigni, aut attrahi, & ibidem non esse. At verò quæ neutiquam gignuntur, ut fûligines; aut attrahuntur, ut aer; eadem quoque nec expelli posse, certissimum est. Et licèt oculus præsentiam aeris attestari nequeat, tactus tamen posset; uti suprà innotuit.

### S E C T. XV.

Laudo animi tui generosam indolem, quod *ne maximorum quidem virorum nudis auctoritatibus standum putes*. Nervi enim sunt sapientiæ, nihil cuipiam temerè credere. Quamobrem nec *Harvæus* à te culpari debuit, quòd neglectâ Veterum sententiâ, dogmata sua assertum iverit. Tecum quidem hac in re sentio, sanguinem  
haud



haud confimilem prorsus in venis & arteriis contineri ; licet rationes à te allatas minùs probem. Videtur enim mihi sanguis arteriosus esse paulò serosior, quòd ille aliquantillum sui olei ( ita loqui libet ) in corde absumpserit. Aerem tamen & fuligines quod attinet, uterque sanguis ( quicquid tu dixeris ) perinde habet ; quod *Harvæum* etiam voluisse arbitror.

### S E C T. XVI.

Putida hæc commenta sunt ; quemadmodum alibi uberius constabit.

### S E C T. XVII.

Cogitanti mihi naturam indolémve sanguinis, ejusdémque ex lacteo chylo originem ; arbitratus sum antehac, illum ( ad hujus modum ) leni calore facile effervesce, atque è vase proflire foras : eámque causam esse transitûs sanguinis è corde in aortam. Re autem postea accuratiùs perpensâ, vidénsque sanguinem ( in vivacibus animalibus ) exempto etiam corde, hujus contractione levissimo negotio propelli : jactabar primùm incertus judicii ; tandem mutavi sententiam, validisque *Harvæi* argumentis convictus, in illius  
castra

castra concessi, judicióque ejus libenter sum suffragatus. Tibi verò omnia concinna videntur, quæcunque præconceptæ semel opinioni congruunt. Sed lustremus animo argumenta, quibus tam fidenter inniteris. Ita est, ais, 1. Quia *Herophilus, Aristoteles, & Galenus* id affirmant. Attamen ipsemet modò, maximis viris absque demonstratione, nequaquam credendum, asseruisti. *Non, quia ajunt, inquires, sed quia docent.* Tuum igitur erat, argumenta eorum producere. 2. Quia *sensus id sentit, si unâ manu ipsius cordis pulsus, alterâ arteriæ in carpo motum attendas.* Scilicet tam hebes es, ut *diastolen* cordis pro *systole* ejus acceperis: ab hac enim procedit pulsatio illa, quam in latere per-sentiscimus. 3. Quia *id ratio dictat: nec fieri potest, ut corpus continuum* (quod tamen proximis verbis negas, licet falso, ut aliàs videbimus) *diversis motibus cieatur.* At quidni, obsecro, si successivè atque alternatim motus ille instituat? Hoc enim pacto, dum cor se contrahit, sanguinem in aortam exprimit; unde hæc aliquantillam dilatatur, quia impletur: neque *systole* & *diastole* cordis simul fiunt, sed vicissim. Tibi autem, adversante licet veritate, secus videtur; quia nempe *aliter sanguinis è splene in cor ingressus,*  
spi-

spirituúmque inde *egressus* simul constare non poterant.

Ut verò manifestiùs appareat, quid de toto hoc negotio sentiendum putem; existimo, cor triplici motûs genere gaudere: nimirum adest *diastole*, quâ cor à sanguine ex auricula sinistra in ventriculûm cognominem depluente distenditur; eâque plenitudine idem ad contractionem sui sollicitatur: mox itaque subsequitur *sy-stole*, quâ cor sese constringit, sanguinémque in ipso contentum expellit: (atque *Herophilus* verè censuit, in hac consistere actionem cordis principalem: *diastolen* verò esse cessationem, *reditûmve* cordis in propriam figuram: ac propterea à *Galen* <sup>4. De caus. pu. I.</sup> abs re redarguitur,) dein *relaxatio* con-tingit, contractioni illi contraria, quâ cordis fibræ motui dicatæ remittuntur: Sûntque posteriores hi motus in ipsa cordis substantiâ, quemadmodum & in aliis omnibus musculis. Interim autem dexter ventriculus ad eandem choream tripudiat. Et cum cor, ante adnatum parenchyma, duntaxat *vesicula* existens, ab effervescente intus (ob fœtum) humore, facilimè ad motum concitaretur: postea etiam, accedente carneo involucre, eundem nullo negotio perpetuat. Ut adeò nihil opus sit, *facultatem* nescio quam

quam *pulsificam* in hanc scenam advocare.

Debile itaque nimis hoc à te allatum fundamentum est ; & validioribus arietibus erat opus, ad circulationis *Anglicam turrin* ( ut ineptè appellas ) demolendam ; quam nunquam ( scio ) evertes ; imò nec quatiens quidem ; licèt, iracundior *Adrià*, è sinu Veneto meliore cum exercitu adveneris.

### S E C T. XVIII.

Asperæ etiamnum restant salebræ in scrupulo hoc itinere : lapides enim loqueris. Sunt certè tenebrosa adeò , ut non intricatiùs quicquam ab *Heraclito* narratum putem ; cujus commentationes ad *natorum Delium* remittebat *Socrates*.

*Arterias sanguinem non excipere , sed eundem suâ sponte propriâque vi attrahere, ex oculata fide testaris ; téque id ipsum ex pulli in ovo fabricâ deprehendisse, ais. Audiamus verò singulare tuum acumen. In ovo, inquis, priusquam cordis parenchyma procreatur, arterias moveri cernimus. Est quidem id verissimum : perge porrò dicere. Ergo arteriæ sponte attrahunt ; quia cor, sanguinem expulsurum, nullum adest. Quid audio ? Vivitne pullus sine corde ?*

corde ? Quid igitur est *vesicula* illa secundo ab incubatione die palpitans ? Quin tutemet ipse, hoc eodem loco, *spermaticorum cordis staminum meministi*. Vis autem, motum cordis tunc temporis non procedere à *parenchymate*, in quo facultas motrix (ceu *intelligentia* in propria sphaera) infideat. Quod nos etiam fatemur libentissimè : quî enim possit, cùm nullum adhucdum sit genitum ?

Experimentum *Galenî* quod attinet, quo arteriam super calamum innodare jubet : fateor equidem non invitus, ejusmodi *ἐγχεῖσιν* haud difficulter institui posse : attamen quid inde rebus tuis accedet commodi ? Sanguis quidem calamum tranabit ; ipsa verò arteria ultra visculum non pulsabit ; quòd eâ constrictione motûs continuïtas præcidatur. Nimirum tenebras Cimmerias eclipsi Solis illustratum ibas.

---

E

DIGRES.

## DIGRESSIO. II.

*De Attractione.*

Exercit. 25.  
N. 1.

**Q**UOD Scaliger de coloribus, idem ego de motuum genere æquè verè dixerim: *Esse nempe horum causas tam controversas, atque obscuras intellectui; quàm sunt ipsi visui manifesti.* Illa autem motûs species præ cæteris cognitu difficilis est, quæ in abditis corporis partibus fit, & cujus causa efficiens ignoratur. Enimvero ut de re præsentî solùm agam, unanimiter ferè omnes (tantum valet inveterata opinio) motum, quo chylus ad hepar (utî arbitrantur) sanguis ad cor, indèq; ad arterias transfertur, *attractioni* nescio cui acceptum referunt: humoresq; *attrahi* aiunt; cùm tamen, si res pensiculatè examine-  
tur, propulsioni potius adscribi debeat. Est siquidem verissimum, *nihil trahi, nisi tractum trahenti adalligatum sit.* Ideoque magnopere miror, Joann. Baptistam à Lamzweerde asseruisse, *Non ideo naviculæ motum nuncupari attractionem, quia per funem alligatur equo trahenti; sed quia navis ista*

Respirat.  
Swammer.  
expir. c. 5.

*ista transfertur ad equum, è quo vis navem dimovendi est egressa. Adeoque restis tantum inservit huic motui per modum medii, per quod virtus ista locomotiva, vel motus impressus navì communicetur. Ohe Crasse, atque Heraclite ridete! Dixisset vellem, quibus machinis vis illa ad navem protrudatur; quibusque harpagonibus eandem ad equum deducat.*

Age igitur diversos *attractionis* modos expendamus. Atque hîc (ut id obiter dicam) *Pecquetus* occatum à me arvum sevit, manifestique plagii reus, suppresso meo nomine, iisdem ferè mecum argumentis usus est. Neque id mirandum magnopere; cùm etiam *Bartholomæo Eusta-* *De Vena sine*  
*chio* inventi primùm *ductus thoracici* debi- *pate.*  
tam laudem manticulatus sit.

Res vulgò *attrahi* dicitur, vel, *ob fugam vacui*; vel, *ob dolorem*; vel, *ob calorem*; vel, *ob familiaritatem substantiæ*; vel, denique, à *facultate*, sive à vi insitâ partis, ad quam accedit. At verò nullo horum modo fiunt *attractiones*.

1. Nullus motus fit *ob fugam vacui*: siquidem non entis nulla est operatio. Quod enim non est, non potest agere; cùm ætus secundus (ut dicitur) præsupponat primum. At enim motus ejusmodi fit, ne vacuum contingat, à quo Natura tanto-

In librum de  
plantis, l. 2.  
pag. 104.

1. Metaph.  
f. 2. c. 2.

pere abhorret. Ita Scaliger: *Aqua non levat aerem in locum suum; esset enim motus aeris per accidens ab externa causa. Neque si deficiat aquæ moles universa, ejus in locum sese demittat aer; nisi, ut ne detur vacuum.* Imò verò id contingeret, ob corporum, à telluris vi magneticâ, connexionem: quâ fit, ut, pro ponderis ratione, ad centrum ejus proximè accedant. Dico enim, à vera philosophia alienum esse, finalem causam pro efficiente constituere. Et quo, precor, internuncio, aqua, sursum means, fugientis aeris persentiscit abitum? quòve sensu intelligit, vacuum rebus accessurum, nisi ipsa, relictis propriis laribus, in aeris recedentis locum ascendat? *Aristoteles Anaxagoram deridet, quòd mente, tanquam machinâ, utatur ad mundi generationem, eâque in dubiis causis assignandis advocet.* Quidni autem potiùs levis aer non ascendat; ne vacuum contingat; quàm gravis aqua sursum meet, ut hoc idem prævertat? Reverà elenchus est non causæ pro causa. Nam quod illi sponte suâ moveri arbitrantur, procul omni dubio ab aliquo in locum, futurum aliàs vacuum, propellitur. Exemplo sit aqua e puteo antliæ molimineeducta; vel suctu per tubulum sublatâ; vel etiam (nam eòdem hæc recidunt) aqua



qua in vitris illis diariis ( quibus tempestatum vicissitudines notantur ) cum frigore ascendens. Atque ut de posteriore solum exemplo, nunc passim obvio, loquar ; clare hinc prædicta veritas elucescit. Cuilibet notum est, aerem, in vitri hujus sphæra à radiis solaribus, alióve calore dilatatum, atque ampliorem jam locum occupantem, deprimere subjectam aquam in ollam, eo fine in machinæ illius fundo collocatam : idque magis minúsve, pro caloris intensiōe, aut remissione. Sin autem frigidior aura successerit ; subitò aqua vitri sphæram adit propius, ipsamque aliquando ingreditur. Hujus rei causam vulgò *vacui fugam* esse aiunt ; ( recedente enim calore, aer denuo constringitur ) quam ego externo aeri, aquam è dicta olla in vitrum adigenti, fidenter attribuo.

*Deusingius* hic nobis adversatur, animò- De vacuo & attractione, pag 73. que gladiatorio in arenam descendens, sic aggreditur : *Sicut in antlia exugit aquam exsurgens embolus, & decidens retundit ;* ( hoc certè non fit, quia cedit aquæ per aperturam ejus ascendenti ) *ita cor diastoles hiatu ( nempe factâ cordis, per fermentativum, adeoque expansivum sanguinis in ventriculis ejusdem motum, dilatatione ) sanguinem alióve humores attrahendo exorbet, quem in pressura systoles cogit facessere.*

fallitur autem egregiè Vir celebris ; concesso enim rebus vicinis ac mobilibus spatium nullo corpore impleto, eadem à proximis aliis arctè connexis, pressisque, in liberius spatium protruduntur.

Fig. 80.

Addit postea : Si tantà vi comprimitur terraqueus orbis ab incumbente aere : utique cum aeris intra tubum supra aquam existentis pondus atque elater nequaquam æquipolleat ponderi & elateri aeris ambientis vastissimi ; nec aer perpendiculariter immittens tubo superius obturato, pondere & elatere aeri contento succurrat ; adigetur aqua vi compressionis, ab externo aere factæ, sursum in tubum ; ipsæque contentus in tubo aer, vi ejusdem compressionis, condensabitur in sese, atque in spatium angustius ad tubi supremam compingetur. Quod cum certissimum sit non ita evenire ; apparet, non comprimi terraqueum orbem ab incumbente illi aereâ mole. Non advertit autem, pressuram illam præcipuè perpendiculariter fieri ; adeoque cylindraceam illam aeris molem à vitri summitate clausâ sustineri. Premitur tamen, fateor, aer in tubo carceratus à vicina aqua nonnihil ; adeoque parum, præter solitum, coarctatur ; quemadmodum omni vitro supernè clauso contingit, si idem orificio aperto aquæ imprimatur. Ideoque malè infert, *Contra Staticæ leges esse,*

esse, unum idémque corpus, v. gr. aërem am- Pag. 259.  
bientem, diversis ponderibus, nempe aquæ,  
in tubis amplitudine differentibus, ad ean-  
dem altitudinem evectæ, æquiponderare.  
Quasi verò cylindri aeris non varient ad  
proportionem tuborum.

Alibi autem, *Liceat mihi*, inquit, *potiore*  
*jure querere vicissim, qui fiat, quòd per tu-*  
*tum retortum* (quo ex vase aqua vel vinum  
educitur) *cujus nempe alterum brachium*  
*altero sit longius, effluente aquâ per longius*  
*brachium, per alterum aqua è vase sequa-*  
*tur, sursumque ad curvaturam feratur, ac*  
*porrò in brachium declivè succedat; donec*  
*aqua contenta in brachio utroque ad æquili-*  
*brium pertingat? Hunc utique motum, ait,*  
*non posse ad pulsionem referri, sed esse om-*  
*nino tractioni ascribendum.* At verò dis-  
par prorsus est ratio: illic enim causa fina-  
lis assignatur pro efficiente; hîc autem ef-  
ficiens manifestè adest: idémque fit, quod  
in balance usu venit, ubi gravius pondus  
aliud levius sursum tollit. Enimvero nisi  
siphonis illius alterum brachium (per  
quod liquor excurrit) alterò nonnihil lon-  
gius fuerit, frustra operam luseris. Atque  
etiâmsi tubus, per quem liquor ascendit,  
altero, per quem idem delabitur, amplior  
sit, adeoque plus humoris in se contineat:  
id tamen ad ponderis momentum nihil

facit ; siquidem liquor primum tubum transmeans, haud majore filo sursum scandit, quàm quo idem per alterum orificium elabitur.

Ait porrò, *absurdum esse, corpus, ipsâmet aquâ levius, terraqueum orbem suo pondere comprimere.* Cum tamen omnibus constet, lignum, aquâ levius, huic in vasculo inclusæ impositum, eandem sursum ad circumposita latera propellere.

Ridiculum fortasse videbitur, quòd ego, graviolem aquam, in thermometro conclusam, ab aere leviole sursum pelli asseram. Verùm rem ipsam penitus intuenti, rationi (credo) videbitur prorsus consentaneum. Fatentur enim, aquam, in vitri tubo conclusam, ab aere in ejusdem sphæra calefacto deprimi. Aut si minùs fateantur, calentem manum vitri hujus summitati imponant, & delabentis aquæ veriolem causam afferant. Quæro itaque ; si aer in vitro à calore dilatatus substratam aquam detrudere potest ; quidni similiter, imò potiole jure, aeris extranei amplior moles eandem aquam in subdita olla undiquaque premens, illam iterum (recedente calore, qui aerem in vitro priùs dilatabat) in dictum tubulum intrudere & propellere possit ? Quantus sit commoti aeris impetus, turbines illi testantur, qui  
altè

altè radicata arbores, imò turres firmissimas interdum prosternunt. At, inquires, etiamsi aer hoc pacto aliquando obliquè sæviat, nulla tamen ejus naturaliter in inferiora vis est ; cùm aer ipse levis sit, & suâ sponte sursum tendat. Suâ sponte ? nunquam. Gravitatis enim & levitatis non sunt entia absoluta, sed in relatione ad aliud, cujus respectu res quælibet gravis aut levis dicitur. In spatio vacuo ( quicquid alii arbitrentur ) si corpus aliquod locaretur, suâ sponte nulloversum moveretur, sed perpetuò quiesceret ; quoniam nullum hîc adesset propellens ; aut motum semel inceptum semper continuaret. Quippe axioma verissimum : *Quicquid ullo modo est, id ita semper est, nisi desinat sic esse ab alio.* Neque minùs verum istuc : *Unaquælibet res tantundem à se removet, quantum ipsa pendit.* Exempli gratiâ, Cavitas illa, quam navis, ( aquæ innatans ) efficit, si aquâ adimpleretur ; navis, resque in ea simul omnes, cum aqua istac æquilibres, ejusdémve ponderis essent ; *ισορρομίαν* Plato dixit. En, tribus verbis, motûs inanimatorum veram causam. Res levior à graviore suspellitur : & quicquid materiâ gaudet, ad centrum fertur. Hinc ovum dulcem aquam subit, falsæ innatat : similiter, oneratæ naves plus superextant in mari, quàm

*Physiol. l. 2.  
sub finem.*

*Specim. Phil.  
los. Cartes.  
part. 3. c. 4.*

quàm in fluminibus. Quamobrem miror, *Guilielmo Gilberto*, præclaro sanè Philosopho, hoc excidisse: *Glacies innatat aquæ (quæ tamen gravior & densior est aquâ) propter aeris majore quantitate, quàm in aqua, mixtionem.* Ejusdem quoque erroris postulandus *Daniel Lipstorp*ius, ubi ait: *Densorem esse glaciem, sive aquam concretam, aquâ fluidâ, clarissimè arguunt gravissimæ moles ei imponi solitæ sine ulla ejus particularum scissura; quòd certè indicium satîs manifestum præbet ejus densitatis, (imò cohærentiæ potiùs.) Densa enim dicuntur corpora omnia, quæ dura sunt, & particulis suis per quietem firmiùs adhærent, ita ut manibus nostris versùs eas motis non facîle disjungi possint. (Ejus itaque arbitrato, pumex valdè densus erit.) Cur autem glacies supernatet, in confesso est, fieri, ob aerem in prima ejus generatione in ea concretum (uti ex ampullis in ea conspicuis liquet) qui profectò aer levitate suâ obnititur descensui, eumque remoratur & impedit. Probè, scilicet, congruunt, rem aliquam aere abundare, & nihilominus densitate insigni pollere!*

*De accessu &  
recessu maris,  
c. 22.*

Haud minùs ineptè *Joannes Dorisius* quærit, Cur, si quispiam in mari, aut majoribus fluviiis æstum recipientibus natâre velit, nullum ferme periculum subeat eo tempore,

*tempore, quo durat fluxus : è contrario autem maximo discrimini expositus sit refluyente Oceano : nempe, ne in maris abyssum abripiatur. Respondet verò, ejus rei rationem esse ; quòd, durante fluxu, non modò animalium corpora, vi majoris extensionis, quam tunc aquæ marinæ acquirunt, sublevantur ; sed etiam mortuorum cadavera, & alia graviora pondera. Verùm falsa est res pariter, & ratio. Nam neque aqua, fluente Oceano, rarior est ; nec, si esset maximè, id innatationi quicquam conduceret, sed potiùs obstaret.*

*Gassendus, causam indagens, cur animal* Tom. 1. sect. 1. l. 6. c. 5. pag. 392.  
*aquâ suffocatum petat primò fundum, ac aliquanto post tempore ex eo emergat, ac supernatet : putat præ cæteris, causam esse posse, resolutionem salis, qui in corpore animalis est ; quique, dum adest, reddit ejus corpus aquâ ponderosius. Atenim parum falsi fixi in animali reperitur ; & alterius vix quicquam dissolvitur.*

*Pulmonum (ait Bartholinus) porositati* De Pulmon. sect. 2. p. 26.  
*& levitati imputant quidam causam, cur suffocati in aquis post tres dies iterum emergant, natentque : unde pulmones eximere solent pyratæ, ne submersa cadavera fundum linquant. Solertia ea certè mihi inaudita est ; neque, si instituat, quicquam ad hanc rem profuturam arbitror.*

*Pec-*

*Dissert. Anat.*  
*pag. 130.*

*Pecquetus* haud meliore judicio aliam viam ingreditur. *Anxiâ diu curâ*, ait, *causam inquisivi, cur immersa demortuorum animalium corpora statim in fundum proruant, illicque aliquanto dierum abscondita spatio, postea demum revelata supernatent: hac ego conjecturâ conatus sum penetrare tantum naturæ mysterium. Audiamus igitur libenter hominis acumen. Necesse est, inquit, tot diebus submersum cadaver aliquid substantiæ, cujus sit in ipso gravitas aquâ ponderosior, amittere. At cum reliquis integerrimum persisteret, solius sanguinis ad effusionem idonea fluiditas (quam quidem in demortuorum venis etiamnum retinet) jacturæ suspicionem induxit. Et verò undis exhaustos ex fundo Urinatores ad littus, me præsentem, exposuerunt: narium emissario vidi, aut alias, si quâ vulneris hiatus, sanguinem profundere. Sic, ut facile concluderim, sanguinei ponderis, præ aqueo vel seroso, gravitate, sub undis cadaverum corpora retineri. Arbitratur itaque, milites, navali prælio pluribus acceptis vulneribus cæsos, statimque in mare projectos, haudquaquam submergi posse; tantillamque sanguinis jacturam totius corporis gravitati, adque subsidendum promptitudini præpollere. Æquè facile profectò pariat locusta lucam bovem. Quippe no-*

tum



tum est, jugulata boum oviúmque corpora, post eductum quantum queas sanguinem, in aquam projecta fundum petere.

Propiùs aliquantò veritati accessit Scalliger, ubi ait : *Quòd piscium recentia ca-* In libr. 2. de  
plant. p. 107.  
*davera quædam fluitent, id efficit aer, qui in illorum vacuis continetur. Sicut ζωλα cadavera terrestrium. Ea postquam sub aquis computruerunt, multo concepto aere de putredinis calore, sursum enatant. Existimat itaque, eadem ab aeris vi suspelli.*

Denique, vulgus apud nos, hujus rei causam somniat, vesiculæ felleæ sub aqua disruptionem. Sed neque causam aliquam comminisci queunt, ob quam vesicula illa subter aquam rumpatur; nec quamobrem, effractâ quoque illâ, corpora illa brevi pòst in lucem exiliant. Notúmque est, equum, atque alia animalia, vesiculâ hac carentia, non diu post demersionem, foras emergere.

Missis autem ambagibus, vera hujus rei causa est corporis intumescencia à succi nutritii fermentatione : qui motu solito privatus, stagnânsque, ebullit, corpúsque simul in tumorem attollit ; idque sæpe adeò, ut arcæ ferales inde rimas agant, faniémque nonnunquam profundant. Simili ferè ratione, quâ vesica compressa in aqua

L. 3. c. 1.

Tom. 2. pag.

543. col. 1. f.

Tom. 2. pag.

543. col. 1. f.

Lib. 16.

De sensu re-  
rum, pag. 34.

aqua subsidit ; flatu autem turgescens sup-  
ernatat. Atque ob hanc causam, teste  
*Plinio*, *anuli morientibus detrahebantur*.  
Nempe, quòd digiti post obitum intumes-  
cerent ; adeoque tunc adimi haud com-  
modè possent. Corpora autem animalium,  
ante obitum, cum aqua pari ferè pon-  
dere constant. *Notus est mihi*, inquit  
*Gassendus*, *è Melitensi equitatu nobilis Vir*,  
*qui præligatis etiam manibus pedibusque*,  
*aquæ superexstet, & demergi nequeat*. Ore  
scilicet, naribusque præclusis. Idque ma-  
gis fit, si aqua ponderosior fuerit.

*Strabo* tradit, *lacui Agrigentino eam in-*  
*esse naturam, ut etiam nandi imperiti in eo*  
*mergi non possint ; quòd nempe liquidum bi-*  
*tumen in eodem lacu supernatet*. Idem quo-  
que in *Asphaltite lacu Judææ usu venit*, ut  
*ἀπόλυμποι* in eo fluitent, nec mergantur.

Ego tamen, ut id obiter dicam, for-  
tuitum arbitror, quod alii perpetuum  
volunt. Sic, *Campanella* ait : *Quod ab*  
*origine habemus, naturale est*. Idque e-  
tiam *cadaver humanum probat*, cùm aquis  
innatans, perpetuò in cælum faciem spectan-  
tem tenet ; & à tali positione deturbatum,  
ad eandem mox redit ; ut pluries expertus  
sum. Nempe occulto regitur sensu, cui ma-  
nifestus deesse videtur. Similiter *Solinus* :  
*Pudoris disciplinam etiam inter defuncta*  
*corpora*

*corpora Natura discrevit : ac si quando cadavera necatorum fluctibus evehuntur ; virorum supina , prona fluitant fœminarum.* Sin vera narrant ; id ossibus dorſi , ſcapularumque tribuendum cenſeo.

Redeo autem è diverticulo in viam. Certè res perardua eſt , ultimam in prædicto negotio cauſam aſſignare : quam propterea à me hîc fruſtra expectaveris. Id nunc ſolùm dicam : Aer centrum adiret , niſi aqua vel terra ( corpora nimirum graviora ) obſtarent. Similiter ignis in aere non aſcenderet , niſi hic ponderoſior illum ſuſpelleret ,

*Pondera , quantum in ſe eſt , cùm deorſum* Lucret. l. 2.  
*cuncta ferantur.*

*Nec cùm ſubſiliunt ignes ad teſta domorum ,  
Et celeri flammâ deguſtant tigna , tra-*  
*bésque ,*

*Sponte ſuâ facere id , ſine vi ſubigente ,  
putandum eſt.*

Ab hoc aeris pondere fit , ut folles , undique occluſi , etiam magnâ vi attolli atque aperiri nequeant. Quod tamen facilè contingeret , ſi modò ſubtilis ætheris materia denſiora quæque corpora facillimè tranſvolitaret ; ut *Carteſio* , *Deuſingio* , aliis-que pluribus viſum fuit.

At

*In Eratosthene  
Batavo.*

At enim nobis aer valde mobilis, & levissimus apparet. Similiter & aqua piscibus: cum tamen, ex computo *Snellii*, hujus pes cubicus sexaginta circiter libras pendat. Ideoque (ut ad propositum revertar) aquæ pars aliqua, si possit locum aliquem nullo aere occupatum ingredi; eadem illico ab extrinsecus incumbente aere in eundem adigitur. In thermometro prædicto itaque, recedentibus radiis solaribus, alióve quocunque calore, (vel, ut exquisitiùs loquar, cessante motu illo à radiis forinsecus impresso, aerisque partes intus ab invicem disjungente) spatium vacuum, quod inde exoriturum erat, nequit à relicto aere impleri; (nullum enim corpus plusculum distendi potest, nisi accedente simul novo corpore intermedio, aut relictis spatiis inanibus; quicquid aliqui velint in contrarium;) ac propterea aqua, in supposita olla, ab aere ambiente pressa, in locum sic relinquendum propellitur. Est autem fluxus ille facilis, ob partium connexum quasi & colligationem. Adque eandem hanc normam (ut arbitrator) motus omnes consimiles instituuntur.

Secundò, Neque *dolor*, propriâ vi, attractionis causa censendus est. Quibus enim nervis agat: aut quomodo in distans; quod

quod agenti naturali non convenit? Præ-  
 terea certum est, ingentes aliquando dō-  
 lores à flatibus, acribusque humoribus ex-  
 citari; sine ulla tamen fluxione ad labo-  
 rantem particulam. Ita si cui manus à ni-  
 ve, aut aliter, vehementer refrikerint; is-  
 que subito ad focum calidiorem accesserit:  
 dolor quidem oboritur acerrimus, eundem  
 tamen nulla fluxio comitatur. Verissi-  
 mum quidem est, doloribus à contusione,  
 inflammatione, aliave obstructione aliquā  
 obortis, humorum sæpe ingentem copiam  
 confluere. Sed istuc fit ob præpeditum  
 transitum; unde affluens humor obsessa  
 loca permeare nequit. Neque illuc tam  
 dolor *fluxionis*, quàm ipsa fluxio *doloris*  
 causa censi debet; dum pars ultra soli-  
 tum distenditur. Frivola itaque est sen-  
 tentia *Menjotii*: *Dolor, inquit, trahit ac-* Pag. 212.  
*cidentariò, dum vim partium dolentium*  
*tractricem acriter instigat ad spirituum pro*  
*ipsarum tutela convocationem; ac, propter*  
*immoderatum tractoriæ facultatis motum,*  
*non modo spiritus, sed succi etiam nocivi*  
*simul convolant: vel potius, dum Natura*  
*solicita de partium afflictarum salute, ha-*  
*rùmque virtutem expulsvam roborare in-*  
*tendens, effusè ac indefinenter (Herculis*  
*furentis instar) sine mensura & modo, sua*  
*præsidia, scilicet spiritus ad ipsas trans-*  
 F mittit:

mittit : unde sanguis ac reliqui humores, juxta spirituum sibi permixtorum motionem, ad eundem locum unà confluentes, subsidium Naturæ ex eventu damnosum reddunt. Cum enim Natura agat necessario, & quantum potest ; baud ritè semper functiones suas moderatur, ac prosperat : idèmq; ipsi contingit ac iis, qui per decùrvia descendentes, præcipitis motùs impetum sustinere nequeunt.

Appositè profectò magis ad hanc rem  
*In hist. an. l. Scaliger : Nimis ruditer, ait, Antiqui lo-*  
*10. c. 1. pag. cuti sunt, qui dolorem attrahere dixerunt.*  
*1193.*

Sed enim cum in locum, in quo dolor est, fluunt humores, propter imbecillitatem loci : neque enim sui juris ille locus est ; quare fluxum arcere non potest. Qui autem aliam adducunt causam ( quoniam, inquiunt, Natura eò loci suppetias mittere contendit ) vehementer errant. Si enim hoc novit Natura, illud noverit quoque, sese nihil profecturam, sed majorem in modum nocituram.

Similiter Gilbertus : *Ista non aliter à do-*  
*Physiol. l. 1. lore eveniunt, quàm cum in civitatis parte*  
*c. 35. aliqua tumultus excitatur. Populus, ut sup-*  
*petias ferat, in illam partem gregatim con-*  
*fluit ; interdum etiam tam festinanter &*  
*confusè, ut major inde perturbatio sequatur.*  
*Nemo philosophus hos prius tumultuantes,*  
*alteros accurrentes attrahere dixerit : quan-*  
*quam*

quam vulgus communi sermone sic dicat.  
 Eodémque modo dolor ex accidenti fluxio-  
 nes humorum facit. Alibique verè ait:  
*Attractio humoris à tritico* (à Galeno pro  
 argumento adducta, quòd triticum inde gra. Ib. cap. 25;  
 vius evadat) vana est, & nullius momenti.  
*Aqua enim, cum in vaporem agitur à circum-*  
*fuso tritico excipitur; vaporque ingrediens*  
*molis simul & ponderis incrementum facit.*

Et quoniam prudentiam partibus attri-  
 buunt, quidni potiùs pars mandans super-  
 fluos noxiòsque humores ad loca evacua-  
 tionis destinata propellit, quàm ad sociam  
 partem aliquam; quâ laborante, toti cor-  
 pori malè sit? Aut quæ mens parti ægræ;  
 ut, calore aut dolore vexata, copiosos hu-  
 mores attrahat, quibus prædicta sympto-  
 mata conduplicentur? Cur non summo co-  
 natu influentes humores repellit? & vicinæ  
 etiàm partes, laborantis misertæ, opitulatum  
 veniunt; humoresque, minùs illis nocitu-  
 ros, ad se traducunt? At enim hîc usu venit,  
 quod in *ὀλιγαρχία* contingit; ubi, qui plus  
 possunt, minùs potentes opprimunt!

Tertiò, Nec magis à calore fit attractio:  
 licèt Averroes (cui *δυσὶν* est Apponen-<sup>5. Collig. c. 18.</sup>  
 sis) generaliter omnem attractionem, quo-<sup>diff. 51.</sup>  
 cunque modo fiat, à calore fieri dixerit.

Quapropter mireris, Joan. Walæum, eti-<sup>Epist. 1. ad</sup>  
 amsi sanguinem fervidum è corde expelli<sup>Bartholinum.</sup>

intelligerāt ; censuisse tamen, eundem in omnes arterias trahi ; quo illæ, illisque vitæ partes nutriantur. Neque sapienter De caloris & magis Comenius, quærens, Unde fervor æstivus ante pluviam, nisi ab aeris, ad colligendas nubes, humores sursum trahentis, factu ? respondet, Quia nubes, in aquosam materiam sese colligentes, aerem ibi densant, & in artius cogunt ; necessario aliunde aer attrahitur ad explenda spatia, ne vacuum detur. Non potest autem aer attrahi e superioribus, ubi longè tenuior est, & purior : ergo ab inferioribus, ubi crassiora de sua densitate aliquid remittere, & universo contribuere possunt, debent, coguntur.

Anat. l. 3. c. 7. Varolius pariter existimat, renes solidâ substantiâ constare ; ut serum, quod alias faciliè elaberetur, commodè attraherent ; Calor enim, inquit, qui in denso corpore inhæret, longè fortius agit, quàm qui in raro.

Calor profectò non attrahit : sed potiùs aer, vel humores, ad loca à calore rarefacta faciliùs impelluntur. Ità ad caminum, aut fornacem, in qua ignis lucet, vapores ( si qui in cubiculo fuerint ) & aer confertim affluunt ; quòd à circumvicino aere in locum, caloris vi attenuatum, faciliè protrudantur. Quemadmodum



dum vinum è cado (facto alicubi spiraculo) rapidè exilit. Perinde enim se habet aer ad ignem, atque aqua ad aerem. Pari prorsus modo oleum pellitur ad lampadem, sebum ad ellychnium, sanguisque ad cor : uti clariùs suo loco, constabit.

Quartò, Censent, à familiaritatè & similitudine totius substantiæ humores atrahi. Ita *Galenus* recurrit ad qualitatis convenientiam : ut scilicet pulmo aerem trahat, non consequutione, quâ impediatur vacuum ; sed *familiaritate* ; eo modo, quo magnes ferrum pellicit. Sic Auctor libri de Anat. Vivorum, Vesiculam felleam calidam & siccam, pariter ac bilem, effinxit : ut bilis ad eam attractionem hac similitudinis imagine adumbraret. Atque ejusmodi attractionem medicamentorum purgantium, *Hippocrates* quoque & *Galenus* voluerunt.

Attamen (quod sine tantorum Virorum injuria dictum velim) sententia isthæc erroris manifesta est. Simile enim non potest agere in aliud sibi consimile, quâ tale : non magis certè, quam in se ipsum. Argutè profectò *Plempius* : *Videmus*, inquit, medicamenta aliqua, ex eorum opinione diversos humores trahentia, infra debitam dosin, quâ singulatim data non traherent, conjuncta debitè evacuare. Nescio autem quo

*modo hoc ritè explicari queat ; quì possit medicamentum unum juvare tractionem alterius, à quo distinctissimam habet vim ac potestatem.*

Et dicant, obsecro, si *rhabarbarum*, ob substantiæ similitudinem, bilem educit : quidni, vice versâ, tinctura bilis optimum menstruum putetur, ad vim purgatricem *rhabarbari* proliciendam ? Aut cur scammonium non attrahat *rhabarbarum*, cum in eadem illa substantiæ familiaritate conveniant ?

1. De purg.  
med. facult.  
cap. penult.

Mirum etiam, non reperiri catharticum, quod sanguinem æqualiter ac cæteros humores è corpore proturbet. *Galenus* quidem ait, *reperiri medicamenta à proprietate sanguinem trahentia*. Refertque historiam cujusdam *Herbarii*, qui plantam à proprietate sanguinem attrahentem cognoverat. Illud autem hodie ad *Pancirolli* Antiqua perditâ relegandum, scilicet !

Deinde, purgationem non fieri attractione aliquâ, epomphalia medicamenta luculenter docent ; quæ humores non trahunt versùs umbilicum, sed pellunt ad alvum.

2. Theorem.  
l. 1. de medicam.

*Joannes Mesues*, adinstar sepiæ, offusis tenebris, hujus rei rationem obumbrat. Ait enim, *Medicamentum esse purgatorium, non à temperamento, neque ut contrarium agit in contrarium, neque ut simile trahit alte*

*alterum ; sed quia talem cœlitus est sortitum facultatem à virtute cœlesti : quam vocat formam specificam, & occultam qualitatem.*

Revera autem purgatio fit ab irritati-  
one & vellicatione vasculorum, quâ hu-  
mores redundantes, corporique molestos  
expellunt. Adeoque purgatio dici meri-  
tò queat, *vasorum vomitus*. Quemadmo-  
dum enim digito vel plumulâ irritato œso-  
phagi orificio, ventriculus (eidem conti-  
nuus) evomit humores, quos intra se com-  
plectitur : ita similiter & vasa, à medica-  
mento irritata, humores fluxioni idoneos  
rejiciunt.

Errorem autem hunc inde promanasse  
arbitror, quòd colores excretorum humo-  
ribus attribuerint, cùm medicamentis de-  
buisent. Existimant enim, rhabbarbarum,  
aloen, & scammonium, purgare *bilem* :  
agaricum ( qui tamen pondus in hac re  
magis habet, quàm vim ) turpethum, co-  
locynthidem, carthamum, & mechoa-  
cannam, *pituitam* : cassiam, sennam, &  
elleborum nigrum, *melancholiam* ( quæ  
certè nusquam reperitur ; ) cùm tamen  
tincturæ illæ ab ipsis medicaminum  
coloribus proficiscantur. Quod vel hinc  
manifestè dignoscitur, quia eorundem  
medicamentorum *sales* ( qui tamen so-  
li purgant ) tincturas ejusmodi non pro-  
ducunt ;

*Meth. ad  
praxin, l. 1.*

*L. de aere, aq.  
& locis.*

*Tom. 3. pag.  
266.*

*Jo. Zechius  
de vat. curan-  
di in Urbe.*

ducunt ; sed serosos solum humores pro-  
liciunt. Ita deceptus doctissimus *Heur-*  
*nus*, ab indito in nares tabaco, magnam  
flavæ bilis copiam è capite sibi profluxisse  
arbitrabatur ; cum tamen fuerit ipsius ta-  
baci tinctura. Simili argutiola *Menjotius*  
ait : *Aquæ statariæ putrendo amarescunt ,*  
*herbeumque adipiscuntur colorem : ut, præ-*  
*ter experientiam, testatur Hippocrates, ob-*  
*servans, aquas palustres ac stabiles à sole*  
*aduri, ac biliosas reddi, hisque utentes fiti-*  
*culosos fieri.* Inconsultè scilicet equos ad  
stagna ejusmodi aquatum deducunt ! No-  
bis tamen id citra noxam fieri compertum  
est. *Paracelsus* quoque videtur huic fal-  
laciæ affinis, ubi invictum albæ lepræ ma-  
lum variis argenti liquoribus superandum  
autumat.

Par eorum hallucinatio, qui pro variis  
humoribus diversos ichores constituunt.  
Clarè hæc res liquet in *myrobalanis* ; quas,  
pro aliis atque aliis coloribus, varios etiam  
humores educere, aiunt. Ita *flavæ & che-*  
*bule*, licèt ( ex quorundam sententiâ ) idem  
fructus sint ; & hoc solum differant, quòd  
flavæ immaturæ colligantur : flavas tamen  
*bilem*, chebulas *pituitam*, nigras *melancho-*  
*liam* purgare asserunt. Simili ratione ai-  
unt, leporinam carnem succum melancho-  
licum gignere : quòd ea scilicet subnigres-  
cat,

cat, sitque animal meticulosum. Et Cato  
 (apud Plinium) somnos fieri, sumpto in ci- L. 28. c. 19.  
 bis lepore, arbitratur. Ego verò, quòd  
 canes insequentes fugiat, non *timiditatis*,  
 aut *melancholiæ* indicium censeo, sed *pru-*  
*dentiaæ*.

Neque etiam audiendus Galenus, ubi L. 5. de med.  
 meminit medicamentorum, quæ, innatâ fac. c. 24. &  
 quadam proprietate, peculiaria corporis de comp.  
 membra respiciant. Nec magis Regne- med. per gen.  
 rus de Graaf (solers aliàs Vir, & philoso- c. 1.  
 phiæ peritus) qui existimat, *diagrydium* De succo pan-  
*potissimum bilem educere è ductu biliario in-* creatico, pag.  
*testinali*: *jalappam autem succum pancrea-* 160.  
*ticum evacuare.* Quo enim *Evestro* (ut  
*Spagirico* vocabulo utar) id contingeret?  
 Numnam alicubi *Præses* quispiam rerum  
 potitur, qui singulis pro arbitrio imperia  
 injungat? dicâtque, ut olim in *Tragædia*;  
*Tu vise latas properè ripas Inachi: tu per-* Euripid.  
*ge Thebas, modò quas Cadmus condidit.*  
 Sic pariter hîc: tu ad *hepatis portas*: tu  
 verò ad *lienem*, vel *renes ambos* *prosciscere*.  
 Si autem spiritus hi internuncii dicto mi-  
 nùs obedièntes forent; hui, quot dere-  
 pentè turbellas in corpore excitarent?

Veriùs itaque *Erasistratus*, non deter- Galenus l. de  
 minatum à determinato; sed omnes pariter med. purg. c. 29.  
*humores ab omnibus medicamentis educi*  
*credidit.* Nimirum quicumque aut copiâ,  
 aut

Strobelbergerus de podagra dentium, pag. 63.

aut acredine Naturæ molesti fuerint, factâ semel irritatione, ac secretione, expelluntur. Ideoque inanis videtur *Joannis Heurnii, & Valesci de Taranta* scrupulositas: Si, inquiunt, *biliosus succus in dentem vel gingivas influit, tunc pilulæ aureæ, & electuarium è succo rosarum: sin autem frigida materia, sive pituita; tum pilulæ cochia* peroptimè conducunt.

Nec tamen semper perinde est, quodnam catharticum in quo morbo exhibeas. Alia siquidem aliis operosius purgant, magisque corpus turbant. Neque omnia omnibus æqualiter conveniunt: cum nonnulli ab aliquo (etiam miti) pharmaco manifestè offendantur. Quædam etiam, ob amaritudinem, ventriculi tonum roborant; & pituitæ detergendæ magis idonea sunt: alia lubricant magis, & leniunt, ut cassia (in calculo) quæ veluti olei vicem supplet. Sûntque etiam alia discrimina.

Ophthalmographia, l. 3. c. 17.

Mireris autem plurimùm illius attractionis vim, cujus *Plempius* meminit. *Narrabat, inquit, nobis Adrianus Spigelius, se quendam Empiricum cognovisse, qui, certâ aquâ oculis infusâ, duas trêsvæ sedes ægru suis procurabat. Percolabatur nempe aqua illa cathartica in palatum & os, indeque cum saliva in ventriculum deglutiebatur, at-*  
que

que ita tum purgationem ciebat. Sed non ego credulus illi.

Attractionis hujus errore deceptus *An- De malig. fe-  
gelutius insigniter nugatur. Sectio, inquit, br. l. 2. c. 3.*  
*Salvatellæ lienosis conducit. Cum enim san-  
guis, qui in salvatella continetur, crassior  
fit; crassior autem est, quia magis concoctus,  
& appositioni propinquior est, ut in venis  
capillaribus contingit; (id verò non fit,  
neque fieri debuit, ne inspissatus sanguis,  
summo cum periculo, capillares meatus  
oppellaret, transitumque adeò sanguini  
denegaret) illo fluere incipiente, pergit ex  
aliis quoque vasis crassior & frigidior san-  
guis effluere; quia simile omne suum simile  
facile sequitur. Scilicet ovium more, quæ  
caprum, gregis ducem, consectantur. Mi-  
rum hercle, lapide aut pisciculo è flumi-  
ne extracto, reliquos omnes haud con-  
festim subsequi. Neque multò melior est  
sententia *Plempii*, censentis, *dextras car- Ophthalmo-  
poris partes sinistris præpollere; quod dex- graphia, l. 4.  
tra membra sanguinem crassiores atque ube- c. 47.*  
riorem obtineant: quem *Galenus* docet vi-  
ribus augendis, roborandisque actionibus ap-  
parari.*

Nec minùs nugas agunt, ut id obiter  
dicam, qui dictas myrobalanos compri-  
mendo purgare, & intestina coarctando fæ-  
ces exprimere aiunt. In decocto enim ex-  
hibitæ,

hibitæ, quomodo, quæso, id efficiant, cum  
 sæcibus intermisceantur? Quid si cum  
 clystere injiciantur? num, ad modum ili-  
 aci morbi, sæces sursum per os protru-  
 dent? an potius ratione donabuntur, mu-  
 nerisque sui memores, furtim ascendentes,  
 sæces postea comprimendo valide deturba-  
 bunt? Similis est fabula *Claudini*, qui pu-  
 rat, *chalybem* adstringentem & siccantem fa-  
 cultate deobstruere. Expulsio certè (ut  
 dixi) non fit à medicamento, ut nonnul-  
 los voluisse video; sed à locis exprimen-  
 tibus. Quamobrem irrillu digna est sen-

*Append. ad  
 ingres. f. 2.*

*Tract. de me-  
 dicam. purg.  
 c. 15.*

tentia *Fallopri*, dicentis: *Facultas expul-  
 trix non ipsa est, quæ expellit; sed humor  
 est ille, qui fugit ipsam facultatem, tan-  
 quam hostem. Quare talis excretio non est  
 propriè vocanda expulsiva: quia fit, ac si  
 aliquis iret domum, & reperiret hostem in-  
 ermum, & stricto ense irrueret in ipsum, &  
 hostis aufugeret. Tunc diceretur utique; do-  
 minum domo expulisse hostem: cum tamen  
 non propriè ipsum expulerit; sed hostis fue-  
 rit, qui aufugerit. Talis quoque est actio  
 facultatis expultricis: quia pars ipsa cale-  
 fit, & colliguntur in ipsa spiritus; quibus  
 collectis, forma fit valida, & facultas ro-  
 busta ac vicens: quem vigorem sentiens in-  
 stinctu Naturæ, ipsum excrementum, aufugit,  
 ac si vidisset armatam hostem, & sic excer-  
 nitur.*



*nitur.* Hem, pro thesauro carbones ! Evenit nimirum, quod dici solet, *ὡς καὶ πῦρ εἰς τὸ πῦρ.*

Ad eundem hunc censum reducitur tractio paleæ ad succinum ; argenti vivi ad aurum ; & ferri ad magnetem. Atque ut de posteriore duntaxat verbum addam, (amplior enim horum disquisitio hujus loci non est) *Causa*, inquit, *Cardanus*, *cur* L. 7. de subtil. pag. 380. *ferrum magnes attrahat ; est, quia vivit, ferroque ut alimento utitur.* Mirum, nisi scobem ferri à magnete absumptam viderit. Hujus autem rei argumentum ait, *quia optimè in scobe ferri servatur magnes.* Obtusum sanè telum ! pari enim jure concluderit, camphoram lini semine nutrir, quia in illo ab aeris injuriâ vindicatur. *Scaliger* quidem negat, ferrum ad magnetem attrahi : causam tamen motus hujus Exercit. 102. n. 6. veram non explicuit. *Gilbertus* autem Physiolog. l. 1. c. 35. rectè ait, *attractionem ferri ad magnetem* improprie & vulgariter dici : nec minùs magnetem ad ferrum, quàm ferrum ad magnetem accurrere. Cujus rei modum si scire volupe est, adi *Lucretium*, summum Lib. 6. Philosophum pariter ac Poetam : inde tibi in tantis tenebris aliquid forsitan lucis affulgebit. Verisimilis enim videtur *Platonis* In Timæo. sententia, magnetem non per *attractionem*, sed *circumpulsionem* agere.

DIGRES.

## DIGRESSIO. III.

*De fluxu & refluxu maris.*

**P**RÆ cæteris autem litem fortassis in hac re movebit *motus maris*; cujus undas à *Lunæ radiis trahi*, ac circumduci arbitrantur. Quod tamen vel eo nomine falsi arguitur, quia in paludibus, stagnis, mari *Hircano* sive *Caspio* ( quod nihil habet cum Oceano commercii ) atque aliquatenus *Atlantico*, *Balticóque*, æstus statis auctibus diminutionibúsque non recipiuntur; quibus tamen, non minùs quàm Oceano, Luna influit. *Plinius* hujus discriminis causam haud veram exhibet: *Lacus & amnes* (ait) *haud similiter moventur*: sive, quia totum in universitate animosius est, quàm in parte; sive quia magnitudo aperta vim syderis laxè grassantis efficacius sentit, eandem angustius arcentibus.

L. 2. c. 97.

Profectò super hac re multùm litigant quidam Recentiorum: neque omnibus unum est,

Petronius.

*Quod placet; hic spinas colligit, ille rosas.*

Lubet

Lubet itaque, quia te hujusmodi subtilitatibus delectari video, post recensitas aliorum aliquot opiniones, meam etiam de hoc negotio sententiam proponere, eandemque ad superiorem normam referre. Damus enim libenter aliorum opinionibus veniam, ut nostris quoque ineptiis eandem impetremus. Enimvero

*Humani generis mater, nutritrixque profecto* Marcel. Palingenius in Virgine.  
*Stultitia est; sine qua mortalia cuncta perirent;*

*Nilque agerent homines in terris.*

*Sit itaque ista in Græcorum levitate perversitas, qui maledictis insectantur eos, à quibus de veritate dissentiunt: estoque, per nos, suum cuique liberum judicium.* Cicero 2. de fin.

*Papinius existimat, refluxum maris, sive contractionem ejus contingere à sale, quod abundat* Sur les passions de l'ame, c. 8. *(ad eum scilicet modum, quo lumbrici & cochleæ (insperso ipsis sale) sese coarctant, & constringunt) fluxum autem ab illius humiditate procedere. Quod refutatu indignum est.*

*Furnerius, putat, ut statim febrium paroxysmi ex succenso quodam per vices formite creantur; sic æstus & quasi paroxysmos maris creari ex halituum sive vaporum commotione. At verò si vapores fluxum* Hydrograph. l. 9. c. 5. *cierent;*

cierent ; cùm mare illos non minùs in recessu, quàm accessu experiatur, nunquam contingeret refluxio. Et licèt mitis Solis calor vapores è mari eliciat ; nullam tamen intumescentiam eidem inducit, qualis in olla fit, cùm à fervido & flammante foco aqua subsultim ebullit.

Strabo.

L. 3. c. 1.

Cap. 22.

*Stoici dicebant, terram esse ingens animal ; atque in profundis Oceani nares quasdam constitutas ; per quas emissi anhelitus, vel redditi ; modò efflent maria, modò reforbeant. Neque adhuc satis cognitum esse, ait Mela, anhelitune suo id mundus efficiat, retractamque cum spiritu regerat undam undique. Hinc aspirari freto insulam, Solinus dicit ; quæ, accedente æstu maris, quasi adspiratione quadam ejus, afflatur, & alluitur.*

Quidam ignibus subterraneis mari vicini virtutem hanc largiti sunt. Et pro eorum vel accensione, vel extinctione vicissitudinariâ, fluxum aut refluxum contingere somniarunt. Naves itaque æstu maris fervente, altiùs demergerentur.

Alii, fluxum ab aqua in Zona torrida ebulliente factum, ab illa, quæ prope polos est, atque ad illam devertit, compesci volunt, & refluxum fieri ; quemadmodum eadem in olla fervefacta subsidit, si frigida affundatur.

Nico-

*Nicolaus Cabæus spirituum sulphureorum, Tom. 2. com. nitroforumque vim toti maris elemento in-* meteorolog. qu. 3.  
*esse voluit tantam, ut hæc præcipua causa sit agitationis, atque refluxus. Quemad-*  
*modum Scheunemannus æstus frigorisque causam in febribus intermittentibus, à sulphure & nitro, lepidè deduxit.*

*Timæus hujus rei causam esse voluit flu-* Plutarch. 3. placit. 18.  
*mina, quæ ex Celticis montibus in Atlan-*  
*ticum mare procurrentia, excursu reditque suo mare implerent, ac minuerent. At flu-*  
*mina non recurrunt, nisi ab ipso mari re-*  
*trorsum adigantur.*

*Doctissimus Gassendus meminit Urinato-* Tom. 2. pag. 27. col. 1.  
*ris, qui intra adhibitam capiti pectorique*  
*machinam respirans, & appensis ponderibus in maris fundum depressus, potuerit illic aliquot horis degere, incedere, varia movere, & observare; qui retulerit, mare imum, & infra paucas orgyas esse placidissimum, ac nullà tempestatum vi, nullà æstus maris agitatione commoveri. Fieri autem nequit, ut quisquam subter mare existens, quò vorum illud feratur intelligat. Imò verò in densa nebula, ubi vicinæ res obtutum effugiunt, nemo dixerit, fursùmne an deorsum fluminis aqua promoveatur.*

*Alii aquas supra cælum sidereum positas in hanc scenam deduxerunt. Enimvero submergendæ toti terræ, montibus-*

Cosmop. ini-  
tio.

que omnibus integendis non suffecisset integrum mare, etiamsi multò amplius extitisset : & tamen ipsum quoque ad eundem modum impleri necesse erat. *Steu- chus Eugubinus* igitur, cùm non videret, unde tantam vim aquarum, quantam diluvium universale postulabat, depromeret; aquas supercœlestes in hunc finem accersivit. Nihilne autem inde periculi Soli, aliisque planetis incubuisset ?

Alii itaque autumant, à Solis ardore mare insigniter incaluisse, ac rarefactum fuisse. Id verò ut aeri evenire possit, aquæ tamen non convenit, nisi simul in vaporem abeat.

Tom. 2. pag.  
665.

*Mothanus le Vayer* ait, se rarò lavisse manus, quin simul micturierit. Additque, complures huic sympathiæ acceptum referre æstum maris insigniorem tempore plenilunii : quòd tunc nempe humidum astrum potentius in vuidum elementum vires suas exerat. Idem tamen contingit in novilunio.

Ita quisque amplectitur suam Helenam : aliique alia commentum sunt. Sed satis ambagum.

Ego autem quod de hac re conjectem hoc habeo. Verisimile videtur, terram, in interiore sinu, ingenti speluncâ patefcere. Creator enim rerum, qui nihil frustra condidit, in nullum finem (quem equidem sciam)

sciam) eandem solidam extruxisset. Aperitur laxa hæc cavitas in externas oras (alibi juxta lineam æquinoctialem) duobus vomitoriis, sive hiatibus, firmo lapide circummunitis; quorum alter alteri adversus est. Et *Macrobius* providentiâ quadam <sup>In Somnio Scipionis.</sup> ibidem locari Oceanum censuit, ut haberent unde alerentur sidera. Aiunt enim Philosophi, *stellas aquam potare: idque, Sole,* <sup>Lucianus in Icaromenippo.</sup> *veluti situlâ quadam per funem demissâ, vaporem è mari attrahente, atque illis omnibus ordine potum distribuyente. Hinc enim profertur (ait Seneca) quo sustineantur* <sup>Quæst. nat. l. 2. c. 5.</sup> *tot sidera, tam exercitata, tam avida, per diem noctemque, ut in opere, sic in pastu. Ferunt autem, in dulcibus aquis Lunæ ali-* <sup>Plim. l. 2. c. 101.</sup> *mentum esse, sicut in marinis Solis. Ad hanc mentem fabulantur, Vestam nutri-* <sup>Marcianus Capella, Philolog. l. 1.</sup> *cem Jovis esse.*

Antrum isthuc (sive cavitas ingens) aëre impletur; ejusque partem concavam, aquæ, per dicta foramina ingressæ, variis locis interluunt; quemadmodum in convexa telluris parte usu venit. *Homerus Oceanum* appellat,

Ἐξ ὧν περ πάντες ποταμοὶ, καὶ πᾶσα θάλασσα, *Iliad. φ.*  
καὶ πᾶσαι κρήναι, καὶ φρέιατα μακρὰ νείκεσσιν.

*Ex quo omnes fluvii, maria omnia manant ;  
Ex quò omnes fontes, omnes puteiq; profundi.*

*In Phæd.  
Sext. Empi-  
ricus advers.  
Mathemat.  
pag. 58.*

Idémque ( teste Platone ) dixit Barathrum ;  
in quod Saturnum à Jove relegatum fabu-  
latur.

Τὴλε μάλ', ἢ χι βάδιον ὑπὸ χθονὸς ἐστὶ Βέρε-  
θρον.

*Longè, & valde altum hîc est sub tellure  
Barathrum.*

Quòd etiam alibi ille, aliique Poetæ no-  
minârunt Tartarum ; Εἰς γὰρ τὸ τοῦ χάσ-  
μα συρρέει τε πάντες οἱ ποταμοὶ, καὶ ἐκ τῆ-  
τος πάλιν πάντες ἐκρέεισι. In hanc enim Vo-  
raginem omnes fluvii confluunt ( mediante  
mari videlicet ) & ex hoc omnes vicissim  
effluunt.

*Genes.c. 7. 11.  
& c. 8. 2.  
Job.c. 38. v. 8.  
& 16.*

*De astu maris  
c. 20.*

Hi, opinor, fuerunt illi fontes, quibus  
adapertis, mundus olim diluvio periit. In  
hos etiam, finito diluvio, eadem aquæ de-  
nuo recefferunt. Neque enim censeo, cum  
Theodoro Moreto, aquas illas, virtute solari  
attenuatas, abductas fuisse ad Cometarum  
regiones, & siderum provincias, nunquam  
( ex pacto Dei ) reversuras.

Πάντα



Πάντα τὰυτα ἔ μάχεται τοῖς φαινομένοις, Epicurus E-  
 hæc mihi videntur consona iis, quæ appa- pist. ad Py-  
 rent. Τὸ δὲ ἀπλῶς ἀποφαίνεσθαι περὶ τέτων, thoclem.  
 καὶ ἴηκον ὅτι τοῖς προαίεσθαι τι πρὸς τοὺς  
 πολλὰς βελομένοις, pronunciare autem sim-  
 pliciter velle in hiis rebus aliquid, eos  
 decet, qui magnificum & portentosum  
 aliquid coram plebecula ostentare cupi-  
 unt.

Oborietur autem forsitan hîc scrupulus:  
 quânam nempe fiat, ut integrum mare  
 dicta illa foramina non ingrediatur, spati-  
 umque omne impleat subterraneum? Hu-  
 jus autem rei, opinor (veritates enim aliæ  
 alias trahunt, & *res accendunt lumina re-* Lucret. l. 1.  
*bus*) motus terræ in causa est, cujus rapi-  
 da circumgyratio, liquidas undas superfi-  
 cieî ejus concavæ quasi alligat; ut huc il-  
 luc in gyrum moveri possint, ad centrum  
 verò decidere nequeant. Quemadmodum  
 in circulo viectoris contingit; in quo posi-  
 ta tegula (si modò ille celeriter circumro-  
 tetur) non delabitur, sed in eodem situ  
 permanet. Similiter vitrum, vino alióve  
 liquore semiplenum, si dextrè rapidèque  
 circumagatur, nihil humoris excutit, ve-  
 rum integrum eum in se conservat.

Manè itaque, quamprimum Sol fora-  
 mini orientali opponitur, idémque radiis  
 suis penetrat; aer illîc incarceratus disten-  
 ditur;

ditur; majúsque spatium occupans, nec habens quò fugiat, circumjectam aquam premit, & exprimit: quemadmodum in thermometro fieri, antehac diximus. Enimvero Sol propriâ energiâ æstum non concitat, sed aeris incarcerati dilatatione id peragitur. Aliàs enim mare ubivis Soli subjectum, æstum quolibet in loco auspicaretur.

A Solis igitur influxu premitur intestina aqua, simulque attollitur ac protruditur foraminibus illis incumbens mare; proximásque aquas quoquoersum propellens, remotas longè ripas adit, atque operit: easdémque, migrato inde sex horarum spatio Sole, aeréque incluso (cessante tunc fervoris accessu) paulatim ad naturam pristinam revertente, deferit denuo; maréque proximum, resorbente aquas voragine, detumescit: móxque Oceanus remotior, inclinationi eidem obsequens, relictâ metâ, ad carceres properanter recurrit. Donec duodecimâ lunari horâ, Sole alteri formini opposito, idem motus instituat.

Variantur autem alternantes recursus: fit enim reciprocatio illa quotidie minutis quadraginta octo tardiùs: quia, ubi pleno alveo mare ad summum intumuit, languescente sensim (ob recessum Solis) vi illâ, quæ undas concitârat, *Neptuno* jam per

per *Tritona* receptui canente, vorticosísque pelagi commoti molibus se paulatim in sua castra recipientibus; necessariò singulis contrariis motibus duodenorum minutorum morula interponitur. Námque inter duos contrarios motus quies necessariò intercedit.

Nec dicat quispiam, haud posse tam exiguum in medio terræ spatium tam amplæ aquarum moli effundendæ sufficere. Nam & vasta cavitas est, & non aded ingens aquarum moles ad hanc rem requiritur. Siquidem (calculus subducente *D. Isaacio Vossio*,) in mari, quod *Tropicos* De motu marium & ventorum, c. 12. interjacet, (ubi, ut dixi, æstuum principium statuo) inter maximum minimúmque ejus tumorem, vix unius pedis intercedit discrimen. Nullaque, inquit, tam exigua superficiei aquarum inæqualitas est, quæ non sufficiat ad inducendum motum. Et utcunque is in initio sensum effugiat; spatio tamen & progressu auctus, satis fit conspicuus: præsertim, si per æqualem miniméque scabram declivitatem aquæ ferantur. Maxime, si vis impellens accesserit; quam in nostra hypothesi adesse constat.

*Hos igitur omnes tellus exæstuat æstus,  
Expirátque foras.*

*Lucretius,  
l. 6.*

Estque hic æstus in summo Septentrione, Austróque, quàm apud nos, multò minor : siquidem motus omnes à principio suo remotiores paulatim flaccescunt ; vimque validiorem propiore nisu exercent.

Luna autem hujus motùs causa principalis haud censenda est. Cùm enim apud *antipodas* agit, quamnam, quæso, virtutem hemisphærio nostro impertiat ? Aiunt, id fieri, ob reflexionem radiorum illius à cælo opposito. Cùm tamen omnes simul stellæ (quarum quælibet plus quàm millies Lunam splendore exuperat) non nisi tenuem nobis luculam impertiant. Fierétque eadem opérâ, ut nunquam nos densæ tenebræ obumbrarent.

*Heraclitus* itaque (apud *Plutarchum*) majore verisimilitudine, æstus marini causam ad unum Solem retulit. Sed ratione non rectâ : quòd scilicet *Sol spiritus moveat* ; à quibus incidentibus, *Atlanticum mare propulsum infletur*, *affluxumque maris efficiat* ; cessantibus verò, quasi revocatum, *subsidat*, & *refluxum pariat*.

L. 2. c. 97. Circa litora, ait *Plinius*, magis quàm in alto, deprehenduntur hi motus : quoniam & in corpore, extrema pulsum venarum, id est, spiritus magis sentiunt. Pulsus profectò ubique similis percipitur, ob motus continuitatem :

nuitatem : æstus autem juxta litora manifestius cognoscitur, ob undarum ἀνάποσιν, five resorptionem.

Vides, quàm facilè sit quidlibet potiùs effingere, quàm ad obsoletos & nugaces illos *attractionis* modos confugere.

Quintò, Tandem ad *Facultatem*, magnum illud Medicorum κρησπύγετον pervenimus : pro qua non minùs hodie, quàm olim pro *Palladio* digladiantur. Nequè sanè immeritò ; quoniam illa, instar *Apol-  
linis*, dubiorum omnium responsa fert. Si quæras, unde cibi concoctio, chyli in vasa distributio, ejusdem in sanguinem mutatio, &c. statim, à *facultate* aliquâ ista fieri, audies. Quod quid aliud est, quàm deos advocare in theatrum, ut solvant nodum fabulæ ? Rem enim, per se obscuram nimis, verbis tenebrosos magis obnubilant. Quæ ars passim hodie in Philosophia obtinuit. Atqui apertiùs dixissent, rem aliquam ita se habere, quia sic Naturæ consultum fuit.

*Facultas* autem hujusmodi multiplex constituitur : nimirum *attraxitrix*, *retentrix*, *concoctrix*, *expultrix*. Quibus Pa-  
Nobil. Subtil.  
pag. 204.  
*risanus appetitricem*, *apponitricem* & *in-  
 fertricem accensuit* : & pari jure sexcentas alias potuisset. Alii addunt facultatem  
*secer-*

*secernentem, distribuentem, dilatantem, uni-*  
*entem, appetentem & formantem.* Alii de-  
 Kyperus An- *enique ossificam, carnificam & nervificam re-*  
 thropolog. pag. *cescent.* Astrologi varias virtutes planetis  
 580. *ineptè ascripserunt, quæ uni Soli conve-*  
*niunt : & Medici similiter facultatibus*  
*munera attribuerunt, quæ soli cordi de-*  
*bentur.*

Utque videas, quàm facetè (qui ad aras  
 L. 1. tract. *Galenii dixere sacramentum*) de facultati-  
 16. c. 6. *bus hisce philosophentur ; Avenzoar, &*  
 l. Collect. 31. *Averrhoes, agentes de modo conficiendi*  
*aquam hordei ; præcipiunt, ut caveatur,*  
*ne grana conterantur : quia, inquit, si*  
*faciendum est decoctum optimum, & infusio ;*  
*debent grana illa in se trahere aquam :*  
*quod non possunt, nisi vivida sit eorum fa-*  
*cultas attractrix ; quæ consistit in totali-*  
*tate & continuis partibus granorum. Quare*  
*si contendantur, facultas attractrix labefac-*  
*tatur : quâ offensâ, non potest aqua attrahi*  
*à granis, & propterea non fiet optima coctio.*  
*Quòd autem facultas attractrix à contu-*  
*sione diminuatur, atque etiam extingua-*  
*tur, inde evincunt ; quia grana, quæ man-*  
*dantur terræ contusa, sunt inefficacia ; soli-*  
*da autem germinant. Unde constat, in*  
*fractis abolitam esse facultatem, in integris*  
*eandem conservari. Nonne præclarè phi-*  
*losophatum ? Dignus profectò capistro fu-*  
*erit,*

erit, si quis hodie ita argutetur. Dicant enim nobis, obsecro, quâ facultate, quibusve fibris, spongia, filtrum, nix, saccharum, &c. humores attrahant? Et tamen tantorum Virorum auctoritate commotus *Mercurialis*, existimat præstare, si *aromata integra potius quam contusa coquantur*. *Præf. l. 3. c. 10.* At quid fiet de cinamomo, aliisque, quæ nunquam ad nos integra perveniunt? Similis eruditissimi Viri lapsus; ubi *maculas pestilentes protrudi*, ait à facultate expulsvâ. Et quòd post obitum interdum expellantur, id quoque à facultate protrudente, etiamnum superstite, provenire arbitratur: quemadmodum ungues & pili ab eadem facultate post mortem crescunt. Idque eò facilius tunc contingere arbitratur, quia in cadavere facultas retentrix cessat, quæ in vivis virtutem exerit. Quasi verò prudens Natura noxios humores retineat? aut facultas, post obitum, ceu nova phoenix, vegetior resurgat? Aut Atropos expultrici magis quam retentrici facultati benigna sit, ut illa sola post funera supersit? Aut tandem facultas aliqua sine anima esse possit, à qua tamen omnino dependet? Profectò æquè radii solares fuerint absque Sole.

Quin dicant, precor, quibus hirurgibus, cucurbitulisve hæc facultas attrahat.

*Natura*

4. De part,  
c. 12.  
L. de aere,  
aq. & loc.

*Natura enim, ait Aristoteles, ad officium accommodat instrumenta. Et Hippocrates dicit, nihil in natura fieri sine Natura. Villos forsitan nominabunt, per venas & arterias sparsos. Attamen dubitatur à multis, nec obscuri nominis, Anatomicis, numnam hujusmodi fibræ sint in vasis. Vesalius fateretur, fibras in venis vel obscuras esse, vel nullas. Cùm enim, inquit, venarum substantiam discerperem, fibrarumque inveniendarum gratiâ, crudam illam, coctamque dissecarem; fibræ mehercle nostrorum Auctorum potius nomine venerant imaginandæ, quàm ut in rerum natura illas esse, possimus asserere. Easdem, puto, in charta æquè facile reperias.*

Exam. observ.  
Fallop.

Observ. Anat.

*Fallop. etiam ait, fibras in tunicis venarum ita latere, ut potius in potentia sint, quàm in actu: neque moveri loco posse, ob connexionem, & densam mutuamque inter se texturam. Tandemque, explosâ fibrarum actione, tantum ob dyspathiam appositas fuisse, concludit. Ad cujus etiam mentem, Riolanus fibris usum potius tribuit, quàm actionem; aut duntaxat partis actionem adjuvare, ait: quippe quæ conferant in venis ad robur & conservationem venosi vasculi; dum aut dilatatur ex plenitudine, aut restringitur ex inanitione. Idque Galeno attestante de fibris intestinorum; inter quas rectæ*

Anthropo-  
graph. l. 5.  
c. 47.



*rectæ transversis sunt additæ ad robur, non autem ad chyli attractionem.*

His accedat Prosperus Martianus : Non Com. in Hip. arbitror, inquit, villos sive fibras humores <sup>Pag. 74.</sup> attrahere : quia multæ partes attrahunt sine villis ; ut hepar, lien, mammæ, testes, &c. aliæ villis donatæ non tamen attrahunt ; ut membranæ, septum transversum, muscoli, & alia. Et cum sit expulsio materiæ in aliqua cavitate contentæ, ex. gr. in vesica ; tota in se contrahitur. Quod fit, non actione villorum transversorum solum, quibus vulgo expulsio tribuitur, sed & rectorum & transversorum simul. Quod etiam testatur Galenus. Si igitur in expulsiōe <sup>De us. part. 3.</sup> omnes villi operantur, contentio & confusio <sup>Ca. 11.</sup> fiet facultatum naturalium. Quare probabilius videtur, villos rectos & transversos robur partibus addere : obliquos autem extensioni conducere. Ac propterea intestina obliquis fibris destituuntur : quia, si intestina facile extenderentur, adauctum stercus anum transire non posset.

Laurentius quidem ait, Villos partibus <sup>Anat. l. 3.</sup> inditos, non ad privatam propriæ nutritio- <sup>c. 26.</sup> nis munus, sed ad communia quædam opera exercenda. Ventriculus enim, inquit, ad cibi attractionem villis utitur, quemadmodum & vena ad sanguinem transmittendum. Ossibus autem, quæ sese tantum nutrire debent,

*bent, publicum verò munus nullum edere, fibras nullas Natura indidit ad attrahendum. At superest etiamnum difficultas: explicato enim opus erat, quomodo privatæ partes sine villis attrahere possint; non possint autem publico muneri destinatæ.*

Ecce tibi abunde auctoritatum; quibus ego tandem ratiunculas aliquot attexam. Fibræ nullo modo queunt promovere humores, nisi constrictione vasorum, quâ illos prorsum comprimant: aliter enim par difficultas orietur de fibris, quæ nunc de vasis. At verò quemadmodum eo pacto pars sanguinis superior sursum pellitur, ita pariter inferior deprimeretur magis; fierétque simul motus in partes contrarias.

Deinde, nutritionem quod attinet, similis in nobis fit attractio, atque in plantis. Sed in istis fibræ non sunt mobiles. Ossa pariter nutriuntur absque fibrarum operâ.

*L. de hist.  
Philos.*

Ut hîc liberè dicam quod sentio: prorsus sum cum *Alcmæone Crotoniate*, qui, teste *Galeno*, *nutrimentum ab animatis partibus non aliter attrahi volebat, quàm humores à spongiis alliciuntur.*

Porro, adeò violentum interdum contingit sanguinis profluvium, ut fibrarum lenti motus meræ fabulæ sint. Et si partes

tes corporis *facultate retentrice* donantur ; quidni, in mictione involuntariâ, ubi sphincter musculus relaxatur, aut læditur, vesica tamen urinam retineat ?

Denique, attractio ejusmodi sursum & deorsum, imò quoquoersum, nullo modo concipi potest. Fortius enim trahens humores omnes ad se arriperet ; aut æqualiter trahentia eosdem in æquilibrio sisterent sine omni motu. Imò, quòd est amplius, una eadèmqve venæ pars, etiam minima, eundem humorem attraheret simul, & expelleret : dum trahit à parte inferiore, protruditque ad superiorem. Quæ, fateor, adeò subtilia sunt, ut hebetis nostri intellectûs aciem prorsus effugiant.

In his tenebris *Alzarius Crucius* facem *De Hemoptysi*, quidem aliquam nobis accendit, sed ob-<sup>pag. 23.</sup>scuram nimis. *Facultates*, inquit, *expultrix & retentrix* ita videntur à *Natura comparatæ*, ut sibi invicem famulentur, (*Castoris & Pollucis instar*) mutuâsque præstent manus : quia dum *expultrix* operatur, cessat ab opere suo *retentrix*, continendi oblita : & dum hæc officio fungitur, altera, ab infito munere vacans, ociatur. Bellum commentum ! Quis dehinc rationem brutis deneget, cùm vilissimis eorum partibus eandem tam liberaliter assertam videat ?

Alii

Alii fortasse respondebunt (idque ex mente *Galen*) attractionem hujusmodi fieri convenientiâ aliquâ qualitatum : sicut ferrum à magnete trahitur. Id autem jam suprà explosimus. Et nunc addo, humores non posse hoc modo attrahi. Tractio enim ejusmodi (si quæ esset) è longinquo semper est imbecillis : at chylus è ventriculo ad extremum corporis facile diducitur. Si dicant, id fieri consecutivè ; ut, quod venis proximis abundat, id similiter à remotioribus attrahatur : regero, omne attrahens, sui solùm causâ, ut attracto fruatur, attrahere ; ideóque nec plus alligere, quàm sibi soli ex usu sit. *Galenus* enim non modo ventriculum, sed quodque aliud organum, attrahere, retinere, alterare & expellere ait, ut se ipsum solum nutriat, & conservet : alioquin, inquit, similia essent iis, qui cum intellectu & ratione agunt, mentéque præditi sunt ; ut ii, qui rempublicam gerunt. Attamen diætorum immemor, *Evenit*, inquit, ut cùm ventriculus longè plus attrahat, quàm sit pro sui nutritione ex usu (parum hæc superioribus conveniunt) multum alimenti ipsi superfluat, quod toti corpori postea est utile ; propterea quòd omnes animalis partes nutriat. Similiter hi dicent, proximas venas sanguinem ad remotiores transfundere ; quòd ipsis chylus

3. De nat. fac.  
6. 13.

chylus abunde suppetat, ac continuò possint novum è ventriculo exhaurire. Id verò est cerebrum in abdomine collocare, & partibus naturalibus rationem transcribere.

Porro dicant, velim, si *jecur* sanguinem in eum finem allicit, ut eodem potiatur; quidni perinde è vena *cava* sanguinem attrahit, atque è vena *Portæ*? præsertim, cum vena illa patentiore ostio *jecur* ingreditur, & sanguis in ea defæcator judicetur; quem certè, præ crasso & crudiore venæ *Portæ* sanguine, eligere debeat. Quidni enim hîc contingat, quod in gravida muliere usu venire, *Parisanus* alibi asseruit? Nempe, *matrem puriore sanguine ali*; Nobil. exerc. de subtil. l. 4. c. 2. *impuro & fæculento ad uterum, ceu cloacam, exploso; quo nutriatur fœtus, tanquam ultimus ad mensam.* Idque inde fieri ait, quia unumquodque membrum primò sibi consulit. Respondebunt, id consultò evenire; ne aliæ partes suo demenso fraudentur. At illud est mente & intellectu agere; quod *Galenus* explosit.

Deinde, quod *facultate* aliquâ attrahit, id sibi conducens & accommodum duntaxat attraheret: at venæ noxios quoque, imò mortiferos humores (si modò adfluerint) allestant.

H

Denique,

De Renibus,  
c. 32.

Denique, si arteriarum pulsatio à facultate promanat, quâ arteriæ dicuntur attolli & subsidere, ut spiritus & sanguinem promoveant: quidni venæ similiter pari motu eosdem transferunt? Bartholomæus Eustachius profectò id ipsum concedit. *Satius est, inquit, arbitrari, venas tractoriæ facultatis esse organa; quàm cum Erasistrato asserere, eas instar sacci vel utris cujusdam impleri; & quasi inanes canales, aut aquæductus, materias suscipere. Quam opinionem ut tueatur, censet, venas à facultate nutritoriâ moveri, perinde ac arteriæ à facultate vitali moventur: licet motus venarum magis obscurus sit. Adeò juvat interdum quidlibet potius dicere, quàm vulgatam diu sententiam relinquere.*

Anthropogr.  
l. 3. c. 4.

His sic prælibatis, quæret à me aliquis: Denegatâ omni attractione, quo motu fertur sanguis ad cor? ubinam est causa propellens? Riolanus certè ridiculam hujus rei causam commentus est. *Partem, inquit, diaphragmatis nervosam cor suo contingit: non ut motum infundat diaphragmati; sed ut oppositum jecur succutiens, sanguinem in venam cavam refundat; cujus ascensum, in homine erecto, suâ diverberatione faciliat* Atqui (ne quid aliud dicam) hoc pacto sanguis potius in venam Portæ præcipitaretur. Ego verò opinor, sanguis

sanguinem ad cor eo motu ferri, quo oleum ad lampadem promovetur: scilicet ad locum, aliàs futurum vacuum ( ut suprà dictum est, atque posthac dicetur fusiùs ) à partibus ambientibus propulsum: effluere autem in arterias, à corde, semet contrahente, protrusum.

Diu jam, vides, procellosum mare navigavimus; tempùsque est ad litus velum vertere. Si tamen priùs alterius *attractionis* meminerim, quam vulgò philosophantes loco artribuunt. Atunt enim, locum attrahere, quia corpora in eum feruntur. Dicóque, quod de hac re *Gilbertus* noster: *miseri illi, qui umbras & inania admirantur, corporum naturam non assequuntur.* *Physiolog. l. xi. c. 35.*

Nunc demum ad arenam redeuntés, dicimus, *Harvæum* jure optimo statuere, non posse arterias suâ sponte dilatari, ut sanguinem in se recipiant: sed potiùs, utrium instar, ab influente sanguine distendi. Atque exemplum *Galenì* quod attinet; ut fatear (quemadmodum antea diximus) arteriam, super calamum arctè constrictam, ultra ligaturam non pulsare; quid igitur? an propterea facultas pulsifica per tunicas arteriarum è corde emanat? Certè ipsis arteriis faculta-

tem hanc non inesse, hoc ipso argumento clarè evincitur : aliàs enim ultra ligaturam motu tremulo cierentur. At dicant nobis, qualisnam illa facultas sit. Nam si irradiatio solùm cordis fuerit, aut virtus aliqua innata, quæ pulsus cieat : quid impedit, quò minùs illa sese per constrictas quoque tunicas transfundat ? Sin fuerit spiritus, sive sanguis arteriosus ; non video equidem quomodo hic per exolutas quoque tunicas transmeare possit. Ego autem veram pulsationis causam, ut dixi, arbitror ipsius cordis primum impulsus. Nimirum, sanguis, è sinistro cordis ventriculo protrusus, in aortæ ostium arietat : unde percutitur ipsius orificium ; idémque motus ad illius ultima perpetuatur ; (quod nemini mirum videri debet, qui motûs celeritatem in corporibus continuis non ignoraverit) postea verò, subsequente cordis relaxatione, motus iste suâ sponte quiescit.



## S E C T. XIX.

Verba *Harvæi* sunt clarissima ; quorum vim ut eluderes, perplexæ sententiæ nubeculam offudisti ; quam consulo pro *Junone* amplectaris. Quorsum autem, incisâ leviter arteriâ, tantum turbarum ? Credat quispiam, adesse captæ urbis vivum specimen, metûque percussos cives, apertâ portâ, confertim prorumpere. Itâne verò sanguis arteriosus, natalis soli oblitus, undiquaque festinat, ut in exilium protrudatur foras ? Aut quodnam est expellens, si in systole (quo tempore ab arteria propelli debuit) quiescat ?

## S E C T. XX.

Hîc, locustæ more, suavissimum florem transfiliisti, ut depresso gramine insideres. Quæ de tunicis arteriarum *Harvæus* refert, sententiam *Galenî*, de vi pulsfica per eas delatâ, prorsus enervant. Ad quæ tu ne verbum quidem ; uti neque ad sequentia.

## S E C T. XXI.

*Harvæus* hîc quidem tantisper à me relinquendus est; te tamen non sequar, cujus verba plena spinis, & sententia erroribus. Licet enim verissimum putem, spiritus in ventriculo sinistro solùm gigni; tum, quia in quibusdam animalibus dexter deest, ac propterea in eum finem sinister solus sufficit; tum etiam præcipuè, quia, in omnibus, vesicula ab initio pulsans (quæ revera cor est) sinistrum duntaxat ventriculum constituit; cui dexter postea, ceu appendicula, adnascitur: tamen ratio tua, *ab omnibus antehac ignorata*, falsissima videtur; quia scilicet *dexter ventriculus sanguine refertus est adeò, ut moveri nequeat, ad calorem (spirituum auctorem) producendum*. Enimverò nego, *Parisane*, motum per se esse causam caloris; ut antehac abunde diximus. Nego etiam, ventriculum cordis dextrum (cunctis se ordinatè habentibus) repleti: non magis certè, quàm sinistrum. Nego tandem, eundem repletum non posse moveri, contractionéque sui contentum illic sanguinem exprimere. Quod autem de *liene* narras, mox expendetur: quemadmodum, quod de motu arteriarum adnectis, *suprà* à me rejectum fuit.

S E C T.

## S E C T. XXII.

Dextrum cordis ventriculum pulmonibus solum *nutriendis* inservire, pernegamus; & nobiscum complures alii. Quamobrem fidenter nimis asseruisti, *hac de re nihil ambigi*. Sed de hoc negotio posthac uberiùs videbimus.

## S E C T. XXIII.

Ob quam causam instituisti inter sensus rationemque divortium? An non hæc ad Naturæ indagationem subalternas operas præstant?

—*quid nobis certius ipsis* (mus? *Lucret.*  
*Sensibus esse potest, quo vera aut falsa note-*

Hi certè, rectè constituti, responsa certiora ferunt, quàm

*Pythia, quæ tripode ex Phæbi lauròq; profatur.*

Meritò *Galenus* illos ridet Medicos, qui, *L. de opt. sect.*  
 de rebus sensui evidentibus, sententiam, *ad Thrasyb.*  
 non sensoriiis, sed demonstratione aliquâ *c. 2.*  
 ferre conabantur.

*Harvæus* quidem verè ait, similia organa non esse in eum finem instituta, ut unum sit sanguinis, alterum autem spirituum repagulum. Ideoque pariter in utroque ventriculo sanguinis regressus prohibebitur. Tu autem diversitatem valvularum objicis; atque in *arteria venosa* duas solum appositas ais, ut arterioso sanguini ascensus pateat in pulmones. At præterquam quod tali sanguine nihil est opus; non potest is per idem vas descendentem sanguini, atque etiam aeri contrarium iter instituire. Verisimile quoque est, arteriæ venosæ orificium binis majoribus valvulis æquè accuratè claudi, atque venæ arteriosæ ostium ternis & minoribus. Quinetiam *Riolanus* ait, sæpe ternas valvulas in arteria venosa reperiri.

Aerem nihil ad spirituum generationem facere, fortassis alicubi à te dictum est: id autem demonstratum uspiam esse, non equidem crediderim.

Mirifica autem est subsequens observatio tua; modò, quid velis, rectè assecutus sim. Ais, *venæ arteriosæ tricuspidales valvulas contractas, falcata lunam referre*. Indèque fieri, ut sanguis, è dextro ventriculo pulsus, sepem hanc faciliè transfiliat: eundem autem retrogradum id non posse, quia *vena arteriosa* non pulsat, (quod tamen

men à vero abludit ; ) propterea que sanguinem ibi placidè moveri, nec saltum illum æmulari posse.

Hæne tuæ, *Parifane*, subtiles subtilitates ? Putabam equidem, valvulas cordis cum fluente prorsum sanguine sese inflectere ; refluenti autem obniti. Quid tu igitur nobis earundem contractionem & expansionem somnias ? Et ut ita sit ; quidni, obsecro, sanguis, quo vena arteriosa referta est, falcatas illas lunulas sine saltu præterfluat ?

Verùm ne in his anfractibus æstuemus nimium ; age, secedamus unà in viridaria tua ; visuri, quàm insignes inde fructus nobis producas. Nolim tamen ad *Plutonis ædem* deducas, ubi in vestibulo *Cerberus* nobis offulâ placandus sit. Quæris, quid metuam ? Nempe quia *os mansu durum* pro foribus video ; *quod* (ante te) *vel primoribus labris nemo unquam degustavit*. Similes scilicet habent labra lactucas. Et *Parifanus*, qui fonte labra proluit Caballino, mira hinc nobis fercula conficiet. Nemo autem degustavit ? Imò verò *Franciscus Ulmus* jampridem ante *Parifanum* hoc idem os arrose rat. Estque libellus ejus *Virgilianæ Ulmo* persimilis,

*Ulmus*

*Aeneid. 6.*  
*v. 283.*

*Ulmus opaca, ingens, quam sedem somnia  
vulgo  
Vana tenere ferunt, foliisque sub omnibus  
hærent.*

*Apuleius in  
Apologia.*

Ex illius penu omnia ferè ad hanc rem spectantia depeculatus es. Et quemadmodum *Ulyssis* socii thesaurum se reperisse arbitrabantur, cum utrem ventosissimum manticulati essent : sic tu pariter hoc delirio magnificè te effers. Ac propterea tui oblitus eras, cum pridem gloriosulè dices : *Parisanus aliena non colligit ; ut opinionum novitas, varietas & subtilitas cuique testificari possunt : & quæ præterea nec lucernam, nec candelæ fumum oleant ; (certè plurima lucernam non sapiunt, sed potiùs nocturna insomnia) vidit in fonte, & fideliter recenset omnia.*

*Nobil. exercit.*  
*pag. 585.*

Videamus igitur, quàm tu medullam ex hoc osse noviter extraxeris.

Quæris primum, *quamobrem cor pulset* ? Dicisque, id fieri duplicem ob finem. Primum, *vitæ causâ ; deinde, præstantioris vitæ gratiâ.* Libenter autem intelligam, quid cordis pulsatio ad *meliores vitam* faciat. Dum per illam, ais, *vitales spiritus producantur.* Ergo vita aliqua fuerit absque illis spiritibus. Igitur vilissima quæque

que animalcula, quibus cor pulsat, meliorem inde vitam nanciscuntur! Addis, *spirituum horum generationem à cordis motu proficisci*. Ego verò fidenter assero, motum cordis à sanguinis effervescencia excitari, nec posse eum ullo modo suâ sponte spiritus progignere. Nimirum mulierculæ, quæ sanguinem faciendis lucanicis diutulè concutiunt, magnam spirituum copiam excitarent; unde illæ magis multò reficerentur, quàm *Democritus* olim ab olfactu panis calidi. Siquidem & motus adest, & quidni calor, ex motu productus? quæ, ex tua sententia, spiritus procidunt. Sin peculiarem aliquem motum causeris; oportet doceas, quidnam illud sit in corde singulare; quod nunquam à te factum est.

Quæris deinde, è quo sanguine hi spiritus profiliant? Dicisque, debere eum esse *subtilem, elaboratum, & ab omni fæce repurgatum*. Esto. Quæritur itaque, *quodnam viscus huic muneri destinatum sit?* Respondeo, non unicum, sed plura: intestina nempe, hepar, lien, ac vesiculæ felleæ & urinaria: à quibus omnibus chylus & sanguis à suis sordibus defæcantur. Sed te loquentem audiamus. *Non defæcatur*, ais, *per septum cordis; tum ob alias rationes, tum quia illud in piscibus aliisque ani-*

*animalibus desideratur. Quia videlicet pulmonibus destituuntur; adeoque iis unicus ventriculus sufficit. Quid tum porro? Ergo, ais, Harvæi sententia de Circulatione sanguinis concidit. Næ tu validus pugil, qui tam levi flatu adversarium proster- nis! Verùm hac de re postea disceptabi- mus. Perge itaque. Oportet membrum hoc cordi vicinum sit; ut, deficientibus spiri- tibus novas continuò suppetias ferat. Istuc autem vena cava melius præstiterit. Sed interturbo: dic reliqua. Oportet sanguifi- catrice vi donetur: & spirituum vitalium calore, arteriarumque motu præditum sit. In quem autem finem tantus fervor? Ut nimio calori & siccitati cordis, frigido hu- midoque sero præsto sit. Pulchrè scilicet hæc congruunt; estque subtili philosopho digna illatio. Denique, oportet, membrum hoc excrementa, & terreum, crassum, a- trumque humorem, ad progignendos spiri- tus ineptum, avertat. Atqui hoc pacto gloriosulus tuus lien, lixæ instar, vili mu- neri destinatur. Tantis autem propositis honoribus, quis non expectet litigantia viscera? Commodè autem *Parisanus* ar- biter solo nutu litem dirimit: nullumque viscus his muneribus magis idoneum esse ait, ipso liene. Spes sanè est, melius actum iri in posterum cum hominibus; splenémque,*

tam



tam eximio honore ditatum, haud amplius melancholiâ laboraturum. Accidit certè, quod vulgò dici solet; *Splen ridere facit*. Quis enim ab irrisu temperet, cùm videat subtilissimum mortalium desertam ab omnibus opinionem tanti fecisse; ut eâ solâ, ad pulcherrimi Inventi firmissima fundamenta evertenda, tanquam inexpugnabili machinâ, uteretur? *Ulmus, Varolius, & Carolus Piso* jampridem eam sententiam, nisi fallor, amplexi sunt; quòd viderent, arteriosum sanguinem sero abundare; & *Hippocrates* splenem aquæ fontem constituerit. Ego verò posthac hujus rei aliam, verâque (opinor) causam redam. Videamus interea, quàm splendida *lien*i privilegia donaveris, ut eum cordi promum-condum faceres. *Est, inquis, viscus cordi proximum*. Quid audio? an propius hepate? consule oculos, si iis fidem adhibes. Imò (dices) respectu *arteriarum*, quæ sinistrum ventriculum adeunt. At, inquam, ne sic quidem. Et ut sit maximum; tantillum sanè intervallum parum obesse arbitror: neque enim partium *vicinitas* earundem mutui commercii constans tessera est. Quin tu enim eodem jure chylum omnem ad hepar, aut cor, immediatè è ventriculo deducis; nullum autem ex intestinis, quia hæc longiùs absunt.

At

At enim spiritus è corde in lienem directè magis & ad perpendicularum feruntur: quod calori augendo plurimùm conducere, communiter creditur. Ideoque Sol vertici nostro propior ardentius flamat. Qua de re in Digressione proxima pensculatiùs videbimus.

Deinde ais, *lienem sanguificatrice vi donari*. Ego verò eam cordi soli convenire arbitror. Ut tamen id tibi largiar; num tu *hepati* eandem virtutem denegabis? At verò nihil hæc nostra ad *Parmenonis suam*! Lien enim spirituum vitalium calore, & arteriarum perpetuo motu pollet. Non est id *ὁμολογούμενον*. Audi *Riolanum*: Cupio, inquit, istos plexus venarum & arteriarum mihi demonstrari, cùm nullos adhuc deprehendere potuerim. Iterumque: Si lien venis & arteriis conspersus sit; cur in tota ejus substantia formam venæ & arteriæ vix agnoscas; sed fibras potius, quàm vasa? Propterea scripsit *Hippocrates*, *splenem mollem esse & fibrosum*.

Tu tamen thus hîc crema, & libamenta inverge: *Pygmææque* spolia *Colosso* impone. Ego enim arterias (& sæpe venas etiam, nam nolim refragari veris) in *liene* frequentes esse, libenter concesserim: præpollet tamen fibrularum, ab interiore ejus tunicâ oriundarum copia; ob quas lienem potissi-

Plutarch.  
Sympos. de-  
cad. 5. probl.  
2.

Anthropogr.  
l. 2. c. 23.  
L. de Prin-  
cip.

potissimum extractum arbitror. Sic conjecto, inquam, ob causas nunc non dicendas. Sunt enim Naturæ consilia hac in re adeò incomperta nobis, ut hætenus haud certò sciamus, quem in finem ea lienem extruxerit.

Quæ autem de calore adjungis; quomodo cum iis conveniunt, quæ alibi à te dicta sunt? nimirum, *lienem cor refrigere* Nobil. Exerc. rare & humectare, aquosum humorem illi Pag. 293. præbendo; quæ *Arabum* sententia erat.

Verbo dicam; hæc omnia meliore jure *pulmonibus* convenirent; quippe qui & cordi viciniore, & jugi motu sanguinem (ut arbitrantur) spiritibus gignendis idoneum præpararent. Quid obstat? Nempe *sanguinis arteriosi per arteriam venosam in pulmones ascensus*. At illud tum est insomnium. Et ut verum sit, an non ejusdem sanguinis per *aortam* descensus, idem è *liene* fieri prohibebit? Dices, nihil sanguinis pulmonibus superesse; sed quicquid eò com meat ab iisdem absumi. Mira hercle pulmonum voracitas, qui tantum sanguinis tuburcinentur, quantum toti corpori nutriendo sufficiat! Verùm hæc res suo loco expendetur.

Porro ais: *Lien proculdubio tale viscus est, quia in eo crassus, terreus & ater humor separatur.*

At

De part. an.  
l. 3. c. 7.

Eumenidi-  
bus.

At quis credat, ab eo viscere subtilem sanguinem generari, in quod sæculentissimus sanguis, tôtque aliæ sordes confluant? nullúsne contagii metus? An non præstisset, ab alio aliquo viscere id muneris primùm obiri? Quemadmodum ii statuunt, qui volunt, lienem crassum chylum ad se rapere (*ἀντισπᾶν*, ut *Aristoteles* fatur) ibidémque ad hepatis commoda præparare. Sed verum experior illud *Varronis*: *Nemo ægrotus quicquam somniat, quod non dicat aliquis philosophus.*

Sequamur attem tua vestigia. Ais, sanguinem crassum & impurum à motu & calore lienis attenuari. Quis autem intelligat, sanguinem hoc pacto tenuiorem fieri? An non tenuitas sanguinis ab admixto sero oritur; qui propterea subsidens in pelvi, crafcescit in fundo, quia serum innatat; & dum hoc, caloris vi, foras protruditur, reliquus sanguis magis densatur? Experire fodes super focum. Et tamen huic (ceu stabili) fundamento innixus, sæpe occinis, arteriosum sanguinem à liene attenuatum (id est, me interprete, sero ejus dilutum; nam aliter id fieri, ut vides, non potest) maximè idoneum esse, qui spiritus producat: cùm tamen illo ineptior nullus sit; & sanguis oleosior huic muneri sit maximè accommodus; ut alibi dicetur.

Quo-

Quoniam autem nunc hîc sumus ; libet variorum animalium lienes depingere : ut liquidius constet, quænam privilegia, præ cæteris visceribus, *lieni* debeantur : & num dignus sit, qui quadrigis albis vectus in Capitolium ascendat : quàmque officiis, ipsi à te assignatis, perficiendû sit idoneus.

In *porcello Indico*, lien oblongus, tenuis, floridique coloris, sinistro ventriculi lateri adhæret, pendetque circiter grana duo.

In *cuniculo*, tenuis, floridæque rubedinis, ventriculi fundo, mediante omento, adnectitur, atque ad ejus dextrum latus divergit. Idem fit in *forice*.

*Echini* lien majusculus ventriculo arctè, membranæ ope, adhæret.

*Columbæ* lien magnitudinem formamque grani triticei æmulatur ; positusque est subter œsophagum , paulò supra ventriculum.

In *pica*, longiusculus est, sedemque inter ventriculum, & hepar fortitur.

In *vespertilione*, exilis, & propemodum rotundus est ; atque inferiori, posticæque ventriculi regioni adnascitur ; hepatisque rubedinem exuperat.

In *perdice*, lienis pars latior hepatis medio ferè accubat, colore ex atro livescente ; ab hepate vasis solum determinatus & pendulus.

.I

*Mustele*

*Mustelæ* lien hepatis colorem æmulatur, ventriculique totum ductum comitatur: ejusque pars inferior reliquo liene paulò latior est.

*In vita Pei-  
rescii.*

*Testudo* lienem floriduli coloris nacta est, ad fabæ ferè similitudinem: situsque est in dextro latere, inter dorsum & hep-  
par. Ubi *Gassendus* eum non quærens, suspicabatur abesse.

*Ranæ palustri* contigit splen, pisi magnitudinem & figuram referens, sanguinei coloris: positusque est in mesenterii mediotullio.

In *raia aspera*, inter medium hepatis lobum, & intestinum recurrens sedem obtinet; latus, crassus, carneique coloris.

*Lucii* lien triquetrus, cordisque prope-  
modum figuram æmulans, prope pylorum locatus est; cui etiam exilibus (validis tamen) fibrulis annectitur.

In *sarda*, gracilis admodum, longus, & saturatæ rubedinis, intestino, ab apophysis prope ventriculum descendentem, accumbit.

In *barbo*, rubicundè floridus, tres pollices longus, ventriculo, hepaticque firmiter adhæret; pluribusque intercurrentibus vasis, connectitur.

In *passere fluviatili*, juxta vesiculam felleam, in hepatis media ferè regione, lien conspicitur, coloris atrii, pusillus, vixque minimi digiti unguiculum exæquans;

piso

piso ferè magnitudine & formâ compar; cum dorso tamen in colliculi modum acuminato. Ab hoc ad ventriculum & intestina, vasa satis conspicua deducuntur.

In *asello minore*, tenuis, oblongus, ex atroque livescens, intestino adnectitur, vâsque conspicuum in ventriculi fundum emittit.

In *anguilla*, exilis, ac rubicundus sinistro ventriculi cornu ( nam in bina dirimitur ) subnascitur.

In *rana piscatrice*, lien in dextro latere inferiùs locum obtinet. Figurâ & magnitudine ( nempe in majore pisce ) reni humano perquam similis est : laxaque adeò membranâ tegitur, ut, factâ scissurâ satis amplâ, per eandem sponte ferè elabatur.

In *Galeo* pisce lien est planè admirabilis. Is ad fundum ventriculi, versùs dorsum, exoritur : latus supernè duos pollices ; inferiùs autem aliquantùm angustior redditus, in obliquum tenuémque cuspidem acuminatur. Priùs tamen appendicem quandam ( cæci intestini instar ) lævorsum emittit ; cujus ductus mox gracilescit, neque ultra pollicis trientem expanditur. Excurrit hic ductus digitorum quindecim spatio ; medióque itinere, variis locis ( coli instar ) constringitur : éstque coloris ex fusco nigricantis. Toto hoc tractu,

tu, plurima & prægrandia vasa, à ventriculo & intestinis, trans mesenterium, lienem ingrediuntur.

Ad finem propero. *Lienis equini* forma haud malè *vomerem* refert. Longitudo ejus, circiter pedalis, atque amplius unciarum novem. Latitudo, ubi maxima, unciarum decem; ubi minima, unius. A latiore parte ad acuminatam, latitudine simul & crassitie continuè decrescit. Ramus splenicus totum serè interiorem ejus ambitum perreptat; multisque passim foraminibus pertusus est: quorum singula oscula valvularum appositu muniuntur: ut sanguini liber quidem è liene ingressus concedatur; regredi autem in eundem non liceat. Rami, è ventriculo prodeuntes, ramum illum splenicum nusquam ingrediuntur. Venæ, quàm arteriæ, tum plures, tum etiam majores conspiciuntur; ipsæque per totum lienem ramulos diffundunt; ut vel inflatu ipso cognoscere est. Arteria venæ subjacet, minúsque foraminosa est. Nervi conspicui à ventriculo, trans omentum, ad lienem perreptant: nulli tamen in ipsum lienem penetrant; nisi qui à tunica ejus interiore proficiscuntur; qui serè sunt innumerabiles.

*Lien*



*Lien bovillus* longitudine sesquipedalis est: latitudo ejus ubique propemodum æqualis; nempe quatuor unciarum, ubi arctissimus; quinque autem, ubi maximè expanditur: crassities vix duas exæquat. Connectitur ventriculo (cui incubat) spatio ferè dodrantali. Annexus hic fit mediantibus fibris nervosis plurimis, citra ullum venarum aut arteriarum vestigium. Figurâ *soleam* piscem resert: nisi quòd extrema hujus magis gracilescant. Tribus circiter digitis à crassiore ejus extremitate, vena lienem ingreditur patulo valde ore, & circumquaque pertuso, ac lacero. Primo statim ingressu, arteriam & nervos (instar *capsulæ communis*) circumambit; pauloque post diffringitur, variâque filamenta, juxta nervorum ductus, ad ultimum lienis terminum transmittit: non cava quidem illa, sed perinde ac si firmitudinem duntaxat parenchymati præstarent; quod valde laxum est, plurimisque passim foraminibus hiat; & ubique fibrulas ab ambiente membrana sortitur, quas ad nervorum propagines deducit. Arteria inter quatuor nervos media locatur: quorum duo majores collaterales sunt; minorum verò alter superjacet; alter autem eidem substernitur. Excipiunt hi nervi ubique fibrillas nervosas innumeras à tunica am-

I 3

biente,

biente, ut dictum est; quæ liquorem, sive succum alibilem (ut conjectare libet) è ventriculo exceptum, in eosdem effundit. Plexus iste, ex arteria & nervis constans, circa finem lienis, ipsius tunicæ annectitur.

Vasa *lienem ovillum* ingrediuntur in ipso anguli majoris confinio, ubi pancreas & ventriculum spectat. Vena tantæ est amplitudinis, ut digiti minoris apicem faciliè admittat. Quamprimum autem lienem ingressa est, terminum quasi ultimum constituit, ac propemodum evanescit: nisi quòd ulteriorem tractum tenuissimâ de se sparsâ membranulâ investiat: toto interea ductu crebris amplisque foraminibus hians. Initio statim, sub ipsum nempe in lienem ingressum, manifestè bifurcatur. Arteria vix stylum exploratorium majusculum admittit. Huc illuc variè distribuitur; ac tandem vasa capillaria in ambientem lienis tunicam dispergit: éstque illi *nervus* perpetuò comes.

Percurre sodes jam dictas *lienum* descriptiones; & videsis, num tuis commentis omnia ritè respondeant. Et quàm verum sit, *lienem in sinistro hypochondrio positum esse, ad corporis æquilibrium.*

Sed ne laborem ampliùs in re tam facili; quomodo isthæc tua munera à *liene* pro-

proficiscuntur in iis animalibus, in quibus nullus lien? Hepar, ait *Aristoteles*, habent De part. an. omnia sanguinea; lienem non habent omnia. l. 3. c. 7.  
 Quæ autem habent, propter adjumentum coctionis habent. Pauloque antè dixerat, lienem duntaxat habere animalia perfectissima. Et *Riolanus* ait: Animalia sanguinea, quæ pulmones nullos aut exiguos habent, carent liene, aut exiguo prædita sunt. Cap. 4. Loco citato.  
 Atqui habent sanguinem arteriosum. Ubi autem hic sanguis in illis præparatur? Quo solo argumento (addit) tanquam *Achille*, destruitur *Ulni*, & *Caroli Pisonis* (atque etiam *Parifani*) opinio. *Parifanus* autem, ceu *Paris* alter, faciliè hunc *Achillem* proster nit. Omnia animalia, inquit, lienem habent, etiam parva, imò minimi pisciculi, quicquid *Aristoteles* dicat. Nos enim, omni adhibitâ diligentia, nullum vidimus sanguineum animal hoc viscere destitutum. Laudo equidem diligentem tuam sagacitatem: planèque hac in re, ut vides, me tibi ad stipulatorem nactus es. Quid tamen de commento tuo fiet, cum lien hepatis locum possidet? Id enim aliquando contigisse, \* *Aristoteles*, † *Plinius*, || *Gemma Frisius*, a- \* Hist. an. l. 1. lièque memorant; nosque etiam modò exempla dedimus. † L. 11. c. 37. || *Spigelius* quoque idem Cosmocr. l. 1. c. 6. se in cuniculis non semel deprehendisse ait. Quid denique de *Matthia Ortelio*,

\* In Append.  
ad Rousserum  
de partu Cæ-  
sareo.

† De morb.  
intern. p. 584.

|| L. 11. c. 37.

cive Antuerpiensi dices; qui, teste \* *Caspa-  
ro Bauhino*, liene caruit? Addo etiam mu-  
lierem Parisiensem, in qua lienem nullum  
reperiri potuisse, † *Hollerius* testatur. Quin  
etiam || *Plinius* affirmat, *eximi illum pos-  
se sine vitæ periculo*. Imò, ipsemet no-  
vi canem, cui (experiundi gratiâ, quid  
commodi ad vitam à liene accederet) ex-  
cētus omnino erat lien. Quid autem illi  
exinde contigisse censes? Numnam, *Belle-  
rophontis* inītar,

*Is miser Elæis errabat solus in agris,  
Ipse suum cor edens, hominum vestigia vitans.*

& melancholiâ oppressus, miseram vitam  
trahebat, brevique post extinctus est? Ne-  
quaquam profectò; sed ad omnia vitæ mu-  
nia idoneus, annos aliquot commodam hi-  
larémque ætatem traduxit.

L. 2. Chron.  
c. 5.

*Physiolog.* c. 6.  
p. 67.

L. 6. c. 9.

Ideoque non audiendus *Cælius Aurelia-  
nus*: *Decidi, vel auferri lienem, voce qui-  
dem dictum, non officio completum accipi-  
mus*. Quinetiam temerè à *Lindano* dic-  
tum: *Qui credunt, lienem sectione, aut  
ustione exstirpari posse; mihi quidem non  
videntur vidisse aliquem in corpore; aut, si  
viderint, ita hîc sapere, ut ille apud Aeti-  
um, qui homines sine capite vivere putabat.*  
Nec multò magis placet illud *Bartholini*:  
*Lienem*

*Lienem tutò eximi posse, nobiles ejus usus* Centur. 4. hist. 51.  
*dissuadent; qui in sanguine acido depuran-*  
*do versantur, & fermento, pro totius inco-*  
*lunitate: nisi vel pancreati, vel hepati,*  
*vel alii parti hoc officium resignet lien.*

Demum, decorticatis carnibus, fibris & membranulis, ad ipsum os accedis. Quæritur enim, quónam sanguis ille, tantopere in liene depuratus, pergat? *Ad caput am-* Plaurus Trib. num. 48. 4. sc. 2.  
*nis scilicet, quod de cælo exoritur sub solio*  
*Jovis.* Nempe ad sinistri ventriculi ostium, introitum proximâ diastole præstolaturus.

*At objiciat aliquis (ais) valvulas, pro foribus aortæ positas, & foras respicientes, ascensui huic sanguinis à splene obviare.* Nec propterea posse, sano aliquo judicio, hujusmodi ἀναποδιπύον retrogradationem sanguinis concedi. Et mihi quidem hoc os durum videtur. Tu tamen illud levissimo ictu dirumpis.

*Sapientissimè, inquis, à Natura id factum est, ne copiosus sanguis à splene in cor immissus, spiritûs generationem impediret.* Ego verò arbitrabar, cor præ cæteris membris sapientiâ præditum esse. In quem finem igitur, (remotis quoque valvulis) plus sanguinis forbillet, quàm ipsi ex usu sit? At verò arteriæ motus cum impetu impellit.

*impellit.* Pulsus igitur arteriarum versùs cor tendit : non autem à facultate vitali ( ut dici solet ) ea vis arteriis indita , ut spiritus à corde per totum corpus disper-  
tiant. Quonam autem impulsore, sanguis è liene per aortam in cordis ventriculum finistrum propellitur ? Quo modo etiam sanguis tuus splenicus prædictas valvulas translabitur ? An sursum per arteriam testudineo gradu furtim in cor revertitur, nihil impediante sanguine servido, è corde recenter propulso, illique obviam prope-  
rante ? Atque ubi ad aortæ valvulas pervenerit, nullúmne ab iis ingressui ejus repagulum ? Quâ enim vi, aut arte, meatus ille, valvulis obturatus, recluditur ? Num  
*In Gallo.* plumam galli *Lucianici* nactus est, quâ occlusas aortæ fores aperiat ? aut potius aliquandiu pro foribus immotus atque oc-  
osus hæret ; instar cineris illius, quem in *Lacinia Junonis ara sub dio sitâ, immobi-*  
*L. 2. c. 107.* *lem fuisse ( perslantibus licèt undique pro-*  
*cellis ) narrat Plinius ? Nequaquam, in-*  
quies ; sed, quia valvulae non exactè clau-  
dunt orificium aortæ, per earundem hiantes rimas, arteria, plenis buccis sanguinem evo-  
mens, singulâ quaque diastole, minimam por-  
tionem, & guttatim quasi introducit. Ni-  
mirum *Sabini*, quod volunt, somniant.  
Agnosco autem *Ulm*i commentum. Tan-  
tumne

túmne verò sanguinis unus *lien* suppedi-  
 tat, ut idem *plenis buccis in cor evomatur* ;  
 plurimúmque interea ejus (ut modò asse-  
 ruisti) ad caput transvehatur, aliásque par-  
 tes, *quæ à venarum osculis per anastomofin*  
*nil mutantur* ? Quis non miretur, tantum  
 sanguinis è lienis paupere penu depromi  
 posse ? Eundem autem sanguini ex corde  
 rapidè decutrenti obniti, ejusdémque tha-  
 lamum ingredi, omnem prorsus fidem su-  
 perat. Quomodo etiam coctio sanguinis  
 crassi in splene perficitur, si singulis mo-  
 mentis pauculæ ejus arteriæ tot majoribus  
 suppetias ferant ? Scio quidém, te sangui-  
 nem etiam ab hepate, & è vena cava, per  
 anastomofin, in arterias transferre. Nem-  
 pe ad mentem *Galen*i, qui venarum & ar-  
 teriarum anastomoses mutuas passim con-  
 cedit. *In toto corpore, inquit, mutua est ana-*  
*stomosis atque oscillorum apertio, arteriis si-*  
*mul & venis; transumuntque in sese pari-*  
*ter sanguinem & spiritum per invisibiles*  
*quasdam atque angustas planè vias.* At  
 nemo profectò anastomoses illas unquam  
 demonstraverit : venæ enim, arteriis eo  
 modo continuæ, ad earundem rhythmum  
 pulsarent. Et si sanguis ille spiritibus gig-  
 nendis idoneus sit, nescio sanè cui funda-  
 mento commentum tuum de liene inni-  
 tatur.

L. 6. de us.  
 part. c. 10.

Præ-

Præterea, si *plenis buccis*, ut ais, sanguis ad cor fertur; qui fit, ut paucæ duntaxat guttulæ illud ingrediantur? Videmus enim aquam, per siphones delatam (si vel minima rimula hiscat) foras cum impetu prorumpere. Non fuerit saltem tanta ea rimula, quanta à phlebotomo paratur? quidni igitur utrobique par sanguinis quantitas profiliat? At verò unde tibi compertum, valvulas illas aortæ orificium haud accuratè claudere? Nempe ita contingit, quia rebus tuis videbatur commodum. Profectò pari ratione, sanguinem è pulmonibus in dextrum cordis ventriculum, atque inde in venam cavam, fecisses retrogradum. Quidni enim valvulæ sigmoides venæ arteriosæ consimili rimulâ patefiant? Aut cur non pariter valvulæ, venæ cavæ janitrices, foras spectant, ne copiosus nimium sanguis ab hepate atque aliunde curriculo afflueret?

Porro, si parva solùm rimula aperitur, quisnam supererit in eadem diastole exenti sanguini spirituosus locus? Et quomodo simul, tanquam ad condictum, ut *Amphictyones ad Pylas*, uterque sanguis utrinque advolat? Hæc tamen omnia (si *Pariano* credimus) consultò, sapientissimèque *Natura providens ita instituit*.



*Quisquis amat ranam, ranam putat esse  
Dianam.*

Ita scilicet fit: agunt Sophistæ histrioni-  
am, & stultitiam summam sapientiæ um-  
brâ obvelant, ne semel cognita irrifui ha-  
beatur. Quæ sequitur admiratio tua, haud  
nova est: familiare enim tibi, ad minima  
quævis à sensu tuo aliena obstupescere.  
Miraris, *Harvæum cæterosque Londinenses*  
asserere, aortæ diastolen frustra esse. Illi  
quidem id nusquam dixerunt. Ego ve-  
rò (ut habeas, quod mireris) non video,  
cuienam usui inserviat. Posset enim sanguis  
in illa, perinde atque in vena, citra pulsum,  
promoveri. Sed fit, ut dixi, ab illisu san-  
guinis in illius orificium: qui motus exin-  
de ad extrema arteriarum necessariò perpe-  
tuatur. *Vesalius ait, arteriæ magnæ trun-*  
*cum in quibusdam osseis hominibus in extre-*  
*mo senio repertum esse ejusmodi, ut cartila-*  
*gineæ prorsus fistulæ imaginem, longo in lum-*  
*bis tractu, referret.* Illis proculdubio, ibi-  
dem sine *diastole*, promovebatur sanguis.  
At hoc pacto actum est de aere, & fuligini-  
bus, quarum funeri voluisti adesse præfica.

*In Exam. Ob-  
serv. Fallop.  
pag. 36.*

DIGRES.

## DIGRESSIO. IV.

*De caloris æstivi, hybernique frigoris causis.*

**L**iceat mihi hîc, animi oblectandi causâ, aliquantulum à re propositâ exspatiari; & videre, quam ob causam, aer æstate magis, quàm hyeme, efferveat.

Aiunt vulgò, discriminis causam, cur æstivi calores hybernis prævaleant, inde petendam esse, quòd radii solares æstate rectilinei sint, & perpendiculariter res subjectas percutiant. Quasi quicquam intersit, quo modo radii rem obviam feriant, modò pari numero in eandem incident. Luminis radii sursum, deorsum, quoquo-versum pari facilitate motum suum expediunt: adeoque, ut æstivi caloris, hybernique frigoris discrimina explicentur, ad incidentiæ radiorum vel rectitudinem, vel obliquitatem, malè vulgò confugitur. In nos profectò radii illi obliquè illabuntur, angulúmque incidentiæ eò acutiorem constituunt, quò propius ad cœli culmen Sol accesserit: obtusiorẽ verò, quanto remotiùs

tiùs inde abfuerit. Neque quisquam dixerit, focum supernè in lacunari positum, præ eo, qui in camino splendet, corpora nostra excalefacere.

Quinetiam radii è cœli vertice in terram rectà incidentes, in sese redeunt ; nec vicina loca magnopere verberant. Ideoque si tegmen aliquod densius, vel nubes aliqua spissior intervenerit, æstus ille haud insignem molestiam inferre queat. Devergente autem sole, & versùs horizontem inclinante, (quod hyberno tempore fit) radii quidam in latera nostra perpendiculariter, sive rectà incidunt, aliique simul à locis intermediis variè ad nos reperiuntur. Alia itaque hujus rei causa indaganda venit : quam sic instituo.

Aeris (qui nos ambit) pars inferior, & vaporosis exhalationibus semper plus minùsve obnoxia, radiorum vim plurimùm infringit : & obtecto vel tenui nubeculâ Sole, in maximis æstibus, refrigerii solamen subitò persentiscimus, quòd ab ea vis illorum aliquatenus vel intercipiatur, vel aliorum devia desleat. Id minutissima corpuscula in aere irradiato huc illuc volitantia palam faciunt. Eorum quippe latera Soli obversa splendent ; à parte autem alterâ tenebricosa cernuntur. Sunt enim minuta hæc corpuscula tenuissimis  
Solis

Solis radiis ponderosiora ; eosdémque in sese irruentes aliò versùs impellunt. Cùm itaque hyeme, densior aer, qui nobis à latere est, quadragies minimùm crassitudine eum superet, qui æstate vertici nostro incumbit ; haud mirum sanè, si brumali tempestate minorem æstum percipiamus.

Accedunt quidem ad causam jam dictam etiam aliæ. Nempe boreales flatus, qui algentem iis locis aerem ad nos propellunt. Nitrum in aere dispersum, exoriente Sole, ab hujus radiis ad nos protrusum. Solis ipsius diversitas ; dum ab amplis maculis, eum circumambulantibus, vel densè obsidetur, vel ab iisdem liber est : Ab harum enim densâ circa limbum Solis obversum agglomeratione, vis ejus plurimùm infringitur : factumque adeò (narrante id *Gemma Frisio*) Anno 1547. ut ante conflictum *Caroli V.* cum *Saxonie Duce*, Sol triduum integrum, ceu sanguine perfusus, comparuerit, stellæque plurimæ medio die conspicerentur. Sûntque etiam fortassis hujus rei aliæ causæ. Verùm prædicta ratio apud me præponderat.

## S E C T. XXIV.

Dicere, *falsa hæc tua fundamenta ex certo sensu jacta esse*, est litem emendicare.

*Harvæus* meritò quærit, cur vasa, quæ sanguinem; atque ea, quæ spiritum ferre dicuntur, eâdem magnitudine constent? Siquidem *spiritus* angusta facillè perlabuntur, dum *sanguis* amplius spatium postulat. *Galenus* ait, *propriam cujuslibet partis actionem sequi propriam substantiæ illius speciem*.

Quamobrem quæ vasa eandem substantiæ speciem sortita sunt, eadem quoque consimilem actionem obtinere credibile est. Tua autem similitudo claudicat. Etiam si enim venæ aliæ sanguinem, aliæ chylum, atque aliæ semen deferant; (quod tamen haud adeò liquidò constat) nihilominus omnes uniusmodi magnitudinis venæ, parem quoque humorum quantitatem in se continent: quod, tuo arbitratu, hîc dici neutiquam potest.

L. 6. sent.  
Hip. & Plat.  
c. 8.

Nequeo autem transilire, quæ de *vena arteriosa* hîc à te disceptantur. Nempe factam illam *crassâ ac densâ tunicâ*, ne tantundem aeris, atque in arteriam venosam illabitur, illam ingrediatur. Quamobrem verò? Ne, scilicet, *dexter cordis ventriculus*, *sinistro minùs calidus*, refrigeretur.

K

Quid

Quid autem impedit, cùm ingentem nihilominus hiatus servet? Et quorsum aer omnino dextrum vèntriculum adeat; siquidem ex illo (ut arbitraris) sanguis fervidus, spumofus, & pulmonibus nutriendis idoneus, exire debeat? Similiter, factam esse venæ arteriosæ crassitiem; ne spiritus maternus, ab aorta exceptus, & per eam in pulmones delatus, in itinere transpiret; à ratione prorsus absonum videtur. Meliore enim jure, post natum fœtum, arteria venosa talem crassitiem nacta esset; ne spiritus proximè è corde delati facilè transvolitarent. Hi namque fervidi & subtiles sunt; illi autem, per longas ambages defatigati, effœtescunt. At Natura, de præsentibus tantùm sollicita, de futuris nihil prospexit. Ubi nam igitur ejus toties decantata providentia?

Ain' verò, arteriam venosam pulsare? Hæc profectò sententia sub sensûs triumpho facilè captiva ducitur. Nam certò constat, nullam omnino venam (arteriæ quippe nomen perperam obtinuit) tremulo illo motu cieri: quòd omnes à prima aortæ trepidatione sejunctæ sint. Fit enim (ut diximus) pulsatio illa ab ictu sanguinis è corde in aortæ orificium illidentis: quem motum illico ad ultimos sui terminos

minos perpetuat. Ideoque auctor tibi  
 sum, ut *Palladem* adeas, quæ caligi- *Iliad. i.*  
 nem oculis tuis, ut *Diomedis* olim, ab-  
 stergat.

Neque causam ullam video, ob quam,  
 arteriæ jam dictæ *laxitas* quicquam ad va-  
 lidiores attractionem faciat. Pari enim  
 ratione, coriacei tubi, præ ligneis, aut  
 plumbeis, deducendæ aquæ accommodi  
 essent.

Aerem autem à corde per arteriam ve-  
 nosam *attrahi*, non minùs nugatorium  
 est; quàm eundem à camino, lucente  
 foco, arripi; quæ fabula jamdudum ex-  
 plosa est. Nec magis aer ille ad cor-  
 dis *refrigerium* confert; ut posthac di-  
 cetur.

*Contactus* hujus tui cauda verè cauda  
 est: quâ dum pulverem verreres, oculis  
 propriis cavendum erat.

Licet vena arteriosa duplici tunica vestiatur, plus tamen sanguinis in se complectitur, quam uterque, vel alteruter saltem descendens ramus in cruralem. Atqui alteruter horum plures partes irrigat, quam vena arteriosa: superest igitur eadem difficultas. Hunc tuum levis armaturæ militem cum elumbem cerneret, ad triarios confugisti: quorum etiam experiemur robur. Magni, ais, & continui pulmonum motus sanguinis plurimum absument; quare magnâ huius copiâ opus est.

Dissert. Anat.  
l. 5. c. 30.  
pag. 977.

Rolfincius (ad mentem Galeni) eandem tibiam inflans, Vena coronaria, inquit, posteriores cordis partes nutriendas, plures ramos spargit per sinistram partem: quia hæc, propter continuum motum, copiosiore alimento indigebat. At uterque ventriculus simul, pariterque moventur. Et quidni ad digitos quoque, semper ferè mobiles, magna vasa perducta sunt? quidni ad oculos? Ain' autem, motum absumere sanguinem? Non diu est, cum diceret, sanguinem à motu rarefieri: quâ ratione parva ejus copia amplum spatium implet: contra verò, ibi multum ejus absimitur; ubi glutinis instar (ut censent) crassior sanguis



guis apponitur. Quis autem intelligat, sanguinem motu solummodò agitatum consumi? Mirum est, totum mare à continuo aquarum fluxu ac refluxu non exinaniri. Quomodo autem, obsecro, à motu sanguis discutitur? quove avolat? An unà cum aere & fuliginibus expulsus, in auras abit? *Aristoteles* quidem sanguinei sudoris meminit: tu verò *halitum* quoque sanguineum adinvenisti. Dic sodes, nonne sanguis illè in pulmonum substantiam transit? opinor, fateberis. Putàsne igitur, tantundem à pulmonibus discedere, quantum sanguinis singulis cordis ictibus accedit? Incredibile profectò est tam jure corporis nostri dispendium. Et licèt pulmones spatii multum impleant, mole tamen ac pondere sunt exigui: adeoque parum sanguinis iisdem instaurandis suffecerit. Crura autem musculosa & ponderosa cùm sint, plurimum sanguinis requirerent. Verè itaque à *Cæsalpino* dictum: *Sanguinem omnem in pulmones delatum ab iisdem absumi, egreditur fines rationis. Non enim rara esset ejus substantia & levis, ut videtur; si tantam alimenti vim in sui naturam converteret.* At enim, inquit *Plempius*, *pulmoni nutriendo tantum vas opus fuit, quia plurimum sanguinis ab iis digeritur; tum quia sanguis admodum*

*Quæst. Perip.  
l. 5. qu. 4.  
pag. 126.*

*Fundam. Med.  
pag. 203.*

*tenuis necessario est, qui eos alit; & sic facile dissipatur: tum quia pulmones ipsi in perpetuo sunt motu; & valde quoque à vicino corde incalescunt: calor autem digerit, dissipátque. Quod ineptè admodum ab eo dictum esse, quis non videt? Profectò nec calor magnopere est sanguinis decoctor, neque etiam motus. Serum quidem illi admixtum ut aliquantulum evaporet; pinguem tamen & glutinosam ejus partem, quæ sola adhæfioni idonea videtur, haud facile discutiat.*

*L. de corde.*

*Quorsum enim in febribus ardentibus, sanguinem adeò liberaliter educimus, si is tam facile à fervore absumitur? sanè parcendum esset vitæ balsamo. Et unde, quæso, pulmonibus tantus ardor, qui frigidum aerem perpetim sorbillant? Hippocrates certè pulmonem naturâ frigidum esse statuit, & inspirato aerè magis refrigerari. Estque id verissimum; atque in eum finem potissimum sanguis jugiter pulmones perlabitur. Denique, si pulmonum calor tantum sanguinis abligurit: quid censes de lienis æstu, quem tu illi insignem decrevistis? Quomodo in liene tantum sanguinis exuperet, quantum conficiendis tot spiritibus satès sit; & pulmonibus idem evenire nequeat? præsertim, cum horum vasa multò ampliora sint.*

*Ridi-*

Ridiculum autem est, quòd *sitim*, à lo-  
*quelâ contractam*, sanguine restingui pu-  
 tas. Reliqua, quæ de aeris ingressu, re-  
 ditúque, & fuliginum expiratione, addi-  
 disti, non oppugnabo ; ne cum larvis di-  
 micare videar.

Quid autem si hîc evincam, sangui-  
 nem corpus animalis nullatenus nutrire :  
 an non omnimodè opinionem illam vul-  
 garemi tibi expectoravero ? *Proh deûm*  
*hominûmque fidem*, inquires, quid hîc mon-  
 stri alitur ? Experiar igitur, quid rationi-  
 bus, haud adeò levibus, sis responsurus.

---

## DIGRESSIO. V.

*An sanguis nutriat ?*

**S**anguinem quidem fovere vitam animalium, verissimum arbitror : siquidem est materia spirituum, qui in corde fabricantur. Pars enim ejus pinguior, sive oleosa, à flammula cordis (ut posthac explicabitur) accensa, spiritus sive calorem per universum corpus diffundit. Eundem autem sanguinem nutrire, sive partes novas extruere, aut deperditas instaurare, minùs mihi verisimile videtur. Neque enim cum iis sum, qui vitam & nutritionem, non re ipsâ, sed ratione solum aliquâ differre existimant. Etiam si (fateor) vita, sine nutricatu, diu superstes esse nequeat.

Varolius A.  
nat. l. 2. c. 1.

Cremoninus  
de orig. &  
princ. membr.

Hofmannus  
com. in Gal.  
de us. part.  
pag. 109.

*Hippocrates & Galenus statuunt, alitionem fieri à quatuor humoribus in sanguine contentis ; pituitâ nempe, bile utraque, & sanguine speciatim dicto. Aristoteles autem censet, nutritionem fieri à solo sanguine. Et Hofmannus (ex sententia Averrois) per solum sanguinem intelligit, non venosum solum, sed & arteriosum : quatenus ambo illi sangu-*

*sanguines per mutuas vasorum anastomoses communicant ; atque ex duobus fieri unum ; dante modò Naturà plus sanguinis venosi, modò plus arteriosi ; prout pars nutrienda crassior, aut subtilior fuerit. Alibique existimat, venosum sine arterioso nutrire non posse, quòd ab hoc accipiat spiritus vitales.*

1. *Aristoteles ait, παντὶ, ἐξ ἑ γίνεται, 2. De gen. an. τροφὴ τὸ λιπόμενον ἐστὶ, cuilibet, unde nascitur, alimentum ipsi relictum est. Fœtus autem in utero non alitur sanguine materno, qui nullus adest ; sed succo nutritio, qui in eum à matre transfertur.*

Plurimæ profectò partes nutriuntur, ad quas nullus sanguis pertingit : ut ossa, ungues, pili, (nam & hos quoque verè nutrirì, unà tecum, arbitror) Cerebrum (cujus maxima pars sanguine defecta est) nervi, medulla spinalis (nam quæ vasa à lumbaribus, per foramina vertebrarum subintrare ad eam visuntur, pergere in ipsam substantiam, nemo hætenus ostendere est ausus) testiculi (particulatim turturis, in quibus nullum sanguinis vestigium cernas) ligamenta, musculorum membranæ, cornea oculi tunica, allantois, &c. Nam si hæ partes omnes quaquaversum sanguine perluerentur, ruberent quoque ad aliarum modum. Et quamvis in aliquot earum

Vesalius obs.  
Fallop. exam.  
pag. 96.  
Lindanus  
Physiolog. pag.  
460.

1. De Alimen-  
to.

rum sanguis conspiciatur ; non tamen in singulis illarum partibus ; uti oporteret, si alio alimento non fruerentur. *Alimenti enim vis*, inquit *Hippocrates*, *ad ossa usque pervenit, & ossium partes*. An igitur ad *Ossilaginem*, sive deam ossium formatricem confugiendum est, quæ sanguinem per invisibiles meatus transvehat ? *Sanguis* (inquit *Dominicus Sala*, Promotor olim meus *Patavii*, mihi quæ semper colendus) non penetrat ad intima omnium partium ; id enim sensus non concedit : præcipuè in ossibus, ligamentis, cartilaginibus, in aliquibus membranis ; quæ, in adultis, nullis venis præditæ sunt, nec vestigium ullum sanguinis habent.

Arist. hist. an.  
L. I. c. 16.

Plin. L. II.  
c. 37.

Tab. fol. 183.

Quòd autem sanguis vicina loca alluat ; factum id, ut partes singulæ à spiritu vitali, sive sanguinis calore, quem secum defert, foveantur. Ita in *cerebro* venæ nusquam sunt, nisi ubi membranæ, quæ earum stabilimen sunt ; præterquam in *plexu Choroide*, aliisque forsitan paucis locis. Ideoque (ait *Platerus*) *plexus Choroides facti sunt, ut interior hæc cerebri substantia, quæ nullis anfractibus constabat* (neque propterea membranas cum vasis excipere poterat) *spiritu vitali gauderet*.

Com. in Gal.  
de uf. p.

Ad quam mentem etiam *Hofmannus* : *Cùm locus is, ob excrementi frigidi præsentiam,*

tiam, opus habeat insigni calore; debuerunt etiam adesse insignia vasa, quæ spiritum cum sanguine adducerent. Ecce, calefactionis ergo, vasa ad cerebrum perducuntur, non autem nutritionis gratiâ: aliàs enim minima quæque cerebri pars à sanguine perlueretur. Nec quisquam, opinor, sanguinem in cerebro extra vasa sua migrare arbitrabitur; nisi qui à minima quoque horum laceratione periculum præsentaneum ignoraverit. Spiritus autem (utpote ignei) quoquoeversum trans vasa sese diffundentes, quantum opus est, *metropolin frigidi* calefaciunt. Similiter, nulla vasa ad mediam *septi* cordis substantiam penetrant (de percolatione sanguinis è dextro in sinistrum ventriculum, quæ antiqua fabula est, hodièque nonnulli somniârunt, non est hujus loci quicquam dicere) etiamsi interdum crassitie duùm digitorum latitudinem æquet. Neque sanè opus erat, quoniam à vicino foco satis incalescit. Exteriora autem, & frigori magis obnoxia, vasis coronariis irrigantur. Ita quoque corporis partes externæ, utpote frigoris injuriis expositæ, à sanguine ubertim refocillantur. Verbo dicam: sanguis totum animalis corpus jugiter percurrit; ut partes ejus singulæ à cordis calore, cujus ille vehiculum est, vivificentur.

*Anto-*

*Antonius Deusingius, Vir celebris, acér-  
que disputator, ut argumenti hujus vim  
eluderet; ait, sanguinem, ad quasunque cor-  
poris partes delatum, vi spirituosæ suæ sub-  
stantiæ, motûsque, ac caloris, in minutissi-  
mos earundem poros se insinuare, ac roris in  
modum quoquoersum diffundi: sicque san-  
guineum hunc rorem imbibi à particulis cor-  
poris quibusvis, quæ nullas immediatè arte-  
riolas suscipiunt; non minus, quàm lignum  
aquam imbibit; ac, pluviâ extrinsecus in-  
cidente, per totum madescit. Subterfugi-  
um scilicet ἐνπερίστωπον! Spongia quidem  
humecta hoc modo madorem imbiberit;  
lignum autem forinsecus acceptum humo-  
rem haud altè in se demittit, nisi putref-  
cat: etiamsi, vivente plantâ, ductus &  
canaliculi interiores, non modò succum  
alibilem, sed & aerem quoque jugiter  
hauriant.*

Addit porrò, licèt sanguis nullus illic  
appareat, eundem tamen, *sub spirituoſi va-  
poris specie, in intima omnium partium se  
insinuare.* Nimirum sanguini illi *Gygis* an-  
nulus obtigit, cujus virtute inconspicius  
evaderet. At quonam quæſo indicio *Deu-  
ſingio* innotuit, sanguinem ibidem deliteſ-  
cere, adque vicina quæque loca perrep-  
tare? In *phlegmone* quidem, aut *ecchymosi*,  
sanguis extra vasa effunditur, ac livorem  
primò,



primò, mox nigrorem induit: similiter in *ophthalmia*, sanguis extra vasa eliminatus, in vicina quæque loca transmittitur; (quanquam *Galenus* non propriè sanguinem, sed potiùs *seri* quandam speciem transcolari voluit;) neque id unquam, rebus ex naturæ instituto sese habentibus, sed solummodò ob solutæ continuitatis speciem aliquam, contingit.

1. De sympt.  
caus.

Pari verisimilitudine, ne *septum cordis* alimento sanguineo defraudaretur, ipsi quoque de liberali commeatu prospexit; sanguinèmq; ex utroque ventriculo affluum, ipsius necessitati suppetias ire voluit. Adeoque, ejus arbitrato, sanguis non solum è dextro cordis ventriculo in sinistrum per intergerinum parietem translabitur; sed etiam mox, lares priores revisurus, idem in dextrum (*æstûs marini instar*) reciprocatur. Nam quid obftet, quo minùs sanguis (dum utrinque in *septum cordis* arietat, idèmq; altè ingreditur) ubi ad ejus meditullium pervenerit, in ventriculos quoque ipsos huc illuc contrariis motibus feratur?

Secundò, Qui maximè nutriuntur, pauxillo sanguinis præditi sunt: macilenti autem amplis venis, copiosoque sanguine gaudent: adeoque animosi plerunque sunt, résque

resque suas alacrius peragunt, utpote spiritibus opulentiores. Ac propterea, qui habitu corporis graciliore constant, liberalem venæ sectionem ferunt; quod musculosa eorum pars, strigosior cum sit, minore quoque refocillatione indigeat. Venæ autem etiam si exhauriantur, levior tamen istuc damno contingit; modò quantum *lampadi* satis est, superfit. At verò torosis & præpinguibus detrimentum majus à copiosa sanguinis evacuatione evenit; quia corporis eorum habitudo sanguine calidior depauperata, serosis humoribus oppletur, facileque in cachexiam degenerat. Similiter, in habitiore corpore, ubi ampliores partes nutriendæ veniunt, illic quoque, pro earundem instauratione, liberaliore sanguinis (adeoque & cibi) copiam opus esset. At obesuli plerunque parcè victitant, quia venas angustiores obtinent; vitamque ferè ociosam degentes, exiguum faciunt nutrimenti dispendium. Nimirum pars chyli minima abit in sanguinis penum (neque enim tam repentina, ac vulgò creditur, fit illius absumptio) reliquum autem, secreto inutili, aliovorsum means, corporis refectiōi inservit. Quæ tamen ejus pars ad cor tendit, oleosior est, reparandisque spiritibus idonea:

nea : qui inediâ, aut morbo pauperiores facti, à vino redardescunt denuo,

*Ut vigil, infusâ Pallade, flamma solet.*

Ovid. Trist.  
l. 4. eleg. 5.

Ideoque Hippocrates ait : Famem vini potio solvit. L. 2. aph. 21.

Atque ob hanc causam ( ut etiam fabel-  
læ locus sit ) Di Homerici, tanquam cicadæ, exsanguis sunt.

Ἵου γὰρ οἶτον ἔδουσ' ἔ' πίνεσ' αἰθοπτα οἶνον. Iliad. 3.  
Τένεχ' ἀναίμωτον εἰσι, καὶ ἀθάνατοι καλέονται.

*Quia panem non comedunt, neque vinum rubrum potant ; ideoque exsanguis sunt, & immortales dicuntur.*

Ac propterea Alexander, ictu sagittæ Plutar. de fort.  
faucius, sanguinemque profundens, adu- Alexan. O-  
latoribus subridens dixit, Hic quidem est var. 2.  
sanguis, non ichor, οἷος πρὸς γὰρ ῥέει μυχῶ- Cæl. Rhodig.  
ξεωσι θεοῖσι, qualis stillat de sanguine Di- l. 5. c. 19.  
vum. Hinc μονόγεαμμοι ab Epicuro di-  
cuntur ; quasi delineati solum ; non addi-  
tis reliquis, quæ justam picturam absol-  
vunt. Italis Schizzo dicitur. Ideoque Ci-  
cero ait ; Hominis esse specie deos, consiten- De nar. deor.  
dum est. Nec tamen ea species corpus est,  
sed quasi corpus : nec habent sanguinem, sed  
quasi sanguinem.

Deusfin-

*Deusfingius* hic etiam nobis adversatur; dicitque, *sanguinem fervidiorem, tenuiorem, adeoque acriorem, magisque mobilem, hand facile particulis suis exilibus corporis partibus adhærescere: imò potius continuâ agilitate suâ partes ipsas corporis hinc inde atterere; licet aliquibus particulis sui alicubi agglutinetur.*

Illius itaque sententiâ, salices, aliæque arbores fluminibus adsitæ, à rapidè præterfluente aquâ parùm alerentur: cum tamen, præ cæteris arboribus, celerrimè crescant.

*Anat. de Circul. sang. c. 5.*

Laudat etiam *Pecquetum*, dicentem, *id, quod in carnes coierat, brevi senescere, supervenientique nutrimento cedere: adeoque quod algoris offendiculo coaluerat, calidi fluoris accessu dissolvi; interceptumque iter rursus aggredi, ac repetere officinam.*

Scilicet, ut aqua noctu gelascens, orto prostridie Sole, liquefcit, & in fluorem pristinum revertitur: sic Natura actum continuè agit, intermissumque, aut præpeditum opus redintegrat; miserèque, *Sisyphi* instar, operam ludit. Fatale nimirum sanguini est intestinum bellum: dum macilentis nutrimentum pariter suppeditat; &, ob magnum acremque fervorem, quod assimilatum erat, citissimè abrodit!

Mirifi-

Mirificum autem est, quod postea ad- §. 72.  
dit: *Famem non esse semper proportiona-*  
*tam indigentiae naturæ. Quamobrem ve-*  
*rò? Aliquando, inquit, plus appetitur, ac*  
*comeditur, quàm pro nutrimento partium*  
*satis est: aliquando appetitus languet, ubi*  
*partes corporis extenuatæ refectiorem pos-*  
*cunt.*

Nempe, dum illi cum voluptate cibum  
abliguriunt, duntaxat gula gaudet: cor-  
pus enim alimento pristino saburratum,  
ingesto præpropere novo, opprimitur. His  
autem, licet reparationem postulantibus,  
appetitus tamen abest; quia itinera, per  
quæ novus commeatus transeat, à pravis  
humoribus obsidentur: deestque ( ut  
sic loquar ) desiderium novæ instaurati-  
onis.

Quæ de fermento postea subnectit: *Pa-*  
*rum ejus obesulorum sanguini subesse, idque*  
*temperatiore qualitate esse præditum, ac*  
*modicâ quantitate ventriculo communicari;*  
*indèque fieri, quòd non adeò magnâ fame*  
*torqueantur: ea omnia commentitia esse*  
*arbitror, adductaque solùm, ut scenæ in-*  
*serviant: siquidem parum recentis chyli*  
*instaurationi sanguinis sufficit. Ex ejus*  
*autem irrequieto motu fermentatio prove-*  
*nit. Sufficitur nempe sanguini deperdito*  
*succus novellus per ductum thoracicum*  
L dela-

delatus ; sed, ob exilem copiam, vim suam tenuiter exerit.

Et cum magna pars sanguinis ( si non omnis ) spiritibus cudendis, excitandove calori impendatur, atque illorum dispendio consulendum sit, inque eum finem plusculum sanguinis absumatur : non intelligo equidem, cur illius reparandi necessitas *famis* nomine venire nequeat. Imò verò odores quoque, dum spiritus refocillant, *famem* simul aliquatenus depellunt : quemadmodum *Democriti* ( panis calentis odore triduo sustentati ) exemplo luculentè constat. Quid enim, existimabimúsne, nihil esse nutriendis partibus idoneum ; nisi quod, crassi glutinis instar, iisdem adhærere possit ?

*L. 7. meth.  
med. c. 6.*

Ita quidem videtur censuisse *Galenus*, ubi ait : *Omnium, quos novimus, ciborum maximè nutriens caro suilla est ; quæ glutinosum succum crassumque generat. Nam nec alio esse habitu potest, quod in summo sit nutriens : quippe adhærere id debet, & firmiter affigi ; non autem præ tenuitate diffluere.* Quemadmodum scilicet parietes, ædésque magnorum lapidum congerie extruuntur. Pari ferè ratione *Huartus*, ad memoriæ stabilimen, laudat anguillarum esum : quòd scilicet viscosus cibus, inuncandis atque agglutinandis in cerebro

*Exam. Ingeniorum.*

bro objectorum speciebus, rerumque ideis, sit maximè accommodus. Attamen quercus, arborum firmissima, solà pluviam ac rore, in vastam amplitudinem excrescit, atque in ævum durat.

Tertiò, Si animalia sanguine nutrirentur, nulla (superstite illo) fame interirent. Quemadmodum lucernæ flamma non extinguitur, quandiu inflammabilis olei in eadem vel minimum suppetit. Quod tamen non fit: namque plenis propemodum venis, homines inedia occidunt. Ob eandem etiam rationem, phlebotomia largior mox famem necessariò induceret.

*Deusfingius* mirè hîc nobis occinit, dicens; fame aliquem posse enecari, quòd illa non oriatur à nutritionis defectu, ac sæpe numero ne quidem cum alimenti defectu conjuncta sit; sed ab alia aliqua causa profisciscatur, quæ ventriculum afficiat, ac cor in consensum trahens, fortè lipothymiam, vel syncopen, mortemque ipsam inducat.

Diuturna fortassis fames eum finem habeat. Nihilne igitur inter eam atque syncopen discriminis? Imò verò incipiente quoque inedia, molestus vellicatus contingit, etiamsi sanguinis ubertas supersit. Neque tamen is interea, tam brevi spatio, pravis qualitatibus magnopere afficitur.

Eâdem profectò rationis specie dixerit, neminem à morbo aliquo extinguì ; verùm omnes, ob anhelitûs defectum, fato concedere. Neque etiam causam satîs idoneam video, ob quam famis causam primariam in ventriculo constituat. Experimur quidem illîc, in diuturniore jejunio, irrequietam vellicationem : ea verò exoritur à molesta vasculorum exinanitorum suctione, quâ ventriculum veluti mordicant, atque ad cibum appetendum sollicitant.

3. De nat. facult. c. 13.

Quartò, Si sanguine nutrimur, & hepar est sanguificator (utî *Parisanus* censet, & vulgò receptum est) quidni hoc in immensam molem excrescit? imò cur interdum contabescit? Adeóne hepar improvidum est, ut suis rebus lautius non prospiciat? præsertim, cùm (auctore *Galeno*) *omnis omnium partium attractio fiat in proprium commodum*, & ipsæ primariam sui curam habeant. Hepar autem pars macilenta est, & minimum nutrimenti suppeditat. Certè incongruum esset, in culina, aut triclinio famem tolerare.

Dices, à provida id Natura fieri, ne hepar ultra modum excrescat. At quidni eadem Natura hypersarchofes in ulceribus prohibet? Hîccine ejus providentia dormit?



mit? E contrario autem, qui fit, ut fonte sanguinis integro, sive hepate rectè sese habente, reliquum tamen corporis macrescat? Quemadmodum in *Rachitide* contingit, morbo apud nos pueris familiari; qui hepar habent prægrande, dum interea musculosæ partes omnes emaciantur? *Vidi*, Anthrop. pag. 203. inquit *Riolanus*, in *tabidis post mortem dissectis*, quibus omnes carnes consumptæ fuerant, jecur integrum perstitisse; quod multi credebant eliquatum & exhaustum à diuturno alvi profluvio. Profectò sæpe evenit, ut, quibus immensum jecur est, illi comedones, macrique sint; sed & agiles, validique. Spiritibus enim abundant, quibus sanguis materiam suppeditat.

Respondet *Deusingius*, sanguificationem nulli parti singulatim convenire.

Certè etiamsi materia sanguinis ex chyllo constet, qui in corpus variè huc illuc diditur; pars tamen ejus in cor delata, hujus virtute duntaxat rubicundum colorem induit, sicè in astacis, cancris, ostreis, cochleis, aliisque pluribus, albescat. Imò verò ne rudimentum quidem ullum sanguinis in hepate adipiscitur, sed cordi soli purpuram suam debet. Nam aliquandiu post efformatum sanguinem, hepatis demum exortus conspicitur, idèmq; planè candicat. Postilla verò sanguis in hepate

à bile suâ defæcatur, & aliquatenus perficitur : adeoque originem suam ipsi debere, vulgò creditum est.

De gener. c. 9.  
pag. 239.

*Velthufius* verè ait : *Ex historia formationis fœtus in utero, certissimum est, fœtus partes ex sanguine, qui à puncto saliente per arterias propellitur, non efformari. Tam citò enim postquam punctus saliens conspectus est, reliquæ fœtus partes efformantur ; ut sanguinis quantitas, quæ tunc in meatibus venalibus conspicitur, par non sit molâ illi, quam Embryo exæquat. Idque ex narratione Cl. Harvæi ; ubi ait : Miretur aliquis, tam brevi temporis spatio à primo sanguinis punctique salientis ortu, fœtum intra annum formari, integrèque perfici. Enimvero circa diem decimumnonum, aut viceesimum Novembris, punctum illud primò comparet ; (loquitur de Damis) circa viceesimum primum, aut postridie ejus, vermiculus sive galba informis conspicitur. Sex autem septémve inde diebus, fœtus adeò perfectus discernitur, ut marem à fœmina internoscere, pedésque formatos, ungulas fissas, mucosas, parùmque flavescèntes videre planè liceat.*

Exercit. 68.  
pag. 232.

Et quamvis sanguis postea partibus singulis communicetur ; videtur tamen rationi congruum, ut culina ipsa, hepar nempe, victu abundet. Videmus enim coquos,

quos, parandis cibis occupatos, præ reliquis pinguescere. Neque enim partibus excrescendi modus à Natura definitur: ipsúmque hepar interdum in notabilem amplitudinem augefcit; quemadmodum in saginatis *anseribus* videre est; in quibus temperies hepatis calidior, incrementum ipsius nequaquam impedit. Similiter pueri (ut diximus) *Rachitide* laborantes, magnis jecinoribus donantur; dum interea reliquæ corporis partes (præter cerebrum) summâ macie extabescunt.

\* *Rhases* & † *Avicenna* aiunt, Eos, quibus digiti longiores obtigerunt (adeoque macrent) prægrande hepar nactos esse. Illisque *Riolanus* est *ὀμόλνθ*. Credibile itaque, *Arachnen*, in araneam transformata, grandi hepate polluisse. Verùm ut seriò agam, *pisces cartilaginei jecinora habent ampla & præpinguia*, è quibus multum olei conficitur: cùm tamen parum nihilve pinguedinis cæteris eorum partibus adnascatur.

\* 17. *Contin.*  
† 3. 1. *doct.* 2.  
*tract.* 1.

Massarius in  
9. *Plin.* pag.  
145.

Neque causam aliquam verisimilem video, cur macritudo ejusmodi cordi transcribi debeat: ubi tamen, ut sæpe fit, nullum ulcus, aut aliud malum cordi conjunctum fuerit; aut tabis, ulcerisve signa alibi appareant. Nec tamen inficias iverim, quin interdum (ob memoratas à

Plautus *Au-*  
*lularia.*

*Deusſingio* cauſas ) macri homines, qui, ceu  
*agni curiones, oſſa & pelles toti ſunt*, ali-  
quando ſanguinis paupertate laborent ; ne-  
que ſemper *lares* ſplendidos colant.

Quintò, Si ſanguis in rorem & cambi-  
um ( ut vocant ) tranſiret ; proculdubio in  
habitu corporis, veniſque capillaribus al-  
bicantior cerneretur ; utpote parti inde  
nutriendæ propinquior. Attamen ibidem  
non minùs floridæ rubedinis, quàm in  
corporis meditullio, vaſiſque, conſpici-  
tur.

Argumentum hoc ( meâ quidem ſen-  
tentiâ ) non minùs aduerſus *Deuſſingium*,  
ſanguinis circuitum admittentem ; quàm  
*Parifanum*, eundem pernegantem, militat.  
Neque enim ab uno ad aliud extremum  
ſaltuatim pervenitur. Deberet nempe ſan-  
guis, priuſquam in carnem migraret, ru-  
bedinis eſſe dilutioris, dein pallescere, ac  
demum carnis albedinem induere. Quod  
profectò fieri, nemo ſanæ mentis dixerit.  
Quinetiam mihi iniquum videtur, & à  
Naturæ conſuetudine alienum ; ſanguin-  
em, illuſtri jam purpurâ fulgentem ( poſt  
præſtita corpori egregia beneficia ) mox,  
honoribus exutum, vili carnis pallorẽ  
ſordeſcere.

Neque

Neque etiam alimentum spissitudine aliquâ opus habet, ut partibus gradatim adhæreat. *Ædes*, ut dixi, sic conduntur: animalium verò corporibus nutrimentum potius *vaporis* specie apponitur.

Sextò, Vir in *Oeneade*, apud *Hippocratem*, plurimum emaciatus, cum ab alimentis non instauraretur, sed indies contabesceret magis; venâ sectâ in utraque manu, sanguinéque educto donec exsanguis redderetur; hoc uno remedio perfectè liberatus est, cum omnia incassum antea tentata fuissent. Quod certè non contigisset, si sanguis alendis partibus inferviret. Nempe chyli duplex præcipue fluxio est: altera, instaurandis partibus, per succum nutritium; efformandis spiritibus vitalibus altera, sub specie sanguinis. Harum unâ præpollente, languescit altera.

Quid ad hæc *Deusfingius*? Nimirum negat se videre, quâ talis chyli fluxio, pro instaurandis partibus, congruat cum succo illo nutritio, à cerebro & medullâ spinali per nervos derivato; quem à D. *Glissonio* D. *Charletonum* mutuatum ait. Illam autem sententiam (sed diversimodè ab eo expressam) ipsemet *Glissonius* se à me accepisse, ingenuè fassus est. Eandemque postea

L. 5. *Epid.*  
t. 25.

Anat. hepat.  
c. 45. p. 413.

postea in Ἀντιάτρειβῃ, quā D. Thruston responsum dedi, latiùs explicui; quam, si libet, consulat.

Mirabile autem est, quod addit, *Non fuisse* (in casu proposito) *chyli, ad cor affluentis, revulsionem inde factam per sanguinis missionem; sed validiorem potius ejusdem in locum exhausti attractionem: nisi fortè ille, ipsà sanguinis missione perterrefactus, metuensque ne similiter exciperetur, ab itinere desisteret, fluménque suum aliorum converteret.*

Quo lepido argumento, in *apoplexia*, à sanguinis exhaustione abstinendum esset, ne arteriæ exinanitæ novum atque uberibrem sanguinis accursum sollicitarent: nisi μορμολύκειον aliquod interveniens ab ulteriore progressu absterreat.

Huic itaque responso parum fidens, seriòque agens; ait, *Emaciationem illam obortam fuisse, ob nimiam sanguinis acrimoniam, ac fervorem; quibus non modò ipse sanguis pro nutriendis partibus ineptus evadebat, sed & substantiam partium atterebat nimium, atque dissolvebat, (scilicet ut lima, aut aqua Strygia ferrum;)* quin & continuo fervore easdem aridiores strigosioresque reddebat. Dempto igitur magnam partem illo acri ferventique humore, temperatior, magisque nutritioni aptus sanguis postmodum subnatus est.

Quì

Qui fit igitur, ut ictero laborantes (quibus sanguis bile copiosâ suffertus est) haud subito macrescant, sed habitiore etiamnum corporis constitutione gaudeant? *Mulier P. 29. f. 3. etiam, ex menstruorum octimestri suppressione gracilima facta, libris tribus sanguinis, Galeni jussu, intra triduum eductis, ad pristinam valetudinem restituta est. l. 6. Epid.* Numnam verò illa quoque tam acri ferventique sanguine abundabat? & ciborum reliquiarum parvarum, exustarum, per alvum demittebantur? Dicet forsitan ita fuisse, ut res ipsa illius sententiarum conveniat.

Septimò, Si sanguis nutriret, pinguis ac glutinosus ei muneri accommodatissimus esset. Serum enim appositionem prohibet; ac propterea ulcera ichorosa haud facile consolidantur. Ejusmodi autem sanguis in venis reperitur; cum arteriosus dilutior sit, & sero magis prægnans: utpote qui (ut diximus) partem oleosiorum in flammulam absumpserit. At verò sanguinis fluor ad habitum corporis per arterias instituitur, indeque rursus per venas ad cor remeat. Quod argumentum licet adversus te (circuitum sanguinis negantem) nihil ponderis habeat; habebit tamen fortassis apud eos, quibus de *Circulationis* hujus veritate persuasum est.

Hic

Hic turbat iterum *Densingius* : Si sanguis, ait, solis spiritibus generandis inserviret, minus serosus esse deberet in arteriis (utpote per quas in corporis habitum fluit) quàm in venis. Serum enim, spirituofo sanguini admixtum, maximè spirituum vigorem obtundit : ut in hydropicis.

Imò verò dum sanguinis oleum (ut sic dicam) spiritibus, sive calori gignendo infumitur ; eàdem operâ pinguiore sui parte depauperatur ; quam, novo chyli adventu, refarcit denuo in *lampadis* utilitatem.

Ad eos autem, qui *ascitide* laborant, ea res nihil attinet : quorum aquosa materia, aut succus nutritius tenuior (nam foco impositus in albuminis speciem concrefcit) sanguinis culpâ non oritur (ut vulgo creditum) sed ab hydatidibus enatis, aut ulcusculo alicubi (& præcipuè in glandulis) oborto : ob quam continuitatis solutionem, succus iste alibilis è lymphæductibus, aut aliunde in abdominis cavum depluit. Et licèt discrimen inter utrumque sanguinem haud adeò oculis conspicuum sit : videtur tamen ex eorum sententiâ vel inde deduci : quòd urinæ materiam ex arteriis emulgentibus depromptum cant.

Quin



Quin ipsemet *Deusingius* fatetur, *consentaneum esse, sanguinem arteriosum à venoso consistentiæ ratione differre.* Nihil tamen commoveor *Pecqueti* auctoritate, qui *etiam mutatarum carniū fæces venoso sanguini admixtas* voluit. Neque mihi placet admodum sententia *Highmori*, dum *in arthritide, & doloribus Ischiadicis* (quibus tamen morbis cum sanguine parum intercedit negotiū) *venarum capillarium apertionem, majorum vasorum sectioni præfert.* Nisi eam ob causam instituatūr, quòd venæ minutulæ loco dolenti viciniore sint; atque etiam (si cum cucurbitulis præsertim res agatur) plusculum feri acris, locūque lancinantis, eādē operā exhauriatur. Nec magis intelligo, quamobrem in coxendicum dolore, venis in parte auriculæ posteriore sectis, juvamen ullius momenti sperandum sit. Etiam si is curandi modus apud nos à mulierculis, in *Rachitide* morbo crebro usurpetur.

*Dissert. Anat. de circul. sang. c. 5.*

*Disquis. Anat. l. 3. part. 2. c. 6.*

Everfis jam (saltem aliquatenus) amotis- que iis machinis, quibus *Cl. Deusingius* fundamenta nostra luxatum ivit: accedunt (velut copix auxiliares, succenturiatique milites) argumenta alia; quæ si non robore singula, juncta tamen numero valeant: quanquam gregarios hos haud adeò *ἐπιστάτας* aut facile fugitivos arbitror.

Recipio

Recipio me itaque in aciei ordinem, redeo-  
que ad institutam pugnam ; conaborque  
pluribus argumentis opinionem antiquam  
animo ejus evellere.

I. Quæro itaque primum, si arteriarum  
sanguis partium nutritui inserviat ; quid  
tanto earum in *intestinis* opus fuerit nu-  
mero, atque amplitudine ? Conducunt qui-  
dem plurimum ad *fotum*, promovendisque  
eâdem operâ excrementis ; ad *nutricatio-*  
*nem* autem, tam amplis vectigalibus nihil  
erat opus. Contrâ autem, *cerebri* ingens  
est magnitudo ; sanguinis parca admodum  
copia. Quòd id vel nulli motui, vel valde  
obscurò destinetur.

Rolfincius  
Dissert. Anat.  
pag. 1166.

Aliqui censent, Naturam tot arterias in-  
testinis donasse ; ut, in *Embryone*, *materni*  
(quo tum temporis utitur) *sanguinis recre-*  
*menta*, *meconium dicta*, ad *intestina per illas*  
*deponerentur*. At neque quicquam sangui-  
nis à matre ad fœtum pertingit ; neque  
etiam, in jam nato, fæces eâ viâ ad intesti-  
na deferuntur.

L. 3. Anat.  
c. 4.

*Varolius*, non solum *venas*, sed etiam *ar-*  
*terias mesaraicas chylum attrahere*, eumque  
*similiter in sanguinem convertere*, inque  
*cordis sinistrum ventriculum (ut ex eo spi-*  
*ritus vitalis generetur)* deferre statuit.  
Scilicet ad *Ulni mentem* !

Spige-

*Spigelius* credibile cenſet, venas & arterias meſaraicas chylum ex inteſtinis haurire; illas plùs, has minùs: hâſque ad hepâr, illas ad lienem transferre voluit. Hæ autem ſententiæ, poſt agnitam ſanguinis circuitionem, indignæ ſunt quæ reſutentur.

2. Si ſanguis partium nutritioni deſtinatur; in quem finem, obſecro, venæ magnitudine pares, imò ampliores efformatæ ſunt? Quid opus erat tam abundante ſanguinis recurſu; ſiquidem parciore gurgite, gracilioribùſque arteriis, totius corporis alimonix ubertim proſpectum fuiſſet? Saltem minores venæ abſumpto partim ſanguini reducendo ſuffeciſſent. Dicent forſitan, partem ſanguinis *chyloſam*, ac necdum perfectè coctam, in nutritionis uſum delibari. At præterquam quòd ea pars crudior alendo corpori inidonea ſit; atque in perfectè ſanis, omnis ſanguis florido colore rutillet: eadem nihilominus difficultas ſupereſt. Et ſi *arterioſus* ſanguis in hunc finem requiritur: cur foetum in utero ab Umbilicali *vena* nutritatum omnem deducere exiſtimant?

3. Si animalia ſanguine nutriuntur; cur Deus, in veteri *Teſtamento*, iteratò, ſeverèque ſanguinis eſu interdixit?

#### 4. Arteria

Anat. Hepat.  
c. 42. pag. 389.  
hist. an. l. 1.  
c. 7.

4. Arteria hepatica, capsulæ communi inclusa, ad hepatis parenchyma non deferitur, neque sanguinem, in illud effundit; quemadmodum D. *Glissonius* luculenter testatur. Ipsæque *Aristoteles* ait : τῇ ἀορτῇ ἔκ κοινωμένη, jecur cum aortâ non communicat.

5. Quî fit etiam, ut membranæ, vasa, imò carnes quoque ipsæ (modò sanguis omnis elyatur) albicent, non autem nativam purpuram præ se ferant? Nam quæ de *lacte* narrant, fabulæ sunt; sanguinique natales suos non debet.

6. Si sanguis per musculorum substantiam percolaretur, transmeante parte ejus tenuiore (veluti per incerniculum) reliqua crassior, pituitosior, ac viscidior, hæreret in vestibulo, tumoresque œdematosos gigneret.

Sextupl. digest. alimenti humani.

7. Quidni etiam sanguis, constrictione cordis in arterias, indèque in habitum corporis propulsus, per obvia quæque vulnera, aut ulcera, ruptamve solùm cuticulam, æquè facilè elideretur foras, atque angusta venarum oscilla subiret? *Helmontius* certè censuit, venarum exteriorem tunicam porosam esse, pèrque eam sanguinem transudare alimentarium.

8. Si sanguis ex arteriis eliminaretur, metus esset, ne oscilla venularum, sanguini

guini illi excipiendo destinata (præcipuè, si is, venæ sectione in proximo institutâ, aliorum diverteret) ab influxu tantisper intermisso, aut sponte conciderent, ac coniverent; aut à congesto ibidem sanguine, finibus eorum gravius incumbente, comprimerentur; adeoque facilis illius subingressus præcluderetur.

9. *Theodorus Kerckringius ait: In fœtibus, arteria pulmonalis expleta est sanguine.* *Observ. 99.*

*Hic non aliunde, quàm ex dextro cordis ventriculo eò pervenit. Quid autem hîc obiret negotii, si non nutriret pulmones?* Idem nempe, quod in natis jam animalibus (ob inspiratum aerem frigidiorum) uberius exercet: nimirum ut pulmones calore suo foveat; arceâtque aeris injuriam. Quæ necessitas cum in fœtu (ob demegatum aeris frigentis accessum) minor sit; ideo sanguinis pars solùm exilis ad eos pertingit; reliquum autem ejus per foramen ovale, & canalem arteriosum secedit.

Quinetiam subdubitat, *numnam venæ & arteriæ, venas atque arterias alias habent, quæ sua illis alimenta suppeditent? & sic porro.* Quasi verò ab interno gurgite haud adeò expeditè ac commodè nutriri queant (si modò sanguis ei usui inserviret) atque à sanguine foris adveniente, & va-

M

forum

vasorum tunicis incluso. Plumbeum certè hoc telum.

10. *Ludovicus Nonnius carniū esum cæteris victibus præfert, ob sanguinem.* Hepata animalium itaque plurimūm nutrirent; cū tamen prætenuem alimoniam suppeditent: eandēque etiam non à sanguine ipso, sed à vasis potiùs, ac membranis, naturā albicantibus. Et si aliter foret, *Pythagorei* sanè infelicitè victitassent.

11. Videmus in demortuis hominibus, adacto, syringis ope, in arteriam (puta axillarem) liquore aliquo; sanguinem faciliè celeritèrque in venam conterminam, (ligatā hac, apertāque prope cubitum, ut in sanguinis missione fieri solenne est) transmeare, indēque foras non minùs continuato filo profilire, quā aliās in vivo animali usu venit. Quod profectò (emigrante è vasis sanguine) ob impeditos in defunctis meatus, non contingeret.

12. Si sanguis ex arteria emulgente in renis substantiam elutriatur, priusquam venam cognominem ingreditur: qui fit, ut non semper adsit cruenta mictio?

13. Præterquam, quòd sanguis animalium, nutritui eorū inidoneus videatur (gummi enim potiùs, aut resinæ in plantis, naturam refert, quā succi earum tenuis

nus & alimentarii : ) non est verisimile, eundem, tam tenuium vestigalium ope, tot ingentibus impensis posse sufficere. Quippe sanguis omnis ab exili illâ per *ductum thoracicum* delatâ refectione constat : quæ partium totius corporis perpetuò avolantium damno resarciendo prorsus impar æstimanda est.

14. Quid plura accumulem ? Sanguinem, ex arteriis effluentem, in spatia intermedia non protrudi antequam venas ingrediatur, vel inde constat, quòd aliàs lymphæductibus non fuisset opus. Siquidem serosus liquor, à nutritu redundans (cui deducendo illi inserviunt) potuisset commodè, unà cum refluò sanguine, per venas ad cor transduci. Aut certè, stagnante illo, oboriretur partium tumor, atque inflammatio : quemadmodum in contusione, atque ecchymosi solet contingere. Non potest autem sanguis, suis canalibus coercitus, in vicina loca evagari, aut aliquantulum deflectere. Est enim ejus cursus *ῥιζυλῶν*, continuato filo it, reditque.

Videtur tamen, fateor, verisimile, sanguinem, in *hepate*, è Portâ egredi. Nam aliter modum idoneum non video, quo is à bile liberari queat. Alibi verò, illius emigrationis nulla (quod sciam) causa est.

Si enim vasa sanguifera passim in finibus patefcerent ; verisimile esset dari pharmaca, quæ sanguinem inde, non minus quàm alios humores, educere possint. Quale tamen hæcenus nullum innotuit : ut pridem diximus.

At enim, inquires, si arteria venæ immediatè conjungeretur ; fieri aliter non posset, quin hæc (ob vasorum conjunctionem) eodem pulsationis ictu cum arteria feriretur. Atque ita profectò contingeret, si vasa illa osculis suis sive extremitatibus unà copularentur. Natura autem, admodum solers, alium, ni fallor, connectendi modum instituit. Nimirum conjicio (ἐκ εἰδῶς, ἀλλὰ ἐκ ἐξέζων, non visu, sed conjecturâ fretus ; & cum Euripideæ Nutrice possim dicere, ἔ μάντις εἰμὶ τ' ἀφ' ἧ γυνῶναι σαφῶς, *vates non sum, incerta certò ut noverim*) oculorum enim aciem tenuitas vasculorum eludit ; quæ adeò exilia sunt, ut, *tanquam filamenta minima, in venarum tunicas obscurè repant, sensumque omnem prorsus effugiant* : conjecturâ, inquam, auguror, arterias obliquè in venas, juxta harum fines ingredi ; quemadmodum ductus biliaris, & pancreaticus in intestinum ; atque Ureteres in vesicam inferuntur. Quippe arteriæ in cervis & damis prægnantibus inflatæ, vicinas venas pariter


Harvæus de  
gen. an. pag.  
289.

Ibidem, pag.  
64.



*riter distendunt: quod illis, ab inflatis venis, vicissim non contingit.* Et quia pulsatio arteriarum, ut dixi, ad venarum extrema pertendit; inde fit, ut istæ ad earum saltum non tripudiant. Vis enim illa, siue impulsus, deorsum vergens, in fine vas eluditur. Quæri autem hîc possit, quomodo igitur fiat hæmorrhagia, si vasa nusquam hîent? Existimo itaque, in naribus, ano, utero, & si alibi fluxio ea naturaliter contingat; venas ibidem tenui admodum cuspidè, ultra arteriæ inoculationem, parum propendêre. Nec posse tamen sanguinem illac facîle profluere: non magis equidem, quàm ex subtili tubuli oscillo liquor aliquis sponte extillaverit. Agitatu autem aut concussu validiore id fieri possit: quemadmodum hîc etiam, à fervore, aut motu concitatioe interdum evenit.

Etenim si sanguis in media spatia elutriaretur, nec compendiariâ viâ è vase illico in vas transfiret; fieret, non rapidè (ut solet) sed pedetentim, & temporis spatîo aliquo, illius in venas reductio: Quemadmodum aquâ è puteo exhaustâ, non succedit continuò ac confertim nova; sed sensim duntaxat, atque interpo-



*Specim. Phil.  
lof. Cartes.  
pag. 148.*

sitâ morâ, id damnum refarcitur. Ac propterea *Lipstorp*ius inscitè ait: *Aqua in terræ venis, & in fluviis circulariter fluit, non secus ac animalium sanguis in eorum venis & arteriis: ita ut per patentissimos terræ meatus tanta semper aquæ quantitas à mari versùs radices montium redeat, quanta ex montibus egreditur: ut proinde non sit necessum, mare augeri, ex eo, quòd flumina omnia in illud intrent. Qui fit igitur, ut (post diuturnas siccitates) flumina vadari facilè queant, imò interdum prorsus exiccentur: eadèmq;e, pluviosis temporibus, ultra ripas suas exorbitent? Ille vero, communi errore deceptus, ineptam sententiam amplexus est. Omnes enim fontes originem suam pluvix debent. Quippe (ut alia omittam) aqua marina, ne multiplici quidem per terram transmeatu falsuginem amittit: nec potest, (etiam à maris æstu impulsâ) fursum scandere, ob hiantia ubique foraminula. Idèmq;e sanguinis ad cor recursum accideret; nisi arteriarum ora venis immediatè conjungerentur.*

*in Virgil. Ecl.  
gam. 10.*

Adeoque fabula censenda est, quod à *Servio* narratur, pateram auream scilicet in *Arethusa* inventam, quam *Olympionices* in *Alpheum* miserat.

Exemplo autem res jam dicta fiet illustrior. Sit itaque (ut vides) ampulla vitrea strictioris orificii, & capacitatis ido-

neæ C. aquâ femiplena : ad hujus fundum demittatur tubus A. qualis in hauriendo tabacco usurpari solet : sitque caput sive summitas illius D. eodem referta. Mox immitte in idem vas tubulum alium breviorē ἀκί-  
φαλον sive capite truncum B. qui solummodò aliquantulum infra collum ampullæ descendat ; non autem ad aquam E.



pertingat. His ita institutis, occludatur arctissimè ampullæ orificium cerâ sigillatoriâ molliculâ, aut argillâ, ne quid aeris præterfluat. Quibus sic ritè peractis, admove lucernam tabaco ; simulque, ore minori tubulo admoto, suctu effice ut fumus trans aquam in os permeet. Idque iteratò commodèque institui potest. Sin autem cera aut argilla in vitri collo hiet, vel utervis tubulus, supernè extrâque vitrum, rimam agat ; operam omnem planè luseris, nihilque illius fumi ad os perveniet. Res similiter in hoc nostro negotio sese habet. Si sanguis alicubi (solutâ ductuum continuitate) è vasis emigraret : institutâ solum venæsectione, obortóve incute ulcere, aut fonticulo efformato ; mox sanguinis per vasa fluor interciperetur : idemque, paludosus factus, stagnaret ; neque unquam ad cor, ceu mare, percurreret.

Quicquid autem hujus rei sit ; spero, alios aliquando ( quibus plus otii, atque ingenii suppetit ) eandem majore rationum pondere pariter, ac verborum ornatu meliore expolituros. Ego enim hujus rei disquisitionem ulteriorem doctiorum magisque sedulorum indagini libens relinquo. Tantúmque abest, ut hæc nervosè candidéque reſelli moleſtè feram ; ut, si quis certiora doceat, méque errore liberet ; ei maximas gratias ſim habiturus.

# S E C T. XXVI.

Heus *Parifane*, expergifcere ; nam certè ſomnias : neque enim vigilans quiſquam tot deliramenta loquitur. Arteria pulmonalis ingenti hiatu pateſcit ; per quem cor, ſingulis ictibus, magnam ſanguinis copiam ſurſum in pulmones protrudit. Quod ſtadium poſtquam is emenſus eſt, nihilne ejus in ſiniſtrum ventriculum depluit ? *Ne guttula quidem*, ais : verùm omnis in pulmonum damna impenditur. Nempe omnis ſanguis *Bronti*, *Steropique*, & *Pyragmoni Cyclopibus*, ſpirituum (ceu ſulminis) fabricationi inſudantibus, in victum ac ſolatium cedit ; qui eum omnem conſeſtim tuburcinantur. Inſatiabilis hercle pulmonum ingluvies ! Attamen ſanguinis pluſculum

colum in sinistro cordis ventriculo conspici-  
 citur. Falleris, inquis: non est enim ille  
 è pulmonibus deciduus; verùm è *liene*,  
 cordis condo-promo, proficiscitur: sur-  
 sumque, adversus deorsum properantem  
 sanguinem, sensim prorepat; furtimque  
 (frustra obnitentibus valvulis) sinistrum  
 ventriculum ingreditur: ubi, ceu novus  
*Prometheus* (sed meliore fato) ignem *Phæ-  
 beum* depeculatus, protinus proximâ systo-  
 le aufugit foras: partimque sursum, spo-  
 liis his ditatus, *Capitolium* ovans ingredi-  
 tur; partim verò deorsum latus, de reli-  
 quis visceribus (ob natalium splendorem,  
 scilicet!) triumphum agit. Miror pro-  
 fectò, non te puditum esse hujusmodi in-  
 eptiarum.

Alio itaque *Perseo* opus est, qui nobis  
*Andromedam* hanc expediat. Videamus  
 igitur, num *Fortunatus Plempius* eam feli-  
 ciùs exolvat. *Valvulæ*, inquit, *non impe-  
 diunt egressum fuliginum in pulmones* (verif-  
 simè equidem, quia hæ nullæ adsunt) *quo-  
 niam arteria venosa tantùm duas obtinuit  
 valvulas*; (nam pluribus, ad oppessulan-  
 dum eas fores, nihil erat opus. Interdum  
 tamen, licèt rarò, etiam tertia dicitur su-  
 peraddi). *adeoque non ità exactè clauditur  
 hoc vas, sicut vasa alia, quæ tres habent  
 valvulas; sed rimas quasdam habet, per  
 quas*

De fund. Me-  
 dic. pag. 200.

*quas fuligines abunde exire queant : nam & spiritus aliquis eâdem exire debuit, ad pulmonem vivificandum. (Existimabam autem, id commodi abunde præstitum à sanguine è dextro ventriculo in pulmones profluente.) At cur, ait, non simul etiam aer ingressus illac remeat ? Scitè nimirum respondet : quia hic retinetur ad certos usus. Quibus autem retinaculis, quâve remorâ ? Denique, pulmoni nutriendo tantum vas opus fuit, quia plurimum sanguinis ab iis digeritur, (quamobrem verò, cùm tenui substantiâ constent ; adeoque parvo impendio sint reparabiles ?) tum, quia sanguis admodum tenuis est, qui eos alit, & sic facilè dissipatur. Ego verò arbitrabar, partes omnes (ex vestra sententia) sanguine indiscriminatim ali ; perinde ac plantæ duræ, mollésque eâdem pluviâ nutriuntur.*

*L. 6. de us.  
part. c. 17.*

*Colleg. Anat.  
pag. 13.*

*At fallor, scilicet ! Galenus enim ait : Cùm cor ex se moveatur, oportuit ipsum habere corpus validum, crassum & densum ; ideoque sanguine indiguit crassiore. Hunc autem accipit per ramos venæ coronariæ. Idque Julius Iasolinus fieri autumat ab aqua in pericardio contentâ. Est nempe hîc etiam Anaxagoræ homœomeriâ opus ! tum quia pulmones ipsi in continuo sunt motu. Similiter & mare : quod tamen, ob*

ob eam rationem, haud plus dissipatur; nec pedes magis jejunio emaciantur, victu uberiore opus habent, quàm humeri, aut latera. *Et valde quoque à vicino corde incalescunt: calor autem digerit, dissipatque.* At frigent simul pulmones ab inspirato aere. Præterea, cor etiam magis æstuat, motuque continuo agitur; nec tamen huic, adversum has injurias, par auxilium à benigna Natura concessum est. Lufit itaque *Plempius* operam, nobisque eadem aqua etiamnunc hæret.

Pulmones non moventur à *diaphragmate*, sed attolluntur ab ingrediente in eos sanguine è dextro cordis ventriculo. Si quidem & avibus respirantibus *diaphragma* deest; & pisces, anhelitu destituti, eodem præditi sunt. Fatemur quidem, dextrum cordis sinum pulmonum gratiâ fabricatum esse. Non tamen, ut pulmones spumoso ejus sanguine alantur; sed ut sanguis in eo ventriculo (quibus is contigit) ob viciniam sinistri, calefactus, pulmones ipsos refocillaret; ibidemque aere imprægnaretur: quo adjutore, in sinistro ventriculo (flammulæ ope) vitales spiritus procuderet. Ut mox clariùs dicetur. Licet autem piscibus pulmones desint, adeoque dextro cordis sinu destituantur: sanguinis tamen circuitus nullo modo corruit;

ruit ; utpote qui proximè è venâ cavâ in eorum cor illabitur , ac per aortam effluit.

*S E C T. XXVII. & seq.*

Quomodo aer, fabricandorum spirituum gratiâ, cor ingrediatur, posthac videbimus. Interea miramur, ea, quæ subtilissimè ab *Harvæo* objiciuntur, nihil tibi negotii facessere. Verùm sic soles ; nugæ tibi videntur ejus rationes ad tuas comparatæ, & imagines muscarum. Et agnosco *Vulcanium* planè *scutum*, quo validiora etiam tela facilè retuderis. Nimirum, fit istuc *summo Naturæ judicio, quo omnes corporis partes spiritus utiles ad se alliciunt, ac retinent ; noxias autem fuligines expellunt : unde facilis eorum separatio.* Quibus autem uncis retinentur spiritus abiturientes ? & in quem finem ? an, ut nutriant ? id, opinor, non dixeris ; an, ut calefaciant ? at ignis calorem nullum ciet, nisi in motu fuerit ; quorsum igitur ? Quid autem fiet, si pauci admodum spiritus adsint, unde ne proximæ quidem arteriæ lautè reficiantur ? Ab his scilicet omnes spiritus illaqueabuntur ; & remotiores partes aut gangrænâ, aut morte ipsâ opprimuntur ; nisi,



nisi, jubente *Parifano*, prudens Natura aliter providerit.

Mira autem hîc, inter alia (ut id obiter dicam) *Parifani* subtilitas; quæ fanè turpissimæ ignorantix absolvi nequit. Nempe, *in vivo animali* (inquit) *lotium*, *arenulæ*, *nec non lapilli à renibus in vesicam descendunt*: *mortuo autem animali, si vesicam follibus infles, aer tamen minimè egreditur, neque urinarios meatus ingredi observabis*. Num propterea vivens illa non recipiebat? Nequaquam, inquam: quia, ab inflatâ, aut aliter compressâ intus vesicâ, interior ejus tunica exteriori arctè conjungitur; adeò, ut nihil aeris per obliquum ductum transmeare queat: quod, in descensu lotii, aliarumve rerum non contingit.

Quæ sequuntur in *Proæmio*, quoniam exilis momenti sunt, neque ad *Circulationis* negotium quicquam faciunt; & potissimum, quia ipse statuo; aeris substantiam Cor ingredi (quod tamen, unâ cum *Harvæo*, non facerem, si eandem tecum, aliisque, de spirituum generatione sententiam amplecterer) objectiones tuas misas facio: etiamsi in iis non pauca occurrant, quæ vellicationem jure mereantur.

Neque

2. Sent. Hip.  
4.

Neque etiam *triumphi* tui diu spectator  
adereo ; qui certè , nisi plurimùm fallor ,  
tibi contigit sine victoria ; (& de quo id  
tibi nunc solùm dicam, quod *Galenus* o-  
lim *Chrysippo*, λάβε μὲν, καὶ κράτει κα-  
λῶς, accipe nihil, & diligenter serva )  
sed te subsequar in *Capitolium*.

---

EXER-

---

EXERCITATIO ANATOMICA  
de motu Cordis & Sanguinis in anima-  
libus.

C A P. I.

**B**Enè habet, quòd debitas *Harvæo* lau-  
des rependas, & ingenuo Viro dig-  
num facis: malè autem, cùm miraris, eun-  
dem totam *Londinensium Academiam* in sen-  
tentiam suam pertraxisse. Id enim tunc  
temporis haudquaquam factum: erânt-  
que, ne fallaris, etiam apud nos veteris  
*Physiologiæ* principiis adeò imbuti, ut no-  
va (licet verissima) haud facilè admitte-  
rent. Libri *dedicatio*, leve argumentum  
est: neque enim crediderim, universum  
*Venetorum Collegium* de novo istoc *lien*is  
commento tecum sentire, quamvis illi  
pariter *Tractatum* hunc tuum inscripseris.  
Jam verò, non solùm *Londinensibus* om-  
nibus, sed & *Exteris* permultis (neque  
id *magico susurro* aliquo, aut *Circæâ vir-*  
*gulâ*, ut arbitraris; sed *Magiâ naturali*,  
sive rationum pondere) ut in sententiam  
ipsius irent, persuasit. Inter quos ego quo-  
que nomen meum libens profiteor. De-  
scendi

scendi autem in arenam hanc, non tam inanis gloriolæ aucupio aliquo ( sum enim tenuitatis meæ probè conscius ) quàm quòd tam facili bonæque causæ patronum hactenus defuisse puduerit : tum, etiam, ut vacivas horas tam pulchræ speculationi impenderem. Non sum nescius quidem quàm periculosum mare navigem ; ubi crebræ syrtes & scopuli naufragium , popularisque aura procellas minatur : præsertim, si relictò vulgaris Philosophiæ æquore, angustiores Veritatis isthmus ingredi ausim.

Verùm jacta est alea ; vela dedi ventis ; & quicquid fors tulerit, censuram temerè præjudicantium parvi fecero, modò cordatioribus Viris me veritati litasse persuaserim.

Rescripti tui plures rationes affers. Unam, *ne*, scilicet, *antiqui Sapientes à te derelicti videantur*. Quasi verò eorum tibi magna cura & veneratio sit ; quos aliàs, ubi tute sententiæ adversantur, ἀγνοούμεως καὶ ἀπροχόλως subrusticè, atque amarulenter inceasis. Atque hîc etiam ( nescio quo mentis turbine abreptus ) magnificè te effers, tumultuaris, paratragœdias, & in convitiòrum spumas ebullis ; atque, *Bombomachidis Plautini* instar, totas legiones uno diffilas spiritu. Facis nempe, quod galli gallinacei ἐκκοροδισημένοι solent, qui halitu

alliato

alliato adversarios abigunt potiùs, quàm superant ; quòdque, apud nos, in ἀλεγο-  
ρημαχίαις vetari, vulgo notum est. Imò  
verò Bonasum agis, &, in fugam versus, Solinus. cap.  
calces jactas, fimùmque amburentem eja- 40.

cularis. Nempe contumelia tibi pro ἀμυν-  
τησίῳ est. Audi, quæso, temet ipsum,  
Thraſonicè jactabundum : *Ecquis, ais, Lap. Lyd.*  
tam bardus est, qui nesciat, Alexandrum pag. 33.  
magnum pauciora cognovisse (humanâ de fa-  
bricâ loquimur) ex Aristotele, qui pauca  
scivit, furatúsque ea est ; & ex paucis non  
pauca falsa docuit, ut res ipsa loquitur ;  
quàm Ferdinandum maximum ex nostro E-  
piloſo ; & minore cum labore, brevioréque  
studio. Et proximis ferè verbis : *Quis in*  
*humana fabrica mediocriter eruditus nunc*  
*temporis est, qui non in eâdem Aristotele*  
*doctior sit ? Euge-Parisane, sic viceris !*  
*Quidnam autem te hîc impulit, ut in Ari-*  
*stotelem, Virum summum, tantâ verbo-*  
*rum acerbitate detonares ? An, ut hono-*  
*rem tibi inde ampliorem adhamares ? At*  
*sapientibus viris displicent hæc Θεωπονιδέυ-*  
*ματα, nec Βατεράων νεγυρὰς morantur.*  
Neque multò mitioribus convitiis Galeni fa-  
mam laceras, & indignis probris proscin-  
dis. *Quis est tam mente captus, inquis, in*  
*hominis fabrica mediocriter eruditus, qui*  
*nesciat, se plura ex aliorum Anatomicorum*  
N lectione,

*lectione, anatomicâque administratione observâsse, & didicisse, quàm Galenum: et si Aristotele longè plura sciverit, meliusque scripserit?*

Certè magis hæc animosè quàm sapienter à te dicta sunt. Feliciter profectò illi contigit, quòd, aspidis argenti more, non tam morsu, quàm sibilo terribilis sis. Sic canes invalidi præ formidine atrocius latrant.

Hi-ne autem illi *Antiqui*, quorum tutelam susceperas? Horum certè gravis auctoritas pro te pridem contra *Harvæum* militabat. Sed præcipuum tibi cordolium fuit, quòd hæc ab *Harvæo* luculenter posita, atque inconcussè firmata, tuam de *Corde* historiam, deque *liene* fabulam labefactarent. Quas assertum ut irès, alticinctus *ὄν δορὶ ὄν ἀσπίδι* in arenam descendisti. Quod profectò *Harvæus*, & *Londinenses Medici* haud ægrè tulerint; utpote quibus *Ἐμπὴς νοινὸς*, & per quos cuilibet, in obscuris rebus, quicquid libuerit statuendi potestas conceditur. Quamobrem nec *Parisanus*, credo, molestè feret, si ego quoque eandem mihi libertatem assumpserim. Justam autem rem ab eo oratum venio, ut dehinc parcat muliebri supellectili; atque (ut virum decet) decretoriis armis agat.

Ut

Ut dicendorum ratio liquidius constet ;  
visum est, brevem cordis, & originis ani-  
malium *διαγεγραψάν* instituere ; ut pluri-  
ma, quæ alioquin distrahenda erant, ad  
hanc, ceu normam aliquam, referantur.

---

## DIGRESSIO. VI.

**Q**UI ad vulgaria elementa ( namque  
hinc mihi ducendum est exordium )  
rerum energias & productiones referunt,  
næ illi plurimis difficultatibus intrlicantur.  
Nam præterquam quòd multa ( ipsis quo-  
que fatentibus ) aliunde, quàm à receptis  
vulgò elementorum qualitatibus, proficif-  
cantur ; non video, quomodo usitata Na-  
turæ opera ad illorum virtutes reduci que-  
ant ; aut quonam apparitore, contraria ele-  
menta ad mixti alicujus compositionem  
convocentur. Terra & aqua, atque hæc  
præcipuè ( aer namque nobis vicinus, ut  
diximus, earum præcipuè effluvium vide-  
tur ; ignémque *Promethei* ferulæ debe-  
mus ; aut aliter industriæ humanæ sua  
accepta fert incunabula ) matrices sunt re-  
rum naturalium ; in quibus, ceu uteris,  
diversa specierum gignendarum semina,

N 2

five

3. De gen. an.  
c. 11. & ult.  
L. de respirat.  
c. 2.

sive spiritus, nidulantur : eorúmque virtutes potissimùm in salibus delitescunt. Celebre est ad hanc rem illud *Aristotelis* :

*Generantur in terra, humoréque animalia, & plantæ : quoniam humor in terra, spiritus in humore, calor animalis in universo est ; ita ut quodam modo plena sint anime omnia.* Virtutes has, in exordio rerum, Creator ipsis impertiit, ut semel conditæ perpetuo circuitu perennarent. Fit enim ( ut arbitror ) in *Universo*, quod in distillationibus *Chymicis* usu venit ; ubi, post insipidam aquam ( quam *phlegma* appellant ) spiritus ascendit ; qui plerunque nubis specie vas excipiens ingreditur ; indéque, post aliquam morulam, in subjectum humorem depluit. Hic spiritus magnam partem est *sal volatilis*, in quo virtus rei præcipua hospitatur ; & cum sale fixo maritatus, mirum quantum polleat, si rerum harum peritis credimus. Similiter humores, calore Solis attenuati, variisque salibus prægnantes, sursum feruntur, aerémque nostratem constituunt ; denuoque in elementa, unde evecti erant, relabuntur : quinetiam interdum, largiore copiâ, roris formâ decidunt : cujus operâ terra & aqua spontaneos suos foetus producunt. Indicium hujus rei est ; quòd, si aquâ calente terram aliquoties perfuderis

ris



ris ( namque eo pacto sal omnis abluitur ) nihil postea in ea nascatur ; ne quidem lapilli, vermiculi, aut gramen ; imò ne femina quidem eidem commissâ ; licèt hæc eadem terra Soli exponatur, atque aquâ stillatitiâ irrorata fuerit. Nihil, inquam, inde progignitur ; donec per aliquod temporis spatium sub dio exposita, novo rore, sive sale vivifico imprægnetur. Rore enim omnes plantæ ( ceu cicadæ ) pascuntur & vivificantur : hujusque illicio, hirci, aliæque animalia flores frondésque appetunt. Hic, ne quid ampliùs dicam, est anima mundi *Platonis*. Quapropter temerè à *L. de fæt. format. c. 6.* Galeno dictum : *Ad impietatem accedere, si quis velit, animam illam creare culices, phalangia, & id genus alia.* Hic ros, super arborum frondes incidens, varia insectorum genera producit. Hic in mediano plantarum cortice potissimùm præpollet ; per quem plantæ vivunt ( ablatis enim cæteris, nempe cortice exteriori, ligno trunci, ipsæque etiam medullâ, arbores tamen superstitæ manent : remoto autem cortice jam dicto, vel ad digiti unius latitudinem, idque etiam in subere, confestim moriuntur : similiter, in insitionibus, unum hunc corticem respicimus ) indéque, debito tempore, frondes, flores, fructusque producuntur. Ac propterea illo ipso, in pertinaci-

De Plantis.

Faber Pallad.  
Spagir.L. 3. de caus.  
plant. c. 24.Tyrocin.Chim.  
l. 2. c. 1.Hist. & ob-  
serv. rar. cent.  
4. obs. 62.  
Rolfincius  
Chym. in ar-  
tis formam  
redact. l. 6.  
c. 3.

bus viscerum obstructionibus referandis, utimur : in quo, si *Brossæus* rectè computum iniit, *vigecuplo plus salis, quàm in alia aliqua arboris parte reperitur.* Imò quidem aiunt, *ab ipsis plantarum salibus, terræ commissis, easdem denuo plantas repullulare.* Atque hinc fortassis orta est fabula de *Phœnice.* Aiunt enim, è cineribus combustæ palmæ (quæ Græcis *φοινίξ* dicitur) novam arborem exurgere. Et *Theophrastus* ait, *Babiloniis compertum fuisse, sale juvari Pal-*  
*mam, non fimo.* *Beguinus* etiam, probaturus, vitam vegetabilium operationibus *Chimicis* non destrui, nec humidum mistorum primigenium iisdem absorberi : *Certum est & multoties probatum, inquit, sales herbarum, præsertim calidarum, si certo quodam modo seminantur, aliàs producere suæ speciei herbas.*

*Petrus Borellus* autem resurrectionis mysterium à vegetabilibus extendit ad animalia. In *phialis*, inquit, *licità necromantiâ, patrem, avum, atavum, totâmq; prosapiam ; imò antiquos Hebræos, Romanos, & quemcunque volueris accerses, cum propriis figuris ; modò eorum cineres servaveris.* Idque confirmatum it experimentis petitis à sanguine destillato ; in quo (scilicet) *phantasma sive idolum humanum apparuit.*

Quor.

Quorsum autem tot ambages ? Nempe, ut constet, idem etiam animalibus contingere, eorúmque semen de natura *salis* participare. Quod ne temerè à me dictum putes, sententia hæc rationibus aliquot firmanda est.

1. Antiqui *Venerem ἀλιγενῆν* saligenam appellârunt. Indéque deos omnes *marinos* sæcundos, pluriúmque liberorum procreatores voluerunt.

2. Semen diutius reservatum, copiâque adauctum, titillationem quandam excitat. Id autem sali deberi, in prurigne videre est.

3. Semen in humido liquefcit, quod sali proprium est.

4. Acidulum olet. Ejusmodi autem sal generationis omnis auctor est ; siquidem ab eo fit fermentatio. Et *Aristoteles* semen comparat *coagulo in lacte*. Ita muscæ minusculæ à spiritu acido vini Moscatellini (quod ab illis id nominis sortitum est) qui in prima ebullitione avolat, producuntur. Similiter in aceto, vinóque tenui acidiusculo, sæpe vermiculi reperiuntur. Et si quis aquæ parum vitrioli albi immerferit ; brevi ingentem eorum copiam prognatam conspiciabitur.

Quereet. conf.  
de arthrid.  
pag. 257.

5. Denique, semen naturam salis obtinere, *Chymici* probant ; quia ex parentum semine fiunt morbi hæreditarii, ut calculus, arthritis, lepra. Ex tribus autem principiis hypostaticis (ut vocant) sal solus est fixus, & stabilis. Morbi autem, qui ab aliorum principiorum vitio fiunt, à *Mercurio* nempe, & *sulphure*, quales sunt *cattarrhi*, & *febres*, haud adeò facilè in posteros transferuntur.

His jam præmissis, etiamsi non omnino apodicticis, saltem tamen verisimilibus ; quod forsitan in hac rerum caligine suffecerit ; ad rem ipsam progredior.

Mihi itaque hanc rem attentius perpendenti, videtur inesse animali perfectiori duplex exordium. Unum, quod (*staminis* instar) telam primam, sive partem vegetalem constituit : quâ nempe animal vivit, nutritur, crescit, suique simile progignit ; éstque *Cerebrum*. Alterum autem (*Cor* scilicet) *subtegminis* sive *tramæ* instar, suis vasis *stamen* interfuit ; sanguinisque calore (imò colore etiam, in perfectioribus) partes corporis omnes inundat. Vel (ut alio etiam exemplo res magis eluceat) fit hîc propemodum, quod in *automatis* iis usu venit, quorum indicio horarum vicissitudines innotescunt. Quæ enim horarum puncta solo indicis circuitu designant ;  
plan-

*plantarum* indoli comparanda veniunt. Quæ autem *machinæ pulsátiles*, temporis vices *sonitu* quoque exprimunt ; animalibus, quæ *Corde* prædita sunt, variósque sentiendi modos exercent, consimilia videntur. Si tamen eorundem *primordia* quærimus ; ea laus ( me iudice ) *Cerebro* debetur. Hujus autem rei documentum optimum ex *ovo* desumitur. Ac propterea Cl. *Harvæum* adi, qui facem in his tenebris præclaram alluxit.

Materia à matre, in *fœtu* ; ab albumine autem, ( partimque à vitello ) in *ovo*, accersita ; cùm ad vesiculam appulit, videtur medium spiritum ibidem hospitantem tranare, ut virtutem illam vitalem induat. Nam licèt sanguinem utrinque rubicundum, singulísque vesiculæ ictibus explosum viderim ; ipsa tamen vesicula albi-cabat.

Spiritus iste in *vesicula*, sive *corde*, à calore foventis vel incubantis excitatus, leniter ebullit ; tandémque plusculùm effervesceus, *flammulam vitalem* concipit ; ( non fumidam & nebulosam aliquam, sed quæ sit *flos lucis*, qualem *Lucretius* dixit,

— *florentia lumina flammis.*

Quæ tum primùm emicat, cùm pulmones suo munere funguntur, aerísque virtus hos penates

Plutar. de Sto-  
ic. rep.

penates ingreditur. Ita etiam *Chrysippus* voluit, *Fœtum tunc primum animari, cum ex utero prodiens, aerem inspirando ducit.*

Opinio hæc quia proculdubio monstro-  
fa multis videbitur; rationum momentis,  
L. 4. de morb. idque pluribus, fulcienda est. Oportet e-  
nim, ait *Hippocrates*, ad opiniones valide  
inhærentes multa argumenta adducere, si  
quis velit auditorem à priori sententia ab-  
ducere, ut suis verbis fidem habeat. Quam-  
obrem id agam, ut primum id fieri posse  
(quod dictum est) ostendam; deinde eti-  
am, adductis auctoritatibus & rationibus  
variis, id ita factum esse, comprobem.

In Biolychnio.

*Burgravius* ait, Sanguinem apto vase  
conclusum, debitoque calore fotum, concipere  
flammap, vitæ necisque indicem. Cujus  
auctoritatem si aspernatus fueris; saltem  
fateberis, sæpe evenire, ut è subterraneis  
locis flammæ subito prorumpant, ubi prius  
nullæ conspiciebantur. Unde autem ig-  
nes illi flammæque oriantur, præterquam  
ope spirituum mineralium, haud facile dix-  
eris. Nam quòd aliqui hîc ignes subter-  
raneos effingunt, id citra rationem fit;  
cùm sine aere libero ignis nusquam ardeat.  
Similiter aliquando contingit, ut scœnum,  
aut linum humectum, arcto loco compres-  
sum, vaporem primò, mox flammam e-  
ructet.

Lac,

Lac, ( ut postmodùm certis argumen-  
tis evincam ) nihil est aliud, quàm chylus  
è ventriculo ad ubera delatus : adeò ut  
præmansus cibus sit, cum potu dilutus,  
quo tenellus fœtus nutriatur. Atqui ex  
*lacte*, testante *Scaligero*, spiritus educi po- *Exercit. 87.*  
*test, qui inebriet.* Et crediderim, inflam-  
mabilem esse, instar vini. Certè triticum  
plus spiritûs ardentis in se continet, quàm  
uvæ. Quidni igitur idem sanguini con-  
tingat ? præsertim cùm hic sit lactis sive  
chyli pars pinguior & gummosior ; sero-  
fior autem seorsim nutriendo corpori in-  
serviat : ad quem usum ( ut in hæcticis vi-  
dere est ) maximè pollet.

Vir nobilis, & in arte Chymixæ apprimè  
versatus, D. *Boylæus* testatur, se in sangui- *Memoires.*  
nis exiccati librâ reperisse ( destillatione  
factâ ) olei fescunciam.

Verè itaque de animalibus aliis dixeris,  
quod *Virgilius* de apibus ; *Ignæus est ollis* *Ænead. 6.*  
*vigor, & cælestis origo.*

Ideoque *Heroes*, ex disciplina *Homeri*, *Servius.*  
*in aquis mortem perhorrescebant ; quòd ig-*  
*neam animam extingui aquâ crederent.*  
Hinc *Achilles* ejusmodi mortem *λευγᾶλεον* *Iliad. 21.*  
tristem & perniciosam appellat. Adeò-  
que ea res vulgò credita fuit, ut milites,  
apud *Synefium*, ne naufragio perirent, sta- *Epist. 3.*  
tuerint sibi necem suâ manu consciscere ;  
ut-

utpote heroicam, & nequaquam exitialem,  
Idémque *Homeri* versum adnectit,

\* *Αἶας δ' ἐξ ἀπόλλωλεν, ἐπεὶ πῖεν ἀλμυρὸν ὕδωρ.*

*Ajax disperiit, postquam bibit æquoris undam.*

*Du fen, & du sel.* *Viginerus* ait, sese, post varias gradatim institutas ignis operas, fortè tandem incidisse in rem quandam, quæ vitro *Hermeticè* sigillato indita, mille annos, citra detrimentum, integra servari posset. Sin autem, transacto diuturno spatio, vitrum idem recluderetur; materia jam dicta, subitò in flammam emicans, funem igniarium nullo negotio accendebat. Ad consimilem ferè modum,

*Virgil. Eclog.*  
8.

— *corripuit tremulis altaria flammis*  
*Sponte suâ cinis ipse.*

*Maccab. l. 2.*  
*cap. 1.*

Narratur etiam, *Sacerdotes Judæos* (in transmigratione *Babylonica*) ignem sacrum in puteo abscondisse: & post annos septuaginta, ignis vice, aquam densiorem reperisse; quæ, ut primùm Soli exponebatur, illico flammam induit. Simili nimirum causæ *Tulliolæ* lampas (si modò vera fama est) natales suos debuit.

De



De generationis hujus modo nihil jam dicam ampliús. Id autem solùm adnitar, ut *flammulam* hujusmodi natam esse doceam. Et quoniam *Veterum* auctoritas apud multos plus valet, quàm *Recentiorum* ratio; illorum suffragia afferam primò; ac deinde nostra aliquot argumenta subjungam.

Ordiam itaque, à Duce nostro & Medicinæ Principe *Hippocrate*; qui ait, *Cor esse membrorum omnium maximè calidum*: *Ε* L. de princip. 1. 7.

facile esse intelligere, ὅτι θερμὸν ἐστὶ τὸ πνεῦμα, *spiritum esse calidum*: eundémque L. de Corde.

ἔμψυτον πῦρ appellat. Alibique ait, *hominem, aliáque animantia omnia ex duobus constare*; *igne nempe & aquâ*; id est (ut L. 1. de dia. 1a.

ego interpretor) *flammulâ cordis*, quâ vivunt; & *succo alibili*, quo nutriuntur & crescunt; sive (ut verbis dicam vulgari-  
bus) *calido nativo*, atque *humido radicali*.

Ibidémque asserit, *animam versari in calidissimo igne*: quem in corde reponit. Rém- Tex. 12.

que hanc luculentiùs exprimit, ubi ait: *Quæ crescunt, plurimum calorem innatum obtinent*; *plurimo igitur indigent alimento*; S. 1. aph. 14.

*alioquin corpus absimitur*. In senibus verò cum paucus calor insit, ideo ὀλίγων ὑπερχαυμάτων δέονται, *paucis ignitabulis sive fomitibus indigent*; à multis enim extinguuntur. Ubi alimentum vocat ὑπερχαυμα  
succen-

succendiculum ; quia magna ejus pars in sanguinem abit, qui mox *flammulae* huic suppetias advenit. Et senibus parum alimentum sufficere, ait ; quia ab eorum debiliter micante flammâ parum sanguinis (utpote serosi plurimum ac pituitosi) absumitur. Quæ claram faciem præferunt iis, quæ suprà à me dicta sunt.

§. 25.

L. de an. 2.

Democritus, apud Aristotelem, ait, πῦρ τε καὶ θερμὸν ψυχὴν εἶναι ἀπείρων ὅδ' ὄντων χημαίων, καὶ ἀτόμων, τὰ σφαιροειδῆ πῦρ, καὶ ψυχὴν εἶναι. Esse animam ignem, calorémque : existente enim infinitâ figurarum, atomorúmque varietate ; ignem, animámque ex sphaericis esse. Opinor autem, rem præsentem respexisse.

In Timæo.

Plato dicit, animal habere in sanguine quasi fontem ignis, πῦρ πηγῆς atque in igne & spiritu, sive aere, necessariò vitam degere. Similiter, Stoici non aliud animam esse voluerunt, quàm κεῖσιν ἐν συμμερείᾳ γηνομένης τῆς ἀερώδους καὶ πυρώδους οὐσίας, temperiem, quæ constat cum proportionem aereæ & igneæ substantiæ. Idémque ignem commiscuere rebus omnibus, ex quo omnes dii, animæque deducerentur. Plato ibidem addit : Cùm (di) cognoscerent, cor rerum terribilium objectu trepidaturum, & irâ sæpius flagraturum ; idque opus omne per ignem fore : æstus hujusmodi

Gal. 1. quod  
animi mores  
seq. corp. tem-  
periem.

modi temperandi gratiâ; pulmonem tegmen  
cordi adhibuerunt, molle primum atque ex-  
sangue, deinde cavis extrinsecus fistulis,  
spongiæ instar, distinctum; ut spiritu, po-  
tiusque hausto, cordis ardorem huiusmodi re-  
spiratione & refrigerio tepefaciat. Alcæus  
Mitylenæus autem hilarius dixit, πύρε  
πνεύμονας ὄνω, pulmones vino irrorata. Et  
βρογχιάζων ab Hesychio exponitur κγτα-  
πνεύ.

Aristoteles etiam nobis in hac lite pa- De Respirat.  
tronus est: ait enim, ἔδὲ γὰρ ἡ πέψις, δι' 8.  
ἧς ἡ τροφή γίνεται τοῖς ζώοις, ὅτε ἀνευ ψυχῆς,  
ὅτε θερμότητος ἐστὶ, καὶ γὰρ ἐργάζεται πάντα,  
concoctio, quâ nutritio conficitur in animalibus,  
absque anima & calore non perficitur, Cap. 14.  
igne enim omnia conflunt. Nec multò post  
asserit, Ea, quæ sanguinea sunt, ταχέως Cap. 18.  
διδάται τῆς κατανύξεως, διὰ τὸ μίχρον εἶναι Cap. 13.  
τὴν ποσὴν τῆς ψυχικῆς πυρρῆς, celeri refrigerio  
indigere; quia absque hoc si esset, anima-  
lis ignis facillè exspiret. Alibi, ignem hunc  
vocat τὴν ἐν τῇ καρδίᾳ τῆς ψυχῆς ἐμπύρωσιν,  
accensionem animæ in corde. Pariter ait,  
cor esse τῆς θερμότητος ἀρχὴν, καὶ τὴν αἰὶον  
ἐστὶν, ἐν ᾗ καίεται τῆς φύσεως τὸ ζωνυρῶν, qua-  
si Lares focusque, qua naturæ fomites nati-  
vi contineantur. Adeoque pleræque gen- 3. Saturn. c. 4.  
tes Vestam religiosè coluerunt. Hanc Ma-  
crobius inter deos penates, aut certè comi-  
tem

Lipſius de  
Veſta, c. 15.

tem eorum, recenset ; quòd fœcunda Terra etiam animalium ſit mater, quibus vis ignea vitæ eſt cauſa. Veſta enim ἄρò τῆς ἐστίας, à foco, aut lare. Indèque mos apud varias gentes ſervandi ignes perpetuos.

2. De nat.  
deor.

Ad hæc comitia Cicero quoque accerſendus eſt. Arteriæ, inquit, micare non deſiunt, quaſi quodam igneo motu. Animadverſumque eſt ſæpius, cùm cor animalis alicujus evulſum ita mobiliter palpitaret, ut imitaretur igneam celeritatem. Omne igitur quod vivit, id vivit propter incluſum in eo calorem. Imò ob flammulam potiùs ; ſiquidem ſimplex calor nequaquam undulatiim movetur.

De form. ſæt. 3.

L. 6. de uſ.  
part, c. 7.

L. de ſem. 10.

De Calido in-  
nato.

Galeno dicente, Cor calidi nativi fons eſt, & ſpirituum vitalium officina, ac quaſi ignis quidam focus. Idémque alibi ait, Cor, ob excellentem caliditatem, moveri veluti flammam quandam indefinenter ; & ſemper viciffim diſtendi, & contrahi. Sic non ſolùm ( inquit Caimus ) motum ejus continuum oſtendens, ſed ipſam motùs ejus cauſam inſinuans ; quæ ſit excellens viſceris caliditas, & qualiſcunque cum flamma cognatio, motionem flammæ propriam impertiens. Nam veluti flamma habet motum ad ſuperiora & inferiora, ad interna & externa, à principio & ad principium : ita Cordis quaſi flammeus fervor hunc eundem ſibi vendicat motionis

*motionis modum ; ut per dilatationem externa petat, & à principio recedat ; per constrictionem interius tendat, & ad principium, cui inhæret, accedat.*

*Meletius ait, Cor, nativi caloris infur-* L. de nat. hom.

*nibulam, pyramidalis figurâ constructum fuisse, ob calorem (flammam rectius dixisset ; siquidem merus calor figuram nullam æmulatur) intra se conceptum, cujus figurâ propria pyramidalis est. Objicit Laurentius : Si talem figuram cor adeptum fuisset ob igneitatē, deberet conus sursum vergere.*

*Respondet Riolanus, non ascendere cuspidem sursum, propter gravitatem sanguinis dextri ventriculi : tum etiam, quia cor non excepisset commodè sanguinem. Adjecit Meletius, si conus sursum vergeret, plurimos ad cerebrum vapores emitteret, qui nativam cerebri temperiem destruerent. Ridiculum prorsus ! per quas enim vias ? Rectius profectò (saltem festiviùs) dixisset, id fieri ad solitam Naturæ normam ; quâ pyra (fructus nempe frigidi) conos sursum attolunt ; eâ re indicantes, unde calorem suum adventitium mutuuntur : nuces pinæ autem calidæ, nativæque pinguitudine gaudentes, quàm è magnæ Matris sinu deprompserunt, illorum acuminatos suos conos obvertunt.* Anthropograph.

O

Descen-

De spirit. &  
innato cal.  
c. 3.

Com. ibid.

Albertus mag.  
l. 3. anim.  
traff. l. c. 4.

Instit. l. 3. c. 3.

Descendo tandem ad nostræ serè ætatis Philosophos: inter quos *Fernelius* inquit: *Quæcunque vivunt, alanturque corpora, pinguem & olei similem continent humorem: præter hunc verò etiam alio perfunduntur, qui minimè est ad inflammationem idoneus, sed superiore magis tenuis & profluens. Hunc humorem dicere placet alimentarium. Quibus sanè verbis, diversas illas chyli partes, & munera, à nobis sæpè memorata, clarissimè distinxit. Riolanus Pater addit: Nativus calor, in aereo spiritu, tanquam in primo subiecto, insidet: cujus tamen substantia dissipabilis & evanida, quia conceptam flammam diu servare non potest, aerius & oleosus humor utrique pro fulcro & fundamento substituendus fuit. Ibidemque: Spiritus insidet humori oleoso, non aliter quàm flamma candelæ, eamque simili modo absunit.*

Cor, apud *Pythagoricos*, proportionè respondet *Soli*, quem ob id vocabant *cor cæli*: nam hoc putabant esse magnum quoddam animal.

*Heurnius* hoc agmen claudet. *Vita nostra*, inquit, *nihil aliud est, quàm mori. Tandiu enim vivimus, dum flamma nativi caloris suam ἐλάμψιν sortitur in humido primigenio: quod dum fit, splendet vita, unaque absunitur humidum primigenium;*

quo

*quo absumpto, extinguitur vitalis lux. Quid clariùs dici potuit?*

Ecce, tibi, abunde auctoritatum, quibus hæc sententia confirmari queat. Quoniam verò aliorum dicta (nisi tuas partes agant) parvi æstimare soles; hosque ipsos forsitan metaphoricè loquutos dices: age, rationum, quæ sequuntur, momenta pensitemus.

1. *Ehodum Parisane*, versamur in tenebris: tu itaque (si quid potes) faculam nobis aliquam alluceas; cujus ope, in densa hac rerum caligine, semitam ineamus, quæ nos ad reconditum hoc Naturæ sacrum deducat. Fac, inquam, intelligam, quo pacto fœtus, postquam semel in hanc lucem prodiit, auræque æthereæ fruitur, nequeat postmodum eâdem vel momento temporis privari, quin illico mortem optet. Embryo enim, materni carceris colonus, menses aliquot in tenebris, sine respiratione, transigit: neque enim aer aliquis angusta ea penetralia adire potest; & in vaccino utero, accessus omnis denso viscidæ materiæ glutine præcluditur. Simul autem ac natus est, inspirato aere sic vivit, ut sine eo ne hilum vivat. Quænam autem causa discriminis? Nimirum calor arcto in loco (puta forno) conclusus, aliquandiu permanet. *Flamma* verò, li-

De reconditis  
Antiquorum  
Lucernis.

bero aere, ventilatione destituta, confestim extinguitur. *Fortunius Licetus* existimat, *flammam nutrimentum depascere*; non, ut generet novum ignem sibi consimilem; sed, ut sublato impedimento, evolare liberè valeat ad locum naturalem. Inficetè nimis: quidni enim (ut cupito fruatur) relicto pabulo, sursum evolat, compedibusque se liberat? Imò verò sic fit: singulis enim momentis nova flamma enascitur. Hunc agminis nostri ducem si legitimo Martè prostraveris; metus sanè est, ne reliquus exercitus, tristi exemplo consternatus, terga vertat; militesque ignavi, ac trepidi, projectis armis, præcipites in fugam ruant.

2. Proximè sese offert cordis fabrica, & pulmonis ministerium. Aperto igitur canis thoracè, cordèque aeri propalam exposito; moribundum jam animal, diris convulsionibus excruciatum, insufflato (follis ope) in pulmones aere, animulam jam fugitantem revocat, ac reviviscit denuo.

Tom. 2. l. 3. *Quemadmodum* (ait *Gassendus*) *extincta candela, si statim insuffletur, iteratò accenditur*; ita observamus, suffocatum, strangulatūque, & nondum tamen penitus mortuum animal, si eductione ex aqua, aut crassiore fumo, vel solutione laquei, introduci iterum, inspirarique aer valeat, animam quasi resumere,



*sumere, seu concipere flammam iteratò.*

Quid enim sibi volunt venæ, sanguinem ad cor deferentes; & arteriæ, eundem jam fervefactum exportantes; Naturæque artificium in valvulis; nisi flammam in corde (*ceu larem familiarem*) residere; quæ à sanguine sustentetur, & corpus integrum (pro hoc munere) igneo spiritu, sive calore vivifico perfundat? Enimvero si à cordis simplici motu (ut te velle video) sanguis incalesceret; cur idem in venis & arteriis diversæ indolis conspicitur? Quare, inquam, sanguis in arteriis, quàm in venis, serosior est? Quippe merus motus, aut calefactio, nequeunt mutationem ejusmodi inducere. Imò verò sanguis potius inde crassesceret magis, ut dictum est. Sed fit istuc, quia pars sanguinis pinguior in flammulam faceffit. Ideoque in febribus (ubi plurimum oleosi sanguinis absumitur) sub declinationem paroxysmi, febrientes gnaviter sudant. Absumpto enim pinguiore sanguine, plusculum serosi humoris relinquitur. Ac propterea sudor, initio prodiens, symptomaticus habetur; sitque à morbo potius, quàm à Natura; humorumque copiam indicat. Fateor tamen, interdum ab initio, auxilio provocatum, juvare posse, quòd obstructions referet. Quamobrem (ut id obiter dicam)

*Instit. Med.*  
c. 6.

falluntur plurimùm, meâ quidem sententiâ, qui sanguinem arteriosum, præ venoso, amplis dotibus exornant. Est enim ille deterior; utpote qui materiam cudendis spiritibus idoneam aliquatenus amiserit. Ac propterea *Joan. Walæus* perperam asseruit, *Eum sanguinem, qui decies per cor transiit, non esse tam perfectum, quàm ille est, qui centies; & qui centies, minùs perfectum, quàm qui millies.* Addo itaque, arteriotomiam, etiamsi commodè institui posset, minùs tamen in febribus utilem esse; cùm venæ magis sanguinem inflammabilem in se contineant.

Non sum quidem nescius, quid ad hanc rem de *liene* dixeris. Verùm illa non magis mihi arrident, quàm hæc nostra tibi (sic puto) placebunt.

*Med. Stat. f. 1.*  
*aph. 59. & 60.*

3. Multum victûs nostri, ac proinde sanguinis, in *Lampadis* hujus usum infumi, ex computo *Sanctorii* constat, ubi ait: *Spatio unius noctis, sexdecim unciae lotii, plus minùsve; quatuor cunctorum excrementorum per alvum; quadraginta & ultra per occultam perspirationem evacuari ut plurimùm solent. Pluribus unâ die naturali per insensibilem perspirationem solam evacuat, quàm per alvum quindecim dierum cursu.*

Quæ.

Quænam verò tanta occulta perspiratio, si non magna ex parte ignis hujus, sive spirituum, qui continuè gignuntur, continuèque avolant? Sanguinis enim in corde simplex *concussio* vix paucillum illius imminuerit: neque etiam eo modo rarefactum, per cutem transvolitare, credibile est.

*Julius Fasolinus* perperam ait, *Dissectis* Coll. Anat. pag. 19. *cordis ventriculis, in ipsorum cavitate frustula quædam, portiones, ac ramenta adipis reperiri: ut magis mirum sit, quomodo is ibi concreascit, quàm qui supra cor ipsum. Et quis dubitabit, inquit, hunc etiam materiam esse caloris, atque ejus pabulum; ubi ali is, carpique possit.* Nimirum pituitam concretam (ut opinor) adipem esse credidit.

Sudor ut plurimum haud magnâ copiâ profluit; & quando id fit, urina parcius emittitur. Solidarum autem corporis partium perditio (quam aiunt perennem esse, & magnâ copiâ) mihi quidem, ut supra monui, haud est verisimilis. Enimvero ursi, glires, testudines, hirundines, &c. totam hyemem somno transigentes, vix macrescunt, imò dicuntur pinguescere. Quod fieri arbitror, quia flammula cordis in iis tunc temporis placidè admodum movetur, parùmque sanguinis absomit: quo motu

etiam in uterò præfocatis cietur. Quinetiam in diuturna inedia (qualis in morbis nonnullis contingit) concessò rapido illo partium avolatu, corpora citò, valdèque gracilescent; quod tamen haud semper evenit. Et licèt aliquando plurimùm emacjata videantur; est tamen musculosa partis duntaxat, ob spirituum, succique nutritii defectum, subfidentia; quæ convalescentibus citò (etiam tenui victu) adimpletur denuo, ac reficitur.

L. 2. de gen.  
an. c. 3.

4. Si sanguis Cor solummodò translabitur, & ab innato ejus calido effervescit; quænam ratio est, cur magis in illo pulsus excitetur, quàm in *hepate*, aut *liene*? Motum enim suâ sponte caloris causam esse, suprà rejecimus; ut & *facultatem* illam imaginariam, à quâ motum hunc dependere arbitrantur. Neque etiam *Aristoteli* assentior, dicenti, *Calorem animantium neque ignem esse, nec ab igne originem ducere*. Unde, quæso, igitur? Nempe vult, *qualitatem esse, respondentem elemento stellarum*. Quod equidem quid sit, alii viderint: ego enim me nescire, haud gravatè profiteor.

L. 6. sent. Hip.  
& Plat. c. 8.

*Galenus* ait: *Qui ex hepate fluit sanguis, non ita cum impetu; quod neque spirituosus sit, neque prorsus pulsant venæ, quæ eum continent*. Quasi nimirum pulsus sit causa pro-

prostitutionis sanguinis ; & non potius, protrusus validè è corde sanguis ipsum pulsum excitet. Idque ipsemet proximis verbis videtur indicare : *Qui, inquit, ex sinistro cordis ventriculo fluit, calidior est, & multò spirituosior, adeò ut vasa ipsius pulsent.* Quid multa ? *Galenus* facultatem hanc in ipso cordis parenchymate constituit : cùm tamen pulsatio cordis & arteriarum ante natum parenchyma existat.

Multò verius de hac re *Aristoteles*, qui *L. de respir.* ( ut *Turrisanus* sententiam ejus explicuit ) <sup>c. 20.</sup> ait, *Motum cordis non fieri ab ulla facultate, vel vegetante, vel sentiente, vel quodcunque nomen præferente ; sed fieri à Natura ipsa :* id est ( ut *Hofmannus* intelligit ) à calido nativo ; sive ( ex nostra sententia ) à flammula cordis, per quæm sanguis in eo effervescit , illiusque constrictione in aortam expellitur.

5. Ipsa pulmonum structura veritati huic luculentè attestatur. In quem finem enim vena arterialis, atque arteria venalis tot ramulis per pulmonum lobos disperguntur ; nisi ut ( præter pulmonum respirationem ) aerem, in illos per bronchia illapsam, sanguis unà secum in sinistrum cordis ventriculum deducat ? Omnis enim ignis duo requirit ; alimentum, & ventilationem ; quorum alterutro si defraudetur, ipse

De respir.  
c. 17.

ipse mox extinguitur. Quamobrem duplex quoque mors est apud *Aristotelem*; alia, per *μάεσσις*, cùm ex defectu alimenti sensim perit; altera per *οβλὴς*, cùm suffocatur. Ignem autem cùm dico, intelligo flammam, atque ignem agentem in materiam aliquam combustilem: qui enim jam genitus est, & emanavit; in sui tutelam nullâ ventilatione indiget. Talis (ut modò diximus) in præcluso furno diu permanet; quia facilè emigrare nequit. Vel (ut rectiùs dicam) quia motus, ab ardente re excitatus, haud citiùs compescitur. Qui autem flagrat, atque è materia subjecta novum fomitem prolicit; intercepto aere, statim extinguitur.

Similiter spiritus ignei, in arteriis, nullo aere opus habent: habent autem maximè in corde, ubi flamma ardens, aere privata, illico suffocatur. Quemadmodum in cucurbitulis medicis, locòve alio arctè clauso contingere, cuilibet notum est. Idque evenit, quia ignis ab aeris nitro sustentatur. Censeo enim, aeris regionem superiorem (mediam dictam) esse frigidiorē, ob nitri copiam; quod, in inferiore ejus regione, à calidis vaporibus, haud altè ascendentibus, liquescit; rorisque specie delabitur. Quod vel inde constat, quia ni-  
vis

vis figura crystallos nitri æmulatur ; quantoque aer hoc nitro opulentior est, tanto quoque potentiùs flamma urit. Inde hyeme, fudo cœlo, quo tempore aer nitro abundat ( æstivo enim calore, sal iste, utpote volatilis, sublimatur altiùs, & dissipatur ) focus elucescit magis, citiùsque ignita materia absimitur, cærulâque flammâ nitri copiam testatur. Quin etiam fenestrarum vitra, gelascente aurâ, crystallo-  
rum nitri varia simulacra exhibent. Tempore autem pluvio, vel nebuloso, contrarium accidit ; quia sal iste ab humido liquescit, & cum eodem in terram delabitur, ut eam sæcundet. Hanc ob causam, aqua pluvia, præ cæteris, nitri plusculum participat, magisq; abstergit. Idque nô-  
runt mulierculæ, quæ meliùs dealbant pannos aquâ pluviali, quàm puteanâ, aut fluminis. Ista virtus est, ob quam spiramus : quâ sine, aer non nisi cum damno pulmonibus nostris accesserit. Sic è putrescentibus stagnis, antrisque mephitimolentibus, aer pestilens, nitro hoc orbatus, spirat ; qui animantibus præproperam necem accersit. Hunc salem animalia omnia, atque etiam plantæ, conceptaculis in eum finem à Natura constitutis, perpetim hauriunt ; eodémque, ad vitæ munia, utque durent, liberaliter παρέχοντες condiuntur.

Verùm

De Thorace,  
c. 7.

Verùm hæc omnia facilè diffilabunt illi, qui non aeris substantiam, sed nudam qualitatem solùm cor ingredi aiunt. Inter quos *Hofmannus* est, qui complura in eam rem argumenta congeffit, quibus responderi non posse arbitratus est. Solutu tamen facilia videntur; uti legentibus eum, opinor, constabit.

Miror autem plurimùm, aeris qualitatem sine illius substantiâ admitti; cùm in Philosophia raturum sit, nullum accidens posse extra proprium subjectum existere. Rem tamen penitus perpendentibus manifestum est, omnem illam actionem, quam *calorem* vocamus, peculiari ignis *motui* deberi.

Tum quòd aiunt, aerem duntaxat ob qualitatem ejus frigidam à pulmonibus attrahi, ut calorem cordis nimium attemperet; id mihi minùs verisimile videtur: prudens enim Natura, minorem focum extruendo, operæ atque impensis pepercisset suis. Aqua etiam, aere frigidior, id muneris commodè expeditisset in piscibus: qui tamen absque aere non vivunt. Pariter in leucophlegmatia, aliisque constitutionibus frigidis, respiratione nihil opus esset: præsertim in summo gelu; quo tempore, non solùm non refrigerari, sed etiam incalescere cor opus habet.

Fa-



Fateor quidem, respirationem tunc temporis infrequentiore esse ; crebriorem autem, & citatiorem æstate & in febribus. Sed id fit, quia sanguis præter morem calefactus, celerius in flammam abit ; ac propterea copiosiore etiam aere indiget. Vel potius ( ut causam efficientem afferam ) quia sanguis celerius affluens, pulmones simul crebrius attollit. Adeoque aer requiritur ut pabulum ; non autem ut frænum exæstuantis flammulæ. Ad fomitem, inquam, non autem ad ventilationem, aere opus est. Ut nempe sopitam flammam, atque aliàs non arsuram, excitet : quemadmodum follium ope inflato aere, flamma circum ligna accenditur. Folliis enim utimur, ut cinerem, poros ( per quos flamma egreditur ) obstruentem, disjiciamus. Nullus autem hic cinis ; sed pariter omnia, ac in lampade, sese habent. Imò nec tetra illæ fuligines, quæ in lampade ex impuro & sæculento oleo exurgunt, hîc adsunt : sed qualis flamma è purissimo vini spiritu emicat, talis è bene constituto sanguine in corde profilit. Ideoque inanis est *Conringii* metus, ubi ait : *Flatus nocere potest, vel nimium accendendo ignem cordis, si levius cale afflaverit ; vel etiam interimendo principium caloris, si fuerit iusto vehementior.*

De Calido innato, p. 104.

Quorum

*Quorum postremum eò faciliùs potest contingere, quo ignis ille noster est mollior, proximè in sanguine hærens ; adeoque flammæ est affinior, quàm prunæ. Non enim flamma temerè fert spirantem ventum ullum, quo pruna accenditur : sed nec illo habet opus. Nequaquam certè ; neque enim hîc difflandi cineres : nec metuunt di hi penates sævientem boream, ne immaturo fato extinguantur.*

*Galenus, pulmones, non tam lampadis refocillandæ, quàm vocis efformandæ causâ, extructos arbitratur. Ait enim : Sicuti dexter cordis ventriculus pulmonum gratiâ factus est ; ita pulmones gratiâ vocis sunt constructi. Idque piscium exemplo comprobatur : qui, cùm careant pulmonibus, carent simul tum dextro cordis ventriculo, tum etiam voce. Quorum primum licet Aquapendens concedat ; pulmones tamen vocis gratiâ fabrefactos negat. Etenim, ait, sine pulmonibus, thoracis cavitate aere repletâ, & ad laryngem aere similiter impulsâ (quo autem motore ?) vox sequeretur. Pisces autem vocem non edunt ; non quidem pulmonum, sed aeris defectu. Ita lampetra piscis, etiamsi pulmones habeat, vocem tamen nullam emittit. Potest sanè idem instrumentum pluribus usibus inservire ; sapiensque Natura quærit compendia.*

*Alibi*

*De Respirat.  
pag. 107.*

Alibi Galenus ait, *Carnem pulmonum esse* L. 7. de af.  
*primum instrumentum alterationis aeris, ut* Part. c. 8.  
*fiat spiritus vitalis : sicuti jecoris caro cibi*  
*in sanguinem. mutationis est auctor.* Ve-  
 rum hujus rei fides planè titubat. Ne-  
 que etiam aer gignendis spiritibus aliter  
 confert, quàm à nobis modò dictum  
 est.

6. In syncope, aut animi deliquio, vini  
 meracioris haustus magnopere prodest :  
 quia illud suapte naturâ inflammabile est,  
 lampadèmq; ægrè micantem promptè  
 exuscitat.

7. Denique, insecta illa, sive muscæ,  
*Lampyrides* dictæ, quæ in *Italia*, aliisque  
 regionibus calidis, noctu per campos voli-  
 tant; nunc pennarum hiatu refulgentes,  
 mox earum compressu obumbratæ, veri-  
 tati huic claram facem præferunt. Expan-  
 sis quippe alis, supra omnes *cicindelas*  
 splendent, ac scintillant. Credas prope-  
 modum sydera in terras descendisse. Pars  
 autem tantopere lucida, est posterior, ven-  
 trem imum, sive ultimam incisuram con-  
 stituens; ubi in ipsis *cor* locatur : quod &  
 aliis insectis commune est. Apem enim  
 si melli immerferis, videbis eandem juxta  
 caudam palpitare. Illud autem muscæ  
 prædictæ videntur habere peculiare, quòd  
 earum membranulæ, cor, reliquumque  
 corpus

corpus ambientes, tenues ac pellucidæ  
sunt; adeoque lumen internum facile  
transiliat.

*India Occi-  
dent. l. I. c. 4.*

Memorable sanè est, quod à Joanne  
*Latio* narratur. *Fidem*, inquit, *prope su-  
perant*, quæ ab *Oviedo* atque aliis dicun-  
tur de *Cucryo*, è *scarabæorum* genere; cu-  
jus ocelli, atque latera, ubi alas suas didu-  
cit, tantum lumen emittunt, ut noctis tene-  
bras, haud secus quàm candelæ, illustrent;  
& hominibus legendi scribendique copiam  
faciant. Imò aiunt, *Incolas Hispaniolæ*  
in *America*, liquore hoc luminoso in Un-  
guenti formam redacto, corpora sua in-  
ungere; eoque pacto illuni etiam nocte  
splendescere, terrorémque hostibus (ceu  
visis spectris) incutere. Quod equidem  
commentum *Milesiis fabulis* affine est:  
quoniam illis mortuis lumen omne extin-  
gitur. Luculentum hoc, opinor, pro sen-  
tentia nostra testimonium.

*Histoire des  
Antilles, l. 1.  
c. 14. § 2.*

Quamobrem frivola est sententia *Ange-  
lutii*, ubi ait: Non possum negare, spiri-  
tus putrescere posse æquè atque humores.  
Quia (teste *Aristotele*) cuncta, igne uno ex-  
cepto, putredinem concipere apta sunt. Li-  
cèt enim spiritus sint naturæ igneæ, mul-  
tùm tamen differant ab igne: imò spiritus  
crassior est aere (ut monstrat *Galenus*) &  
ex aere inspirato fit, &c.

*De malig. fe-  
br. l. I. c. 2.*

*Quod sang. nat.  
cont. in arter.*

Nec

Nec minus, credo, falluntur ii, qui putant, spiritus ipsos in pestiferis morbis inquinari.

Dixi modò, verisimile esse, flammam hanc tunc primulùm enasci, cùm pulmones suo munere funguntur; quoniam illa nequit persistere sine aere. Unde difficultas haud spernenda exoritur, quonam pacto accensio illa primitus contingat? *Notum est*, ait Gassendus, *ex nitro intermixto sulphuri, bitumini, & calci vivæ, misturas quasdam fieri; quæ, aspergine humidi, vel etiam sputo, accendantur.* Et Plinius ait: *In Nymphæo exit è petrâ flamma, quæ pluriâ accenditur. Exit & ad aquas Scantias. Additque Dalecampius: Eadem aqua micat in uliginosa terra, cùm baculo scalpitur, prope Gratianopolim Allobrogum, ad fontem, quem Ardentem vocant; è quâ stramen admotum possit accendi.* Ait etiam Plinius, *Servio Tullio dormienti in pueritia ex capite flammam emicuisse.* Ego verò hîc nihil ejusmodi queo comminisci. Dico itaque solùm cum eodem Plinio, *Non esse quærendam, in omni parte, Naturæ rationem, sed voluntatem. Prometheus quidem ignem cœlestem ferulâ (asininâ plantâ) suffuratus dicitur: aliis autem eadem felicitas non contigit.*

Tom. 2. p. 43.  
col. 1.

L. 2. c. 107.

L. 37. c. 4.

Libavius de  
Vagit. Uter.  
Albert. magn.  
l. 10. de anim.  
Sennertus de  
morb. mul.  
pag. 382.  
Epist. l. 2. ep.  
528.

Difficultatem aliquam forsitan movebit, quòd complurium testimonio constet, fœtum interdum in utero *vagitum* edidisse: quod certè, sine inspirato aere, neutiquam evenerit.

Melanchton ait: *Nuper in Urbe Northusæ, infans in utero horrendum vagitum clarè edidit.* Possémque ipsemet hujus rei illustre exemplum proferre.

Secl. 5. aphor.  
51.

Existimo autem id nunquam accidere posse, nisi priùs fœtus secundinas, quibus involvitur, persregerit; aérque simul admissus sit. Neque huic rei obstat Hippocratis autoritas, ubi os uteri, gravidis clausum asserit: *συμπεδαῖ* enim (dicente Spiegelio) non significat, ut vulgo explicatur, prorsus clausum esse, ut stylum nec minimum admittat; sed connivere, ut nos palpebris, cum dormimus. Mucor ille (qui in muliebris uteri vestibulo est) impedit quidem ne aer confertim ingreditur; omnem tamen ejus accessum non præcludit. Ac propterea partus is solus naturalis habetur, quo infans capite præcedaneo nativitatem auspicatur. *Estque id* (ait Hofmannus) *ideo, quia hoc duntaxat modo abest suffocationis periculum, quod reliquis modis omnibus præsentaneum est: quia nimirum osculo uteri à corpore fœtus arctè clauso, omnis respiratio intercipitur.*

Com. de nf.  
part. pag. 344.

Aditum

Aditum hujus aeris quod attinet, *Aristoteles* ait, Circa os uteri internum reperi- Hist. an. l. 10. c. 2.  
 riri canaliculum quendam, per quem uteri clausi respirant. Quod ut aliter sit, nemo tamen de ingressûs modo magnopere erit sollicitus, qui pullos intra ovorum testas pippientes audierit : quod perfectò absque aere minimè evenit.

Aliquandiu pendebam animi, utrum flammulæ ipsi, an potius sanguini ebullienti, pulsatilem cordis motum attribuerem. Nam cùm ignis sit in perpetuo fieri (ut dicitur,) atque modò exurgat, modò subsidat ; videbatur pulsus ratio commodè hinc deduci posse. Verùm cogitanti mihi, flammulæ illam varietatem à materiæ diversitate potissimùm procedere ; quam similiter in corde haud reperiatis : atque etiam cor pulsare, antequam aer subeat, aut flammula nascatur : quinetiam in ovo, vivacibusque animalibus, cessante omnino palpitatione, ab admoto novo calore, cor intermortuum denuo reviviscere : malui, cum *Aristotele*, ad ὄγκωσι, sive ebullitionem sanguinis, *systolen* cordis irriterentem, causam illius transferre. Ita tamen, ut, quemadmodum cor primulùm à calore soventis cietur ; sic postea, sui juris factum, à proprio igne excitetur. Sine calore enim nulla fit actio, ut notum est.

Et quod aliqui de fermento hîc somniant; id sanè veterano sanguini haud convenit. Neque in excluso fœtu, præter flammam hanc, ullus calor perennis commodè effingi potest.

*De Secreta  
Triplicitate.*

*Viginere du  
feu & du sel.  
p. 41.*

Lar autem iste familiaris lenissimo foco sustentatur. *Rhases* ait : *Est quidam ignis, qui ferè suâ sponte subsistit ; adeò exili alimoniâ ipsi opus est : indéque splendorem atque claritatem ampliorem nanciscitur. Est item alius obscurus, fumosus, ardens, ac destruens quicquid attigerit. Huic verò in hac scena nihil est negotii.*

Pro cordis itaque motu vario, & prout sanguis uberiùs, parciùsve ; citiùs, aut tardiùs ab illo propellitur ; ita pariter pulsuum discrimina sese habent. Nec mirabitur quispiam, à tam leni calore sanguinem adeò intumescere posse ; si floribus sulphuris terebinthinæ spiritui inditis, lenique foco impositis, quantum ibi turbellarum concitetur, animadverterit. Multoque minùs finxerit, Cor ipsum à flammula sua absumptum iri ; si linteamina, spiritu vini madentia, ab hujus incendio indemnita viderit ; ac perpenderit, *ignem fatuum* dictum (qui est tenuis exhalatio naphthæ, aut bituminis) rem nullam comburere. Cordis enim flamma reliquis omnibus



nibus mitior est. Sunt quippe (inquit Gaf- Tom. 2. pag. 251. col. 1.  
sendus) variæ ignis species, magis minús-  
que adurentes, à metallis usque fufis, ad ig-  
nes illos innoxios, ex quibus aliquando vi-  
sus est,

*Fundere lumen apex, tactûque innoxia molli* Virg. *Æn.* 2. v. 683.  
*Lambere flamma comas, & circum tempora*  
*pasci.*

Imò & adusque ipsam lucem; quam suo lo-  
co deduximus, nihil aliud esse, quàm flam-  
mulam, seu avolantem tenuissimam ac purif-  
simam flammæ partem. Flamma hæc tem-  
peratè & lentè potest agere, ob humores ma-  
cros pinguetudini sanguinis commistos; ut  
flamma creata ex spiritu vini, cui commi-  
stum est multum phlegmatis. Nec obstat,  
quòd animali vivo exsecto, flamma aut lux  
non pateat: nam etiam quando ferrum can-  
dens in diei luce deservescit, nulla flamma,  
nullûsve ignis esse in ipso conspicitur; qui  
in tenebris tamen observatur. Et nemo ul-  
lam lucem esse crederet, aut in Lapide Bo-  
noniensi, aut in putrescentibus lignis, aliis-  
que rebus, quæ noctu lucent, si interdiu qui-  
dem solum spectarentur. Alimentum autem  
huic flammulæ conservandæ idoneum non  
est, nisi quatenus pingue est, inflammabilève  
quidpiam continet. Unde neque aqua, nec

*res purè macræ nutriunt ; sed panis, vinum, & cætera omnia, ex quibus potest elici spiritus, Aqua vitæ dictus, quàmque accendi posse manifestum est.*

Unum tamen est, quod scrupulum forsitan aliquem injicere queat : nimirum, sinistrum cordis ventriculum sanguine impletum, locum nullum huic flammulæ relinquare. Verum aliter multò se rem habere arbitror. Etenim si cor sanguine adimpleretur, ne quidem ebullire aut effervesce hic in eo posset : quæ enim locum aliquem implent, in eodem intumescere nequeunt. Quamobrem nec pulsatio aliqua contingeret : sed sanguis sensim duntaxat & sine sensu, per cordis ventriculos (quemadmodum per hepatis parenchyma) protruderetur. Nam quod de *facultate* narrant ipsi cordi insidente, mihi litem ampliùs non movebit. Repleretur quidem ventriculus ille, si sanguis ad eum impetu afflueret : verùm hic paulatim à flamma allicitur, (ut populariter nunc loquar) sive potiùs pedetentim impellitur : tantumque ejus solùm accedit, quantum modò recesserat. Hujus rei veritas elucet in *Lampade Cardani* ; ubi, quamvis fastigiata turris oleo plena sit, nihilo tamen plus ex illa delabitur, quàm ab ellychnio in imò absumptum fuerit. Neque enim

*L. 1. de Subtil. pag. 10.*

id

id perpetim, aut continuato lapsu fit, sed per intervalla, atque interpositis morulis: siquidem exilis aeris expansio, permittente Naturâ, conceditur; majorem autem non nisi ægrè fert. Ideoque suffocationis hujus flammulæ nullus est metus. In vitâ autem defunctis, in quibus flamma hæc extincta est, haud mirum, si à delabente continuò sanguine, ibidémque restitante, totus ventriculus impleatur.

Sanguis hoc modo in sinistro ventriculo fervefactus, facilè constrictione Cordis in aortam expellitur; cùm in arteriam venosam (ob resistentes valvulas, & descensum in ea sanguinis) nequaquam possit. Atque ita porrò per totum corpus calorem, in corde enatum, deducit: unde partes omnes vivificantur, commodèque munia sua expediunt. Sanguis, inquam, aortam ingressus, fluit porrò quocunque permittitur, peræquè sursum ac deorsum, quia motus est continuus. Quemadmodum in aquæductibus contingit, ubi (quocunque hi feruntur, modò tamen nusquam hient) aqua impulsâ indefinenter pergit moveri. Quamobrem nugantur strenuè, qui protrusionem hujusmodi, non, nisi rectâ linæâ, fieri posse arbitrantur.

*Veltius, apud Macrobiū, per Apollinem, L. 1. Satur.  
ipsum Solem intelligendum monet; cui me-  
nal. c. 17.*

*dendi potestas ideo attributa fit, quòd temperatus Solis calor omnium morborum fuga fit.* Id ipsum verò de *Corde*, ceu *Sole Microcosmico*, multò veriùs asseruisset. Enimverò licèt hic *Sol* loco suo non migret, radios tamen per universum animal diffundit. Imò sanè hìc *sphæra* volvitur, dum *Sidus* quiescit. Sanguis nempe, calorem cordis deferens, per anfractuosa vasorum circumlabitur, ut corpus totum calore vivifico exhilaret, novúmque vectigal denuo ipsi cordi rependat.

Bartoletus  
Encycloped.  
pag. 38.

Fítque istæ circumgyratio, *non solum* ( ut *Soranus Ephesus* voluit ) *ab hora nona noctis ad horam diei tertiam* ; sed perpetuò : quemadmodum ex dictis constitit, uberiùsque ex dicendis constabit.

Ego verò ὑπὲρ τὰ ἱκαµένα πηδῶ, ultra limites salio ; nimiùmque à litore recessi : ideóque obliquare sinus ,

Horat. l. i.  
Od. 34.

————— & retrorsum  
*Vela dare, atque iterare cursus  
Cogor relictos.*

Libet itaque videre, quàm validis arietibus *D. Needhamus* causam nostram oppugnatum iverit. Agite igitur, tubæ  
utrín-

utrinque canant, committamus hos lūdos.

Ait, *sanguinem (si ad ejus genium propius attendamus) ignitioni minus aptum videri: is enim carbonibus injectus, flammam non facile concipit, sed potius torretur in grumum.*

De Biolychnio,  
pag. 130.

Ego autem, quem adversarium nactus sum, eundem patronum in hac lite advoco: eumque ipsum contra se testem dabo. Sanguis (inquit) in prima sui formatione, licet spiritu vitali prægnaus sit; fixatior tamen est, & plantarum succo propior; imò fortè plantis nonnullis ignobilior (id autem ὑπερβολικὸν nimis) Donec accedente calore materno (quasi verò ab initio non accesserit) fovetur diu, & paulatim in altiore volatilitatis gradum evehitur. Hinc est, quòd animal, in primis sui initiis, vitæ plantæ vivere non ineptè dicatur. Ita quidem censuit Galenus; quia matri adhæret, ut planta terræ. Ac propterea credidit, hepar prius formari, quàm Cor ipsum. Qua in re plurimùm hallucinatus est: siquidem hepatis parenchyma, aliquandiu post efformatum Cor, demum in conspectum venit.

De Communi-  
one vasorum  
fætus, p. 115.

De formatione  
fætus, c. 3.

Quod autem addit, *Flammam hanc nulli mortalium conspectam fuisse*; non imus inficias. Sed nec spiritus animales viderunt

derunt unquam ; quos tamen præfidenter assertum eunt, amplisque præconiis celebrant. Ab effectu scilicet hæc dignoscuntur. Tam tenuis etiam lucula interdiu ( in clariore nempe luce ) visum omnem subterfugit : nec quisquam, splendente sole, aut ferrum modicè candens, aut cicindelas micantes, aut lampyrides coruscantes, aut ignes fatuos, aut ligna putrida, aut alia tenuiter lucentia, viderit ; ut *Gassendus* rectè monuit. Addo præterea, tam sævo laniatu flammulam extinguere, priusquam ad lararium istoc penetrare queas. Unde autem aliter calor hic perennis enascatur, haud facile dixerit. Siquidem ad *fermentationis* operam recurrere, inane auxilium est : quoniam ipsamet, sine calore, nihil egerit. Nec rationem satis idoneam invenerit, quamobrem cordi tam amplis vectigalibus opus sit ; si calore solum, aliunde mutuato, munere suo defungatur. Calor enim, succendiculo destitutus, parum nihilve absumit, & citò deperit : quinetiam aere ipsi nihil opus est, cujus refrigerio citius extinguatur.

Pag. 131.

At-enim, inquit, *sanguis, in dextro cordis ventriculo, tum lymphæ, tum chylo, neutris sanè inflammabilibus, confunditur. Non sunt quidem suâ sponte admodum conflagrabiles :*

grabiles : neque enim hîc insigni detonatione opus erat ; siquidem placuit Naturæ, lenissimis hos *flammis adolere Penates*. *Ænead. l. i. v. 708.*  
 Imò verò nec *cribratio*, aut *comminutio* illa sanguinis in pulmonibus, (sine qua sanguinem circuitiōni ineptum fore arbitratur) hîc requiritur : sed absoluto pulmones calefaciendi officio, paulatim (ut diximus) in sinistrum cordis thalamum delabitur ; novum denuo calorem illic indepturus.

Miror autem, quo indicio nitrosi aeris præsentiam nos testari velit, si minùs ad eam rem suffecerit, quòd nullum animal in præcluso forno momentum temporis durare queat ; licèt idem interea aere repletus sit.

Quòd ait, *Calorem sanguinis haud tantum esse, quantus ad tam crassi liquoris inflammationem sufficiat*. Dico, id pedetentim, diuturnoque foru præcedaneo evenire posse : quemadmodum scœnum humectum, arctèque compressum, interdum flammam concipit. Pag. 136.

Nemo autem cum eo crediderit, tantundem sanguinis rapidè per cor ferri (cunctis sese naturaliter habentibus) quantum è singulis venis apertis effluere possit. Quippe, datâ semel portâ, celerius multò exilit, quàm aliàs more solito in vasis integris

tegis prorepat. Quemadmodum in porticu oblongiore utrinque foribus munitâ contingit : ubi, januâ alterâ apertâ, si altera occlusa sit, ventus (etiam acriter flans) in hanc non nisi lenem auram spirat; quia in semet refluus, sævientem impetum compescit; sin autem ambæ reclusæ fuerint, celeri turbine prorumpit foras. Adeoque (si rectè calculum ponat) sanguinis circuitus ordinarius, ejusdémque è corde protrusio (quæ singulis systolis fit) non unciis, ut opinatur, sed nec drachmis, aut scrupulis forsitan merienda est. Instituat enim computum, & reperiet, trigecuplo minimùm plus sanguinis (si rem ad suum calculum revocaverit) unius horulæ spatio (quo tempore pulsus moderatus quater millies cietur; sanguisque καμπτῶν κύκλους τέλει, flexuum orbis decurrit) è corde in unam aliquam arteriam propelli, quàm toti corpori insit. Quod num veri speciem aliquam habeat, ipsi æstimandum relinquo: apud me certè omnem fidem superat.

Nec quisquam facilè credat, nullum aliud cordi à Natura demandatum esse officium, nisi ut sanguinem ex angustiore vasorum spatio in amplius conceptaculum excipiat; eundémque immutatum (nam quâ aliter possit, cum nullus locus à san-



à sanguine liber concedatur?) in conjunctam arteriam transmittat.

At verò in piscium sanguine digiti calorem nullum perfontiscunt. Et *D. Low-* Pag. 138.

*rus concedit, pisces hac flammulâ non donari.* Pulchrè sanè in re crepera apponit

pignori fidem alienam. Catenata colunt officia, traduntque ecce operas mutuas:

alter caprum mulget, alter subdit cribrum.

Rem tamen perterricrepam narrat; nam profectò, quantum video, sententiæ meæ

periculum hinc haud spernendum imminet. Adversarium quippe nactus sum,

qui, *siquidem connixus sit, per corium, per* Plaut. Mil.  
glor. A. 1.  
Sc. 1.

*viscera, perque os Elephanto brachium trans-*

*mitteret.* Abscedite itaque ocyùs, fugite *Trojani, Achilles* vobis à tergo est. At-at

fallor plurimùm; otioso estote animo, sistitéque securi gradum: nam ab hoc mi-

lite ego *Prisciani* magis quàm vestro capiri metuo malum. Neque enim illius

auctoritate quicquam commoveor, ubi res ipsa, & ratio contrarium suadent. Siqui-

dem & nos quoque calidiusculi manum alteriùs frigore algentem prendentes, nihil

in ea caloris perfontiscimus; quàm tamen omni calore destitutam nemo dixerit.

Quinetiam sanguis piscis *Manati*, five *Vac-* Purchas. Tom.  
4. pag. 1275.

*cæ marinæ*, nobis, eum tangentibus, calidus deprehenditur. Atque Vir illustrissi-

mus

De forma ca-  
lidi.

Arist. de re-  
sp. c. 14.

Ibidem.

mus *Franciscus Baconus* verè ait : *In piscibus, collatis ad animalia terrestria, magis notatur gradus caloris, quàm privatio.* Pisces quidem non sunt, ut *Empedocles* censuit, *omnium animalium calidissimi, ut proinde in terra primum generati, opus haberint aquam incolere, refrigerationis gratià; sed paupertino solum Lare gaudent.* Non tamen *Needhamo* concesserim, *esse illos ad tactum lattucà vel portulacà frigidiores.* Sunt certè novi aeris identidem (etiam sævâ hyeme) appetentes; quia eorum flammula illius semper est indiga; eodémque præcluso, confestim intereunt.

*Nemo mortalium, inquit, vidit flammam frigidam.* Experiatur, quæso, in noctilucis, lignis putrescentibus, carnibus noctu splendentibus, atque etiam in lapide *Bononiensi*; & narret nobis, quem calorem persenserit. Idem de *rana* dictum putet: quæ quidem *pulmone manifesto* (ut ille voluit) non donatur: sed folliculos ventosos solum obtinuit; quos, ad respirationis rhythmum, nec contrahit, nec explicat. Agilitas autem illa, quam memorat, *cerebro* ejus potius, quàm *cordi*, debetur: si quidem, præciso capite, illico immobilis jacet; cum tamen, exempto corde, atque interaneis, repetitis saltibus vitæ præsentiam testetur.

De

De *spiritibus* autem *animalibus*, quorum natales & vivendi ordinem enarrat, non sum amplius sollicitus; utpote quos Natura ignorat; & de quibus *Willisus* multa lepidè somniavit, quem ille vigilans libenter sequutus est. Si quis tamen ejusmodi quisquiliis delectetur; adeat, si libet, Animadversiones nostras in *D. Thruston* Diatribam de Respiratione, pronuper à nobis conscriptas.

Illud verò apud eum perquam facetum, est, *Cerebri* nempe *corticem colore griseo* Pag. 140. donari, quòd sanguis arteriosus scilicet ad caput properans, spirituum animalium honorem ambiturus, ibidem purpuree suae vestigium reliquerit. Quemadmodum nempe, qui ad Principes legationis munus obeunt, intermedio itinere, in diversoriis publicis, Tabulas, honoris tesseras, sive symbola, suspendunt.

Fatetur quidem, flammulam cordis per ejusmodi *colum non trajici*; uti neque in arteriis cum sanguinem deflagrare: attamen calor, ex ea natus, unà cum sanguine illuc facile permeaverit. Fumus fuliginum, quarum hìc sæpe meminit, oculos illi, credo, obtenebraverat. Nimis autem inficetè ait, spiritus inter comburendum *absumi*; qui tamen uni huic incendio natales suos debent.

Que

Pag. 141.

Quærit postea, Cùm omnia animalitatis indicia, præsertim sensus & motus, imò & animi pathemata non obscurè se exerant, dum fœtus in utero moratur; quidnam superesse possit ad animal conficiendum; aut quorsum illud actuale incendium excogitetur? Ego autem respondeo, id fieri, quia simul ac lætus primùm prodiit in luminis oras, auræque æthereâ vesci cœpit, ( ut dictum est ) nequit postilla momento temporis eâdem privari: cùm tamen merus calor illâ facilè, imò cum comodo suo, carere possit. Estque etiam alia hujus rei causa; quia nimirum, in utero dum esset, à calore materno fovebatur; quò postmodum destitutus, luculentiore foco domi opus habet.

Ibid.

Ait deinde, *Chylum crudum & indigestum*, è brachii venis, vice sanguinis, à Chirurgis non rarò emissum fuisse. Fateor quidem id interdum (perrarò tamen) contingere, egoque etiam hujus rei exemplum vidi: quia nempe lacteus succus recens, copiâ majore solito, sanguini admiscetur. Quod tamen, opinor, non evenisset; si *concussionem*, *depositionem*, & *comminutionem* ( ab illo celebratas ) in pulmonibus subisset. Quia tamen parum admodum illius succi sanguini commiscabatur; potuit flammula, sine prodigio, eam labem effugere.

Ego,

Ego, ut hîc liberè dicam quod sentio, *fermentationem* illam πολυβρύλλητον in ven- Pag. 143.  
triculo, (cunctis sese ordinatè habentibus) nequaquam agnosco: fitque solùm, ubi adest, ob moram nimiam chyli in ven-  
triculo; atque etiam ab acidis humoribus, ructus aliâque incommoda afferentibus. Cum ipsamet concoctio à cibi manducari lentâ colliquatione procedat. Multò minùs admiserim, aerem, per cutis poros ingredientem, sanguini commisceri: libenterque audierim quænam *historiæ id testentur*. Pag. 144.  
Neque verisimile est, aerem, illac ingressum, per pulmones avolare. Miror autem maximè, repentinam mortem, non tam aeris defectui, adeoque flammulæ extinctioni attribui, quàm circulationi sanguinis interruptæ; qui tamen, etiam in defunctis animalibus, aliquandiu stadium suum perambulat. Nec etiam ( fateor ) *perpetuæ adeò nutritionis indigus est, ut omni minuto pasci eum tantopere oporteat*.

Pulsatio cordis, & pulmonum respiratio eundem rhythmum non servant: motus enim cordis frequentior est; quia sanguinis copiâ uberiore opus est, ut pulmones ad contractionem sui, sanguinisque propulsionem stimulentur. Nisi quis mecum mavult, id accursui solùm

Q

lùm sanguinis ad flammulam attribuere.

Pag. 148.

Mucosa substantia, ab eo memorata, non proficiscitur à sanguine per pulmones transeunte; verùm è nervis illorum tendentibus expuitur: ut hujus beneficio pulmones à siccitate nimia, motum eorum expeditum impediturâ, sese tueantur: quemadmodum frequenti calentis sanguinis transcurso, à nimii frigoris periculo proteguntur. Nec tamen (ut censet) mucor is vocis modulationi magnopere inservit; siquidem fistula humectior sibilum potius, quàm clarum sonum fundit.

Quædam alia minoris momenti, & ad rem, de qua agimus, parum spectantia, libens transilio. In eo autem hæsito plusculum, numnam scilicet in piscibus, *vesicis natatoriis* (ut appellant) donatis, renes majores, quàm in aliis congeneribus (quibus illæ defunt) reperiantur. Multò minùs concesserim, piscibus ejusmodi omnibus *vesicam urinariam* obtigisse. Quoniam ut libenter dem, renes eorum amplos utrinque à diaphragmate ad anum pertingere; non tamen concedam, eosdem omnes vesiculis urinariis donari; cùm illæ paucis solummodò obvenerint.

De

De avium modulato cantu (eum nempe ab *abdominis musculus* celebrari) mihi *Pag. 163.* cum ipso minimè convenit: utpote qui existimem, vocem earum diversimodè expediti ope *laryngis*, propè pulmonem in aspera arteria sitæ; ubi, adjuvantibus muscellis, lateribus ejus utrinque adnexis, variis modis aperitur, & coarctatur: hujusque variæ formaturæ concentuum varietas debetur, dum <sup>canoræ</sup> *aves* diversimodè fringuntur. Non autem existimandum, melodiam eam à tubulorum discrepantia, ceu disparibus Organorum fistulis, provenire. Quid enim transitum eodem tempore per omnes simul tubulos commentitios impediat? Neque sanè pulmonum vesiculæ *tibiis utricularibus* comparandæ veniunt. Rana variis modis coaxat; non tamen ærem in abdomen (avium more) transmittit; neque vesicularum pulmonalium auxilio ad eam rem utitur: quiescunt enim illius folliculi inter respirandum.

Sunt etiam aliæ officinæ, quibus sententiam suam scenicâ venustate phaleratum ivit. Quod ego in Viro admodum ingenioso haudquaquam culpo: facilémque mihi veniam ab eo paratam spero, quòd in hac re ab ipso dissenserim. Namque inter amicissimos quoque interdum dissidium sententiarum exoritur.

Q 2

D. MAYOW

D. MAYOW etiam adversus hanc nostram sententiam argumentis aliquot velatus est ; sed quæ mihi videntur haud profecta à dea *Pôrtho*, possèque levi manu rejici.

Ait, *Ignem, ad iterum dissolutionem, interitumque potius, quàm ad vitam animalium sustinendam aptum natum videri. Quo vix quicquam dici potuit incogitantius.* Eodem certè delirio cupiat Solis radios extinguï. Nec minùs ridiculum, quod adjicit :

*Si quis istiusmodi ignis in cruoris massa accensus esset ; dum sanguis ex arteria secta erumpit, eadem certè flamma luce propriâ se proderet.* Pari profectò rationis acumine dixerit, ignem in conclavi non exardescere, quia nihil flammæ, luminisve foris extra caminum conspicitur. Additque : *Neque equidem flammam unquam, nisi luminosam, & insuper aliquantulum causticam, & destructivam, accendi putandum est ; nisi fumos pro flamma venditare animus sit.* Ex illius itaque sententiâ, flamma quælibet è lucerna angustum foramen transvolans, per longum aeris tractum esset etiam à latere conspicua. Et ignis fatuus vicinam sylvam concremaret.

*Neque*



*Neque est, inquit, quòd credamus, flammam vitalem in sanguine è vase profiliante extinctam esse; quippe aer afflatu suo igni excitando potius, quam extinguendo idoneus est. Mirum hercle nî fidem habeat Rable-  
fo, jocosè narranti; in locis Septentrionalibus, sæviante hyeme, aliquando contigisse, ut bombardarum ictus displosi congelascerent; qui postmodum, adventante Vere, liquefacti, denuo horrificè intonerent.*

*Et quid demum, ait, de igne vitali animalium aquaticorum existimandum est? Eff-  
ferum certè eum & indomitum esse oportet, qui subter aquas deflagrat; & cui extin-  
guendo totus non valet Oceanus. Valeret quidem ad eam rem minor aquæ copia, modò ad illud sacrarium pervenire queat. Novimus autem, in respirantibus piscibus, eam ne quidem ad pulmones pertingere. Sùntque ignium species in ipsis undis inextinguibiles.*

*Plura non addam, quia antehac à me id negotii curatum est.*

*Hactenus Parisane, per obscuros Naturæ recessus divagatus, ubi pauca admodum Auctorum vestigia, tenuésque solùm & creperi rationum radii affulserunt; ad te demum revertor, visurus quàm strenuè cum Harvæo de via decertes.*

## CAPUT. II.

*Qualis sit Cordis motus.*

*Celium Rhodiginus.*

**C**Rediderunt Augures, à Deorum sede Septentrionali cùm in meridiem spectes, ad sinistram esse partes mundi exorientes; ad dextram, occidentes. Inde sinistra auguria fausta dicebantur; quòd ea, quæ oriuntur, quæque ortus causam tribuunt, meliora sint iis, quæ occidunt, quæve interitum rei demonstrant.

Inauspicatò itaque à te factum, Parisane, quòd Harvæum ad lævam collocaveris. Nobis enim Septentrionalibus (ut nôsti) meridiem intuentibus, sinistram versùs Solis ortus est. Neque ægrè ferre debuisti, quòd ille in novo itinere sine comite incedat. Quomodo enim ab aliorum sententiis causæ suæ suffragia expectaret; qui certis experimentis, firmisque (ut palam fiet) rationibus, contrariam iis stabilivit? Neque fortuitò sanè aut infelicitè id illi accidit; etiamsi spretis peritis tuique similibus piscatoribus, angustos rivulos

los ingressus sit. Ubi tamen nullas *faeces* ex *cæno* expiscatus est : verum potius ex abditis Naturæ recessibus luculentam veritatem elicuit. Itane autem parvæ res tibi tam parvi pretii? nihilque placet, nisi quod

—*pulmo animæ prælargus anhelet?*

Perfius. Sat.  
I.

Ego verò subtilitatem maximam in iisdem reconditam esse, semper sum arbitratus : utpote ubi in arctum coacta sit rerum Naturæ majestas. Audi *Plinium* : *Turrigeros elephanthorum miramur hunters ; taurorumque colla & truces in sublime jactus, tigrum rapinas, leonum jubar ; cum ipsa rerum natura nusquam magis, quam in minimis, tota sit.* *Galenus* etiam ait, *Non solum in homine, sed & quocunque animali,* *part. c. 1.*  
*parem Opificis sapientiam & artem deprehendi : & quanto ipsum minus fuerit, tanto majorem admirationem excitare.*

*Parifanus* autem, aquilæ pullus, non captat muscas, nec pisces balænis minores venatur. Dignus sanè piscator, qui inter astra in *Eridano* se exerceat !

At-enim invisa tibi parva illa & frigida animalia, quia eorum corda, pusillo calore, pauculo & debili spiritu prædita, tardiore motu cientur. Indèque celebrem *Virum* tantopere hallucinatum ais : mirarisque, quòd laceri cordis, & jam penè mortui palpitati-

Cap. 4.

*ones observatum iverit. Quâ equidem in re tuum contradicendi pruritum nequeo quin vehementer demirer. An non enim ipsemet postea, calidi animalis cordis motus spectandos negas, quia inibi & eodem ferè tempore, quatuor peraguntur sensiles motus, ut non possint simul & nictu oculi distingui, discerni & internosci. Quine-  
 eiam, proximo Contactu<sup>r</sup>, asseris, quietem inter contrarios motus, nisi mente, percipi non posse. Quidni igitur frigida animalia in hanc rem adeunda sint, in quorum oculo pulsu hæc discrimina internoscantur? Baculi decussatim invicem juncti, si rapidè circumagantur, circulum suis extremitatibus præferunt; nec potest oculus interstitia dignoscere: qui tamen remissiore motu manifestè crucis formam exhibent. Et in quem finem Veteres, ut dictum est, ova adierunt, si tantum in minutis rebus fallaciæ est? Non arbitraris, opinor, in placido lentoque cordis motu, aliam (quàm in celeri) efficientem causam, aliúmve palpitationis modum esse. Soles profectò quidlibet interdum dicere, ut adversario obstrepas.*

S E C T.

## S E C T. XXXVI.

Pulsus rarus non est necessariò parvus, sive constrictus: quinimò sæpe celeriore elatior deprehenditur. In ovo, vesicula palpitans systolen & diastolen intuentibus manifestè exhibet. Quod similiter in tenuibus parvorum animalium cordibus usu venit. Difficultas enim internoscendi, à varia crassi parenchymatis vibratione provenire solet.

## S E C T. XXXVII.

Fibrulæ carnae, quas movendo Cordi præfecisti, non videntur mihi muneri isti obeundo satis idoneæ. Galenus quidem, *L. 1. de motu muscul.* intra cordis ventriculos *ligamenta robustissima, & tendinibus similia constituit; quæ retracta systolen efficiant.* Et Nicolao *De rad. Chyna, pag. 145.* *Massæ parvi sunt muscoli.* At Vesalii, & Riolani iudicio, non sunt aliud, quàm *valvulæ tricuspidēs cum columnis carneis.* Quas ego (si conjecturæ locus sit) eo partim sine sic fabricatas arbitror, ut earum operâ sanguis concutiat, comminuatúrque, ne grumescat. Ac propterea (ait Spigelius) *in dextro ventriculo* (ubi sanguis copiosior, minúsque calidus est) *quinque*

*quinque aut sex aliquando hujusmodi fibræ reperiuntur; in sinistro autem duæ tantum occurrunt. Quod certè fieri non debuit, si motui destinatæ essent; qui in sinistro ventriculo validior, imò profectò in eo solùm reperitur; cùm dexter, ob viciniam sinistri, moveatur, ac pulset. Quinetiam ipsemet postea negas, Cor, instar musculi, in se ipsum colligi & abbreviari posse: cùm neque structura ejus, nec dura, solidior, & densior substantia id permittant. Addis que commodè, Fibras vulgò dictas, non esse in ventriculorum, aut interstitiis, substantiam diffeminatas, ut in musculis usu venit; sed ab invicem, parietibusque separatas, in ventriculorum vacuis existere.*

Non iverim tamen inficias, in tenuibus cordibus, præsertimque piscium (in quibus paries hic intergerinus abest) expansis lateribus, conum basi, vel hanc illi magis appropinquare.

### S E C T. XXXVIII. & seq.

§. 17. De *Systoles* & *Diaستoles* indole atque usu, vide (si libet) quæ antehac à me dicta sunt. Similiter, quid de *Attractione* sentiam, in *Digressione*, huic ipsi rei dicatâ, exposui.

### CAPUT.

## CAPUT. III.

*De arteriarum motu.*

**A** *Mphora* à te instituta planè *Urceus* exit. Circulationis enim fundamenta, ab *Harvæo* posita, ne labefactasti quidem. Et erroris manifestum est, quod ais, Sinistro Cordis ventriculo, & aortâ ab innata facultate simul dilatatis, sanguinem in hanc ex illo profluere: Pars enim dilatata non exprimit, sed excipit potiùs. Utrunque verò simul fieri (ut tu vis) nimirum ut Cor eâdem diastole sanguinem in aortam effundat, atque alium eodem tempore ab hac mutuetur, adeò à ratione omni alienum videtur, ut ulteriore refutatione non sit opus.

## S E C T. LIII.

Verissimum arbitror, arterias omnes ipsius Cordis productiones esse, & simul cum cordis primo stamine, ante natum parenchyma, pulsare; ac propterea motûs illius causam ab hoc minimè dependere; quod  
tamen

tamen ipsemet, Contactu primo asseruisti.

Negamus autem, pulsus fieri à *facultate*, idque *mediantibus fibris*; quas in prima vesicula nullas reperias. Sed motus iste fit eo pacto, quo diximus. Quæ in contrarium attulisti, exigui momenti sunt. Nam licet à primo fonte, corde nempe, omnis arteriarum motus dependeat, non autem à peculiari aliquâ *facultate* in iisdem hospitante; potest tamen motus per corpus continuum facile perpetuari. Unde verò tibi constitit, non esse illum, sub finem, paulò hebetiorem? Credisne tam exigua discrimina internosci posse? Quid illud etiam, quòd *motus naturales sub finem languescere* ais? Satin' istuc congruè? Dein, nolumus, motum arteriarum fieri à percurrente sanguine, qui sibi proximum, undarum instar, continuè propellat, (eo enim modo interpellatim fieret, ac per intervalla) sed à primo ictu, quem sanguis, (ut sæpe diximus) è corde propulsus, aortæ incutit. Et si intestinum aquâ impletum hoc modo serias, conspicias eundem motum ad finem usque perdurare.

Falleris similiter, cum *percussâ trabe aliquâ longiore, motum in medio aerè fieri*, ais; qui propterea facile possit ad aliud extre-

*munum*



*mum pertingere* : nisi per medium lignum (ubi ictus fit) aerem cursitare somnias. Est tamen, aliquantum discriminis sit : est tamen (te quoque fatente) ejusmodi, ut à nobis percipi nequeat : quale etiam in arteriarum motu non illibenter concedimus. Reliqua hic à te allata paris roboris sunt, & fallaci fundamento innituntur.

#### S E C T. LIV.

Notum est, in *aneurismate*, unam duntaxat arteriæ tunicam ruptam, vel exhaustam esse, integrâ interea remanente alterâ. Undenam igitur spirituum tam immane dispendium ; cum à singulari tunicâ satis commodè intra præscriptos limites coerceri possint ? præsertim si spiritus (ut te velle vidimus) aerem, per diastolen avolantem, non sequantur ; sed, majore prudentiâ præditi, ad partes nutriendas feruntur, trahunturque. Quidni pariter hoc tempore idem fit ? Addo etiam, tunicam alterutram in homine, integram quorundam animalium arteriam crassitudine adæquare. Cur non igitur *spiritus*, qui in his tam tenui repagulo coercentur, in illo etiam unicâ tunicâ contineantur ? Imò verò id in arteriarum nostrarum finibus fieri, non negaveris. Præsertim, cum illi, (te arbitro)

tro) nihil aliud sint, quàm sanguis à cordis agitatione attenuatus.

Sed *trabuntur aliorsum*, inquis, à dolore, & *ratione vacui*. Hæc superius rejecimus. At quonam, quæso, trahuntur? An non ad ipsum aneurisma? Qui fit igitur, ut, tot spiritibus undiquaque ad locum dolentem affluentibus, pauculi saltem (idque cum partis illius emolumento) locum hunc non præterfluant, & porro per arteriarum spatia delabantur? Credâtne quispiam, spiritus tam numerosos (qui, ex *Parisiensi* sententiâ) momento citiùs è corde ad extrema corporis transvolant, omnes à parte haud magnopere dolente, ceu magneticâ virtute aliquâ, ita detineri, ut nulli ad ejusdem arteriæ ulteriora perveniant? Vera autem hujus rei causâ mihi videtur, quòd continuitas illa, quam diximus, aliquatenus interrupta sit; tum etiam, quia exundans inter tunicas sanguis, easdemque distendens, ac comprimens, vinculi rationem obtinet.

## CAPUT. IV.

*De motu Cordis, & Auricularum.*

**M***axima de nihilo nascitur historia.* Propert. l. 2.  
Eleg. 1.

Miror autem, tam subtilem Philosophum, in lepida sua *Cordis cum Imperatore* analogiâ, reliqua *Electorum* officia prætermisisse. Tu verò de *liene* tuo solum satagebas, cui *Ganimedis* munus discerneres.

Nec minùs pulcellus tuus cum Lectore dialogus, in quo ipsemet quæstionem instituis, & responsionem paras. Sed, quæso te, mihi quoque respondendi vices sint. Age itaque, interroga. *Cujus est proximè in corpore vitæ munus?* Virtutis semineæ, inquam, quæ in Cerebro & Corde nidulatur. *Quibus actionibus peragitur?* Calore foventis primùm; deinde ab innata flammula. *Quibus instrumentis?* Venis, quæ sanguinem Cordi apportant; & arteriis, quæ illum ex eodem efferunt. *A quibus agentibus?* A corde, sese contrahente.

*Quid*

*Quidnam è corde expellitur ? Sanguis ibidem calefactus, absque fuliginibus. A quo sanguis, & quonam ? Ad integrum corpus per aortam ; eundemque à vena cava prius excipit, quæ illum ad dextrum Cordis ventriculum defert ; indéque, per pulmones, ( præstito illíc refocillandi officio ) in sinistrum transfertur : eademque vena cava, non solum in piscibus, sed & cæteris omnibus animalibus à corde oritur, ut verissimè Aristoteles censuit. Unde ipsa ? Hæc sanguinem habet à magno officiali membro, hepate nimirum, atque etiam ab arteriolarum finibus in ejus ramusculos extremos definentibus : non autem à ficto Parisani lacu, liene scilicet. Spiritus quibusnam expelluntur, & quonam ? A nullo, neque quopiam : sed necessariò, quâ data porta, unâ cum sanguine effluunt ( pariter ac calor cum aqua fervefactâ ) totumque corpus simul perambulant. Quid sit de sanguine in Cor. attracto, si illico, apertis omnino semilunaribus valvis, evomitur ? Sanguis, in sinistrum ventriculum destillans, non illico incalescit, sed morulâ tantillâ opus est, ut debitè calefactus in aortam propellatur. Nullis autem fibris retinetur, ad cordis nutritionem. Quomodo fiunt spiritus ? Eo, quo suprà dictum est, modò ; non autem à motu cordis, aut parenchymatis*

renchymatis calore; qui, nisi ab iisdem spiritibus, nullus est. *Suntne aliæ cordis huic officio dicatæ partes, aliæve munera?* Sunt: *pulmones* nempe; quos aer perrepans sinistrum cordis ventriculum ingreditur; non quidem, ut ejus æstum attemperet; sed ut flammulam conservet; quâ deperditâ, vitalis simul lux extinguitur. Quippe inepta admodum est *Veltbusii* sententia: *Auget plurimum, ait, spirituum robur illa refrigeratio sanguinis, quam patitur in pulmonibus. Subitâ enim refrigeratione rigidiores redduntur: quemadmodum ferrum candefactum, & aquæ frigida immersum indurescit, & rigidius redditur.* Non potuit sanè quidquam magis stolidum excogitari, quàm cordis, ab ingruente per cutem ac pulmones aere, refrigeratio. Respirationis profectò utilitas, quantum ego video, in intimis clausa est Naturæ recessibus: sanguinisque motus opus est pistrinense; non minùs nos vertit in gyrum, quàm ipsemet vertitur. *Natura enim hanc rem in profundo, ut ait Democritus, penitus abstrusit.*

De generat.  
pag. 269.

Cicero in Lucullo.

Vides, quàm facilè hæc omnia in alium sensum torqueri possint. Quamobrem remove nobis ista *lusoria* arma, & age decretoriis. Idque etiam te velle, video; nam quæ omnia crasso hætenus & confuso

R

modo

*modo à te tradita sunt, jam accuratiùs clariùsque tractanda aggredieris.*

Priusquam autem in arenam hanc descendimus, non est transilienda levis illa ratio, quâ dextrum cordis ventriculum in eum finem extructum ais, *quia pulmones, ut & reliquæ corporis partes arterioso sanguine nutriri nequeunt.* Et hæc est illa subtilitas, quam *Harvæus* ignoravit; *Parifano* autem, sacrorum Naturæ penetralium ædituo, innotuit. Ipse tamen sæpe asseris, *spiritus à remotis arteriis ad nutritionem attrahi:* atque etiam passim, *den- sam & duram cordis carnem ab arterioso sanguine nutriri* affirmas. Et spumosi pulmones ab eodem non poterunt? Neque est quòd tergiverferis, te sanguinem *splenicum* per arteriam delatum intelligere. Nam hoc ipso loco statuisti, arteriarum (perinde ac cordis) motu spiritus confieri. Neque ego causam ullam idoneam video, cur dexter ventriculus, simili motu agitat- us, sanguinem pariter spirituosum non procudat: præsertim, cùm dexter ventri- culus, in calidis animalibus, celerius, va- lidiùsque pulset, quàm sinister in frigidis & exsanguibus. Sed *turpe est difficiles ha- bere nugæ;* quales sunt, quæcunque de spi- rituum generatione à te prolata sunt. Ideo- que ad sequentia propero.

§ 84. alibi-  
que.

Semen

Semen esse vitæ principium, jamdudum  
fassi sumus ; utpote è quo totius vitæ *con-*  
*servator*, *cor* ipsum extructum est. Nu-  
triri autem illud, & ab alimentali semine  
augeri, haud concesserim ; neque etiam  
*innatum* illum *calorem*, quem cum vulgo  
philosophorum adstruis ; nec magis, *arte-*  
*rias simul cum corde existere* ; etiamsi su-  
bitò pòst ex illo oriundæ sint ; eo modo,  
quem diximus. Neque *Aristoteles* vide-  
tur id voluisse, quod illi affingis ; *paren-*  
*chyma nempe cordis statim ab initio pro-*  
*ductum esse* : sed duntaxat semineum illud  
*flamen*, sive vesiculam palpitantem ; quæ,  
in animalis exordio, cordis munus explet,  
& revera *Cor* est.

Miror autem magnopere, cùm calidio-  
ris cordis motus tam ambiguos fatearis ;  
te frigidorum animalium corda tantopere  
respuere, & potiùs ad mortui cordis exa-  
men accingi. Notum est, quàm varia  
orbium cœlestium schemata ab *Astronomis*  
efficta sint, eadémque pari ferè verisimili-  
tudine ; ob hanc solùm causam, quòd va-  
rios siderum positus, ac mutationes, ob ni-  
miam à nobis distantiam, usurpare oculis  
nequeamus. Notissimum pariter, quanta  
de singulis ferè totius corporis partibus in-  
ter *Anatomicos* orta lis sit ; quòd, jugulato  
animali, earum munia statim aut cessent,

aut certè turbentur. Cordis autem motus, cùm post fata, licèt languidior, aliquantillum supersit; tu tamen mortuum prætulisti; ut nullum potiùs motum, quàm obscurum, cerneres: idque hìc etiam, ubi de motùs modo disputatur. Atque in hunc finem cor *vituli* elegisti: è cuius extispicio si probè tua phænomena extruxeris; næ ego *vitulà te dignum* arbitror: imò verò *quinquatris* tibi libenter faciam. Vereor autem plurimùm ne *muta* tibi ista exta sint.

Spiritus sive calorem è sanguine progigni, ultro tibi largimur: cordis autem *motu* id neutiquam fieri, jam ad ravim dictum est. Neque etiam *motus* illi (quos memoras) sibi invicem contrarii sunt, sed subalterni: fiuntque omnes à sanguine, per auriculas in Cor illabente, atque elabente ex eodem in aortam.

Hìc passim eandem cantilenam occinis, fingisque denuo *cor parasiticum*, quod lenis *quadrà* victitet. Ego verò eas ineptias amplius non moror, neque me morantur.

De cordis primo motu, sive *diastole* (quæ tamen revera motus non est, sed potiùs quies, & passio) quam *fibris carnis* peragi statuis, suprà abundè dictum est. Nec *systole*, quam transversis parenchymatis



chymatis fibris institui imaginariis, nos ulterius remorabitur.

*Sed hîc, inquis, communis sese obiectio offert, quæ trepidationem incutere creditur; quòd aortæ principio tres semilunares valvulæ præsto sint, in cordis diastole ingressum prohibentes.* Nihil autem hîc apportas novi; sed, ut sæpe antea, nunc etiam gratis tibi concedi postulas, sanguinem splenicum cor ingredi, licèt valvulæ contrarium suadeant. *Gratis, dixi: nam ratio, quam affers, ne triobolaris quidem est: quia aliàs scilicet aortæ dilatatio frustra esset.* Quasi verò traducendo è corde sanguini non inserviat; & ab hujus ingressu non necessariò efficiatur.

*Sin verò Aorta diastole à corde traheret, seu spiritus raperet, ut perhibent communiter hallucinati, confusio & chaos sequeretur; quoniam contrariæ diastoles essent: quippe cordis intrò, foras aortæ altera, simul & eodem tempore traherent; quod repugnans est.* Sanguinem è sinistra cordis auricula (diastoles tempore) in ventriculum cognominem delabi, eundémque proximâ systole in aortam protrudi, nullam confusionem parit; quæ certè contingeret, si (ut arbitraris) eodem tempore, pèrque idem vas, sanguis spirituosus è corde ferretur; & crassior è liene sanguis per valvularum

rimulas illaberetur. Nam discrimen illud, inter diastolis finem & systolis initium, tanti non est, ut hæc incommoda prohibeat. Quis enim credat, sanguinem spirituosum unicâ systole (ut ais) universum corpus transvolitare? Atque id incommodi, licet in alios transtuleris, ipsemet tamen in proxima pericope persensisti.

*Hactenus de Cordis diastole, &c.*

Qui censent, sanguinem per cor in aortam transire, non propterea ab eodem corpus nutriri autumant; nisi quatenus calorem, nutritionis vitæque opificem, secum unâ circumfert. Et quamvis plurimi id statuunt (ut certè faciunt) levia tamen nimis tua argumenta sunt; nec iisdem contrarium unquam eviceris. Nam quæ subdis, de copia sanguinis pulmonibus nutriendis destinatâ, prorsus frivola sunt, & vel *phantasticè ac cerbellotico jure* (ut tuis elegantiss utar) à te inventa, vel ab aliis temere mutuata; nunquam autem à nobis concedenda.

*Caterum postquam Cordis motibus moti, &c.*

Relicto Corde, ad auriculas secedamus; visuri, quàm præclare *Parisanus*, qui olim  
*auditis*

*auditus historiam mirabiliter mortalibus explicuit, de iisdem philosophetur. Profectò non tam olim ovârunt Ægyptii, invento suo Osiride; quàm ille, repertâ hac Chimærà.*

Negas, auriculis propterea opus esse, ut inde sanguis paulatim suppeditetur, qui aliter viâ declivi confertim in Cor irrueret. Idque ideo, *quia sanguis attrahitur ad usum: quare haud majore copiâ, quàm par est.* At recordare, quæso, rationum tuarum, quibus valvulas aortæ præfixisti; & desine hujusmodi quisquilias objicere. Illic enim similiter sanguis splenicus (ut censes) à corde attrahitur; & tamen *summâ prudentiâ (ais) valvulæ constructæ sunt, ne impetu & copiâ ingrediens, cor laderet.* Quod tamen à *Bauhino* dictum subsannas. S. 85.

In iis animalibus, quibus pulmones desunt, vena cava immediatè *sinistrum* ventriculum ingreditur. Quod nostræ causæ nullam difficultatem parit. Neque ille situs auricularum est, ut delabenti sanguini excipiendo sint inidoneæ; quicquid hîc in contrarium effinxis. Quapropter ratio nulla est, cur *Harvæus* uspiam lamentetur: nisi forsan præ gaudio lacrymet, quòd à tam elumbi Adversario causam suam firmiùs stabiliri videat.

*Verum enimvero ad rem, &c.*

*Initio Operis  
sui.*

Prope est, ut de te credam, quod *Galenus* objicit *Argenterius* : non solitum te nempe tua relegere. Fierine enim aliter potuit, ut tot dissonas sententias in paucis aliquot paginis conscriberes ? Ais, *sanguinem, in sinistro ventriculo temporis ferè momento in vitales spiritus converti*. Et tamen, proximis ferè verbis, *mora, mora opus esse* clamas. Quanta autem est mora illa, quam requiris ? *Duarum, scilicet, aut trium pulsationum*. Commodam sanè tempus, quo sanguis splenicus à motu cordis in spiritum evehatur ! In quem finem autem debuit sanguis ille in dextro cordis ventriculo commorari ? Nimirum, *ut à motu & calore cordis attenuatus & elaboratus, opportunum alendis pulmonibus fieret alimentum*. Atenim quid id aliud est, ex tua sententia, quam *sanguinem spirituasce* ? Suprà tamen acriter contendisti, sanguinem spirituosum non nutrire. Meministi ? Quo pacto autem fiat, ut sanguis è sinistro ventriculo ( quamvis cedentibus aortæ valvulis ) non illico elaboratur ; ex jam-pridem dictis satis, opinor, constat. Hæ tamen reculæ tanti apud te inomenti sunt, ut à nemine eas, *ne sub*  
*nube*

*quæ quidem*, hætenus cognitas fuisse, glori-  
eris : donec hæc præclara inventa, è *Nephe-  
lococcygia Aristophanis*, credo, nobis de-  
promeres.

*Quum itaque stantibus licet, &c.*

Oberras-ubique eâdem chordâ : & *lie-  
nem* semper, ceu *ægidem*, nobis obtendis ;  
saxumque hoc *Lemnium* clamore prope-  
modum *Philoctetæo* funestas. Auricula-  
rum quoque usus, quem statuis, merum Cic. 2. de fi-  
nibus.  
figmentum est : quod cum pro arbitrio  
tuo effectum sit, à nobis etiam pari liber-  
tate denegabitur.

Subit autem mirari, *Parisanum*, qui to-  
tius sanguinis circuitiorem videre non po-  
tuit, eandem tamen in sinistro cordis ven-  
triculo tam subtiliter perspexisse. Ait e-  
nim, *Sanguinem (in diastole) ex aorta in  
Cor guttatim illabi, rimulâ valvularum fa-  
tiscente ; partemque ejus aliquam ab esuri-  
ente corde in systole prærodi, ad nutritio-  
nem ; reliquum autem per latera ventriculi  
sinistrorsum in auriculam expelli, & ab ea-  
dem attrahi, & nonnihil absumi : deinde  
in auriculæ systole, cordis verò diastole,  
ejici denuo, & à ventriculo rapi, hujusque  
fundum petere : tandem verò, in proxima  
systole, sive sextâ ( ut numerat ) concussi-  
one,*

one, attenuatum & spumescentem, splenis crassiorem sanguinem conscendere; &, ceu curru triumphali vectum, aortam, pro Capitolio, ingredi.

Idem profectò *Parifano* hîc contigit, quod iis solet, qui terras incognitas adnavigant; videntes nempe magnum alicubi fluvium in Oceanum decurrere; urbem aliquam amplam, haud longo intervallo disitam imaginantur; nec procul ab ea circumadjacentes vicos, amœna pascua, frondosa nemora, præruptos montes, & reliqua, pro arbitrio. Quæ postea chartis aut membranis inscripta, pro comperitis exhibent. Unde enim *Parifano* hæc res innotuit? *Quisquam ne Curator viae Appiæ, qui Annæo Senecæ quid ageretur in Cælo evulgavit, id illi palam fecit?* Nimirum, quia ita figmento ejus videbatur commodum, hæc omnia in corde, etiam *mortui vituli*, subtilissimè rimatus est. Facile enim credimus, quæ facta esse efflictim cupimus.

## S E C T. LVI.

Multiformes cordis & auricularum motus pro arbitrio commentus es. Neque enim *sensu ullo*, ut fateris, *percipi possunt*; sed, obstetricante ratione, solum proveniunt. Ego similiter ex meis fundamentis dicam, quid hac de re sentiam; nec ulteriore utar refutatione.

Postquam pars sanguinis in sinistro ventriculo efferbuit, hujusque constrictione in aortam expulsa est; alius illico sanguis ex auricula proxima in locum jam inaniturum illabitur. Eo prorsus modo, quo oleum in lampade ad flammam accedere diximus. Ejus locum supplet sanguis è pulmonibus per arteriam venalem illapsus; & hunc denique subsequitur ille, qui in dextra auricula continebatur. Quemadmodum, per siphunculos subterraneos, aqua quoquoversum ad aufugientem aliam continuò protruditur.

Pulsant autem auriculæ, quia sanguis in illas obliquè, & guttatim quasi delabitur: unde fit, ut membranea illa vasa contremiscant.

## S E C T. LVII.

Hallucinaris plurimùm (ut è dictis liquet) dum, positis ab *Harvæo* principiis, motum aliunde quàm à corde incipere arbitraris. Neque tantilla *auriculæ dextra à suo ventriculo distantia* quicquam incommodi affert: ne quidem, etiamsi longiùs abesset: ut cuilibet hæc rectè perpendenti notum est. Reliqua putativa sunt.

## S E C T. LVIII.

*Καλῶς τρέχεις, ἀλλ' ἔγω τῆς ὁδοῦ.* Verum quidem ais, sed non veré. Etiamsi enim certissimum arbitrer, *cor ultimò vivere*; auriculam tamen, ob ascensum sanguinis in eam è ventriculo cordis, novissimè pulsitare, non existimo; sed quia, per intervallum aliquod, parum sanguinis è pulmonibus in illam delabitur. Tum etiam fortassis, quia, extinctâ jam flammulâ, sopitôque cordis fervore, tantillum sanguinis tanto ventriculo dilatando non sufficit.



*S E C T. LIX.*

Auriculæ moventur, postquam ventriculi ab officio cessarunt, dictas ob causas. Atque ut clariùs rem totam explicem, ita hæc sese habere arbitror. Moriente jam flammulâ, parum duntaxat sanguinis ad sinistrum ventriculum accurrit, ob causam jamdudum explicatam ; unde fit, ut in pulmonibus subsistat ; hîque, fato proximi, quasi suffocari videantur. Interea temporis, sanguis in sinistro ventriculo lentè effervescit, systolêque imbecilli ægrè exprimitur ; & vicissim in diastole parumper quiescit : eodémque tempore tantillum sanguinis è pulmonibus in auriculam sinistram illabitur ; statimque pôst è vena cava in auriculam dextram : quoniam successivus iste motus est.

*S E C T. LX.*

Sanguis, qui exili copiâ, dicto jam modo, in ventriculum illapsus est, à calore etiamnum superstitè, licèt debili admodum, parumper effervescens, pulsationem qualemcunque æmulatur.

*S E C T.*

## S E C T. LXI.

Quid hîc *systolen* aut *diastolen* nobis memoras ; cùm *Harvæus* dicat, cessante cordis motu, mucronéque ejus abscisso, & sanguine per vulnus effluente, auriculam nihilominus pulsare ? Et proiecô si ingredienti sanguini statim exitus pateret ; non video quomodo ille satis intumescere possit, ut ventriculum distenderet. Fit itaque auriculæ pulsatio, ob delabentem in eam è pulmonibus sanguinem ; non autem ( ut somnias ) à sanguine ex aorta, ante mucronis abscissionem, in auriculam transmissio. Sanguis enim ( tuo arbitrato ) ventriculi systole in auriculam explosus, proximâ illius diastole regreditur denuo, & per vulnus necessariò effluit. Novus autem sanguis in auriculam ingredi nequit ; quia ex aorta ( te sic censente ) in fundum ventriculi delapsus, per hujus vulnus excideret potius, quàm sursum scanderet. At verò pulsatio illa auriculæ, cessante etiam corde, aliquandiu durat. Ideoque, dum præclaris tuis inventis ( more tibi solito ) tantopere applaudis ; murem farinâ aspersum habes pro domino pistrini.

Scalig.

## S E C T. LXII, LXIII.

Quæ paragraphis his dicuntur, virgulâ censoriâ indigna judico.

## S E C T. LXIV.

Eodem argumento evicerim, neque cor moveri ab immisso ex aorta sanguine : nam & hac præscissâ (perinde atque auriculis) cor tamen usque palpitat. Sed reverâ motus ille, in quibusdam animalibus diutius permanet ; quia (ut *Harvæus* verissimè ait) sanguis eorum viscidior, calorem semel acceptum diutulè retinet.

## S E C T. LXV.

Haud mirum est, sanguinem, qui aliquando in corde æstuabat, accedente novo (licèt exiguo) calore, reviviscere denovo, & agitari. Indèque meritò evincitur, cor motûs hujus primariam causam esse. At verò inde deduci, sanguinem ad cor non deferri, sed ab illo (propriè loquendo) *attrahi*, indèque in auriculam expelli ; nullâ probabilitate, nedum demonstratione aliquâ, eviceris. Neque  
causâ

causæ quicquam video, cur *Harvæus* sententiam hanc suam mutare debuerit.

LIB. IV. *US E C T.* LXVI.

Crediderim equidem, motum illum qualemcumque sanguinis in dextra auricula, à trepidatione cordis provenisse.

*S E C T.* LXVII.

Nonnulla quidem rationi congrua, in historia *de ortu pulli ex ovo*, tradidisti. Non sunt tamen tanti, ut propterea tibi statuatam deposcas. Nam & eorum pleraque ab aliis observata sunt; & cuilibet ea diligenter intuenti faciliè occurrunt.

Verissimum sanè arbitror, cordis *vesiculam*, à calore incitatam, initio statim pulsare; idque ob spiritum semineum ibidem ridulantem. Dixi etiam, *semen*, in arctiore vesiculâ primò hospitans, à calore postea expansum & intumescens, laxiora spacia efformare: initio fortè aortam, dein alia vasa; & auriculas. Quinetiam rubedinis in sanguine causam aliquatenus explicare conati sumus: fieri eam nempe à *spiritu acido seminis*; quemadmodum & alii consimiles spiritus materias congeneres purpureo colore tingunt: nam si calore  
solo

solo rubedinem acquireret ; qui fit, ut carnes assæ, aut elixæ eandem amittant ? Nunc dicimus denuo, sanguinem, in corde tinctum, in *auriculis* quidem conspicuum esse ; nullum autem novi vestitus indicium in *corde* prodere ; quod primis diebus totum albicat.

### S E C T. LXVIII.

*Homo* verè *bullæ* dicitur : siquidem *cor* ( ejus aliquale principium ) tale est : túque ipsemet nos insigniter doces, cùm tam levem ob causam tantopere infleris, atque intumesceas.

### S E C T. LXIX.

Vero consentaneum, imò verissimum arbitror, id, quod in ovo palpitat, esse spiritum ; talem nempe, qualem diximus ; & ab eodem postea sanguinem agitari. Superest autem, etiam post obitum, aliqua palpitatio ; quia nonnihil caloris ( unde spiritus ille in actum promoveatur ) reliquum est. Potuitque fortassis similis palpitatio in semine ab *Aristotele* percipi. Quod verò addis, *semen illi excrementum esse, téque alibi id confutasse* : nunquam factum ; neque profectò *Parisanum* tam  
S
subtilem

subtilem agnosco, ut id possit. Verba quidem ejus aliorum accepisti, atque ab eo dicta erant. Ait enim *Aristoteles*, semen esse excrementum utile. Et merito quidem; quoniam ab animali, ceu superfluum, excernitur. At enim putavit, nihil ejus in formatione fœtus remanere: sed, postquam qualitatem aliquam utero impressit, statim ab eodem expelli. Falleris plurimum: credidit enim, partem ejus præcipuam (quam nos *salem peculiarem* diximus) unde fermentatio procedit, remanere: reliquum autem, quod vehiculi gratiâ eam comitabatur, aut superfluum erat, diffuere. *Harvæus* tamen (in elegantissimo Libro de *Generatione Animalium*) asseruit, sese (dissectis pluribus uteris, septimo, atque etiam amplius, post coitum die, nihil feminis, aut alterius rei, in iisdem reperisse. Verum hæc ad rem præsentem nihil attinent.

### S E C T. LXX.

Hic supinè admodum philosopharis. *Absque corde, inquis, vivitur in ovo, quia necdum efformatum est parenchyma: ita enim tua verba interpretor. At paulo antea: Admittimus, ais, cordis motum initio, carneâ nondum fabricatâ parte, absque sci-*  
*licet*

*licet affusione, sed vix visibilem.* Imò fanè vesicula, quæ omnino cor est, ab initio manifestissimè palpitat. Hic tamen error tantopere tibi placuit, ut ubique ferè cor ipsum cum suo *parenchymate* confuderis: quod tamen illi, non nisi postea, ( tutelæ gratiâ, vividiorisque motûs ergô ) adnascitur.

Non est ridiculum, insectorum corda in eorum *caudis* sita esse; siquidem illîc palpitationes, eorum effecta, cernimus. Crediderim tamen, in *cochleis*, & ejusmodi alijs animalibus, cor secus, quàm in sanguineis, sese habere; & *flammulâ* illâ, cujus meminimus, privatum esse: Eâque animalcula ad *plantarum* naturam propius accedere; *Solis*que duntaxat beneficio vitam tolerare: adeoque spiritus eorum à calore solùm externo suscitari; eoque nimis debili existente, motum quoque in illis omnem cessare; quemadmodum hyberno tempore contingit. Eidemque rei attestatur vesicula in ovo palpitans; quæ, frigido aeri exposita, moveri desinit: subdito autem aliquandiu pòst leni foculo, reviviscit denuo, motumque pristinum reintegrat. Ideoque malè intulisti, *cochleis corda, ob privationem motûs, deesse.* Neque minùs enerve est argumentum alterum. Quid enim, an motum *pulicibus*,

*bus*, aliisque minutulis animalibus denegabis; quia nervos & musculos, usitata motuum instrumenta, in iisdem nequis discernere?

### S E C T. LXXI.

Stellarum *fixarum* trepidatio, argumento est, eas nativo proprioque lumine splendescere; non autem (*Planetarum* more) ab aliena face radios suos mutuari. Ita sæpe viri prudentis est, proprioque ingenio Naturæ abdita perscrutantis, passim hæsitare, nihilque temere in rebus incertis astruere. Contrà verò nulli minùs dubitant, quàm plagiarium hominum genus; qui, in Magistellorum verba jurantes, eorum opiniones, tanquam *Xenocratis* testimonium, aut *Metelli* tabulas, transcribunt.

Cic. *ad Atticum*, l. 1. *Epist.* 13.

Pulsationem cordis fieri diximus ab infuso spiritu; non autem à parenchymate, aut facultate aliquâ.

### S E C T. LXXII.

Crassa hæc subtilitas est. Quasi *Harvæus* punctum mathematicum intellexerit, & non eo nomine res parvulæ indigari soleant. Quod de colorum *incertitudine*



*tudine* objicis, id parvi momenti est : varia enim animalcula enumerans, varios etiam colores expressit. Quam ego differentiam (idque animadversione haud indignum arbitror, licet tibi forsitan ridiculum videbitur) à *salis seminei* (ut sic dicam) diversitate proficisci existimo; quemadmodum alibi quoque, pro varia salium indole, diversimodas tincturas prolici, vulgo notum est. Et hanc veram causam censco, cur non omnia animalia *sanguinea* sint, etiamsi sanguini analogo vivificentur.

### S E C T. LXXIII.

Hanc rem antehac expendimus.

---

## CAPUT. V.

*Cordis motus, actio & functio.*

**C***icero* olim, cùm fraterculum suum, hominem pumilum, amplâ tabulâ ad medium duntaxat sui depictum cerneret; subridens dixit, *Dimidium majus toto*. Et *Parisianus* similiter protracto hactenus Operi plus laudis tribuit, quàm integrum meretur. Quot enim ex superioribus *Harvæi* observationibus jure explorerit, penes Lectorem candidum judicium esto.

## S E C T. LXXIV.

Qui soles in dictione sordescere, jam nimis delicatulus es: namque ego, inter *contractionem & constrictionem* quid hîc intersit, haud satis intelligo. Verùm hæc levia sunt.

Quæ ab *Harvæo* hîc afferuntur, rebus ipsis omnino conveniunt. Nam licèt initium motûs in vesicula, sive *corde* sit; ille tamen, efformato jam fœtu, in *auricula* primum

primùm conspicitur, utpote per quam sanguis in ventriculum delabitur. Multa quidem in contrarium accumulas; sed ubique eandem quercum feris: ideóque novo labore nobis nihil est opus; nec metus ullus, ne à tam levi ictu *circulationis* fundamenta collabantur.

### S E C T. LXXV.

Fibras illas, quas toties occentas, non magis in corde ejúsve auriculis inveneris, quàm in venis, vesicâ, aut ventriculo; quas nullas dari, *Vesalius* nobis oculatus testis est. Aut, si adsuerint, robori partium potiùs, quàm attractioni, aut expulsiõni, destinatas esse, certum arbitror.

*In Exam. Ob.  
serv. Fallop.*

*Harvæus* non dixit, auriculæ & ventriculi unum eundemque motum esse, simulque institui; sed in calidioribus animalibus, ob motûs celeritatem, ita videri. Antea enim inter eos motus distinxerat; sequensque *sclopeti* exemplum mentem ejus dilucidè explicat.

## S E C T. LXXVI.

Nôrunt omnes, machinæ illius motum esse *artificialem, ac violentum* ; cordis verò *naturalem & spontaneum* : cætera tamen exemplum ad amussim quadrat.

## S E C T. LXXVII. &amp; seq.

Falsissimum arbitror, deglutitionem fieri ab attractione musculorum ; cùm potius ab eorundem compressione, cibique depulsione contingat. Nec tu quidquam, præter decumana verba, in sententiæ tuæ confirmationem, attulisti. Crediderim propemodum, te velle, mictionem fieri ab attractione *matulæ*, non autem à *vesicæ* exclusione ; ita frequenter *attractionum* meministi. *Rudis antiquitas* (ait Seneca) *credebat, attrahi imbres cantibus, & repelli. Quorum nihil posse fieri, tam palam est, ut hujus rei causâ nullius philosophi schola intranda sit.* Par tuarum attractionum, & expulsionum ratio.

Nat. quest.  
l. 4. c. 7.

S E C T.

## S E C T. LXXX, LXXXI.

*Harvæus* rectè statuit, pulsum arteriarum fieri à sanguinis è corde impulsu. Tuique villi & fibræ, quas toties memoras, debiliores sunt, quàm ut nos trahant in sententiam contrariam. Enimvero cùm (tuo saltem arbitrato) similes fibræ in hepate ac venis reperiantur; quidni hæ quoque, perinde ac cor, & arteriæ pulsant?

## S E C T. LXXXII.

*Omissâ hyperâ, pedem insequeris*, ut est in adagio. Nihil enim hæc tua ad *Bacchum*: facisque hîc, quod *Ajax Lorarius*; qui, cùm in suos sæviret, credebat se *Argivos* cedere. Putavit quidem *Galenus*, spiritum è corde per totum corpus diffilere; noluit autem (nisi fallor) eundem cum sanguine unâ deferri, sed per medias arteriarum tunicas separatim transvolitare: cùm tamen spiritus à sanguine non magis seungi queat, quàm calor ab aqua fervida, si hæc per canales similes ferretur. Caloris autem causam, quam *ab octo diversis motibus* deducis, jampridem exploravimus, ut non sit opus pluribus. Quod  
de

de celeri sanguinis transfusione queritaris, non ita se res habet; nam diutius ille ex nostra, quàm ex tua sententia, in corde commoratur.

### S E C T. LXXXIII.

Sustinet, fatemur, *Galenus* contrarium; idque, ob rationem ab *Harvæo* allatam, quòd iter sanguini excluso commodum non inveniret. Illud verò cùm *Harvæus* liquidò aperuerit, non est quòd te vanà spe lactes, orationem tuam unquam fore verticordiam; illúmque aliquando sententiam tuam amplexurum, in quam nescio an quisquam hactenus concesserit; etiamsi omnia tua tam *bellè veritati, rationi, sensui, Naturæ providentiæ, fabricæque constitutioni convenire* glorieris. Ille autem opinionis suæ fautores nactus est ferè omnes.

### S E C T. LXXXIV.

*Facula* tua tenebriosior est, quàm ut lucem aliquam idoneam afferat. Sanguis enim splenicus, qualem effinxisti, ne per somnium quidem *Galeno* in mentem venit. Nec tamen difficultas tollitur, etiamsi quis talem admiserit. Ecquis enim intelligat, san-

sanguinem *plenis buccis* ad cor affluere, idémque in arteriæ diastole (quâ rimula valvularum imaginaria patescit magis) ingredi; proximâ autem systole (quâ arteriam angustiorem reddi autumas) sanguinem jam spirituosum, ac propterea tumidiorem factum, in aortam refundi, eandémque momento citius transvolitare, licet omnia plena sint? Profecto,

*Hæc mihi si Delphos, Dodonâq; diceret ipsa; Ovid. 4. Trist. Eleg. 8.*  
*Esse videretur vanus uterque locus.*

Deinde, qui fit, ut cor sanguine spirituofo & elaboratissimo nutriri dicas, cùm id antehac sæpius à te negatum sit? Quæ de vasorum anastomosibus narras, perperam à te intellecta sunt.

Ais, *Spiritus, simulâtque geniti sunt, (quod citò fit) explodi, & unicâ cordis systole per totum corpus deferri.* Atque hîc in mentem mihi veniunt tua verba.

*An ventriculorum celeres motus, tractio & Cap. 4.*

*explosio, bombardarum ictus sunt? Bone*

*Deus; quàm ridiculi & mirabiles isti usus?*

Sed tibi familiare est ea sapienter dicere, quæ ab aliis prolata deridicula videantur.

Perpende quæso; quæ à *Thuano*, historico nostri ævi gravissimo dicuntur, *Scomber-*

*gus, inquit, in curru suo, intercepto spiritu* *Hist. 122.*

ritu eneētus. Jam enim à longo tempore difficultate respirandi laborabat : ad quam per intervalla accedebat acutissimus circa præcordia dolor : quò cùm corripiebatur, sudore per totum corpus diffluebat ; adeoque debilitabatur, ut prope animo linguì videretur. Secto corpore, quod prævalidum ac vastum vivus habuerat, admiratione dignum Medicis ac Chirurgis fuit, quòd membrana & carnea omnis pars, quæ sinistram cordis regionem tegit, & ad flabellationis assiduæ usum dilatatur, ac comprimitur, ex immodico calore, & liberiore victu, tota ossea reperta est ; ita ut respirandi facultatem impediret : idque tandem repentinæ suffocationis causam dedisse creditum est. Nam alioqui saluberrimo temperamento, nullaque pars in eo non maximè sana erat, nisi quatenus crebrâ strangulatione vexabatur. Dic, age, Parisane, quomodo spiritus in illo gignerentur, cùm motus in osseo ventriculo nullus esse potuerit ? An ab eodem illo ventriculo, spiritus unicà systole in extrema arteriarum protrudebantur ?

Ego etiam pervelim scire, quamobrem hìc alibique passim, sanguinem arteriosum nutritioni inidoneum putes. Quænam, obsecro, tanta illi mutatio obtigit ? Sanguis nimirum ( tuo arbitratu ) ex li-  
ene



ene & venarum anastomosibus, per aortam cor ingreditur, inde auriculam sinistram adit, denuo in cor relabitur, tandem ascendens, fulgure ocyus per arteriam evolat. Unde, precor, interea ineptam nutritioni qualitatem induit? Dices forsitan, à motu cordis *incaluisse*. At verò calor vitæ opifex est, & sine eo nulla nutritio. *Attenuatus est* autem, & factus levior. Faciliùs igitur angustos nutriendi corporis meatus subeat. Causaberis forsitan illius *motum* & agitationem; quâ durante, nulla agglutinatio fieri possit; sic enim ulcera, ut consolidentur, imperturbata maneant oportet. Quomodo itaque *sanguis arteriosus* cordi apponitur? Quo pacto nutriuntur arteriæ à *venoso sanguine*; cum pariter in continuo motu sint? §. 6. Quin tu alibi, spiritus perniciousè transvolantes, ab arteriis retineri ad nutricatum, asseruisti. Ego certè in tam densis tenebris nihil video: sis igitur nobis portifculus ad clariorem pharum.

### S E C T. LXXXV.

Nihil hîc à te allatum, præter cramben. Negavit *Harvæus*, quidquam sanguinis ex aorta cor ingredi posse, quoniam Natura illius ostio obdidit pessulum;

lum ; valvulas nempe, ingressum omnem prohibentes. Tu verò non adeò connivere arteriæ illius valvulas, ais, quin aliquid furtim per eas in cor illabatur : præsertim corde ipso ita *volente*, atque *attrahente* : parum etiam duntaxat sanguinis per patentem rimulam ingredi ; nimirum *guttam unam aut alteram*. Quis autem credat, duas trêsvæ sanguinis guttulas (unde etiam, ut arbitraris, cordi & auriculæ nutrimentum paratur) tantum spirituosæ sanguinis procudere posse ; ut hic, unicâ systole, per omnia arteriarum spatia, fulguris instar, transvolitet ? Quinetiam cum sanguis ex lienis æstuario, vicinisque anastomosibus (ut censēs) *plenis buccis*, *summoque impetu* ad cordis ripas impingat ; undenam tanta ejus penuria ? Videmus enim è dolio, minimâ etiam hiante rimulâ, plurimum vini aut aquæ confestim profillire. Verùm hîc summæ Naturæ providentiæ aliter visum ; quærere plura nefas ! *Harvæo* quidem, nihil ex aorta in cor illabatur, nihil debuit, obstantque valvulæ, ne id per vim aliquando fieri possit. Anne hoc ridiculum ? Quis credat, *Parisano* tantum mandragoræ offusum esse, ut hæc non intelligat ?

## S E C T. LXXXVI.

Dicta pridem non repetam. De cæte-  
ro, si mihi pro *Harvæo* respondere con-  
ceditur; negabo, sanguinem in corde ab-  
solutam perfectionem nancisci: quin di-  
cam potius, perfectionem pristinam, ali-  
quatenus in corde amisisse. Nisi istæ  
perfectio dicenda sit, quòd parte sui op-  
timâ in spiritus absumptâ, calorem vita-  
lem cunctis partibus refocillandis imper-  
tiat.

## S E C T. LXXXVII.

Quæ tibi nullam difficultatem pariunt,  
mihi quidem, secundum tua principia,  
solutu difficillima videntur. Enimvero si  
(ut pridem à te dictum est) *tantundem*  
*sanguinis à pulmonibus absumitur, quantum*  
*per venam arteriosam singulis cordis icti-*  
*bis ascendit*; undenam ille sanguis, qui  
in demortuis animalibus arteriam veno-  
sam implet? An sanguis, ex tua senten-  
tia, pulmones scandit sine attractione?  
Aut hi plus attrahunt, quàm ipsis ex usu  
sit; & jam morti appropinquantes, de  
copiosiore viatico sunt solliciti? Simili-  
ter,

ter, an valvularum illa rimula, defuncto jam corde, plus sanguinis, quàm olim, intromittit? Quorsum, precor? an, ut cor extinctum nutriatur; &, si fieri id possit, ab orco revocetur? Quibus autem fibris, cessante jam animæ officio, sanguis ille attrahitur? Profectò si facultas aliqua *attrahitrix* adsit, crediderim *expultricem* pariter non deesse.

---

CAPUT.

---

I  
ni  
pe  
no  
sit  
ha  
né  
par  
stin  
eju

mir  
isse,

## CAPUT. VI.

*Quibusnam viis sanguis è vena cava  
in arterias, vel è dextro cordis  
ventriculo in sinistrum feratur.*

## S E C T. LXXXVIII. &amp; LXXXIX.

**M**erito ab *Harvæo* dictum, non posse  
certò partis alicujus usum dignosci,  
nisi ejus diversitas in pluribus animalibus  
perspiciatur. Cum enim aliquæ partes  
nonnullis animalibus desint; aliæ aliter  
sitæ, & diversimodè efformatæ sint: ab  
hac varietate veri earundem usus functio-  
nèsque optimè elucescunt. Quamobrem  
*parum sanus es, dum Harvæum* (ob præ-  
stitam præclarè hanc operam) & sequaces  
ejus reprehendis.

## S E C T. XC.

*Harvæum*, ad hanc rem explicandani,  
minora animalia summâ cum ratione adi-  
isse, jampridem diximus. Jam verò mirari

T

libary

Cap. 2.

libet, à tam subtili Philosopho inconcin-  
nam adeò sententiam potuisse proficisci.  
*Docet Galenus, ais, & nemo nescit, arterias  
sui nutriendi causâ, sanguinem à venis mi-  
noribus per anastomofin (& à splene potissi-  
mum, ex tua sententia) trahere, & na-  
turâ continere. Quid igitur? Ergo sectâ  
transversim prope cor arteriâ, sanguis, qui  
effluit, non prodit è corde, sed à remotis  
venis & liene. Hæ-ne tuæ subtiles de-  
monstrationes? Profectò, instar Spectri  
Virgiliani,*

*Das sine mente sonos, das cassa & inania  
verba.*

Accede, quæso, ad *Lapidem tuum Lydium*,  
ut videas num-nam aurum sit, quicquid  
fulget. *Innocens* certè ego sum (ut tua  
verba mutuer) *ab hujusmodi speculationis  
subtilitate.* Ain' verò, *neminem nescire,  
arterias sanguinem è venis per crebras ana-  
stomoses mutuari?* Quin tu unicam saltem  
ibi loci anastomofin ostende; &, per me,  
viceris.

## S E C T. XCI.

Verba magnicrepa solùm das, dum nos  
argumenta valida exposcimus. *Etiamsi,*  
ais,

ais, *Harvæo* concedatur, *ventriculum finistrum* è cava sanguinem trahere, nulla tamen inde sequetur circulatio. Quidum verò *Parifane*? Quia cor, providentiâ *Naturæ*, tantum sanguinis duntaxat trahit, quantum nutritioni ipsius sufficit. Ergo, quicquid pariter (te iudice) ex aorta ingreditur, id in nutriendo solùm corde absumitur. Nequaquam, inquis, quia cor, ceu officiale membrum, aliquanto plus, quàm pro nutritione ejus satîs sit, attrahens; quod superest, id, in spiritus conversum, per arterias toti corpori communicat. *Eugepæ*! pulchrè hæc conveniunt, tuisque principiis digna sunt. At quidni pari, imò meliore jure, *Harvæus* dicat, eâdem *Naturæ* providentiâ, plusculum sanguinis ad cor affluere; ut pars ejus inde profiliens, spiritusque simul deferens, totius incolumitati prospiciat?

## S E C T. XCII.

Profectò pugnant, quæ tu hîc commentus es; non autem ea, quæ ab *Harvæo* statuuntur. Ne autem gratis hæc dicta putes, rem ipsam pressius intueamur. *Vniones vasorum*, inquit *Spigelius* (idque ex vulgari sententia) *pulmonum gratiâ condite sunt*; quos (in fœtu) & crasso sanguine

T 2
venoso

venoso nutriri, nec arterioso destitui conueniebat. Crasso quidem nutriri; ut, cum nondum cordi respirandi præstarent officium, ad quod levitas eorum requirebatur, aspera arteria, tenera adhuc & flexilis, ab eorum pondere comprimeretur, ne vacuum in ea esset, quod aerem traheret, qui in utero concedi non poterat: hinc in fœtu pulmones graviores esse cernimus, & aquæ injectos immergi. Arterioso autem non destitui, ne privarentur vitâ. Vasa ergo hæc Natura sic adaptare debuit, ut neuter sanguis ad cor appelleret: non venosus, ne in dextro ventriculo (ut in editis) attenuaretur; nec arteriosus, ne ad pulmones non deveniret: non potest enim cor ingredi, cum in aortæ orificio valvulæ foras spectent. Ille ergo per venam umbilicalem attractus ad hepar, indeque per radices Portæ refusus in cavam; statim, antequam cor attingat, in arteriam venosam effusus, pulmonibus subministratur. Hic contrâ, attractus per arterias umbilicales, ubi prope orificium arteriæ magnæ constiterit, cum cor ingredi nequeat, per tubulum ad venam arteriosam, indeque ad pulmones defertur.

Quæ verba transcribere placuit, quia clara sunt: ut inde constet, quid de controversia præsentis (cujus sæpe meministi) sentiendum sit. Illa autem duntaxat attingam,



tingam, quæ sententiæ tuæ communia sunt. Ac primum mirari subit, cordis vos tantopere oblitos esse, ut ne unam quidem sanguinis guttulam illi concederetis in solatium, sed omnem eum ad pulmones transferretis. Haud mirum equidem, pulmones (edito jam fœtu) adeò famelicos esse, si in primis incunabulis tantum sanguinis abliguriant. Magis etiam mireris, Naturam decussata illa itinera transferendis sanguinibus destinasse. Quidni enim (ex tuo decreto) sanguis arteriosus ex aorta per patentem valvularum rimulam, sinistrum ventriculum ingreditur, ut inde rectà per arteriam venosam pulmones adeat? Similiter, sanguis venosus nullo (quòd sciam) incommodo per dextrum ventriculum in venam arteriosam efferri potuit. Nam quòd hunc, obliquo itinere, à vena cava per arteriam venosam ad pulmones transfertis, prorsus commentitium est, & ipsius valvulæ (foramini ovali præfixæ) structura refragatur. Quorsum enim hæc radice suâ supernè firmata est? Certè infernè potius debuisset; Illo namque modo, quo jam extracta est, dum sanguinem affluentem admittit, aliquantulum sublata ejusdem ascensum prohibet; descensui autem sanguinis versus sinistrum cordis ventriculum neutiquam in-

commodat. Et certè hujus gratiâ potissimum omnem sanguinem affluere arbitror. Indèque cordis motus, etiam in Embryone (quicquid *Parisanus* voluit) perennis est. Idque ita esse, positâ nostrâ sententiâ, clariùs (opinor) elucescet; quæ sic se habet. Sanguis, è vena cava profluens, per foramen ovale ingreditur arteriam venosam, pèrque hanc in sinistrum cordis ventriculum delabitur, ut materia fabricandis spiritibus præsto sit. Alio autem itinere haud expeditè id fieri poterat; quia pulmones etiamnum compressiores faciliem ei transitum abnegant: neque etiam eo opus, quoniam isti, materno calore rescillati, necdum magnâ illius copiâ indigent. Ex sinistro mox ventriculo in aortam protruditur. Sed & dextrum ventriculum sanguinis pars è cava ingreditur, ut speluncam illam apertam servet, foveâtque; per quam sanguis omnis postea transferendus est. Inde autem pars exilis sanguinis recreandis pulmonibus delibatur; dum reliquum in aortam per canalem arteriosum fluit, & cum reliquo arterioso sanguine circulatur.

Postea verò, nato jam fœtu, pulmonibusque aerem inspirantibus, novus transitus conceditur. Ideoque sanguis è dextro ventriculo fursum per patentius iter pulmones

mones versùs fertur, & canaliculum (in usum pristinum efformatum, móxque occludendum) maximam partem præterlabitur. Deinde, perfuncto pulmones calefaciendi officio, in arteriam venosam illapsus, dictam valvulam alluit, eandemque compressu suo vasis lateri tandem agglutinat: unde fit, ut illæ vasorum copulæ tempore dispareant. Tempore, inquam: nam licèt *Galenus* dicat, *utrámque sigillationem fieri intra biduum aut triduum*: L. 15. de us. part. c. 6. *Vesalius* tamen existimat foramen obsignari, & canalem concidere; non statim atque animal editum est, sed post aliquot septimanas. Et *Hofmannus*, in vitulis duarum aut trium septimanarum aliquoties perspicuè ostendit. L. 3. de Thorace, c. 13.

*Ergo-ne*, inquires, *durantibus illis anastomosis*, nihil sanguinis ad pulmonum nutrimentum affluit? Nihil sanè in eum finem affluere, jam antea à me satis disputatum est. Exilem tamen foculum, ut hilariùs in tenebris vitam exigant, iisdem, à tantilli sanguinis affluxu, concessimus.

Quamobrem (ut ad te revertar denuo) non erravit *Harvæus*, cùm circuitiorem sanguinis in Embryone quoque constitueret. Et quæ in hanc rem à te afferuntur, leviora sunt, quàm ut nos à suscepta sen-

tentia dimoveant. *Negas, te intelligere, quomodo sanguis sursum fluere possit.* Id verò à nobis antehac explicatum est. Nimirum, sanguinem ad sinistri ventriculi flammam, perinde ac oleum ad ellychnium, accurrere. Et qui tantam vim *attractionibus* tribuere soles, non debuisti hîc hæsitare. *Trahitur quidem sanguis, ais, in alimentum; non autem aliter.* Quasi verò *provida Natura* ( ut tuo more dicam ) non possit æquè in alium, eúmque potiore, finem, sanguinis quantum satis sit attrahere? Idque etiam fieri asseruisti, cùm plus sanguinis à sinistro ventriculo trahi diceres, quàm pro ejus nutritione sufficeret; ut reliquum ejus in spiritus, ad vitam animalis sustinendam, impenderetur. Deinde scrupulum tibi injicit, *quomodo per idem vas* ( nempe arteriam venosam ) *sanguis ad pulmones ascendere, & descendere ad sinistrum ventriculum possit.* Qui facilè eximitur; si ( ut modò diximus ) nullum sanguinem è cava per arteriam venosam ad pulmones ascendere, sed omnem illac ad cor descendere intellexeris.

Accedit tandem hastatus miles: *Cùm Natura, in Embryone, per umbilicales arterias sanguinem arteriosum sursum ad cor transmittat, non potest sanguis per easdem illas*

*illas arterias, eodem tempore, deorsum ruere.* Quidni autem, perinde ac in edito jam fœtu, sanguis venosus & arteriosus (ex tua sententia) contrarium iter instituunt? Sed revera nullum hîc ejusmodi incommodum: pro confesso enim accipis, quod caput est quæstionis. Nempe *Harvæus* nunquam concesserit, sanguinem arteriosum à matre per fœtûs arterias transfundi: sed verè statuit, sanguinem illum omnem per fœtûs arterias in uteri placentam effundi; pèrque hanc eo prorsus modo in venas fœtûs redire denuo, quo per habitum corporis in jam natis solet.

### S E C T. XCIII.

Non potuit ab *Harvæo* quicquam dici luculentius, quôdve ejus sententiam confirmet magis. Nam cùm in anastomosi venæ cavæ cum arteria venosa, valvula juxta foramen ovale apposita sit, quæ venosi sanguinis recursum impediat; quidni similiter in canaliculo illo, qui sanguinem (ut arbitrantur) ex aorta in venam arteriosam apportat, tale quid extructum est, quod arterialem sanguinem regressu prohibeat? At verò quoniam, ex nostra sententia, sanguis non fluit ex aorta, sed in illam per venam arteriosam influit; valvulæ

vulæ sigmoides, orificio hujus præpositæ,  
 id muneris commodè explent. Nequit e-  
 nim sanguis, ab his valvulis præpeditus,  
 ad dextrum ventriculum remeare : nec  
 potest multum illius in compressos jam  
 pulmones ascendere : itaque necessario per  
 tubulum sive canalem illum propellitur.  
 Adhæc tu, parum appositè, negas, *cor in*  
*utero contrahi, ut ejus motu sanguis in ve-*  
*nam arteriosam exprimi possit.* Jamdudum  
 verò contrarium evicimus, paritèrque mo-  
 tum dextri ventriculi à sinistri pulsatione  
 deduximus. Quid autem *montes* hi ver-  
 borum parituri sint, quidve novi *Parisa-*  
*nus* adinvenerit, quod *omnes hæctenus latu-*  
*erit,* nunc videndum est.

#### S E C T. XCIV.

Suaviter dictum, scilicet : *Embryonis*  
*pulmones, quia ociantur, sanguine materno*  
*crassiore aluntur ; pulmones verò fætûs in*  
*lucem editi, quia continuo motu agitantur,*  
*tenuiore & elaboratiore sanguine, à motu &*  
*calore dextri ventriculi attenuato, nutriun-*  
*tur ; sapientissimâ Naturâ ita providente.*  
 Attamen æquius videbatur, ut tenelli pul-  
 mones, nullis etiamnum agitationibus, nec  
 vitam duram tolerare sueti, delicatulo pri-  
 mùm victu alerentur. Itâne rustici, con-  
 tinuis

tinuis laboribus fracti, opiparis, coctisque  
facilibus cibis vescuntur? Verùm id pul-  
monibus à *Parifano* conceditur in sola-  
men, ut grave pensum alacrius absol-  
vant.

Quæ verò tandem res illa nova ab om-  
nibus hæctenus ignorata? Nimirum, *pul-  
mones per dictum canaliculum, sanguinem  
duntaxat spirituosum recipere*. Unde igitur  
nutritur canalis iste, si sanguis arterio-  
sus corpori alendo ineptus est? Atqui *Spigelius*  
(ne alios jam commemorem) ean-  
dem rem, ut vidimus, clarè expressit. Ve-  
rum, inquires; sed modum non explicuit.  
Nam cùm sanguis venosus arterias per ana-  
stomoses ingrediatur, ille pariter (ex vul-  
gari sententia) eodem curriculo ad Em-  
bryonis aortam pertingeret; quod fieri  
nefas. Quid fit igitur? Audienda est mi-  
rabilis *Parifani* subtilitas, nulli unquam  
(nisi fortè *Ulmo*) cognita. *Sanguis*, inquit,  
*splenicus, & alius quilibet venosus, per dia-  
stolem cordis & arteriarum, sursum ad ma-  
tris cor vergit; cujus unicâ systole, sanguis  
spirituosus, sive vitalis cordis materni va-  
por, & halitus duntaxat, ad ultimas matris  
arterias, & Embryonis pulmones expellitur*.  
Res sanè mirabilis, & vix à quoquam an-  
te hac intellecta! Plurimum tibi pulmo-  
nes debent, famamque (ut par est) cele-  
brabunt,

brabunt, de quorum commodo tantopere es sollicitus. Cui autem bono, spiritus è corde matris ad Embryonis pulmones tam rapidè exploduntur? Scilicet, ut his vitam suppeditent. At verò illi, ceu carcere conclusi, vitam ociosam ac privatam degunt; & caloris quantum iis sufficit per alteram anastomofin facilè nancisci poterant, ut adeò nihil opus sit tanto spirituum dispendio; præter eos enim, nihil (tuo quidem arbitrato) in arteriis fœtûs continetur. An igitur congruum tibi videtur, ut ignavi atque ociantes pulmones plus sanguinis liguriendo absument, quàm postquam operæ se accinxerunt suæ? Quinetiam cedo, obsecro, quo duce spirituosus sanguis ex matris corde rectà ad uterum pertendat, & placentam ejus ingrediatur; nec tamen à deteriore sanguine venoso ibidem scatente commaculetur? Aut quâ indagine, per anfractuosa viarum, ad fœtûs arterias perveniat; quæ non à matris, sed à fœtûs corde oriuntur? Negas? Quî fit igitur, ut nulla proportio sit inter orificia vasorum placentæ uterinæ, & innumeras umbilicalium vasorum ramificationes? Undenam hæc initium habent, quibus in utero nullæ respondent? Vel quid illud est, quod tandem innumeras arterias in unam aortam conjungit; si hæc è corde fœtûs



fœtus oriunda, in multiplices ramos sese non diffindat? Quid multa? Hujus veritatis clarum specimen affert *Galenus*; ubi ait, *Constrictis umbilicalibus arteriis, pulsum durare versùs fœtum, cessare autem versùs placentam.* Ubinam igitur facultas arterias attollens? Ubi sanguis arteriosus in easdem è matris corde explosus? *Harvæo* quidem hæc commenta nihil incommodant, neque illâ tuâ subtilitate ipsi quidquam opus est; utpote qui omnino inficiatur, sanguinem spirituosum à matre per arterias ad cor Embryonis ascendere: sed, è diverso, eundem ab Embryonis corde ad placentam matris proficisci, statuit. Adeò ut fluxus omnis à placenta fiat per venas, refluxus autem ad illam per arterias. In cujus rei confirmationem (quod magis circuitum sanguinis evincit, quàm cuncta à te allata eandem destruunt) *Galenus* ait: *Constrictis umbilicalibus arteriis, moventur arteriæ fœtus; cessant autem, venis laqueo interceptis.* Ligatâ enim venâ, sanguis (spirituum materia) nequit ad cor appellere.

L. 6. de us.  
part. c. 21. &  
l. 6. de sens.  
Hip. & Plat.  
c. 6.

L. 6. de us.  
part. c. ult.

## S E C T.

## S E C T. XCV, &amp; XCVI.

L. 3. de part.  
an. c. 4. & l.  
6. hist. an.

Anthropol. l. 6.  
c. 8.

Cùm in ovo nihil reperires, quod spirituosum sanguinem ad pulli artérias transmitteret; æstuans nimium, ad diverticula quædam & umbras confugisti. *Harvæi* utrumque motum negas, alterum tamen statim agnoscis; eum nempe, quo pulli cor in ovo movetur. Nescio autem quâ temeritate dixeris, *Aristotelem* hunc motum ignorasse; cùm tamen eundem sæpe dilucidè explicuerit. Quod verò addis, *rem in utero gestis aliter se habere, quia horum cordis vicem maternum cor supplet*: id precario dicitur, nósque, ob rationes dictas, præfractè pernegamus. *Quineti-* am *Riolanus* experimento & autopsiâ certissimâ rei hujus veritatem comprobavit. Si, inquit, ovis vel capræ uterum secueris, intactis membranis; videbis trans membranas cor agitari: nam supra membranas appressâ manu thoraci, cordis motum senties. At nondum respirat fœtus, quia sunt integra involucra, quibus undique septus & obvolutus est. Quod si supra membranas os fœtus apprehendas, & arcè constringas, ut nequeat ore vel naribus aërem inspirare; & illis discissis membranis, thoracem momento incidas; cor ipsum micare depre-

*deprehendes : quod sæpius à nobis observatum, & publicè demonstratum. Quamobrem subterfugium tuum ne trioboli quidem est, dum ais : educto ex utero fœtu, cordis motum sub obtutum cadere, quia jam respiratione, ac refrigeratione eget. Vides enim, non minùs in exemplo Riolani, quàm in clauso utero, obstare membranas. Neque causam ullam video, cur fœtus potiùs in aere frigido, quàm in calente utero, refrigeratione indigeat.*

Exempla ab *Harvæo* adducta prudenter transilis ; quia in ejusmodi ( nisi fallor ) parum es exercitus.

. S E C T. XCVII.

Antiquam cantilenam canis.

S E C T. XCVIII.

Nimis tibi despicatui sunt exigua animalia : & *Senecionis* instar ( cui ob id Seneca sua for. 2. cognomen *Grandio* impositum ) omnia magna expetis. Prudenter monet *Aristoteles*, De part. an. l. 1. c. 5. *viliorum animalium disquisitionem* atque inspectionem spernere, indignum esse *Philosopho* ; cùm nulla res sit *Naturæ*, cui

non

*non infit aliquid admirabile.* Mirórque  
 vel eò magis, quia ( ut ais ) nullum ani-  
 mal tam exiguum occurrit unquam, in  
 quo *lienem* non deprehenderis. Eo au-  
 tem cùm fruereris, non videbatur aliud de-  
 siderari, de quo magnopere esset sollicitus.  
 Hic enim tibi potissimùm in delitiis: e-  
 undémque ut aliquantulùm recreares, jo-  
 cum venustulum scilicet deprompsisti.

---

## CAPUT.

H  
 tu  
 ex  
 pe  
 pe  
 de  
 ne  
 nis  
 los  
 dis  
 tru  
 ani  
 gis  
 vide

## C A P U T. VII.

*Sanguinem è dextro cordis ventriculo per pulmonum parenchyma permeare in arteriam venosam, & sinistrum ventriculum.*

## S E C T. XCIX.

**E**Xempla, ab *Harvæo* adducta, sunt appositissima. Quis enim diffiteatur, sanguinem per spongiosos pulmones expeditius permeare posse, quàm aquam per terram; sudorem, per cutem; serum, per renes; eundemque sanguinem, per densius hepatis parenchyma? Tu tamen, ne nihil diceres, aquis facilem viam sternis, etiam per compactos arenarum cumulos, & densas glebas: sudori calcaria addis: aquis acidulis funes adnectis, & protrudentes machinas. Denique, quidquid animo collibitum est tuo, promptè effingis: tuisque his commentis Naturæ providentia perpetuò obstericatur. At enim

U neque

neque *Harvæo* pro suo motu deerant trahentia instrumenta, si modò ad antiquas illas nugas confugere voluisset.

## S E C T. C.

- Nullus unquam error quempiam decipit, nisi sub specie veri.

## S E C T. CI.

Plin. l. 7. c. 52. Vigilabas, *Parifane*, cùm hæc scriberes? Fabulantur, *Hermotimi Clazomenii* animam, relicto corpore, errare solitam; ut, quid alibi terrarum ageretur, cognosceret.

Herodot. l. 4. c. 14. Similiter, *Aristeæ Proconnesii* anima, quoties vellet, corpore exire atque redire solita erat. Metuat propemodum aliquis, ne idem tibi hæc scribenti contigerit. Potuissétne enim aliter subtilissimus Vir tam obtusè philosophari? Profectò nihil hîc à te allatum video, quod non sit τὸ ἐν ἀρχῇ. Audiamus acutas tuas ratiunculas. *Fecur est officiale membrum, secus quàm pulmones.* Quid audio? Pulmones, quorum tanta modò tibi cura fuit, ut è matris corde, uteròque, per decussatas vias utrumque sanguinem accerferes; jam tantis redditibus ditati privatam vitam degunt? Nulùmne cordi officium præstant? *At non omnibus*

*omnibus insunt.* Quia neque omnia corda eorum auxilio indiguere. An propterea iis quoque, quibus obtigere, nullo modo adminiculantur? Quorsum instituti igitur? Num, ut sanguinem, qui singulis cordis pulsibus per venam arteriosam ascendit, statim abliguriant, reliquumque corpus genio suo defraudent? Diaphragma, vesica utraque, atque aliæ itidem partes nonnullis animalibus desunt; ideóne autem non sunt membra officialia? Et tamen pluribus (etiam *insectis*) insunt, quàm faciliè credas. *Quia hepar, non solum oblectandi gratiâ superfluum sanguinem prolecat & allicit, sed totius gratiâ trahit: non item pulmones.* At verò gratis ista dicuntur, & Galeno adversantur (ut pridem diximus) tibi que etiam ipsi, nisi fallor. Et, quæso te, quidni pari probabilitate idem de pulmonibus prædicari possit, modò cupiat aliquis tam oscitanter philosophari? *Quia hepar diutius retinet, & concoquit: minimè pulmones.* Subtilem virum! hepar diutius retinet, ergo faciliùs transmittit. *Quia hepar, peractâ cōctione, superfluum partem in cavam venam, & Portam transmittit.* In Portam, ais? Id nos planè inficiamur; neque tu unquam (opinor) probaveris. *Haudquaquam pulmones.* Equidem pulmones sanguinem in

cavam & Portam non deferunt : transmittunt tamen in cor, ut similitudo ab *Harveo* proposita præ se fert. *Quia naturæ deditâ operâ hepar hæc omnia perficit : nequaquam pulmones.* Pervenisti tandem ad *Pontem*, cujus auxilio facilè æstuosissima quæque sicco pede superaveris. Hæc omnia ita sese habent, quia *Naturæ*, sive *Parisano* potius, sic visum fuit.

Lucret.

*Ut pueri infantes credunt signa omnia abena  
Vivere, & esse homines——*

*At pulmones sanguinem non diu retinent aliorum causâ, nec itidem concoquunt.* Ergo citius ablegant : non quidem (ut vis) ad dextrum ventriculum (obstant enim valvulæ) sed ad sinistrum, quò primum iter est. Retentio siquidem non fit in alterius, sed in proprium emolumentum. Quæ de aquis *thermalibus* subjungis, ejusdem farinae sunt. *Facilè (ais) hepar permeant, quia non sunt ex illius usu : & quia suapte naturâ exitum parant ; atque onere & copiâ stimulant, attrahuntur, expelluntur, &c.* Attamen iter iis patulum concedendum erat. Benè equidem actum esset cum animalibus, si omnes noxii humores, corpus vellicantes, pariter sponte foras properarent, traherentur, expellerentur.



tur. Verùm *thermalibus aquis* duntaxat concessum est hoc privilegium!

Ultima tua verba, etiamsi vera essent, nihil tamen adversus *Harvæum* militarent; dum ais, *haud plus sanguinis spongiosa pulmonum foramina ingredi, quàm iisdem nutriendis satîs sit*: reliquum autem per *oscilla vasorum venæ arterialis, & arteriæ venalis transfundi.*

Pulmonum inexplebilem tuburcinandi aviditatem antehac mirati fumus; jam verò commeatûs eorum reliquias in dextrum cordis ventriculum rejici, omnino pernegamus: *valvulæ enim ingressum præpediunt.*

## S E C T. CII.

*In hepate (ais) nullum est impellens, adest tamen expultrix valida.*

*Frigida es, & nigra es: es, & non es Chione.* Martial. l. 3. Epigr. 34.

De *facultatibus*, toties memoratis, nos antehac nimis quàm multa diximus. Id nunc solùm addam, pari verisimilitudine ab *Averroë & Alberto* asseri; *Alimenta per sese ac propriâ vi ferri ad membra, propriam veluti sedem perfectionemque adeptura.* 7. Phys. com. 10. 7. Phys. tr. l. 3. Domin. Sala de aliment.  
*Quod alicubi vulgus vitulinæ carni pecu-*

liare ait. De modo etiam, quo sanguis ad cor pervenit, dictum est dudum, quantum satis est. Quoniam verò *expulsionis*, quæ fit pulmonum operâ, sæpius meministi, libet tandem hanc rem paulo accuratius perpendere.

Respiratio interdum est actio-mista: *animalis* enim est, quatenus, ope musculorum thoracis, celeriores eam, aut tardiores reddere possumus. *Naturalis* autem est, quoniam non desinit, ne exiguo quidem temporis spatio, sed pari semper cum vita passu ambulat. Principium posterioris hujus motus non est in thorace, five musculis intercostalibus. In *apoplexia* enim, ubi respiratio diminuta est, si non ablata, musculi tamen thoracis evidentius operantur, quàm in febre ardente; quamvis in hac maximus sit usus respirationis. Imò verò in *paralyfi* manifesta musculorum thoracis nulla est spirandi difficultas, nullaque angustia, dummodo absit *apoplexia*. Et è diverso, in *angina* eadem vigent symptomata, cum tamen nulla adsit resolutio. Neque ab *ipsis pulmonibus* respiratio instituitur; quippe musculi, spontanei motus instrumenta, absunt. Nec magis à *diaphragmate*, cujus cum pulmonibus nulla talis colligantia, ut id præstare queat. Quid igitur (inquies) est, quod  
tumo-

tumorem pulmonibus inducat? Motus, inquam, sanguinis ad sinistrum ventriculum; ad quem eo modo pellitur, quo oleum ad lampadem. Idémque *Aristoteles* quoque 3. De part. an. c. 6. videtur voluisse, ubi ait, *Pulmonem motûs principium à corde habere*. Ideoque ad quaternos aut quinos cordis pulsus, unica solum contingit respiratio: quia plusculum sanguinis requiritur ad pulmonum intumescentiam atque elevationem: quâ peractâ, sanguis in auriculam sinistram paulatim depluit; indéque subsequitur necessaria pulmonum subsidentia: non autem compressio illa, quam tu commentus es. Quotiescunque igitur fit ἀπόλησις φλέβων venarum interceptio (ut cum *Hippocrate* L. 2. de morb. loquar) sive sanguis in magnis vasis restitatur (quod à pituitæ infarctu, atque oppellulatione plerunque contingit) ut in *apoplexia* & *pleuritide* usu venit; pulmones ægrè moventur. Quia nec novus sanguis facilè ingreditur; &, qui inerat, difficulter effluit.

Subtilis porrò tua sententia est, quâ arbitraris, sanguinem è pulmonibus in arteriam venosam ad hujus solius nutritum delabi: nihil autem ejus ultrà ad auriculam, nedum cor ipsum pertingere. At quidni saltem guttulas aliquot concessisti, ut cor inde alacriùs reficeretur? Præsertim,

tim, cùm, te dictatore, sanguis arteriosus non nutriat ; & splenicus etiam sanguis, à perpetua aortæ pulsatione, talis propemodum effectus sit. Sed ne umbra quidem circulationis admittenda erat. Cedo igitur, quâ prudentiâ factum existimes, arteriæ-ne venosæ, an ipsius sanguinis, ut hic per apertum, lubricum, ac declive iter descendens, in cor tamen non delabatur, aut ab irruente simul aere in illud protrudatur ? Quid est, inquam, quod ruentem sanguinem sufflaminet ? *Verùm, Naturæ providentiâ hac de re cautum*, scilicet ! Tibi sanè hîc contigit,

Horat. Art.  
Poet. 444.

*Ut sine rivali tēque & tua solus amaris.*

### S E C T. CIII, CIV, & CV.

Nihil hîc dictum, quod non sit à te dictum prius. Ut causam nullam videam, cur tot passim verba frustra perdas : nisi ut Adversarium (etiãsi nihil novi apportes) ubique refellere videaris. De pulmonum compressione, id nunc dicam solùm ; eos nunquam in vivo animali tam arctè claudi, ut sanguinis per vasa transitum prorsus impédiant.

S E C T.

## S E C T. CVI.

Tædet fabulæ, in qua *lien* solus histri-  
nem agit. Hunc enim *Subballionem* con-  
stituisti, qui hepatis officio in cordis mi-  
nisterio defungatur. Et mirari subit,  
quamobrem cerebro & cordi solum, in-  
ter officialia membra, facultatem ad lon-  
ginqua expultricem donaveris. *Cerebrum*  
enim quod attinet, mihi quidem indubita-  
tum est, nullos inde spiritus, nisi per ve-  
nas unà cum sanguine, effluere posse. Ve-  
rum hæc res alterius loci est ; & de eadem  
in *Antidiatriba* nostra satis superque egi-  
mus. Neque multò magis *cordi* validam  
hanc protinus ad remotissima expellendi  
vim attribuere debuisti ; cùm *arterias par-  
tēsque alias spiritus hos attrahere*, suprà  
dixeris : & tam celeri spirituosì sanguinis  
decurfui, angustię viarum, sanguis è splene  
& venis (ex tua sententia) obuius, aliâque  
nimis obstitent. Præ cæteris autem vehe-  
menter miror, quis animus tibi fuerit, cùm  
negares, in animalibus, quæ dextro cordis  
ventriculo & pulmonibus destituuntur, ve-  
nam cavam rectà cor ingredi. Rem ipsam  
intuere, &

*Si non vis nobis credere, crede tibi.*

## CAPUT

## CAPUT. VIII.

*De copia sanguinis transeuntis per  
cor è venis in arterias ; & de cir-  
culari sanguinis motu.*

## S E C T. CVII.

1. Offic.

**N**ON est cur mireris, *Harvæum* sui no-  
minis curam agere. *Negligere enim,*  
ait *Cicero, quid de se quisque sentiat, non*  
*solum arrogantis est, sed etiam omnino disso-*  
*luti.* Præsertim, cum ea tempestate se  
natum meminerit, quâ superstitiosa Anti-  
quitatis veneratio adeò omnium occæca-  
vit animos, ut *ostracismo* propemodum dig-  
nus habeatur, si quis *Veteribus* aliqua in  
re refragari audeat. Quasi simul cum  
mundo hominum ingenia consenescant :  
& non potius præcedentium industriâ ad-  
juti, uberiore luce potiantur. Utcunque  
tamen adhortatiunculam tuam æquo gra-  
tôque animo amplectitur.

S E C T.

## S E C T. CVIII.

Quidni verisimile sit, omnes totius corporis partes perinde ab *arterioso* sanguine nutriri; atque à *venoso* easdem ali, à te statutum est? Calor enim, qui (ex tua sententia) solus accessit, tantum abest ut noceat; ut nutritionem potius quàm maximè promoveat. Verùm ea de re, ut & reliquis, jampridem dictum est plus satis. Id autem hìc deceptus es, quòd credas, circulationem, ab *Harvæo* nutritionis potissimùm causà assertam esse.

---

## C A P U T. IX.

*Esse sanguinis circuitum, ex primo supposito confirmato.*

## S E C T. CX.

**A**Is, moribundum cor sanguinem ad se, refrigerii causà, attrahere: quod mihi prorsus deridiculum videtur. Extinctâ quippe vitâ, ipsemet quoque calor vitalis

vitalis evanescit : adeoque cordi *calore* potius quàm *refrigerio* opus est. Unde autem (obstructis, & collabentibus jam pulmonibus) frigus hoc nanciscatur, quicum unà sanguis in cor illabatur ? Nimirum *ex aorta* ; quæ *per cutem habitumque corporis frigidum aerem attraxit*. Nunc demum causam intelligo, cur cucurbitulæ medicæ, moriente flammâ, cutem in se admittant ; *refrigerii* causâ scilicet ; ut aerem per os aut aliunde advenientem, in sese unâ cum cute alliciant.

### S E C T. CXI.

Esto (quoniam ita vis) cor *spirituum*, non autem *sanguinis*, officina : est tamen sanguis spirituum causa materialis ; neque hi sine illo in aortam effluunt. Non omnis tamen sanguis simul elabitur ; neque adeò ventriculus, in systole, totus comprimitur. Valvulæ etiam, ut egressum sanguinis non remorantur, ita neque eundem accelerant. Vel ( ut ex positis antea principiis loquar ) non alius sanguis aortam ingreditur, quàm is, qui à flammula denuo retocillatus in eandem expellitur. Qui etiam si mole amplius videatur ; cum tamen spiritu plenus sit ( ut lac super focum ebulliens ) materiâ tamen & pondere est exiguus.



guus. Atque hæc ratio est, cur in cada-  
vere, dissipatis illis spiritibus, parum san-  
guinis in arteriis reperiatur: præsertim,  
cum post obitum pars ejus haud exigua  
in venas transierit; cujus tamen inde in  
ventriculum sinistrum progressus, à sub-  
sidentibus tum pulmonibus præpeditur.  
Quod vel inde constat, quoniam, in præ-  
focatis, dexter ventriculus sanguine admo-  
dum infarctus deprehenditur.

## S E C T. CXII.

*Harvæus* gratiam tuam hac in re non  
ambit. Nam quæ tu *commenta* vocas,  
opinor à me clarè demonstrata esse. Id-  
que etiam, quod de copia transeuntis san-  
guinis statui, haud infirmo tibicine sufful-  
tum arbitror.

Videamus, age, demonstrationes tuas,  
quibus tantopere te effers. *Quomodo*, ais,  
*sanguis ex arteriis effusus, à venis colligi-*  
*tur? an magneticâ virtute?* Certè istuc  
à te quæri minimè decuit, qui alium mo-  
dum nullum nôsti, & attractiones validas  
ubique crepas. Nos autem propelli san-  
guinem statuimus, non autem illorsum at-  
trahi. Nec volumus, ad extrema corpo-  
ris fluere, ut ea nutriat; sed ut caloris  
(nutritionis vitæque auctoris) inde pro-  
fecti,

fecti, vehiculum sit : & copiosum inutiléque serum per sudores & in renes exonerando, quod reliquum probi sanguinis est, cum noviter suppeditato chylo, per cavam ad *lampadem* recurrat. Et quidni partes à sanguine arterioso alantur ? Num rapidum illum motum nutritioni quicquam obstare autumas : cum *dictum factum*, alimentum statim apponi dixeris ; & in pulmonum, cordis, arteriarumque irrequietis motibus, sanguinis tamen agglutinationem faciliè inveneris ? Nec major metus est ; ne proximæ venarum anastomoses remotioribus sanguinem omnem præripiant : quippe amplior ejus copia est, quam ut omnis sanguis arteriosus à pauculis venis excipiat : & qui ocyùs per pauciores arterias fluit, tardiùs per plures venas regreditur.

At *videre nequis, sanguinem, è vulnere effusum, à venis attrahi.* Argumentum architectonicum ! Quì possit à venis attrahi, cum per patentius iter foras effluat ? At videre licet, sanguinem, in contusionibus extra vasa eliminatum, tandem discuti. Illud autem quomodo fit, si non à venis resorbeatur ? Nisi forsitan dolenti parti, ut reficiatur alacriùs, omnem eum sanguinem in solatium destinari autumas.

Motus

Motus à pede sursum versùs cor, non fit ob fugam vacui (quam sententiam jam quidem *inane commentum* vocas ; licèt ali-  
bi tibi magnopere arriserit ) sed sanguis illuc à subsequenti fluxu, & externâ pres-  
surâ (ut dictum est) tanquam in locum vacuum, impellitur. Quemadmodum per  
victorum inflexos canales aqua aut vinum  
facile ascendunt, si modò per longiorem  
tubulum liquor effluerit. Ac propterea  
frivola est sententia *Mercurialis*, existiman-  
tis, *serum, præ pondere sui, ad caput ascen-*  
*dere non posse.*

S. 114, 116,  
118. *alibique.*

De *Aurium*  
*affect.* l. 2.  
S. 52.

### S E C T. CXIII.

*Posito (ais) sanguinis circuitu ; sequere-*  
*tur, quòd cor (bene valens) nunquam eodem*  
*modo sanguinem transmitteret.* Paulò pòst  
tamen affirmas, *pulsu debere semper esse*  
*similem, quia idem sanguinis continuus flux-*  
*us, & in eadem copiâ.*

Sententia *Harvæi* verissima est, non  
semper eandem sanguinis quantitatem cor  
permeare ; ideòque & pulsuum, qui inde  
nascuntur, varia esse discrimina. Et præ-  
ter rationes ab eo recensitas, ipsius sangui-  
nis differentia, qui aliquando dilutior, non-  
nunquam pituitosior, interdum etiam ali-  
ter malè affectus est, diversitatem ejus-  
modi

modi faciliè produxerit. Cùm enim, ob prætenuem & evanidam ferè flammulam, sanguis in corde leviter efferveat ; fiunt pulsus languidiores, rarióresque, ac totius sanguinis circumlatio tardior.

Quamvis autem *Tabellarii* tui diversis equis ferantur ( sanguis scilicet arteriosus celerius moveatur, tardiùs verò ille, qui in venis ) nullus tamen metus est, quin negotia sua debito tempore peragant. Sanguis enim arterias ingreditur spiritu plenus, turgidus, inflatus ; detumescit autem magnam partem ( avolantibus quoquoversum spiritibus ) priusquam ad ultimas venas pertigerit. Deinde, haud parva seri pars, quæ sanguini arterioso commiscetur, per sudorem abit, & insensilem transpiratum, antequam ad venas accesserit. Tandem, venæ plures & majores sunt, quàm arteriæ : ideóque sanguis celerius per arterias delatus, tardiùs per venas, nec incommodè, repedare potest. Tu autem, qui varietatis pulsum allatam causam respicis ; cur aliam veriore, si haberes, nobis invidisti ?

Quantitatem transmissi sanguinis quod attinet, causam nullam video, cur illa ab *Harvæo* constituta ( siquidem in plurimas arterias distribuitur ) majorem pulsum efficere debeat.

In

In pulsûs intermissione, nihil sanguinis  
è corde excluditur.

S E C T. CXIV.

Fateor quidem, nec illibenter, sanguinem, è secta arteria aut venâ prorumpentem, non omnem eodem tempore per cor ruere : sed partem ejus majorem è vicinis vasis (impellente corde) illuc propelli. Nego enim id fieri à *vulneris tractiōe aliquâ* (ut arbitraris) aut *vi vacui*. Quomodo enim partis exiguæ *tractiō* (quæ tamen nulla est) reliquarum omnium *retentioni* præpolleat? præsertim, cùm ejusmodi *tractiō* Naturæ adversaria sit, *retentio* autem eandem conservet? Dormitne hîc Naturæ providentia? Aut quomodo vacuum daretur, si sanguis in vasis subsisteret? Sic aliqui, lapidem, è manu aut fundâ projectum, moveri porrò asserunt, *ne detur vacuum*. Ego autem hebetior sum, quàm ut ejusmodi subtilitates intelligere queam.

S E C T. CXV.

Sanguinem per arterias & venas eo modo fluere diximus, quo vinum per inflexum victoris tubulum fertur : & quod  
X *suctus*

Digres. 2.

*suctus* aeris hîc facit, illic cordis per flammulam *tractio* præstat. Attractionem autem cùm dico, populariter loquor ; nam revera utrobique ab incumbente aere propulsio est : ut jam pridem diximus. Quemadmodum itaque, si foramine aliquo, aut rimulâ majore prædictus tubulus hiscat, vinum iter prius inceptum deserit, & utrinque delabitur : ita similiter, apertâ venâ aut arteriâ, proximus sanguis, à progressu inhibitus, per vulnus effunditur. Alia tamen vicina vasa, quæ etiamnum integra sunt, circulationem perennant. Neque inficior, sanguinem expeditiùs per *arterias*, quàm per *venas*, profluere ; in illis quippe tenuior, & spirituosior ; è *venis* autem egrediens (quia frigidior) facîle densatur, viâque transituro præpedit : magnâ etiam sanguinis copiâ jam egressâ, vasa exilia, in quibus pars ejus continebatur, facîle connivent ; nisi fotu calido aperti servantur, sanguisque fluidus permaneat.

## S E C T. CXVI.

Nihil soles admirari, nisi quod à temetipso profectum fuerit ; & difficultates ab aliis propositas, etiamsi maximas, levi negotio diffilas, *quasi ventus spolia*. Quàm dextrè

dextrè verò id hîc præstiteris, libet penitus intueri.

Statuis, sanguinem venosum arterias (per anastomoses) ingredi, ut ab illo hæ nutriantur; quòdque à nutritione superfuert, id per aortam ad cor pergere, ut spiritus inde fabricentur. Motus itaque sanguinis in arteriis (ex tuo decreto) est versùs cor; non autem ab isto, ut vulgo creditur. Quæro igitur, quâ vi fiat, ut (præsectâ arteriâ jugulari) omnis ferè totius corporis sanguis per vulnus effluat? Nihil quidem ad hanc rem facit *motus* sanguinis; quoniam hic ad cor properat. Neque *calor*, qui eundem hunc motum accelerat. Nec *spirituum impulsus*, qui (te sic volente) sanguinem venosum conscendit, & transvolat; neque accessum ejus versùs cor à *liene*, aut aliunde, impedit. Neque *fuga vacui*, quæ merum commentum est, & à nobis, téque etiã ipso, antehac explosum. Nec *arteriæ diastole*; quæ tantum abest ut sanguinem exprimat, ut majus illi retinendo spatium largiatur; & in qua ipsemet voluisti sanguinem in cor illabi. Neque ejusdem *systole*, quæ sanguinis splenici ascensum non arcet; imò quæ, ex tua sententia (nisi fallor) sanguinem ad cor propellit: siquidem spirituosum tuum sanguinem solum immediatè ab ip-

fo corde eliminari audivimus. Quapropter rationem nullam video, cur (secundum tua dogmata) *arteriarum corpus, tanquam unum rete, totum corpus peragrans, ocysimè inaniatur*. Nam licèt spirituosus tuus sanguis hoc modo foras proflire possit; illà tamen (ut arbitraris) sanguinis, qui in arteriis continetur, minima pars est. Quæ de venarum rete, sive contextu, à te allata sunt, ea *nihil ad Iphicli loves*. *Harvæus* enim hîc non contendit (ut tua verba præ se ferunt) sanguinem venosum, apertâ venâ aliquâ, separatim effluere; sed scissâ arteriâ jugulari sive sopariâ, utrunque sanguinem, arteriosum, inquam, ac venosum, pariter exhauriri. Negâtque, arterias aliunde sanguinem è venis excipere, quàm transitu priùs facto per cor. Idémque certissimo argumento confirmat; quia ligando arteriam juxta radicem cordis, & aperiendo carotidem, aliâmvè arteriam; hæ solæ, non item venæ, exinaniuntur. Quæ tu consultò transfiliisti. *Retia* igitur tua foraminosa magis ac lacera sunt, quàm ut *Harvæo* irretiendo sufficiant.

Exemplum, à te allatum, nec appositum, nec verum est. Quamvis enim aer, nâres ingressus, partim ad pulmones per gargareonem, partim ad cerebrum per mamil-



mamillares processus ferretur ; quid inde, obsecro, eviceris ? nisi, sanguinem pariter per arteriam, aut venam majorem delatum, in minores ejusdem ramulos huc illuc distribui posse. Id autem *Harvæi* argumentum nequaquam labefactat ; ut ex dictis manifestè liquet. Tum etiam

*Non valet exemplum, quod litem lite resolvit.*

Aerem enim adire cerebrum, non concesserim ; neque pro sententia hac nova argumenta afferam, donec iis, quæ à doctissimo *Hofmanno* producta sunt, planè responsum videro.

*Com. in Gal.  
de us. part.  
l. 8. c. 6.*

Quæ postea de revulsionibus dicuntur, nihil nobis faceffunt negotii. Tantundem enim sanguinis à pedibus ascendit per venas, quantum ad eosdem delabitur per arterias. Facto itaque vulnere in pectore, aut capite, revulsio instituitur ( si modò à tam longinquo instituenda sit ) in crure. Quia sanguis, aliàs quoquo versus ruens, facto jam in pede egressu, copiosius per descendentem ramum, procul à vulnere delabitur. Non enim arbitramur, sanguinem suâ sponte æquè celeriter per arteriam decurrere ; atque is, sectâ earum aliquâ, effluit. Nec sanguis ad læsum pec-

tus, aut caput, per venam cavam, impetu affluit, ut fingis; quia fluor ille, apertâ inferiùs venâ, intercipitur.

Quòd circulationem hujusmodi in plantis reperire nequeas, haud mirum; siquidem nec *cor* quisquam in iis unquam invenerit. Imò miror plurimùm, *Parifanum* (philosophum subtilissimum) qui in plantis circulationem quæsit, quia illis vita conceditur; & (ut ait) *radicem habent pro corde*; (immo quidem, quod mirandum est magis, tibi nullum est cor; nam radices earum ventriculi potius, quàm cordis munere funguntur) cœlo, vice versâ, quia circulatur, vitam non donâsse; & insectorum exemplo, *cor* in cauda, *Sole* scilicet, collocâsse; qui, tanquam *cicindela*, mundum illuminet.

### S E C T. CXVII.

*In Anatome (ais) plurimum sanguinis reperitur in venis, minimum verò in arteriis: quia illæ non sui tantùm, sed totius ferè corporis gratiâ, eum habent. Atqui eâ ratione, etiam in vivis animalibus, multò plus sanguinis in venis, quàm in arteriis, contineretur; quod tamen proposita quæstio non admittit. Deinde, licèt (ex tuo postulato) plures partes à venis nutri-*  
antur;

*antur* ; an propterea hæc magis de aliena, quàm illæ de propria salute sunt sollicitæ ? Nimirum venæ abunde sanguinis trahunt ; ut inde, simul cum aliis partibus, ipsæ quoque arteriæ nutrimentum hauriant : & arteriæ tam socordes erunt, suique commodi immemores ; ut, approximante jam funere, nihil de propriis exequiis cogitent ; nec, ( cordis morientis exemplo ) paratum à venis convivium pollucibiliter delingant ? Debebant profectò multum congerere ; ut, traducto eodem ad sinistrum cordis ventriculum, spiritibus inde jugiter reficerentur. At arteriæ, appropinquante fati periculo, obstupescunt !

Quod tandem addis, *Veteres non immeritò credidisse, solos spiritus, vitæ gratiâ, in arteriis contineri ; quia, defunctis jam animalibus, nihil sanguinis in iis reperitur* : pari ratione concluderis, nihil etiam sanguinis ( vitâ etiamnum superstitè ) in arteria venosa, cordisque sinu sinistro inesse ; quia post obitum sanguinis expertes reperiuntur : aut saltem exilis admodum copia superest. Quod tamen ( ut sæpe diximus ) inde fit, quia concidentibus tunc pulmonibus, transitus illi omnis præcluditur. Idem verò in ipso subitanæ mortis articulo contingere ; quia non liquet res, liquefcit fides.

## S E C T. CXVIII.

§. 116.

His tuis tergiversationibus paulò antea occurrimus.

## S E C T. CXIX.

Quomodo cor in *syncope* aut *lipothymia* afficiatur, dictu haud adeò pronum est. Verisimile tamen videtur (quod *Harvæus* ait) sanguinem tunc, quiescente corde, subsistere, neque inde in arteriam elabi; ideoque nec novum è pulmonibus accedere, *qui suffocationis metum asferre possit*. Tua autem ratio planè trivialis & imaginaria est, atque subtili philosopho indigna; quâ *spiritus, in metu, ad cor remeare* contendis. Quænam enim illis mens, quâ malum prævideant? aut qui pedes, quibus fugam moliantur? Ruunt quidem ad exteriora, ab ipso corde (ut ais) præcipitati: quibus autem machinis resiliunt? Num spiritus versùs cor (eidem suppetias laturo) suâ sponte regrediuntur; an verò ab ipso corde retrahuntur? quemadmodum *Cacus* olim *Herculis* boves, prehensâ caudâ, retrorsum in antrum traxisse fertur? Scilicet, ut in bello usu venit, ubi castrametato exercitu, emissæque pabula-

tùm

tum manu militum ; speculatores, vitulantes primùm, gaudióque exultantes, subitò (detectis hostium insidiis) ceu *Gorgone* conterriti, catervatim fugiunt, reliquósque etiam populabundos in castra revocant : ubi turba & trepidatio ; donec loci & sociorum fiduciâ (accurrente jam novo militum globo) motus ille sedatus fuerit. Sic è corde, ceu arce humanâ, spiritibus turmatim ad partes laborantes subsidio missis, si quid mali inopinatò ingruat, illi represso gradu subsistere primùm, & pugnam experiri ; mox autem, inclinatâ acie, semianimes trepidare ; dein *αἰσχυρόντες* cancrorum more cessim euntes, præcipienter mox ad cor nullo ordine fugere ; (quippe spiritus *Dodonæi lebetes* sunt, moto uno, omnes moveris) hinc trepidatio illa & anxietas ; donec, vel amoto hoste, vel adauctis copiis, consopito jam tumultu, ad quietem pristinam redierit exercitus.

En tibi aliud exemplum sententiæ tuæ affine ; neque enim hæc subtilitas è te primùm nata est. *Joachimus Burserus*, causas æstûs febrilis recensens, inter alias hanc affert ; *Quòd spiritus, scilicet, ab externis partibus ad interiora rapidè ferantur, ut laboranti cordi suppetias ferant ; eoque facto, discusso nimirum frigore, denuo ad ambi-*

*De febrib.  
Epidem. c. 10.*

*ambitum corporis recurrant : per quem motum reciprocum (velut collisionem) inflammantur ; localis enim motus (inquit) calefacit. At verò in malignis & pestilentibus febribus, ubi plus periculi incumbit, minor tamen plerunque æstus persentiscitur. Numquam ibi spiritus averrunci & tutelares, alto somno consopiti, stertunt ? Miror equidem, tam subtiles Metaphoristas non addere : Spiritus vitales, post diffusum frigus (hostem vitæ tantopere infestum) gratulabundos ob reportatam victoriam, ad cor accurrere ; visum, quomodo princeps membrum post anceps certamen valeat, utque languidum etiamnum consolentur. Atque ex multiplici illo spirituum concursu calorem febrilem excitari ; qui respirationem densam, pulsum celerem, sitim ventriculi, dolorem capitis, reliquaque symptomata inducat. Quippe æquum videtur, ut famulantibus membris, non minus quam Principi, malè sit : quemadmodum olim apud Persas, Regis busto servorum funera jungebantur. Addit Burseras : Cor, quod est quasi sedes Naturæ indoctæ, & facultatis totum gubernantis, videtur affectu quodam, zelo aut iræ non abstermili, corripì, quando corpus à repentino & vehementi hoste invaditur. Quæ fortasse non minima causa est, cur in omnibus tam*  
*varii*

varii generis acutis morbis, imò in ipsa puerorum dentitione, apostematum perruptione, aliisque insignibus naturæ conatibus, mox febres ingruant. Præclaram sanè cordis sapientiam ! quod à minore malo vellicatum, illico præ ira aut zelo, majus damnum universo corpori accersitum it. Utque effusiùs rideas, en tibi Campanellæ singulare acumen. Ad molliendum jecur, inquit, lac confert, ac res molles, & parum excrementi habentes. At suspendere vas aquæ, ex cujus canali interpolatim guttæ aliquæ cadant super jecur, optimum est remedium. Timor enim flammam exhalantis caloris, indurantisque jecur abscessu tenuitatis, reprimat, retruditque interiùs : itaque relaxat, emollitque jecur ; & duras partes, per admistam tenuitatem, disponit ad mollitiem. Sicut coturnix, ab accipitre interfecta, tenera est magis, quàm aliæ coturnices ; quoniam timore collecti spiritus introrsum, relaxarunt ac mollierunt carnes. Quo nihil potuit vecordius aut stolidius dici : carnificinam enim potiùs, quàm medicinam docuit.

De sensu rerum, pag. 293.

Atque hæc attexui vel eo nomine libentiùs ; ut hinc constet, quantum prava consuetudo valeat ; quâ Viri, aliàs docti, causas naturales voluntariis actionibus transcribunt ; &, quod Galenus non semel

semel irrifit, rempublicam constituunt in  
visceribus.

# S E C T. CXX.

Ais, sanguinem ex arteria & vena  
promptè, copiosumque educi, etiamsi quis  
utranque arctâ ligaturâ constrinxerit. Id  
autem aliter se habere, ipsemet oculatus  
testis sum; qui non semel viderim, bra-  
chio strictè nimis ligato, parum admo-  
dum, nihilve sanguinis prorupisse. Illud  
etiam fidem omnem propemodum exupe-  
rat, ubi ais, in mortuo frigefcente corpore  
sanguinem obrigescere, & conglaciari adeò,  
ut fluere nequeat. Apud Hyperboreos quid  
fiat, equidem nescio: in Italia autem id  
contingere, haud facilè credam.

---

CAPUT.



## CAPUT. X.

*Primum suppositum, de copia pertranseuntis sanguinis è venis in arterias; darique sanguinis circuitum, ab objectionibus vindicatur, atque experimentis ulterius confirmatur.*

## S E C T. CXIV.

**O**bjectio, ab *Harvæo* proposita, non est *frivola*, sed ad rem præsentem appositissima. Quippe ille, ex copia sanguinis adeuntis cor, circulationis ejusdem necessitatem deducit. Quoniam, si quicquid sanguinis cor adit, idem in illo absumeretur; deberet tantundem eodem temporis spatio ab hepate, aut aliunde suppeditari. Quod illi ab omni probabilitate prorsus alienum videtur. Ipse verò à nonnullis objectum iri prævidit, *perinde magnam sanguinis quantitatem in lac absumi, quoties nutrix infantem unum aut etiam al-*  
*terum*

*terum eodem alit.* Respondet *Harvæus*,  
imparem esse omnino lactis, & sanguinis  
cor pertranseuntis quantitatem. Tu verò  
à re proposita in aliam transilis ; & de  
modo, quo lac ad mammas perveniat, in-  
quiris: deinde etiam aliis quæstionibus te  
exhilaras. Quibus etiam responsum da-  
bo, postquam prædictæ objectioni aliter  
satisfecero. Id autem fiet sequenti di-  
gressione.

## DIGRESSIO. VII.

*De Lacte.*

*In Theophr.*  
*de caus. plant.*  
*l. 6. c. 30.*

*Com. in Hip.*  
*pag. 32.*

**G**alenici ferè omnes, tam optimates,  
quàm proletarii, statuunt, lac fieri è  
sanguine, in adensa mammarum substantia  
dealbato. Ita *Scaliger*: Lac in animalibus  
est sanguis magis coctus, humidior, &  
odoratior. Quod ego, ob multas rationes,  
erroneum arbitror: & censeo potius cum  
*Prospero Martiano*, doctissimo *Hippocratis*  
interprete, Lac esse chylum, è ventri-  
culà ad mammas traductum. Atque in hu-  
jus rei confirmationem, afferam primò ar-  
gumenta aliquot *Martiani*, quia liber is  
paucis

paucis est ad manum : postilla etiam nostra adjungam.

1. *Impossibile* (ait) foret, mulierem vivere posse tanto sanguine orbatam. Certum enim est, infantem quotidie ultra duas libras lactis sugere. Et si eadem materia lactis censetur in belluis ; certum est, plures singulis diebus tantam lactis copiam dare, quantam sanguinis non capiant venæ totius corporis. Nam vaccæ in Epiro (ut Aristoteles testatur) singulæ lactis amphoras singulas implent. Amphoram autem octoginta libras capere, notum est. L. 3. hist. an. c. 21.

2. Corpus tantæ sanguinis copię generationi assuetum, statim in perniciosam plethoram incideret, ubi mulier lac dare cessaret. Cum tamen id non fiat ; nec menses quidem multo ante consuetum tempus iis erumpant ; aut copiâ majore, quàm lactantibus.

3. Sive sanguis is ab utero, sive aliunde ascenderet ; sisterentur omnino puerperia, dum lac, secundo à partu die, tanto impetu fertur ad mammas, ut puerperarum plerisque febris accendatur ; quæ vulgariter appellatur febris ex lacte.

4. Si lac ex sanguine generaretur, non autem ex succo è cibis & potibus expresso ; impossibile esset, odorem & facultatem ingestorum adhuc retinere : quandoquidem  
nulla

L. 6. Epid.  
f. 2. t. 33.

nulla manifesta qualitas cibi observatur in sanguine ; multò minùs in iis, quæ ex sanguine generantur. Contrà verò lac sæpe odorem retinet, & facultatem ingestorum. Ità elaterium, à matre sumptum, puerum purgat. Si mulier, aut capra, inquit Hippocrates, elaterium aut cucumerem agrestem comederit, lac infantibus est purgatio.

Aliæ insuper copix à Martiano in aciem producuntur, de quibus Auctorem consule. His autem rationibus apodicticis nostras quoque auxiliatum advocabimus.

Lap. Lyd. pag.  
337. & 353.

I. Nulla ratio apparet, cur tenellus embryo, in utero, crudo sanguine (ut censent) alatur ; & jam editus in lucem, atque adultior factus, teneriore victu, sanguine scilicet in mammis ulteriùs cocto atque elaborato, sustentetur. Atque hujus argumenti vim Parisanus persentiens, ait : Sanguis ad mammas perreptans ad lactis constitutionem, longè impurior eo est, quo fœtus in utero nutritur ; ex puriore videlicet & à sese selecto. At mammas petens, ab uteri vasis ad mammarias venas explosus, crudus est, quia purus menstruus. Quippe rationi consentaneum est, ut alimentum in utero pro debilioris fœtus nutritione, purius & perfectius sit. Quod ut ab eo citra rationem dictum

dictum est ; ita sententiæ suæ parum tenax, alibi, contra communem opinionem, asserit, *Fœtum in utero impuriore succo nutriti, quàm post egressum in lucem. Quia in utero, menstruo sanguine impuro & imperfecto alitur ; extra eum autem puriore & perfecto nutritur. Quæ dissidia ipsi Parisano componenda relinquimus.*

L. 4. de Subtil. pag. 213.

2. Cibus & potus nequeunt subito in sanguinem migrare, & porro in lac transmutari. At verò mammæ citò post pastum implentur ; & nutrices ferè simul ac biberunt, sentiunt potum ad ubera, ceu curriculo, ascendere.

3. Mulier obesula, & quæ carne laxiore constat, majorem lactis copiam producit, quàm macilenta, & venas amplas nata, quæ est illi contraria. Si autem lac è sanguine gigneretur ; quanto major hujus copia esset, tanto etiam uberior illius foret proventus.

4. In quem finem etiam sanguis in lac mutetur, cùm idem denuo à sugente fœtu in sanguinem sit vertendum ? Nam ridiculum est, quod *Schneiderus* narrat, se quendam audivisse, qui insperso pulvere, sanguinem à lacte separare valuerit, ut utrumque seorsim appareret. Opinor autem, eum, cum *Ænea*, per eburneam portam egressum ;

Deuslogius  
de Hepatis of-  
ficio, §. 41.

--*Quâ falsa ad cælum mittunt insomnia Manes.*

De formato  
satu, pag. 19.

Ego profectò (cum *Varrone*) *cras credam, hodie nihil.* Putavit autem *Schneiderus*, si fortè hoc fieri posset, sanguinem in lactis formam à pulvere potiùs corrumpi, quàm lac ab eo separari. *Needhamus* tamen, ad fidem proclivior, *Quidni*, inquit, *Naturam* idem multò accuratius efficere posse concludamus? Similiter *Heurnius*, ex *Platone*, *Natura* (inquit) fucum facit infantibus, dum sanguinem in mammis lacteo tingit colore, ne crudeliter pasci videantur. At quidni eadem prudens *Natura*, in leonibus, pantheris, tigribus, aliisque similibus feris, ab hoc fucò abstinuit; utpote quibus humanitas aliena est, & crudelitas naturalis?

L. 4. de morb.

5. Lac & sanguinem non esse liquores contribules, sed distinctæ familiæ, vel hinc mihi constare videtur; quia lac motu atque agitatione caseatur, aut in butyrum concrevit: sanguis autem motu tenuior fit, & quiete densatur. Sic apud *Hippocratem*, *Scythæ* lactis equini agitatione, butyrum, serum, caseum (*ἱππικὸν* ipsis dictum) separabant. Lac etiam ab acidorum mixtura grumescit: quod sanguini non contingit; nam in contusionibus acetum juvat; atque oxymel, & syrupus acetosus

cetosus pleuritidi auxiliantur : omnéque coagulum , grumosum & concretum sanguinem attenuat , ac discutit ; dum lac constipat & coagulat. Lac etiam facile aëscit , præsertim æstivo tempore ; uti videre est in Nutricum linteis , quibus earum ubera obvolvuntur : sanguis verò non item. Id autem chylo familiare est , dummodo diuturniorem paulo moram in ventriculo traxerit. Lacti etiam quiescenti cremor innatat , qui in sanguine non conspicitur.

6. Quid multa ? Mihi verisimile , imò verissimum videtur , Naturam in animalibus consimilem nutricandi normam instituisse. Ita ingluvies , in avibus , respondet magno ventriculo in ruminantibus. Profectò columbæ , angues , & pisces majores vivipari , ( ut phocæ , vituli marini , aliique ) pullos , anguiculos , & catulos suos *χυλεύουσι* , cibo è ventriculo deprompto cibant : nam etiam columbæ pullos suos tenellos & jam primùm natos , molli chylo , concussione & veluti vomitione sursum acto , non autem cibo duriusculo ex ingluvie excusso ( ut postea , ubi magis adolevere , contingit ) educant. Sic etiam *galei* Arist. l. 6. hist. an. c. 8. *emittunt & admittunt intra se catulos.* Quod & *squatinae* & *torpedines* faciunt. Et quidem visa est torpedo grandior ,

*quæ ad octoginta contineret in se fœtus.*  
 Credendum itaque, lac quoque è mulie-  
 rum mammis promanans, ejusdem gene-  
 ris atque originis esse : ad ubera verò sur-  
 sum scandere, decoris, commodæque ge-  
 stationis gratiâ : novitque vulgus fœmina-  
 rum *vasa lactigerula* in mammis prægnan-  
 tium, à *venis sanguiferis* distinguere.

Est itaque lac nihil aliud, quam succus  
 chylosus, lactationis tempore copiosè ad  
 ubera translatus. Ideoque vietæ vetulæ-  
 que mulieres elactescunt. Nullæ quidem  
 venæ lacteæ ad thoracem pertingunt ; &  
 ambagiosum nimis iter est, chylo per  
 ductum thoracicum ad cor, indèque, per  
 arterias mammarias, motum ad ubera con-  
 cedere ; præter alia jam memorata incom-  
 moda, Compendiosiore autem viâ fit chy-  
 li è ventriculo ad mammas, per musculo-  
 rum abdominis pectorisque spatia, traduc-  
 tio. Mihi enim sæpe compertum, mox à  
 frigida potu, dolorem acrem à flatu infra  
 mammarum regionem persentisci : & post  
 viscerationem lautiolem, sive uberiolem  
 victum, si quis manum pectori admoveat ;  
 subito molestia quædam, & dolor obori-  
 untur ; ob præpeditum nempe chyli libe-  
 rum ascensum. Id autem per venarum  
 ductus non fieri, quilibet (opinor) veteri  
 sententiæ non mancipatus, haud invitus  
 con-



concefferit. In hujus porrò rei confirma-  
tionem, *Antonius Everardus* (Vir deli-  
gentiæ atque ingenii præclarus) profite-  
tur, se observasse in cuniculo fœmina (quæ  
& prægnans esset, & fœtus lactaret) vasa  
chylifera, seu lactea, excurrentia supra mus-  
culos abdominis, subter pinguedinem, seque  
in glandulosam mammarum substantiam in-  
sinuantia; quæ postmodum conjunctim tubu-  
los aliquos lacteos, ac tandem canalem com-  
munem constituerent, sicque lac per papil-  
lam exhauriendum præberent.

De hom. bru-  
tique exortu,  
pag. 282.

Ex utero autem materiam lactis ad ube-  
ra deferri (ut *Martianus* credidit) à rati-  
one omni alienum est: siquidem infantes  
masculi primulùm nati interdum lac (ut  
mihi certò cognitum) ex uberibus pro-  
fundunt. Et *Casparus Schwenckfeld* testa-

*Theriotroph.*  
*Silesia*, p. 98.

tur, *Villicum* quendam in pago *Fischbach*,  
*hircum* aluisse, qui lac ex ubere redderet  
papillis duabus. Item *Baricellus* ait: Vidi

De Lacte.

aliquando Viros, qui in uberibus habebant  
lac; quod exprimendo emittebatur. Con-  
stat autem, in masculis lac non fieri ex san-  
guine menstruo. Et *Vesalius* id se non se-  
mel conspexisse testatur. Similiter *Wot-*

De hum. corp.  
fabr. l. 5. c. 18.

*tonus*: Non prægnantibus aliquando, sed  
rarò, edulis quibusdam, aliisque artibus  
(ut uberum frictione) efficitur, ut lactes-  
cant. *Mathiolus* affirmat, in *Boemia* tres

Hist. an. l. 1.  
c. 30.

L. 3. Epist. 25.

Epist. quest.  
a. 1.

L. 3. hist. an.  
c. 20. & L. 1.  
c. 12.

Histor. Natur.  
l. 9. c. 68.

*hircos repertos fuisse, qui suis ex uberibus lac copiosum redderent. Quinetiam Cælius Calcagninus asserit, catulos duos venaticos, frequenti suctu, ex grandioris canis masculi papillis lac evocasse; ut, cum omnium admiratione, matris vice perfunctus sit. Imò verò ipse Aristoteles ait: Maribus, magna ex parte, nec bestiis, nec hominibus, gignitur lac; fieri tamen potest, ut aliquibus interdum gignatur. Nam & in Lemno insula, capro tantum lactis emulgebatur, ut colostrâ inde conficerent. Quod idem etiam proli masculæ illius evenisse accepimus. Eusebius Nierembergius etiam ait, se vidisse mulam sterilem, quæ lacte copioso nutriebat aliam mulam parvulam, quam pepererat asina; vidisseque lactis copiam ex mulæ uberibus exprimi.*

Possem plura hujus generis attexere: verùm iis, in re perspicua, nihil videtur opus.

Scio tamen, haud pauca adduci posse, quæ jam dictam sententiam labefactare videantur: uti nullam ferè opinionem reperiâs, quæ non aliquibus difficultatibus sit obnoxia. Minora tamen (nisi fallor) ea sunt omnia, quàm ut nos in veteri, magisque improbabili sententiâ retineant.

Mulier

Mulier quædam *Rufi*, apud *Mefven*, sanguinem spuebat, postquam lac in mammis ejus delituit: qui sanguis denuo restrictus est, lacte provocato. Respondeo autem, factum id, quia ex materia lactis sive chylo, fit sanguis: non verò contrà, quia è sanguine lac gignitur. Quamobrem cum chylus, qui priùs copiosè ad mammas ferebatur, postea, mutato itinere, maiorsum ad cor transfiret; haud mirum, si vasa jam sanguine referta sese in pulmonibus exoneraverint.

Ita similiter interpretor illud *Hippocratis* dictum: *Si mulier, quæ neque gravida est, neque peperit, lac habet; ei menstrua defecerunt.* Atque id etiam: *Gravidæ si copiosè lac è mammis effluat, fætum imbecillum esse significat.* Non, quia ex menstruo sanguine fit lac, ut vulgo creditur; sed quia sanguinis materia intercipitur, chylusque uberius in lac abit.

*Adrianus Auzotius* noluit chylum ad mammas ferri, ibidemque lactis materiam constituere: quia, inquit, sæpe lacti succedit sanguis, quando nutrices nimium exuguntur: quòd sine dubio non satis fuerit temporis ad immutandum in lac sanguinem. Ego verò id unquam contigisse haud memini, etiamsi sæpissime infantes querulos, lactisque plurimum appetentes,

5 Aphor. 39  
et 52.

Epistolâ ad  
Pecquetum.

uberibus propemodum exhaustis admotos viderim. Et si aliquando, ob vim vasculis sanguiferis illatam, aliquantillum sanguinis eductum fuerit; non tamen protinus dicendum, copiosam lactis materiam ab eodem fonte promagare. Pari enim verisimilitudine evicerit, mucum è naribus extillantem, ortum suum sanguini debere; quòd interdum emunctis validè naribus, sanguinis ex illis fluor subsequatur. Videtur tamen habere hac in re aliquatenus contesserantem *Jasonem à Pratis*: *In musteis puellis*, inquit, *lac confici, à veritate non discrepat. Et pastores montis Aetæ ubera caprarum, quæ coitum non patiuntur, urticâ vehementer perfricant, ut dolorem infligant. Itaque primò humorem cruentum eliciunt, mox albore squallidum, postremò lac; non minùs, quàm in iis, quæ venerem patiuntur.* Nempe ab urticæ punctura sanguis profilit; & à fricatu diuturniore ac dolorifico, succus nutritius uberius affluit.

Etiamsi hæc propositis à te objectionibus satisfacere videantur; superest tamen scrupulus haud parvi momenti à nobis eximendus. Quî nempe fiat, ut chylus, qui antea promiscuè ad omnes corporis partes ferebatur, imprægnationis tempore ipsas mammas abundanter adeat? Possẽm quidem

De Uteris,  
6. 9.

dem ad hanc rem producere Naturæ sagacitatem ac providentiam; quæ victum supeditet, quamprimum eo opus est. Sic *bombyces* ex ovis prodeunt, simul ac *Mori* folia (quæ illis in pastum cedunt) ex arbore profiliunt. *Apes* Maio mense pariunt, cum roris mellisflui copia conceditur. *Vespæ* æstate, cum fructus muturantur. Et sic pariter in animantibus partitudinis tempus appetit, cum in uberibus lac idoneum reperitur.

Attamen causa hujus rei *efficiens* assignanda est. *Prosper Martianus* itaque hujus rei hanc causam reddit. *Lac*, inquit, ex sententia *Hippocratis*, est pinguißimum ex cibis & potibus, quod ex ventriculo expressum (uterus enim tumidus ventriculum comprimit) profilit in omentum & carnem, atque inde fertur ad mammas. In mola verò, etiamsi à tumido utero ventriculus comprimatur, & materia sursum feratur, non tamen transfit in lac; quia uterus spiritum & sanguinem, quibus lac perficitur, ad mammas non transmittit. A motu autem infantis lac generari, ex eo constat, quia non prius lac in gravidis apparet, quam fœtus incipiat moveri. Post partum, etiamsi uterus concidat, perpetuo tamen suctu lac ad mammas per consuetum iter trahitur.

In

In quā sententia haud pauca mihi displicent. Nam pro concessō accipit, ad lactis perfectionem debere concurrere *spiritum & sanguinem uterinum*. Quod cur fieri debeat, aut quomodo possit, ego quidem non intelligo. Quin potius arbitror, merum chylum esse, qui è ventriculo ad mammas transfertur. Quidni enim in *mola* etiam, imperfecto saltem & crudo lacte mammarum distenduntur? Ut in virorum quorundam mamillis aliquando contigisse diximus, hodièque alicubi terrarum fieri historiae testantur. Et cur non statim primis gravidationis mensibus, mammarum lacte turgent? quoniam tunc temporis quoque ventriculus ab utero comprimitur; ut vomitiones dilucidè ostendunt. Non dixerit, opinor, spiritum & sanguinem huiusmodi abesse. Porro malè statuit, chylum è ventriculo ad mammas ab *utero* protrudi; cum ad hunc potius, graviditatis tempore, propellatur. Verissimum quippe arbitror, lac ad matris uterum, nutriendo embryoni, decurrere. Ac propterea in illius exordio mammarum non turgent; quia parum admodum, nihilve chyli in istis convasatur, cum tantillum tunc utero sufficiat.

*De hom. excrement. c. 26.*

Neque pensior illa ratio *Fonsæ*, quā ait, *Mammas demum circa tertium & quartum*

tum mensem intumescere ; quia fœtu tunc grandiore facto, premuntur venæ, & sanguinem ad mammas mittunt ; & menstruus sanguis, ex quo lac gignitur, magis eo tempore abundat, infante jam genito, & carneis placentis. Nihili, inquam, hæc ratio : nam, præterquam quòd iniquum videatur, tenellulum fœtum vitioso pessimòque sanguine nutriri ; adolescente jam sub ultimos menses fœtu, sanguinis plurimùm ( ut communis fert sententia ) absumitur ; & tamen Ubera lactis copiâ augmentur : Tum etiam in mola, hydrope, & præfocatione uteri, ob eandem rationem, idem eveniret.

Diximus antehac, Cor, in animali, esse primum principium, à quo sanguinis circuitus dependeat. Non erit itaque intellectu arduum, cùm mater duobus cordibus prædita sit ( nimirum & suo, & fœtûs ; quorum alterum in pectore, in utero alterum gestat ) cur, in eadem, chylus è ventriculo diversis quoque itineribus feratur : cujus pars alia per ductum thoracicum ad cor proprium, atque etiam aliorum ; altera verò ad placentam uterinam, indèque ad cor fœtûs prorepat. Is porro qui ad fœtum tendit, partim eundem nutrit, partim vividum reddit. Chylus enim ( ut dictum est ) utrumque in se continet ;

tinet ; & succum alibilem tenuem, quo corpus alitur ; & liquorem pinguiorem, unde spiritus fabricantur. Hic in corde foetus rubedinem induit ; posteaque per arterias ad placentam remeans, sanguinem illum constituit, quem à matre protectum vulgò arbitrantur : cum tamen, si quis uterum praegnantis attentè intueatur, omnia ejus conceptacula lacte plena reperiantur. Indèque *Laurentius* ait, *se vidisse puerperas quamplurimas per uterum & vesicam, maximam lactis copiam excrevisse.* Sin autem & sanguinis aliquantulum tunc temporis circa uterum appareat ; id ad partis illius refocillationem ( utpote spirituum vehiculum ) affluxisse, censendum est : quemadmodum etiam in mammis, lacte turgentibus, usu venit.

Liquoris hujus tenuis, foetum in utero sustentantis, *Riolanus* ineptam causam reddidit. *Fuligines* (ait) *quæ fiunt in generatione sanguinis arteriosi in corde Embryonis, in pulmones abeant, indeque per os & nares effluunt, & in aquam convertuntur, quâ foetus circumfusus est.* Quis non miretur, potuisse tam supinam sententiam à Viro egregiè docto proficisci ? At tantum valuit transmutationis elementorum falsa hypothesis : & fuliginum in animalium cordibus inane somnium. Desino autem ampliùs

L. 7. Anat.  
qu. 11.

Anthrop. l. 6.  
c. 8. pag. 636.



plius mirari, fuligines à sanguine, in spiritus vitalis productione, avolare posse; cum ab ipso illo spiritu fuligines recedere audiam, dum in animale spiritum convertitur.

*Claudinus* enim ait, *cerebrum contrahi, ut calidior fuligo expellatur, quæ in concoctione, quâ spiritus animalis generatur, necessario suboritur.* De sede facult. princip.

Quæro itaque, cur lac in mammis ab eo tempore (imò prius etiam) generari incipiat, quo foetus movetur? Non dicent, opinor, sanguinem tunc ab utero ad mammæ ascendere. Aut quorsum, in gravidis, lac ante partus tempus in uberibus colligatur? Num per trimestre spatium, atque eo amplius, lac in mammis coaceratur, ut inde diu post nascendus foetus victum quæreret? Quis autem nescit, quantum damni lactis per diem unum aut alterum retentio lactantibus afferat? Frustra sanè Natura tam festinanter victum procurasset, nisi eundem quoque protinus embryonis nutritui destinasset. Hoc

volunt aphorismi *Hippocratis*, *Mulieri S. 5. aph. 37, utero gerenti si mammæ derepentè graciles- 38, 52, & 53. cant, abortionis periculum est, &c.* Non quidem (ut voluit *Mercurialis*) quia, ubi mammæ extenuantur ex inopinato, necesse est, ut humor ille aliquâ violentiâ feratur ad uterum, atque ita interimat foetum: fed

sed quia nullus chylus, aut exili nimis copiam (impedito nempe itinere) ad uterum pertingit.

Denique, solet puerperis, secundo à partu die advenire febricula, *lactea* vulgo dicta; quæ fit à lacte inter ubera & uterum stagnante. Lac quippe iter solitum jam deserit; & quod antea ad uterum ferebatur; nunc (amotò fœtu) immediate ex uberibus profluit. Cessat autem brevi istæc febris; ubi, quod restitit, sudationculâ, pristinoque restituto motu, discussum fuerit. Dixi sententiam, etiamsi non ex Tripode. Nunc tempus est ad *pistrium* revertar denuo, reliquâmq; tuam farinam, aut fursur potius, excutiam.

### S E C T. CXXV.

Arist. 2. *Metaph.*

*Heraclitus* solem quotidie novum exoriri censebat. Et tu nova similiter tibi videris in singulis paragraphis afferre, cum tamen eandem ferè rem passim repetas.

De eruptione sanguinis per sectam arteriam (quam *violentam* esse ais, & *præter naturam*) superius à nobis dictum est. Id nunc quæram duntaxat, cur idem sectâ venâ non contingat? utrobique enim eadem vis est. At verò discissâ (exempli gratiâ) venâ jugulari; pars inferior, cujus

jus orificium caput respicit, nihil sanguinis aut parum admodum extillat ; superius autem osculum, quod deorsum spectat, ingentem ejus copiam profundit ; cùm tamen inferius fonti sanguinis vicinior sit.

Experimenta itaque, ad quæ provocas, *circulationis* nostræ veritatem nihil omnino turbant. Incisâ enim venâ in talo, aut crure, omnis corporis sanguis effundetur ( si modò tamen ligatura affuerit ) quia è vicinis arteriis illuc affluit.

Alteram tuam *autopsiam* quod attinet, planè in ea deceptus es. *Harvæus* enim, licèt non negaverit, sanguinem, ab arteria in venam receptum, sursum fluere ; negabit tamen, sanguinem illum, qui ultra venæ aperturam ascenderat, denuo relabi posse. Et certè si quid ejus lentè distillaverit ( quod utique fieri non negamus ) id partium vicinarum compressioni, sanguinisque ipsius ponderi tribuendum censeo ; non autem ejusdem spontaneo ad partes nutriendas motui ; ut tu voluisti. Quod de motûs celeritate objicis ; obtusum adeò telum est, ut illi arcendo nobis clypeo nullo opus sit : idèmq; etiam antea retudimus.

S E C T.

## S E C T. CXXVI.

Nugas meras agis, cūm oculis circa proprium objectum ritè dispositum fidem abrogatum is; quia per duplex medium, aerem puta & aquam, rectum remum, ceu incurvum, intuentur. Neque argumentum ab *Harvæo* allatum, est rei tam exilis, ut oculorum aciem effugiat, aut ambiguum relinquat. Quin fidenter assero, in magnis quoque animalibus (experire sodes) idem usu venturum. Ego verò persuasissimum habeo, te periculum hujus rei nunquam fecisse. Nam neque *Harvæi* mentem rectè affecutus es; & quod ex tua comminisceris, fieri nequaquam potest. *Harvæus* asserit, ligatâ venâ (nempe cavâ) paululū infra cor; fore, ut sanguis omnis (qui inter ligaturam & cor continetur) brevi ad cor transeat, locúsque inanis relinquatur: quia is jam per cor in arteriam recessit. Tu autem de ambabus cordis venis nescio quid fabularis. Earum enim nomine, vel intelligis cavam & aortam; vel aortæ utrumque ramum, ascendentem & descendentem. Utrumlibet verò statueris, nunquam id eveniet, quod tu somnias. Præcluso enim in aortam aditu, omnis sanguis,

guis, qui inter cor & ligaturam continebatur, è cava migrare nequit; licèt cor infletur, venæ coronariæ intumescant, ac sangüinem opiparè devorent. Nam ante aortæ ligaturam omnia sanguine referta erant. Et si, ablata illâ, alteram in cava reliqueris; haud videbis cor, ejúsve vasa magnopere intumescere. Ideoque tua autopsia fallax est: venas nimirum, rebus tuo ordine instructis, brevi exhaustum iri: vera autem *Harvæi* illatio; dum, secundum posita ab ipso principia, ait, *circum-*  
*tum sanguinis concedi debere; nisi quis oculis suis fidem abroget.*

# S E C T. CXXVII. A.

Quæ hîc ab *Harvæo* afferuntur adeò luculenta sunt, ut vel sola circuitionis sanguinis veritatem demonstrare queant. *Parisæus* tamen, qui in firmissima quæque ubique arietat, miro artificio, ex dictis contrarium elicit. Qua in re volupe erit, acrem ejus subtilitatem aliquanto propius intueri.

Cordis *diastolen* & *systolen* suprà perpendimus: simulque *fibrarum* hac in re operam rejecimus. Nec debebat *Parisæus* earum denuo hîc loci meminisse; nisi cor ipsum vecordix insimulare vellet;  
Z
dum

dum suis villis (quasi datâ operâ) tantum sanguinis trahit, ut suffocationis inde periculum immineat.

Ficta etiam illa sanguinis vertigo sive circumgyratio (*quâ sanguinem ait ex aorta ad fundum cordis delabi; eundemque, per latus ejus ascendentem, in auriculam explodi; indeque in imum ventriculi disturbari denuo*) hîc nullum locum obtinet; quia vena cava, in *angue*, (ex *Harvæi* observatione) ex adverso aortæ, ventriculi fundum ingreditur, contrâ ac usitatò fieri solet: ac propterea sanguis ex aorta (ut vis) illapsus, per cavam venam, perinde ac per sectum cordis mucronem, elabere-  
tur. Neque est, quòd valvulas objicias; quæ non magis sanguinis egressui in cavam, quàm ejusdem ingressui ex aorta, obstarent. Accedamus autem ad propositum exemplum. *Ligatâ, in vivo angue, venâ cavâ per aliquod spatium infra cor, accursuque adeo sanguinis intercepto; quicquid hujus erat inter cor & ligaturam, statim inanitur, & cor perlabitur.* Quid autem ad hæc *Parisanus*? Nequaquam, inquit, sed à corde læso trahitur; atque ab eodem, ejusque coronariis venis statim absumitur. Unde autem cor læsum; cum ligatura illa sive interceptio dolorifica non sit, & remotè infra cor instituta fuerit?

Quin-

Quinetiam, si *dolor* humores attrahit ; ipse locus dolens & constrictus, sanguinem potius utrinque ad se alliceret (nempe sursum è cava, deorsumque è corde) quam ad cor sanguinem à se propelleret. Mirifica sanè verba ! Dolor attrahit ; ergo vena, à vinculi constrictione dolens, sanguinem ad cor propellit. At enim fit istuc, ais, *quia cor ligatæ venæ compatitur* : adeò ut hujus dolor omnino sit *cordolium*. Suavem Philosophum ! Vena claudi nequit sine cordis angustia ; & si illa vel minimum (etiam à leniter comprimentibus digitis) patiatur vincula ; cor statim misericors tam ingenti luctu affligitur ; ut copioso sanguine opus sit, quo dolorem abluat. Quin, quod magis mireris, sanguis iste, qui languidum jam cor consolatum ibat, ab eodem confestim absumitur : quemadmodum de ægrotante leone *Æsopus* olim fabulabatur. Mirum hercle, postremum sanguinem, (quem à vena, ob ligaturam dolente, aliquandiu retineri par erat) vulpeculæ astutiâ præditum, pedem non figere, diceréque, *hæreo*,

— *quia me vestigia terrent*  
*Omnia te adversum spectantia, nulla re-*  
*trorsum.*

Horatius l. 1.  
 Epist. 1.

At ille amens præcedaneum sanguinem sequitur. Quid igitur? Spēsne est, cor à tanta sanguinis copiâ diu exhilaratum iri? Falleris: statim enim, *Eresichthonis* instar, illi summa macies & *pallor*. Quem ego potius à luctu & metu deduxissem. Verùm aliter se res habet, si *Parifano* credimus. Nimirum, anguillæ corculum membranaceum & propemodùm exsangue, præ dolore fit famelicum, & vicinum omnem sanguinem momento abligurit. Neque hinc tamen magnopere, diuè reficitur; sed (epoto licèt cordiali haustulo) protinus languescit: & *dexter ventriculus* (qui certè in anguilla nullus est) mœrore jam propemodum confectus, sinistrum in doloris consensum trahit: idque adeò, ut hic *ἄσπετος* sit; & licèt victus illi comiter à *liene* offeratur, eundem tamen recuset, ut dolori indulgeat.

*Similiter* (ait) *Harvæus*) ligatâ vel compressâ arteriâ, pari à corde intercapedine, pars arteriæ intermedia distenditur, & cor præter morem intumescit, purpureūque colorem contrahit usque ad livorem, adeò ut jam sanguine oppressum iri videatur. Unde verò istuc? Nimirum, inquit *Parifanus*, quia jam cordi major dolor ingruit; quoniam *arteria*, ceu filia ex propriis visceribus nata, se malè habet. Quidni igitur



tur sanguinem ex arteria (cùm ex tumore dolorem hujus augeat) pariter trahit, atque modò è vena factum erat? Cur non sanguis ille omnis in dolentis cordis nutrimentum abit; ut eo absumpto, cor denuo palleat? Fortasse,

*Leves dolores vescuntur, ingentes stupent.*

At dic, obsecro; cùm sanguis (te sic volente) à *splene*, & *venis*, per aortam, cor ingrediatur; quomodo, ligatâ illâ, tanta sanguinis copiâ ad cor allabitur? Aut si sanguis, non obstante vinculo (sed, valvularum tuarum instar, transitum aliquem concedente) ad cor accedere potest; spiritus-ne tuus purpureus per eandem semitam recedere non poterit? Malè mihi velit *Hygieia*, si quidquam in his tenebris videam, præter larvas, & somniorum Chimæras. Et tamen *Parifanus*, sui summus admirator, hæc commenta meridianâ luce clario-  
ra ait: quæ autem ab *Harvæo* summo ac-  
cumine adducta sunt, nihil ad circuitum sanguinis stabiliendum conferre. Cùm ta-  
men ista adeò manifesta, reique ipsi conso-  
na sint; ut, si quis clariorem lucem requi-  
rat,

*Ostendi solem postulet ille sibi.*

Ovid. *Trist.*  
l. 5. eleg. 3.

## CAPUT. XI.

*Secundum suppositum confirmatur.*

## S E C T. CXXVII. B.

L. 1. Elench.  
C. 1.

**A** Ntiqui omnes cum ratione loquuntur, quoties tecum sentiunt; & Naturæ optimus ordo, egregiæque æconomia subvertitur, si quis a tuis figmentis dissentiat. Non immeritò hîc dixerim, quod de Sophistis ait Aristoteles, Inflata esse, quæ pingua videntur. Multa enim hîc consuiisti, quæ parum admodum ad rem præsentem spectant, adversarium autem nullo modo premunt. Ais, officialia membra sibi solummodo agere & operari; alterius autem partis nullam curam gerere, nisi per accidens, & sine ipsi Naturæ ignoto. Unde igitur fit, ut superfluum sibi attrahant, quo postea aliæ partes nutriantur? Enimverò nisi intelligentiæ cujuscpiam id opus fuerit, quidni etiam à privatis partibus idem similiter contingat?

Addis,

Addis, cerebrum mutare spiritus vitales in animales; quos postea per nervos transfundat in membranas, musculos, tendines etiam, aliasque partes; eorumque opera sensum iis & motum impertire. Quod supra à nobis negatum est, & in nostra *Antidiatriba* fusè refutatum. Multò autem minùs crediderim, Spiritus naturales efformari à testibus, ad totius individui robur. Quibus alibi tantum virtutis attribuisti, ut ausus fueris dicere; Si Deus homini ejusce magnitudinis testes constituisset, ut satis seminis ad omnium spermaticorum membrorum satietatem conficerent, additis singula ad membra deferentibus vasis, hominem naturali morti minimè subiectum fore. Quam ridiculam sententiam (cùm hujus loci non sit; & alibi, quid hac de re sentiam, abunde dixerim) ulterius non convellam. Quorsum autem hæc parerga, nisi ut nubeculam legentium oculis offunderes? Neque enim causam ullam video, cur, (ex *Harvæi* sententiâ, æquè atque ex tuo dogmate, pro quo tot ambages nectis) diversæ partes alimentis quoque variis nutriri nequeant. Quid enim interest, partésne ipsæ alimentum suum trahant, ut tu vis; an illud ad partes nutriendas feratur, ut *Harvæus* rectiùs existimat? Nisi quòd hoc intellectu, factùque

De Subtilit.  
l. 4. exerc. 1.  
c. 3.

multo facilius sit. Celeritas enim motûs ( quæ ob stare videtur ) agglutinationem sanguinis non impedit ; & commodè satis variis partibus diversa alimenta appor-  
tat. Ita flumen, rapidè decurrens, om-  
nis generis arbores, plantâsque, in ripa-  
rum marginibus consitas irrigat, ac nutrit.  
De illo verò alimonix discrimine, quod  
memoras, paulo ampliùs satagendum est.  
*Sicut (ais) indecorum foret, eodem cibo po-  
tûque regem nutriri, eodem vernam ejus,  
servum, bajulum, ac rusticum ; ita nec cere-  
brum, cor, oculi, os, cartilago, ligamentum,  
&c. alimento eodem nutriri debent. Quo-  
modo igitur omnes corporis partes ( ut ar-  
bitraris ) à venoso sanguine nutriuntur, pro-  
pria ventriculi tunicâ exceptâ ?* quanquam  
non video, cur hanc exceperis : siquidem  
ventriculus, ut censes, è semine constat,  
cui sanguis ( te judice ) quàm chylus, vi-  
cinior est. Tantùmne est in illo discrimi-  
nis, ut pars hæc mollem carnem, illa  
os durum constituat ? Mirum nî in plan-  
tis etiam, ex eadem pluvîâ, pro earum  
radice, medullâ, ligno, corticibus, foliis,  
floribus, & fructibus, totidem diversa ali-  
menta repereris. Videmus profectò, ean-  
dem terram & aquam varia plantarum ge-  
nera educare ; dissimilésque pecudes eodem  
gramine pasci. Ita quidem videtur, in-  
quies ;

quies; sed tamen in eodem pabulo diversissimæ partes delitescunt, quæ à singulis variè proliciuntur. Cedo itaque ( si caro & os ex diversis alimentis constant; neque eædem sanguinis partes utrisque inservire possunt ) unde nam carnivoræ aves ossa sua, cartilagine, ungues, plumas, &c. nutrant? Debebant certè, quantum audio, etiam plumis vesci. Satiùs equidem diversis *facultatibus*, cum vulgo, quàm alimentorum partibus, varietatem hanc adscripsisses. Ita enim membrana transit in cartilaginem, ob *facultatem cartilaginis*; & cartilago, à *facultate ossificâ*, in os durefcit. Quidni enim transmutandi alimenti, perinde atque attrahendi, munus illis concedas?

Quæ de Embryone narras, sublestæ fidei sunt omnia; imò verò turpissimi erroris manifesta. Quicquid enim dixeris, nobis indubium est, cor in fœtu moveri, sanguinèmq; per vasa ejus circumcursare. Adeoque plurimùm miror, *Gassendum*, singularis industriæ atque acuminis Virum, ejusdem erroris affinem esse, ubi ait:

*Quandiu fœtus moratur in utero, non tam vitam propriâ, quàm maternâ, vivit; artetriæque ejus, non ad cordis proprii, sed ad materni motum pulsant; propriumque adeò cor veluti ociatur; neque ab eo vita, magis quàm*

Tom. 2. l. 13.

c. 4. pag. 610.

quàm ab alia quapiam parte, derivatur in cæteras. Quo sanè nihil dici potuit à veritate remotius: parique rationis specie, quis dixerit, pullum in ovo, ab incubante gallina foto, non suo, sed hujus cordi vitam, motúmque omnem debere.

### S E C T. CXXVIII.

Quasi verò *Harvæus* ex assumptorum copiâ, & non potius inopiâ circumgyrationem sanguinis probaverit? Miror, te in re perspicuâ manifestè adeò prævaricari.

Contingit quidem interdum plethora: cum nempe plus chyli in cavam diditur, quàm in cordis usum absumitur. Quid autem inde rebus tuis accedit commodi?

### S E C T. CXXIX.

De humorum attractione, ob dolorem, calorem, &c. suprâ abunde dictum est; nec placet crambe.

Sententia *Harvæi*, de ligaturis, est verissima; uti ex dicendis constabit.

## S E C T. CXXX.

Reverà *Harvæus*, more suo, bellissimè ratiocinatur, dum tu nihil præter verba fundis ; & suaviter tibi sapere videris, quòd arcta ligatura præcedanea tibi in mentem venerit ; unde dolorem, caloremque, attractionis causas, accerferes. At scire te velim, Vir subtilissime, posse fieri arctam ligaturam, citra dolorem aut calorem majorem solito. Deinde, etiam animadvertere debuisti, tumorem, de quo agit *Harvæus*, subsecuturum esse ( licèt minùs conspicuum ) si mediocris solùm ligatura instituatur. Antea quoque à nobis demonstratum est, calorem, dolorem, vacuum, &c. non attrahere humores, nisi per accidens, quatenus scilicet impulsì, ad ea loca uberius affluunt. Verùm esto, concedamus, in tui gratiam, vinculum dolorificum humores ad se trahere, qui aliàs quieti in neutram partem obnoxii essent, nisi prout à partibus esurientibus invitarentur. An non æquum est, ut sanguis *utrinque* ad ligaturam rapiatur ? Prorsus : cum hic suâ sponte in neutram partem inclinet ; & vis trahens non minùs inferiora, quàm superiora, respiciat. Unde igitur, solutâ arctâ ligaturâ, manus intumescit ?

mescit? cùm locus dolens in cubito sit, & illoversum sanguis è manu surrepserit; qui nunc fit, ut (sóluto arcto vinculo in laxius) simul cum illo, novus ex humero sanguis dolentem locum præterfluat, ut indolenti manui dolorem inferat?

Quæstio, quam *Harvæo* proponis, (quomodo nempe, durante ligaturâ, circuitus fursum fieri possit) nec *Oedipo*, nec *Davo* quidem opus habet. Fit enim multiplex in corpore sanguinis circuitus: qui non solum in extremis artubus; sed etiam, per varios recursus, multosque arteriarum & venarum ramulos, sinuososque flexus ad majora vasa revertitur. Quod de secto pollice subnectis, gratis dicitur, petisque principium.

## S E C T. CXXXI.

Quomodo *spiritus*, *apposito pulsanti arteriæ digito*, *sentiri possint*, nequaquam intelligo: ne quidem, etiamsi illos (tecum unâ) sanguinem in corde solum & auriculâ agitatam & calefactum statuam. Nam cùm uno pulsu vix sex septémve sanguinis guttulæ in omnes arterias prodeant; & pars quoque ejus (ut censet) inter eundem, refocillandis arteriis restitetur: quis credat, tantillum sanguinis, tam  
rapidè



rapidè volitans, in extrema arteria à digito persentisci posse? Nec magis intelligo, quomodo arteria tantisper jejuna (durante scilicet constrictâ ligaturâ) tantum sanguinis refarciendo damno requirat, ut fluxio ejusdem ab admoto digito facilè animadverti possit.

### S E C T. CXXXII.

Quidnî (superstite etiam arctâ ligaturâ) sanguis tuus spirituosus ad arteriæ inferiora labitur; cùm (ligatâ venâ) sanguinem venosum majore impetu desuper affluere statuas?

### S E C T. CXXXIII.

*Arteriæ (ais) ex stricta ligatura intumescunt, quia copiosus spiritus, in itinere sufflaminatus, easdem inflat, & pulsum augeat.* Verùm audisis: idem contingit, si ligatura prope extremam manum facta fuerit. An hîc etiam tantilli spatii indigentia tot spiritus accumulât? Quidni similiter artuum extremitates, quæ spirituum horum impetum terminant, perpetuò inflantur?

Quod de venarum infra ligaturam turgentia narras, id rationi multò magis est dissen-

differtaneum. Licet enim stricta ligatura laxetur: mediocris tamen, quæ remanet, omnem sanguinis per venam descensum prohibet. Quinetiam diximus, dolorem ab arcta ligatura in cubito, non posse esse causam descensus sanguinis ad imam manum. Atque ut sit maximè; nos doce, quæsumus, cur demptâ arctâ ligaturâ, venæque ab omni vinculo liberatâ, tumor ille subter cubitum non appareat? Ligatura enim mediocris (quæ nunc etiam abest) non est (te quoque fatente) dolorifica.

Nobis explicatu facilè est, cur *venæ* (ita enim legendum, ut sensus loci docet; non autem, *arteriæ*) supra ligaturam intumescant: quia nempe sanguis is ad cor prorepat. Tua verò ratio nulla est; quia pars venæ suprâ ligaturam à fonte suo de novo impleri posset; etiamsi (ut tibi adlubescit) sanguinis aliquantum inde, præ dolore, ad interiora raperetur.

#### S E C T. CXXXIV.

Vena (ut tu quidem arbitraris) in mediocri ligatura, infra vinculum intumescit, quia superior sanguis (nihil scilicet impediente ligaturâ) illuc, ob dolorem, trahitur. Cui commento objectio *Harvæi* commodè occurrit: dum ait, sanguinem,

nem, infra ligaturam collectum, trans illam ne vi quidem adigi posse. Respondes autem, id fieri; non tam ob ligaturam, quàm quòd sanguis naturaliter deorsum ruat; ac propterea ascensum illius sanguinis præpediat. Idque præclare in rem tuam facere, omnémque sanguinis circuitum tollere, contendis. At verò si sanguis, qui est supra vinculum, tanto nisu deorsum tendit; quâ fit, ut levissimo digiti impulsu sursum adigatur; & (demptâ modò ligaturâ) inferior quoque sanguis eundem subsequatur? ut intuentibus manifestè constet. Neque est profectò, quòd *fugam vacui* causeris; quoniam, secundum tua principia, sursum protrusus sanguis potius descendere deberet; quàm ille, qui infra ligaturam continebatur, ascendere, & fugientem subsequi.

S E C T. CXXXV.

Video, me damnatum ad metalla: hæreo enim etiamnum in tristi hoc negotio. In arcta ligatura, pars arteriæ superior intumescit, ob descensum sanguinis, qui ulteriùs progredi nequit: idem autem venæ non contingit, quia nihil sanguinis in hac ad exteriora fertur. Deberet autem vena supra ligaturam turgescere, si sanguis

sanguis ( ut voluisti ) naturaliter in vasis deorsum rueret, & quoquo versum à dolore traheretur.

Quid illud autem, quod ais, *venas, ob ligaturam compressas, ideo tumidiore fieri, quia nec sursum quidemquam sanguinis suggerunt, nec deorsum aliquid recipere possunt?* Unde itaque tument, si non à sanguinis influxu? aut quomodo hic influit, si non recipitur? Num sanguis ille, cujus nunc locum tenue vinculum obtinet, inde emigrans, longa venarum spatia in tumorem conspicuum attollit?

Clypeus, quem *Harvæo* obtendis, imbecillior est, quàm ut ictum tam validum sustinere queat. Ais, *sanguinem in mediocri ligatura ad imam venam descendere posse; quia, fatente Harvæo, idem ad arteriæ extremum pertingit.* Qua equidem in re plurimum hallucinaris: mediocri enim ligatura arteriam neutiquam constringit, sed venam solùm; quia arteria & profundius sita, & tunicâ densiore donata est.

## S E C T. CXXXVI.

Non hîc repetam, quæ antehac à me dicta sunt. Illud autem mihi prorsus admirabile videtur, quod ais, *Sensu ac rati-*

one

one tibi compertum esse, sanguinem per venas, earundemque cæcos ductus, in mediocri ligatura, descendere. Ades nempe nobis novus *Chærephon*, qui etiam pulicum noverat vestigia. Quibus autem oculis, precor, cæcos illos ductus animadvertisti? aut quis sensus tibi indicavit, sanguinem per venas descendere? Quoniam, inquis, in laxa ligatura, sanguis nec copiosè, nec longius effunditur, ut in stricta ligatura fieri solet. At enim hoc est ratiocinatione uti, non autem sensuum testimonio. Imò verò nec ratione quidem ullâ hîc usus es. Nam in stricta ligatura, nihil omnino sanguinis profilit; quia *arteria*, non minus quàm *vena*, occluditur. In mediocri autem ligatura, licet *arteria* relaxetur, *vena* tamen, cuti citima, adeò comprimitur, ut nullus sanguini transitus pate scat. Quæ tu profers in contrarium, prorsus emendicata, atque gratis dicta sunt. *Valvulae* autem nihil ad rem faciunt.

Quod verò addis, *brachio artè ligato, copiam sanguinis decrescere, & consumi in brachii nutritionem*; valde dubito, numnam aliquo sensu id perceperis: aut si tam *Lynceus* es, ut, quæ nusquam sunt, perspicias; certum mihi tamen, rationem nullam id tibi indicasse. Quam tu enim sanguinis consumptionem vocas; ego spi-

rituum sive caloris abitum esse, aio. Nempe detumescencia ejusmodi oritur à spirituum avolatu, qui per strictè ligatam arteriam noviter suppeditari nequeunt. Tam imbellis *Paris Harvæi Achillem* nunquam justo Marte prostraverit.

### S E C T. CXXXVII.

Miror magnopere, te, qui modò in tenebris tam perspicaci intuitu pollebas, in clara jam luce positum cæcutire. Sanguis pedetentim frigefactus non grumescit, aut crassescit adeò, ut ad motum ineptus sit: apertâ namque venâ in cadavere, sanguis profluit. Neque hic fursum rapitur suâ sponte, aut illuc trahitur; sed protruditur à sanguine subsequente ex arteriis; eoque modo fluit, quo jampridem diximus. Falleris etiam, cùm sanguinem, qui infra ligaturam est, recursu ad cor factò, lipothymiam suo frigore inducere arbitraris: hic enim à corde nuperrimè emanans, etiamnum calet. Est autem is sanguis, qui supra vinculum resistebat, cujus calor plurimum evanuit; neque novum è corde, ob præpeditum iter, nancisci potuit. Nec nobis adversatur, quòd, algente ob frigus pede aut manu, idem semper eventurum ais: affectus enim ejusmodi non contingit,

git, nisi frigus subito in calidius cor ingruat: at verò hyeme totus sanguis alget; sitque mutatio istæ paulatim, ac temporis spatio aliquo. Sententiam hanc confirmat experientia; quâ constat, si quis tenellæ constitutionis calentem manum algidæ aquæ immerferit (factâ præsertim supernè ligaturâ) eundem mox, ablato vinculo, commotionem aliquam li-  
pothymix similem experiri.

### S E C T. CXXXVIII.

Contrarium potiùs eveniret: mutatâ enim strictâ ligaturâ in mediocrem, arteria (ut ex pulsu liquet) aperitur, ac vigescit. Nulla igitur ratio est, quin sanguis, præsertim spirituosus, impetûque ad-  
actus, in imam usque ejus partem descendat. Vena autem (quicquid dixeris) etiamnum clauditur; (alias enim ligatura omnino frustranea esset) idque adeò, ut sanguis ad inferiorem hujus partem trans vinculum penetrare nequeat. Quapropter *Harvæus* jure merito asseruit, venas ab arteriis repleti. Enimverò si dolor à ligatura (ut arbitraris) hanc venarum plenitudinem induceret; quidni arteriæ similiter ab eodem dolore implentur?

## S E C T. CXXXIX.

Venas, in mediocri ligatura, priùs juxta vinculum intumescere, non autem in extrema manu, etiamsi verum esset; id tamen non fieret ob dolorem à ligatura illatum; sed quia sanguis, ex arteriis in venas illatus, in ligaturam impingit, atque ab eadem sistitur. Quemadmodum in rapidè delabente flumine, obice factò, videre est.

Figmentum de extensione & contractione valvularum, precariò à te asseritur, neque cum rei natura convenit.

## S E C T. CXL.

Quomodo arctam ligaturam à dolore distinguis?

## S E C T. CXLI.

Esto, *ad dolentem partem spiritus & sanguis confluant.* Cedo autem, quo itinere id fiat. An non per arterias, eodèmodoque modò, quem *Harvæus* statuit? Etenim si per vasorum anastomoses (quas nullà ratione ubique ferè comminisceris; cum tamen easdem, opinor, nusquam videris)



deris) id fieret ; nulla ratio esset, quò minùs pars venæ supra ligaturam pariter atque infra illam intumesceret : immo certè multo magis ; siquidem fluxio ( ex tua sententia ) deorsum vergit, & à ligatura impeditur ; infra quam sanguis pacatè degit. Temerè enim ais, partem superiorem non pati, non ligari ; siquidem illa, ex tuo dogmate, sola, aut saltem præcipuè, ligaturam patitur ; ut animadvertentibus palam est.

In tumorum generatione quænam aliæ concurrant causæ, præter sanguinis, succique alibilis interceptionem, si nôsses, dictum oportuit.

## S E C T. CXLII.

Quoties eadem ? Nimirum tam subtilis tua philosophia, ut nisi idem usque & usque regeratur, nemo sit, qui intelligat. Non tangam autem antiqua ulcera : illud solum refricabo, unde ( te censore ) *circulationis vanitas manifestè patet. Sectâ venâ, ais, absque ligaturâ, sanguis guttatim egreditur ; quia nullâ vi, nisi vacui, fluit & expellitur.* Atqui istæc olim tibi maxima fluxionis causa habebatur. Dic sodes, in mediocri ligatura, an non, ob vacui solius fugam, sanguis rapidè profilit ? Quid-

S. 114, 118.  
alibique passim.

ni igitur idem, soluta omni ligaturâ, contingit? Quin dic potius, quomodo vacuum sit futurum, si nullus omnino sanguis prodeat? Profecto ingenio tardior sum, quam ut id intelligam. Multoque minus, quod sequitur: *datâ scilicet circulatione, venâque sectâ sine ligaturâ, sanguinem rapidissimè effluxurum.* Quomodo enim tam celeriter profluat è vulnere; si, vas conscendendo, ipsum vulnus prætersluat? Verum est, quod dici solet,

*Causa patrocínio, non bona, pejor erit.*

Sectâ arteriâ, gravia interdum subsequuntur incommoda; quia sanguis, ob fervorem, quem in corde nactus est, copiosè validèque exilit, nec facilè sisti potest. In *vena* autem, percolatione factâ per angusta vasorum orificia, adeoque retardato sanguinis rapidè advolitantis impetu, dissipatòque magnam partem calore; omnia aliter sese habent.

Hîc ligaturam à vena cava desuper trahere ais, tanquam à parte dolente: eandem tamen pati quidquam, præcedenti pericope inficiabaris.

Illud verò omnem propemodum fidem superat, *Æmylium Parisanum*, acutissimum mortalium, tam turpiter hallucinatum esse,  
ut

ut nesciverit, in secandis venis colli, atque brachii, ligaturam, ( fluentis sanguinis respectu ) ad eandem normam institui : nempe eam utrobique pariter sanguinis per aperta vasa affluentis impetum compescere ; eadēque operâ, celerem illius per vulnus exitum promovere.

### S E C T. CXLIII.

Sectâ capitis venâ, ligatura quidem infernè instituitur, respectu habito ad caput ipsum ; supernè tamen id fieri, verè dici potest, immo debet, ratione fluentis sanguinis : hic enim per capitis venas descendit ; quemadmodum vice versâ ascendit per venas pedis, aut brachii. Quamobrem ratio eadem est, licet modus sit diversus ; utrobique enim fertur ad cor.

De causâ sanguinem propellente, non est hujus loci quidquam dicere ; antea enim id abunde præstitum est ; ubi *dolorem, calorem, & vacui fugam* exulatum misimus : neque vel umbra sanè rationis apparèt, cur horum cuiquam sanguinis explosio tribuenda sit ; cùm eundem potius, ex tua sententia, attrahant. Quod autem ais, *sanguinem è vena capitis sectâ deorsum ruere* ; id neque verum est ; nec, si esset, quidquam causam tuam adjuvaret. Sectâ

A a 4

enim

enim jugulari, sanguis rectà profilit ; aperta autem verticis venâ, idem sursum emicat. Quemadmodum in siphunculis subterraneis, aqua arctiùs pressa, factò supernè foramine, sursum exilit. Et si sanguis è colli vena profluens, sub finem deorsum vergit ; id certè ponderi ejus tribuendum fuerit. Quid autem æstuo in re tam frigida ? Quicquid hujus sit ; si difficultas aliqua in hac re esset (quæ equidem nulla est) eadem non te minùs, quàm *Harvæum*, stringeret. Ipsemet enim sanguinem per *venas* partibus affluere statuis ; ille autem id fieri ait per *arterias* : atque utrobique, quod ad hoc negotium attinet, res sese perinde habet.

---

## C A P U T. XII.

*Esse sanguinis circuitum, ex secundo  
supposito confirmato.*

## S E C T. CXLIV.

**H**I tui milites, *Simalio*, & *Donax*, sensus, & ratio, quos sæpe auxiliares advocas, *κατὰ πρόσωπα* mutæ personæ sunt ;

sunt ; nihil in tui gratiam loquuntur, nihil agunt. Sanguis enim nequit ultra ligaturam progredi, ut sæpe diximus ; quippe alias frustra esset. Atque etiamsi posset maximè, nulla tamen ratio constat, cur illico per angustam potius rimulam foràs profiliret, quàm per patentem amplè venam deorsum tenderet.

#### S E C T. CXLV.

Non liquet.

#### S E C T. CXLVI.

*Harvæus* de sectione venæ supra ligaturam non loquitur, sed contrarium dicit. Scire tamen pervelim (factâ ligaturâ stric-  
tâ adeò, ut nihil sanguinis, te quoque fa-  
tente, ad venam inferiorem descendere  
queat ; sectionéque supra vinculum insti-  
tutâ ) cur non omnis totius corporis san-  
guis æquè effluat ; atque, sectâ infra liga-  
turam venâ id fieri conceditur ? An non  
hîc pariter adsunt *dolor, calor, vacui fuga*,  
& si quid aliud comminisci, animo colli-  
bitum est tuò ? Subterfugium autem tu-  
um, de penetratione sanguinis ultra liga-  
turam mediocrem, quod tibi in hac diffi-  
cultate unicum asylum est, facilè præclu-  
fero.

sero. Venâ enim à circumvicinis partibus liberatâ, factâque jam strictâ ligaturâ ; idem usu veniet, quod suprâ in mediocri contigit ; quia arteria hoc modo non constringitur ; neque adeò sanguini, per eam properanti, frænum injicitur.

### S E C T. CXLVII.

Etiamsi, exhausto sanguine arterioso, novus alius continuò ad cor affluat ; non est tamen fabricandis spiritibus idoneus, nisi accessus ejus perpes fuerit, & aliquantillam in corde moram traxerit ; ac propterea lipothymia interea facîle supervenerit.

### S E C T. CXLVIII.

Licet vena receptum ab arteria sanguinem porrò provehat ; ille tamen (ait *Harvæus*) à subsequente alio protruditur, atque hic similiter motum suum cordi debet.

*Germana autem & luculenta tua ratio*, quæ spirituum ad cor recursum effectum hunc tribuit, nimis obscura est, & à nobis jampridem exauctorata. Quia tamen tantopere tibi arrisit, eandem denuo expendemus.

*Andreas*

*Andreas Cæsalpinus*, philosophus haud proletarius, ait, *Cor esse fontem sanguinis*; *Quæst. Peri-*  
*quia in metu sanguis fugit ad cor, tanquam* *pat. l. 5. qu. 3.*  
*ad suum principium*; non autem ad hepar,  
 aut cerebrum.

Et non paulo deterius *Huartus*: *Imagi-* *Scrutin. In-*  
*nativa facultas*, inquit, *opus habet luce qua-* *gen. c. 16.*  
*dam*; quæ intra cerebrum sit; ut phantaf- *pag. 509.*  
*mata*, quæ in memoria extant, introspiciat,  
 ac cognoscat. Hanc autem claritatem nec  
 Sol ipsi, neque candela impertire potest;  
 sed provenit à spiritibus vitalibus, qui in  
 corde nascuntur, & per totum postea corpus  
 distribuuntur. Metus autem, spiritus vi-  
 tales omnes, in fasciculum quasi collectos,  
 ad cor retrahit; & cerebrum prorsus obscu-  
 rum, uti & reliquas omnes corporis partes  
 frigidas, relinquit. Unde quærit *Aristo-* *señ. 27.*  
*teles*, cur voce, & manibus, ac labio infe-  
 riore tremant, qui metuunt? Respondet *Problem. 6.*  
*autem*, in metu calorem naturalem ad cor  
 reduci; reliquas verò corporis partes inde  
 frigidas relinqui. Frigiditate autem (se-  
 cundùm Galenum) omnes animæ faculta-  
 tes ac potentiæ torpescunt.

Quid autem opus est, spiritus adeò re-  
 motos ad cor retrogradi? Verisimile enim  
 est, illos, qui in proximis vasis excubias  
 agunt, factò in corde tumultu, primos  
 advolare. Qui cùm in proximis arteriis  
 & ve-

& venis (ut ex tua sententia loquar) plurimi sint; quid remotiorum operâ opus est? Adeone excors cor est, ut, ingruente levissimo strepitu, subsistere non audeat, nisi integro convocato exercitu? At forsitan spiritus, qui in manibus, pedibusque operam navant, cordi maximè ex usu sunt; quoniam illi didicerunt *pugnare*, hi autem *fugere*. Licet verò spiritus ad cor remeent; sanguis tamen venosus, qui paucis iis solùm donatus est, in venis remanet, atque ad exitum à ligatura sollicitatur: quin prodit igitur? Numnam, ob spirituum abitum, catoche prehenditur? *At*, inquis, *dolor non persentiscitur*. Ego verò nego, leve animi deliquium semper ἀναισθησίαν comitem habere. Et ut habeat maximè; nonne in apoplexia, ubi sensatio omnis tollitur, sanguis è secta vena effunditur? Porro, si in lipothymia sanguis & spiritus undiquaque ad cor rapiuntur; quidni sanguis venosus, per venas remeans, facto obstaculo, per vulnus exilit? Aut in quem finem sanguinem venosum, paucis admodum spiritibus dotatum, ad dextrum cordis ventriculum refluere voluisti? Scilicet, cùm aorta de sinistro ventriculo magnopere esset sollicita; non debuit vena cava pulmonum suorum oblivisci! Et cùm, in *syncope*, ob sanguinis in pulmonibus



nibus stagnationem, hi ægrè spirent; debant insuper à sanguine confertim irruente suffocari. Talis certè fertur simiarum erga suos catulos amor. Denique, cur hîc exulat *vacui fuga*? Prorumpenti enim sanguini si lipothymia superveniat; an non vacui metus imminet, si ille moras nectat, fluxúmque priorem intermittat? Alibi profectò tibi sic videbatur; ego autem discrimen hîc nullum video. Neque *sanguinis thrombus* quidquam causæ tuæ auxiliatur; quoniam, redeunte animo, fluxio sanguinis denuo renovatur.

Sanguinem menstruum quod attinet; is quidem interdum statis temporibus moderatè ac naturaliter emanat: aliquando tamen copiosè ac violenter nimis profunditur: quemadmodum in aliis quoque immoderatis hæmorrhagiis, ob rapidum sanguinis affluxum, contingit: qui, obveniente lipothymiâ, commodè sistitur. Hanc causam arbitror, cur *Veteres*, in ardentissimis febribus, doloribúsq; vehementibus, sanguinem ad animi deliquium usque mitteri voluerint. Non quidem, ut lipothymia esset mensura maximæ evacuationis, ut multi arbitrantur; fallax enim admodum fuisset hæc regula; cùm sint quidam, qui ex quacunque etiam minimâ sanguinis eductione, animo linquantur; aliique è  
diverso,

diverso, qui etiam immodicas, citra animi deliquium, sustineant. Id autem potius fit, quia in ejusmodi affectibus, *lipothymia* virtute propriâ auxiliatur. Ab hac enim sanguinis impetus coercetur, habitus corporis refrigeratur, sensibûsque torpor inducitur. Quæ sanguinis circuitioni lucem magis addunt, quàm adimunt.

### C A P U T. XIII.

*Quo tertium suppositum confirmatur.*

### S E C T. CXLIX.

**V** *Alvularum* in venis usus, quem tu *unicum Harvæi asylum* vocas, non est nisi è multis unum, plurimùm tamen ad circulationis veritatem confert. Usus earum, à te excogitatus, idem est cum illo, quem *aortæ* valvulis affinxisti: nempe, ut aliquantillum quidem sanguinis transmittant, ejusdem autem affluxum uberiores impediant. Atqui pari ratione dixeris, valvulam colo præfixam, non omnem fœcum regressum prohibere, sed recursus im-

impetum duntaxat infrænare. Etiamſi autem verum eſſet, valvulas has ita conformatas eſſe, ut omnem ſanguinis refluxum arcere nequeant; ſufficeret tamen, eundem aliquatenus cohiberi: reliquum enim impetûs illius ab accurrente ex arteriis ſanguine reprimitur, ac ſup<sup>er</sup>etur<sup>us</sup>.

### S E C T. CL.

Quæ hîc præcipui momenti ſunt prudenter reticuiſti. In *emulgentibus* (inquit *Harvæus*) & in boum canûmque *cruralibus*, quæ *transverſim* eunt, valvulæ reperiuntur; adeoque non in eum finem inſtitutæ ſunt, ne ſanguis ſuo pondere deorſum ruat. Tu ad hæc ne verbum quidem. Quæro etiam, cùm ſanguis tuus *splenicus* ad cor *plenis buccis* feratur, cur nullæ valvulæ in aorta fabricatæ ſint, quæ ſanguinis huius refluxum prohibeant?

### S E C T. CLI.

Cùm hominibus caput ferè ſemper erectum ſit, debebant valvulæ potiùs ſuſum aperiri, ut ſanguini, nutritionis cauſâ attracto, facilis tranſitus pateſceret; deorſum verò claudi, ne Natura *Sifyphi ſaxum* volveret; ſanguisque, magno molimine attractus,

attractus, confestim delaberetur. Quidni etiam in magnis vasis similes valvulæ extractæ sunt? cùm sanguis in illis, ob copiam, ponderosior sit; & periculum majus immineat, si quantitate nimia in viscus aliquod decumberet.

### S E C T. CLII.

Quamvis in extremis partibus calor aliquis adsit; minor tamen est, quàm in mediis & majoribus vasis, quorum comparatione habitâ illæ frigidæ dicuntur. Quamobrem cùm sanguis fervidus (te sic opinante) in magnis vasis quiescat; nulla ratio est, cur idem in minoribus refrigescens, tanto impetu (etiam submotis valvulis) feratur.

Lepidè verò ludis, cùm *Harvæum* tuas partes agere existimas; qui id apertè negat, quod tu pro concessio accipis. Periculum quidem ruptionis venarum impendêret, si è magnis vasis in minora sanguis celeriter transflueret: talique sanguinis refluxui propterea obstant valvulæ. Sanguis igitur, more solito, non fluit è magnis venis in minores; sed ab his in illas fertur, indèque in amplam cavam. Manifestissima hæc sunt; tantum abest, ut sibi invicem adversentur.

Fertur

Fertur sanguis ex arteriis in minores venas, ex his porrò in majores; idque non *tractione* aliquâ, sed cordis *impulsu*; eodémque modo, quo dictum est. Ne tamen à concussu, pressurâ, aliâve de causa, sanguis retrorsum adigatur, extructæ sunt valvulæ, quæ id impedian. Quid in hac re inconcinnum?

Ad objectionem à temet ipso propositam multa quidem respondes; nihil tamen, quod veritati sit consonum. Et ne omnia recenseam, utpote nihil ad rem præsentem facientia; unde, quæso, tibi innotuit, in *nutritione intestinorum totum hepar exhaustiri, idémque à suffectio chylo repleri denuo*? Vidistin' unquam hepar hoc pacto vacuum, aut repletum? *Tractiones* illas tuas jam non traham in dubium: id quæro solùm, cur *valvulæ* ullæ efformatæ sint; si utrique motui, nempe ascendenti chylo, & descendentì sanguini perinde faveant? *Tractiones* enim ejusmodi lentæ admodum sunt: neque sanguinis hîc, ob *pondus*, ruituri ullum periculum est. Miror sanè, te chylum potius diverso itinere, per venas lacteas nempe, non traduxisse. Sed nihil novi tibi placere video, quod ab aliis adinventum sit.

## S E C T. CLIV.

*Ubi de re constat, inquit alicubi Scaliger, non disputandum est rationibus contra experientiam, sed rei rationes potius quærendæ sunt.* Sanguis, versùs extrema venarum digitis protrusus, adeò à valvulis impeditur, ut nihil ejus transmeare possit; id ad oculum claret; nec potuit *Harvæus*, cautè rem tractans, specillum illàc transmittere. Tu verò diligentior, utrinque specillum immittens, fecisti, ut sibi invicem occurrerent. Quis miretur? Quoniam viam invenire non poteras, aperuisti. Ita nimirum reperti sunt, qui per medium cordis septum stylo transitum pararent.

Gassendus in  
Fluddum,  
c. 17.

## S E C T. CLV.

Hactenus primipilares tuos milites experti sumus. Nunquidnam supersunt levioris armaturæ alii? *Solus Sannio manet domi.* Videamus itaque quàm strenuè hic rem gerat. *Inter ligandum (ais) sanguis vi ad inferiora descendit.* Quisnam, obsecro? Num is, qui supra vincendum locum erat? At dictum factum, illico vena constringitur, idque arctè adeò, ut nihil permeare possit. Neque (opinor) sanguis

Tessent. Eunucho.

guis ille, quid futurum esset, præfagire poterat, ut affatim ad partes inferiores ru-  
eret; ne istæ (præcluso mox aditu) fame enecarentur. *Verùm, præ dolore, sanguis ex inferioribus partibus attrahitur.* Esto, in tui gratiam; indèque pars venæ supra valvulam distenditur. Quî fit igitur, ut, remoto subter valvulam sanguine, ille pa-  
riter, qui supra illam est, non descendat; imò verò ne vi quidem deprimi queat? Cùm tamen, te arbitro, inter valvularum januas specillo transitus pateat; & in dila-  
tato vase hæ valvulæ plurimùm hient; ut in sequenti *Contactu*, alibique sæpe à te dictum est. *At violenta hæc actio est*, in-  
quis. Quis nescit? An propterea, si tran-  
situs concederetur, sanguis non efflueret? Sanè multò magis, si quicquam intelligo. Debuítne tam misero patrocínio ridiculus jocus præmitti?

# S E C T. CLVI.

Venarum valvulæ (ut ex dictis liquet) nihil sanguinis transmittunt. Ideoque sta-  
tuendum est, trans cordis quoque valvulas nihil in illud ex aorta affluere. Mirórque, tibi *Seni* oculos tam perspicaces obtigisse, quibus medium inter illas foramen conspi-  
ceres.

Sanguinis circuitus incommodum, quod fingis, nequaquam affert. Neque multiplices valvulæ frustra extractæ sunt; quoniam aliæ aliis auxiliatum veniunt.

S E C T. CLVII.

Animo *Lacon* videris, ita nihil *trepidas*. Vellem etiam verbis fuisses: ita enim paucioribus res hæc tota transacta esset. Nunc autem eadem semita nobis sæpe terenda est, quia te sequimur.

Quàm parùm *Harvæum* hætenus falsi argueris, ex dictis luculenter constat. Quæris jam, *quomodo sanguis sursum feratur? Utrum à corde tractus; an suâ sponte gravis sanguis ascendat?* Quorsum autem hæc ambages, cùm *Harvæus* eum à subsequente arterioso sanguine protrudi, toties dixerit? Agit enim de sanguinis motu in vivente animali. Tu autem ad vacui auxilium confugisti, atque hinc sanguini ascensum largitus es. Verùm dic sodes; sanguine superno trans valvulam acto, digitoque etiamnum inferiorem cœrcente, daturne vacuum? Non, opinor, dixeris. Si enim detur; quidni sanguis, ut id monstri evitet, trans valvulas sibi iter parat? præsertim, cùm (ex tua sententia) cunctis sese etiam ordinatè habentibus, sic facere soleat.



soleat. Sin non datur (utì certè non potest, quia vena tunc subsidit) quisnam, ablato digito, ejus metus? *Non potest autem* (ais) *sanguis per valvulas descendere, quia rimula earum in nimia distensione occluditur.* Quîdum obsecro, cùm in aortæ diastole, valvulæ ejus plurimùm hiscant, (ut nobis persuadere conatus es) atque illæ his prorsus similes sint? Neque magis ligatura impedimento est, quo minùs sanguis ultra valvulas delabatur: nam, etiam amotâ illâ, sanguis tamen ibidem restitat. Adeò, ut si millies sanguinem venosum altero digito retinueris, alteroque eum trans valvulas adegeris; toties sanguis in majores venas abeat; nunquam verò relabatur ad locum, unde exprimebatur. Neque propterea *experimentum hoc ad rem nihil facit, quia violentus motus est*: ut tu, parum subtiliter, voluisti.

### S E C T. CLVIII.

Subtilissimi Viri rationes (quibus neuti-quam respondendo eras) cùm nihili æstimes, profectò *parum sanus es.*

---

C A P U T. XIV.

*Conclusio demonstrationis de Sanguinis Circuitu.*

S E C T. CLIX.

**P**Arifani conclusio sequitur partem deteriore.

---

C A P U T. XV.

*Sanguinis 'circuitus rationibus verisimilibus confirmatur.*

S E C T. CLX.

**E**X semine primùm fabricantur Cerebrum, & Cor : atque hoc ipsum ne quidem in embryo ociatur, ut dictum est. Cæterum, quòd alios omnes tecum unà sentire jubes, edictum omnino *Prætorium* est.

S E C T.

## S E C T. CLXI.

Sanguis, uti diximus, è corde expellitur, ut novo è cava advenienti locum cedat ; tum etiam, ut serum (quod pauxillum ei inest) in renes, ac per sudores eliminet : simul etiam (& quidem præcipuè) ut *caloris*, qui cuncta vivificat, ad omnes partes vehiculum sit. Quippe spiritus alios, præter *calorem* jam dictum, in animali non agnoscimus.

## S E C T. CLXII.

Magno conatu nihil agis. Sanguis arteriosus licet è corde plusculum caleat, superatur tamen iste calor à prævalido frigore externo : adeò, ut sanguis ille torpeat, motuique ineptus sit. Non omnis tamen circuitio tollitur, licet in ea parte compescatur aliquantulum, vel intermitatur. Non magis certè, quàm in ligatâ aut amputatâ parte aliquâ, ubi sanguinis *περὶ εὐρὴν* per proxima vasa perficitur. Nihil autem roboris habet, quod addis, *partes corporis nostri ab affuso arterioso sanguine non calere, quia in magno gelu rigent : cùm tamen ab aqua tepidâ extrinsecus affusâ (quæ spiritibus illis minùs calida*  
B b 4
est)

est) præserventur, ne algeant. Quippe hoc pacto aer frigidus (effectûs illius causa) à corpore arcetur. Neque etiam asserit *Harvæus*, eodẽ permanente frigore, spiritus gelatum quasi sanguinem relocilare posse. Quomodo enim; persistente causâ, tollatur effectus? Sed hoc ait; præcluso maximam partem frigore externo (etiam absque adventu caloris extranei) spiritus sive calorem à corde ad extimas partes delatum, motum sanguinis redintegrare, partésque illas propriis muneribus exequendis idoneas reddere. Quod tam brevi fieri posse negat, nisi sanguis frigidus à novo alio fervente incalcesceret. Spiritus enim illi (quicquid tu dixeris) feruntur unâ cum sanguine, perinde ac calor cum aqua fervelacta. Frigus autem, quod in timore, aut febris accessione contingit (quia spiritus parcius, quàm aliàs fieri solet, è corde prodeunt; non autem, quia ad cor fiunt retrogradi; ut tu opinaris) amotâ causâ internâ, quæ illud induxit, brevi dispellitur; quia ambiens extraneum non impedit. Quandiu enim hoc affuerit, internus calor (utpote imbecillior) superatur. Ideoque *Harvæo* egregiè imponis; quasi is velit, durante insigni frigore externo, circuitum illum sanguinis restitui posse.

Porro

Porro ais: *Partium extremitates, ex. gr. digitorum cacumina minùs algerent, imò ex sanguinis circuitu magis calerent; quòd ab arteriarum siue & extremitate calidissimus sanguis in venas recipiatur, & ibidem effundatur.* Valida scilicet ratio! Quasi verò calor non æquè ex arteriis, atque è venis, circumquaque in auras dissipetur: atque ubi illæ majores, focòque suo propinquiores sunt, ibidem quoque majus caloris in vicina loca effluvium non contingat? Aut quasi arteriosus sanguis solummodo in extremis partibus, & non similiter in spatiis intermediis, venas ingrediatur? Quis sanè miretur, multas magnasque arterias, cordi vicinas, crassòque cutis, carnis, suarúmque etiam tunicarum tegmine circumvallatas, plus caloris in corporis mediotullium, magnósque artus effundere; quàm paucas, exiles, tenues, frigori que proximas in digitorum cacumina?

Affectuum, quos memoras, causam nos spirituum subsistentiæ (siue sanguinis in corde moræ) non autem eorundem re-gressui, tribuimus. Et licèt in illis nonnulli spiritus prodeant, sitque aliquis sanguinis circuitus; minor tamen est, quàm ut solitis vitæ muniis obeundis sufficiat.

Insul-

Infalsum est, credere, venas (ante natum cor) sanguinem attrahere; siquidem illæ omnes cordi originem suam debent.

S E C T. CLXIII.

Non existimamus, *Cor sanguinem producere*, (licet ipsi verisimiliter ruborem impertiat) *aut alimentum partibus deferre*. Vigorem quidem corpori hinc affluere credimus, & vitam commodiorem. Et quamvis, aliis quoque partibus malè sese habentibus, sanitas pessundetur, morsque ipsa tandem adveniat: hæc ipsa tamen mala à cordis invaletudine magnam partem ortum ducunt. Quæ cum tuæ quoque sententiæ nihil adversentur; miror, quid in iis reprehendendum videris. Verùm *Parissanus æger* quibus belli ardore insanus, affingere aliquid maluit, quàm Adversarium ullibi intactum relinquere; ut demum in Epilogo, *omnia à se eversa & explosa*, gloriaretur.

S E C T. CLXIV.

Cor sanguinem neutiquam *meliores* reddit; sed potiùs, spiritibus jam inde fabricatis, *deteriorem* paulo in arterias propellit: ut sæpe dictum est. Hi tamen  
*Spiritus,*

*spiritus*, qui eundem comitantur, nutriti-  
onis, vitæque auxiliatores sunt : siquidem  
absque illis cuncta languent, nec munus  
suum, ut oportet, ullum viscus ritè o-  
bit.

Non arbitror, semen ex *sanguine* con-  
fici ; imò ne *mediate* quidem. Potiùs  
existimo, id è *succo nutritio* (accedente  
tamen cordis virtute) originem ducere.

### S E C T. CLXV.

Ad partium quidem *nutricatum* nullus  
manifestus motus requiritur : sed *succus*  
*alibilis* eo modo ad illas fertur, quo aqua  
in plantas, aut spongiam solet. Ad ea-  
rum tamen *vitam commodiorem*, circula-  
tione *Harvæanâ* opus est : sanguisque ad  
cor eo modo fertur, quo jampridem dixi-  
mus.

---

### CAPUT.

## CAPUT. XVI.

*Sanguinis circuitio ex consequentibus  
probatur.*

## S E C T. CLXVI.

**A**Rgutè *Harvæus*, à subita interdum humorum infectorum translatione, circuitus sanguinis necessitatem evincit. Enimverò, si sanguis (ut tu quidem arbitraris) stagnando quiesceret; non posset contagium aliquod ad remotiores partes prorepere, sine intermediarum omnium infectu. Nam quòd *venenum spiritibus communicari*, ais; libens fateor, me nequaquam intelligere. Illi enim cum sint *ignei*; quo pacto, obsecro, contagium induent? Sint tamen (ut vis) sanguis in corde solum *attenuatus & calefactus*: cum hic (te ita censente) à corde ad extimas corporis partes momento propellatur; quomodo is venenum, digito, puta, impressum, ad cor, aut caput regeret? Concedisne spirituosì sanguinis circumlationem? Aut quomodo spiritus illi contagium,



gium, in cute admissum, ad interiora deducant, sine sanguinis intermediarii inquinamento? Quòd autem inde deducis, omnem sanguinem, ( concessâ semel *circulatione* ) illico infectum iri : id à veritate longè remotum est. Malefica quippe qualitas unâ cum sanguine, cui primùm impressa erat, ceu vehiculo, circumfertur ; nec statim virus suum in vicina loca exeat ; sed, pro varia contagii naturâ, tempore opus est, priusquam in actum producat, pravique moris indolem exhibeat. Addo etiam, loca quædam diversa venenis esse peculiariora. Ita quædam *pulmones* solos inficiunt : rabies canina *jugulum* petit ; (*hydrophobia* enim, ut rectè censuit *Aromatarius*, est *anginæ malignæ* species.) Cantharides dicuntur *vesicam* præcipuè afficere : & in aliis multis similiter usu venit. Non quidem, quòd venena suâ sponte, relicto sanguine, peculiariora loca adeant ; sed quia alibi maleficium suum commodè expedire nequeunt. Licèt enim materia contagiosa per majora vasa circumducatur, còrque ipsum permeet (quemadmodum & pulmonum abscessus, teste *Galeno*, aliisque) eadem tamen haud magno opere lædit ; donec tandem (circuitus enim non est uniusmodi) in arctiora & idonea loca impacta, virus diu celatum exerat.

erat. Indéque evenit, ut ( inter alia contagia ) lues venerea aliquando plures partes invadat ; nonnunquam autem, ( præ contagii inopiâ ) unam solùm infestet.

Quod de abscessibus ais, *fore, ut semper sanguinem fundant, si hic ad eosdem perpetuo circuitu ferretur* : id levi negotio diffilatur. Abscessus enim succo nutritio originem suam debent, nihilque illis rei est cum sanguine, qui aliam scenam agit. Fit quidem à sanguinis affluxu major dolor, atque intumescencia ; quia liber ejus circuitus à loci sordibus impeditur. Indéque fit, ut deterfis mundatisque ulceribus, titillatio quædam oboriat, quæ sanationis indicium est : nempe, quòd sanguis jam angustiora vasa penetret, eadéque mulceat, à quibus antea arcebatur. Neque illud silentio prætereundum videtur ; quòd in magnis, & præsertim internis apostematibus, febris obveniat ; quia pars purulentæ materiæ ( prærois nimirum à puris acrimoniâ vasculis ) cum recurrente sanguine, ad cor fertur ; eadéque cesset, ubi apostema ruptum fuerit ; & pus, extra vasa eliminatum, exciderit. Quæ omnia circulationis hujus certitudinem plurimùm confirmant : tantum abest, ut eandem ullo modo labefactare videantur.

S E C T.

## S E C T. CLXVII.

*Harvæus*, dum statuit, *sanguinem* (in-  
*guente febrium rigore*) in *pulmonibus* &  
*vicinis locis restitare*; non propterea ne-  
 gat, paululum sanguinis cor ingredi. Mi-  
 nus quidem solito allabitur ( uti etiam in  
 apoplexia, syncope, affectione hystericâ,  
 catalepsi, &c. evenit ) adeoque pulsus exi-  
 lis, rarûsque est. Sanguis etiam nonnihil  
 in arteriis sufflaminatur; unde haud plus  
 inde egreditur, quàm è venis ad cor re-  
 currit. Quamobrem non est, quòd de  
 fame arteriarum tantopere sis sollicitus.  
 De ipsa febrium intermittentium natura  
 ( quarum profectò subtilissima est disqui-  
 sitio ) non est hujus loci plura dicere.

## S E C T. CLXVIII.

Modò diximus, spiritus haudquaquam  
 esse *qualitatum bajulos*. Neque jam video,  
 cur arteriis potiùs, quàm venis, attrahendi  
 munus attribueris: præsertim, cùm hæ  
 multò plures in cute reperiantur. At,  
 inquis, *Galenus idem voluit, qui plurimas* L. 16. de uj.  
part. 6. 13.  
*arterias sese in cutem aperire asseruit.*  
 Idem tamen alibi negat, ullas in cute re-  
 periri. Et ut sint maximè, an non illæ  
 sangui-

sanguinem spirituosum è corde ad extimas partes efferunt ? Quomodo iste igitur topicorum virtutem ad cor reducet ? Aut quibus fibris arteriæ illam attrahunt ? Quicquid enim rem aliquam attrahit, suo privato duntaxat commodo id facere creditur ; ( ut sæpe nobis à te dictum est ) superfluum autem ad vicinas partes amandat. Num quicquam ejusmodi hîc etiam comminisci queas ? præsertim, cum res ad motæ Naturæ ipsi infestæ sint. Credisne piper ( à *Galeno* memoratum ) ab esurientibus arteriis, in cibum, attractum fuisse ? Nimirum jam causam percipio, cur sapientulæ mulieres ( in abortiendi periculo, quod gravidis ob diuturnam à cibo abstinentiam, imminet ) lauta obsonia, in unguenti formam redacta, exteriori abdomini inungant. Nec causa est, cur Medici se amplius torqueant, utrum in suffocante angina, corpus clysterum ope nutrirî possit ; cum victus viâ multò commodiore institui queat.

Dominicus  
Sala de ali-  
ment. c. 28.

### S E C T. CLXIX.

Aliquando bonus dormitat *Homerus*. Ignoscendum itaque ingeniosissimo *Harvaeo*, si lactearum usum eo tempore minùs perspexerit.

S E C T.

## S E C T. CLXX.

Rationi omnino absonum videtur, venas mēfaraicas sanguinem è cava attrahere, ut eodem nutriantur. Quidni enim chylo (quem, tuo arbitratu, deferunt) perinde alantur, ac ventriculi & intestinorum interior tunica; quemadmodum gratis imaginariis? Aut in quem usum chylum attrahunt (tuo enim more loquor) nisi ut inde victum quærant? Quod de temporibus diversis (quibus chylus ascendat, & sanguis descendat) fabularis; omnino πλασματικόν ἐστίν, fictitium, ac nugatorium est. Quid enim, si stata cibandi tempora mutantur; & vixdum absumpto, priore chylo, novus statim è ventriculo suppeditetur: an non hoc pacto descensus ille sanguinis prohibebitur? Quid etiam, si unà cum cibo medicamentum leniter purgans sumatur, ut sæpe fit; nōne humores & chylus per eadem vasa contrario motu ferentur? Ego autem te libero istoc metu: humores enim cathartico educti, non prodeunt è venis, aut arteriis; sed è vasis chyliiferis expelluntur; ut in *Antidiatriba* nostra uberius dictum est.

Famis veram causam ne attigisti quidem. Ego (ut rem jam paucis expediam)

C c

censeo,

cenſeo, eam contingere à moleſta vaſculo-  
rum inanitorum vellicatione, quâ ventri-  
culum ad novæ annonæ ſuppeditationem  
ſolicitant. Fit quidem interdum, ut ven-  
triculus ab acido humore ſtimuletur, &  
*bulimia* oboriatur: ipſa tamen naturalis  
ciborum concoctio, eſt eorundem *in pi-  
tuitoſum liquamen contabefcentia* ſolùm, &  
marcor.

### S E C T. CLXXI.

Miſturam diverſorum humorum, eſſe  
alteratorum unionem, *Ariſtoteſi* non con-  
ceſſerim. Et licet parum chyli copioſo  
ſanguini commiſtum, faciem ſuam exuat,  
ut ampliùs non appareat: ejuſmodi tamen  
permanet, donec in corde (ut arbitror)  
rubedinem acquiſiverit. Nam utcunque  
guttulæ aliquot vini albi, integro rubri  
vini dolio commixtæ, colorem huius non  
immutent: tamen, ſi, recedente paulatim  
vino rubro, album (etſi minimâ quanti-  
tate) continuè ſufficiatur; cauſa nulla eſt,  
quin tandem omne vinum album evadat.  
Verùm (quod cauſæ tuæ jugulum petit) ſi  
in venas, jam ſanguine orbatas, tanta chyli  
copia aſcenderet; non poſſet non in venis  
meſaraicis clarè eo tempore conſpici.

### S E C T.

## S E C T. CLXXII.

*Membra officialia (ais) instante morte, primum ab opere cessant. Nollem equidem hanc illis inustam maculam. Dedecoratum quippe habetur, si centuriones, bellicque moderatores prius fugiant, quam reliquus exercitus. Saltem honori suo prospicerent, etiamsi aliorum obliti essent. Credebam etiam cor ultimò mori. Quomodo autem id reliquis supervixerit, si li-en (ejus promus; quem passim summis laudibus effers, ut pueri Junonis avem) jam animam efflaverit? Atenim istuc de ventriculo potissimum & hepate verum est. Et de illo quidem; quia suapte naturâ parum calidus est, & crudum cibum ac potum assumit, (idque scilicet in omni morbo) quos vehementer repugnantes solus superare, & concoquere nequit. Quid fit igitur? Sic hepar ultimo attracto chylo abundat: & tanquam hausto toxico, ventriculo commoritur. Quænam autem partes lautam hanc hæreditatem cernunt? Venæ mesaraicæ, sibi primum consulentes, prout egent, & quandiu indigent, ab hepate trahunt: atque id etiam ideò, quia membra ab illis alliciunt, & rapiunt: quare mortuo jam animali, sanguis, in eo dissecto, tractus ab*

C c 2

hepate

*hepate (non ab arteriis) deorsum, non autem chylus, reperitur.* At verò, *Parifane*, si canem vivum ac sanum aliquantisper post pastum evisceres, ramumque mesentericum, vel etiam Portam, in exortu ejus ligaveris; videbis tamen, nec vacuas venas esse, neque chylum album in iisdem contineri; sed sanguine rubicundo plenas deprehendes.

Quòd negas, sanguinem arteriosum per venas mesentericas ad hepar recurrere, quia hoc ab illo nimium æstualet; inanis metus est. Calor enim quantopere fit hepatis necessarius, nemo nescit. Unde autem eundem mutuetur, si non à corde, per arteriarum ductus? Paucae autem admodum & exiles arteriae ad hepar perveniunt; adeoque congruum est, ut calorem etiam per Portae ramos nanciscatur: qui tantum abest ut hepar inflammet, ut potius metus sit, ne muneri suo non sufficiat; quoniam toto itinere calor trans vasorum tunicas avolavit. Neque etiam arteriosus sanguis ulterius in hepate concoquitur, sed chylo (ut ajunt) comitatus, sive potius bile suâ partim liberatus, utiliter ad cor relabitur. Hepar enim non est *officina* sanguinis, sed *colatorium*. Unde etiam ad reliquas tuas objectiones facilis apparet responsio.



## S E C T. CLXXIII.

Errandi causa fuit, quod existimes, vasa umbilicalia ex utero prognasci ; & arterias, non minùs quàm venas, sanguinem ad fœtum deferre : cùm tamen arteriæ eundem deducant à fœtu in placentam uterinam ; sintque istæ arteriarum fœtûs propagines : fiunt enim post natum cor, ejusdémque vasa. Similiter, vena umbilicalis non inferitur in hepar ( quasi inde venarum sit origo : oriuntur enim ex corde, ut dictum est ) sed in extimam ejus crepidinem, ubi transitus conceditur in *canalem venosum*.

Quod ais, *Cor in fœtu ociari, idque secundum omnium sententiam*, à veritate est alienum ; quemadmodum suprà innotuit. Nec magis verum est, *matris* sanguinem per iliacas ad aortam infantis ascendere ; ut jam diximus. Ac propterea belli intestini, matrem fœtûmque inter exoriundi, nullum est periculum.

Cor in fœtu etiamfi à pulmonibus, utpote quiescentibus, sanguinis nihil, parùmve admodum excipiat ; excipit tamen ab auriculis, per vias peculiariter ei usui destinatas ; idque eo modo, quem dudum diximus.

Audiamus porrò *subtiliora tua ratiocinia*. Quæris, *an maternus sanguis non ingrediatur embryonis delineatam fabricam, priusquam cor, id est, parenchyma generatur?* Respondeo, te pessimè res diversas confundere. Parenchyma enim non magis de cordis essentia est; quàm hepatis substantia, de vasorum, quæ in eo reperiuntur. Ipsa vesicula, statim ab initio pulsans, verè cor est, omniumque primum existit; antequam (non dico, sanguis, qui certè nullus unquam à matre ad fœtum decurrit;) sed chylosus succus ab utero ad fœtum affluerit. Parenchyma autem non nisi postea adnascitur, (idque summæ utilitatis gratiâ; cum, ut cor affectionibus, nocumentisque minùs foret obnoxium; tum etiam, ne spiritus calorque vitalis omnino evanescerent; nullo cohibiti solidamento, sed raritate mollitiæque efflati) diu postquam alimentum à matre cœpit accurrere. Illud autem tuæ causæ parum patrocinator, *Harvæus*que tibi libenter concesserit.

Quod sequitur, haud magis subtile est. Nam, ut de generatione parenchymatis cordis nihil dicam, (quæ propterea statim non est vera, quia ita fert communis sententia: *neque enim, quod consensu omnium receptum est, & tempore fidem auctoritatēque meruit, id continuò verum est;* inquit alicubi

• Cæl. Rhodig.  
antiq. lect. l. 4.  
c. 16.

dicubi *Josephus Scaliger*) figmentum tuum, de protrusione sanguinis in fœtum ab arteriarum *matris* systole, nec rationi, neque experientiæ convenit : ut jam pridem diximus. Reliquis, quæ longo verborum ambitu attexuisti, idem dictum puta.

S E C T. CLXXIV.

Quæ memoras, haud melius à te probata sunt, quàm reliqua tua dogmata hoc libello confirmasti. Nego enim, pullum luteo nutriri : sanguinem quippe ex eo confici arbitror, unde spiritus in corde excudantur. Nutritur autem albumine, ut *Aristoteles* verè censuit. Nego etiam, prima pulli lineamenta sive stamina ex semine ali : hoc enim haud aliud est, quàm ἀρχὴ κινήσεως, ἢ ἀρξὴς, principium motivum & activum, non autem materia constitutiva, sive nutritionis. Verùm, quia hæc ad circulationis hujus negotium parum attinent, plura non addam.

## C A P U T. XVII.

*Confirmatur sanguinis motus & circuitus, ex apparentibus in Corde ; & ex iis, quæ in dissectione Anatomica patent.*

Q Uemadmodum jam pridem diximus, *Semen animalium esse spiritum salinum* ab ipsis deciduum, qui totius naturam atque genium referat ; quique in conceptu primæ vitæ flamina moderetur : ita scitu perquam jucundum est (etsi intellectu arduum) generationes æquivocas dictas, & nominatim insecta omnia, sæpe vitam atque originem suam aliunde mutuari : idque vel è culmis vietis & arescentibus, ut culices ; vel è succis fermentatis, ut muscellæ, è vino generoso, & musteo, quod proinde Moscatellinum dicitur : muscæ item plurimæ diversorum generum ex variis animalium partibus nascuntur : locustæ, aliæque animalcula è rore ; aliæque aliter. Unus tamen horum generationis modus est ; spiritus nimirum acidus, subtilis,

tilis, volatilis, qui à leni calore vivificatur ; & , pro subjecti naturâ (quæ in sale ejus potissimum nidulatur) varia quoque animantia producit. Hic spiritus coit, sive unum in locum colligitur, in iis, quæ corde prædita sunt : in vermibus autem, crucis, aliisque, per totum corpus dispergitur ; & (ut cum *Harvæo* loquar) *tota cor sunt*. His si debitus calor adsit, spiritus iste in actum prolicitur ; sin autem defuerit ; quiescit, torpet, mortemque præ se fert. Insomnia, scio, hæc videbuntur iis, qui nihil ultra crepidam philosophantur : si quis autem naturam rerum altius penetraverit ; verisimilia fortassis comperiet, nihilque in se monstri alere.

### S E C T. CLXXV.

Pulsus in exsanguibus æstate percipitur, quia eorum calor eodem tempore vegetior est. Vere autem & autumnò (quoniam noctes frigidiores sunt, diésque minùs incalescunt) virtus illa labefactatur adeò, ut pulsus commodè percipere nequeas. Vivunt tamen, corque ipsum suas functiones obit, licèt obscurius : fabricat, inquam, & transmittit spiritus ; quamvis pauciores, quàm ut manifesto pulsui excitando sufficiant. Hyeme quidem alimento nullo,  
aut

aut perparcè fruuntur ; quia, oçiante corde, & sopitis spiritibus, nulla, aut exigua admodum fit eventilatio, materiæve dissipatio. Idque ita fieri posse, haud creditu arduum ; cùm majoribus etiam animalibus eodem tempore idem còtingat.

# S E C T. CLXXVI.

Non est dubium, quin animalia ista ( etiam hyeme ) naturam suam servant. Quia tamen eorum corda lentè adeò pulsant, ut quiescere videantur ; non immeritò plantæ vitam agere dicuntur. Quòd quædam animalia hyeme absque cibo degant ; non inde evenit, quia *superfluum, incoctum, crudum, & pituitosum alimentum convasarunt*, ( non posset enim sine præsentis periculo id fieri : nec fœminæ, si modò vera narrant, quæ multos annos ἀσπιτοί fuere, eam cibi copiam congesterunt ) sed quia cor in illis eo tempore foriatur, parùmque admodum nihilve sanguinis in spiritus absument ; quorum potissimùm causâ victu opus est.

## S E C T. CLXXVII.

In perfectioribus animalibus cor requiritur robustum, ad usus prædictos; non autem ad *spirituum protrusionem*. Hi enim ignei cum sint, quæ data porta, avolant, atque unà cum sanguine deferuntur. §. 173.

## S E C T. CLXXVIII.

Quorsum luculentus focus à Natura in corde extructus est, si ad hujus refrigerium inspirationis operâ opus est? Pepercisset potius sumptibus, & labori damnum allaturo. At verò minore impendio vita ipsa (quæ caloris est progenies) minime vitalis extitisset. Respirationis autem necessitas alii usui inservit.

## S E C T. CLXXIX.

Ludósne hîc facis, *Parifane*, an simpliciter ignorantiam tuam profiteris, dum de contrariis istis motibus ineptè cornicaris? Sanguis quidem, in fœtu, diversis itineribus progreditur; nempe, & per foramen ovale, è cava in arteriam venosam, scilicet è vena in venam; & per canalem arte-

arteriosum, è vena arteriosa in aortam; nimirum ex una arteria in aliam.

Prior tamen ille sanguis, per foramen ovale delatus, non scandit sursum in pulmones (quemadmodum somnias) id enim fieri, per valvulam, orificio ejus supernè appositam, deorsumque spectantem, non licet: sed pars sanguinis ( ut pridem diximus ) dextrum ventriculum ingressi, rectà sursum per venam arteriosam in pulmones (recalificandi eosdem gratiâ ) deferitur. Ad eundem planè modum, quo sanguis, per venam umbilicalem retrogradus, maximam partem per *canalem venosum* in cavam trajicitur: dum interea aliquantulum ejus per hepatis parenchyma, refovendi ejus causâ, prorepat. Atque ex jam dictis, futilitas eorum, quæ sequuntur, satis constat.

#### S E C T. CLXXX.

Vesica illa, auriculæ analogos dicta; & vena dilatata, quæ pulsum facit, revera cor est.

#### S E C T. CLXXXI.

Motus motum juvat. Ideoque *Harvæus* argutè censuit, auricularum motum, cordis



cordis sanguinem propellendi potentiam promovere.

S E C T. CLXXXII.

*Astrologi Mercurium* nocere, aut prodesse arbitrantur ; prout is infesto, vel auspicato sideri conjungitur. Ita *vacuum* interdum tuis rebus auxiliatur, aliquando obest. Hic quidem à te abigitur ; subito post tamen ad comitia *attractionis* à te advocatur.

Nequeo intelligere, quamam facultate, quibúsve fibris ossa & cartilagines sanguinem alliciant. Tu paucis negotium expedis, & *suapte naturâ attrahere*, ais. Quis rei tam dilucidæ non acquiescat ?

S E C T. CLXXXIII.

Nervum esse præcipuam musculi partem, & auctorem motûs, haud facile (opinor) demonstraveris. Eleganter ad hanc rem *Harvæus* : Cum, inquit, motum & sensum, ante natum cerebrum, adesse liquido cernamus ; manifestum est, non omnem motum neque sensum à cerebro proficisci : siquidem constat, à prima statim sanguinis guttula in ovo, antequam quicquam corporis efformatur, sensum motumque clarè elucescere.

De gen. anim.  
exerc. 36. pag.  
191.

*cere. Prima quoque corporis fabrica (quàm mucilaginosam diximus) priusquam membra ulla discernuntur, cùmque cerebrum nil aliud quàm aqua limpida est; si modò leviter pungatur, instar vermis aut erucæ sese obscurè movet, contrahit, & contorquet; ut adeò sentire ipsam evidenter pateat. Motus etiam, & actiones, quas Medici appellant naturales, quòd illæ nobis, etiam nolentibus, contingant; neque eas moderari, accelerare, retardare, aut inhibere, pro arbitrio nostro, possimus, (ideòque à cerebro non dependeant) illæ tamen prorsus citra sensum non fiunt, sed eundem subesse indicant; utpote à quo excitentur, irritentur, atque immutentur.*

Verùm hæc res alterius disquisitionis est. Ad rem præsentem quod attinet, dicimus; motum corporis solidi, quo trahitur; & fluidi, quo pellitur; toto cælo differre: nec rationem hujus ad illius normam exigendam esse.

#### S E C T. CLXXXIV.

*Aristoteles de nervis & cerebro benè sensit, modò rectè intelligatur.*

#### S E C T.

*S E C T.* CLXXXV, CLXXXVI.

Auriculæ majores, in cordis exordio, quàm pro proportionem, videntur; quia cor necdum parenchymate suo vestitum est, quod ipsi postea adnascitur. Neque auriculæ idem omnino cum corde officium est, licèt ambo in utero moveantur.

*S E C T.* CLXXXVII.

Vesicula palpitans revera cor est, cujus expansio latior, punctum illud sanguineum, five auricula est; in qua sanguis, ob pelluciditatem (in corde tamen ipso priùs tinctus) facillè conspicitur. Hic sanguis per venam, umbilicalem accedit, quæ (in primis illis rudimentis) cordi propinqua est; post illa verò, adauctis jam omnibus, longius recedit.

Quid autem illud, quod ais, Cor à magnis vasis nasci? mihi quippe ratum est, cor omnium vasorum sanguineorum fundamen esse, & primùm existere.

*S E C T.* CLXXXVIII.

Sanguis quidem ab initio vasa percurrit, & cor translabitur: fœtus tamen necdum

dum movetur; quia nec muscoli, neque ossa ( quibus illi alligentur ) etiamnum satis robusta sunt.

Lis, quam crebrò intendis, solutu facilis est. Nec tibi gravis esse debuit, qui, sanguinem *splenicum* ad cor ascendere, atque arteriosum inde descendere, eadem viâ, eodémque tempore, statuisti. At nos utrunque modum ( utpote commentitium, & absonum ) rejecimus; denuóque affirmamus, sanguinem, è corde foëtûs in aortam elapsum, per arterias umbilicales ad matris uterum deferri: eundémque, transitu factò per placentam, ( quam simul calore suo fovet ) novis succi alibilis vectigalibus auctum, ad foëtum denuo per venas appellere: nullúmque unquam sanguinem ei à matre per arterias accedere. Quid hac in re arduum; ut dicendum fuerit, *solvat, qui potest? Sphingem*, soluto ab *Oedipo* ænigmate, *asino* avectam ferunt. Nemo sanè est vel è plebe philosophus, qui, his rectè cognitis, arduam tuam litem dirimere nequeat.

### S E C T. CLXXXIX.

Eodem jure, fibras etiam cordis, atque usum illi à te assignatum sustulisses.

### S E C T.

## S E C T. CXC.

Cuculi more, cantilenam eandem canis: nihil enim hîc dictum, quod non sit à te dictum prius.

## S E C T. CXCI.

Appropinquante exitio, damnosiores solent esse animalium infestorum morsus. Cavetis itaque, *Harvæe* celeberrime, ac te respice; tua enim nunc maximè res agitur; & quantum video, *niger agnus cædendus* est; adeò atrocem tempestatem pro foribus video. *Parifanus* enim,

*Torva Mimalloneis implevit cornua bombis.* Persius Sat. I.  
vers. 99.

Recipe autem animum denuò, brutum enim fulmen est, periculum omne evanuit, mōnsque perterrificèpus ridiculum murem peperit. Veritas autem τὴ δαίται κτύπε, Philostratus,  
l. 6. c. 5. pag.  
270. τὴ δαὶ τῷ βροντῶν, μάλλον δὲ τῷ ἐμβεβροντῶν; quid sonitu indiget? imò quid tonitru, vel potius attonito affectu? Audi, quæso, temet ipsum *Thrasonicè* fulgurantem: *Maximâ me hîc talia admiratione* Parifanus, pag.  
505. col. 2. *afficiunt; quòd nimiram audiam, videam,* *sentiam, experiar, intelligam, doctissimum*

D d

Virum,

*Virum, Londinensium magno Collegio assentiente, & subscribente, nihil credere Galeno, & præstantissimorum Medicorum Scholæ, nec communiori doctissimorum Anatomicorum sententiæ, nec communibus experimentis, nec suæ autopsiæ, nec sibi ipsi quidem. Quamobrem istæc, inquires? Non aliâ de causa, crediderim, nisi ut Aristotelis causam agat, & se Peripateticum profiteatur, relicta in omnibus veritate. Imò sanè id te visit plurimum, quod Aristotelis patrocinium susceperit, quem tu alibi (ut vidi-mus) non semel turpiter conspuisti.*

Cap. I.

Martial. l. 10.

*Siccine autem, Parisane, audacter nimis facit, qui rem aliquam à te minùs intellectam asserit? Vellem, istuc tibi nimis crebro non contigisset. Ad rem præsentem quod attinet, ego ipsemet, qui non sum dignus Harvæo præstare matellam, audebo dicere, unum Aristotelem cordis fabricam multò rectiùs intellexisse, quàm Galenum, reliquàmque veterem Medicorum Scholam: quinetiam (licet Parisanus hîc alibique illi contumeliosissimè oppedit) plus subtilis ingenii, veræque philosophiæ ostendisse; quàm Parisanus in omnibus suis nugis quisquiliisque demonstraverit. Mitto autem muliebre hanc pugnam; & argumenta tua aggredior, visurus quantum præ Philosophorum coryphæo sapias.*

*Quomo-*

*Quomodo quæsumus, &c.* Cor propriè dictum (de parenchymatè enim ejus nunc non agitur) ex *Aristotelis & Peripateticorum* sententiâ, non fit ex sanguine, sed è semine: atquè (in ovo) sanguis primùm in illo conspicitur, quia vitellus (qui sanguinis est rudimentum) ibidem saturatiore purpurâ tingitur. Idque diu, antequam vestigium ullum hepatis appareat. Ego autem (ut pridem dixi) nullam partem ex sanguine constitui arbitror; verùm omnes è succo tenui (albumini, in ovo, consimili) efformari, augerique censeo.

*Est in notioribus, &c.* In æquivocis generationibus, ut diximus, spiritus ille semineus, qui cor constituit, aliunde suppetitur. Idque intellectu, opinor, facilius est; quàm vitello analogon quid somnare, unde *hepar* primùm, & postea *cor* fabricentur. Cedo enim, cur vitellus ovi subventanèi (quæ certè res est hepati conficiendo aptior, quàm tu ullam alibi facilè inveneris) à debito incubatu *hepar* non gignit; unde sanguis temperatior prodeat; qui postea, adaucto calore, cor producat? Quin dic potiùs, unde calor iste, nondum existente corde? cùm hoc sit principium caloris nativi. In quem finem etiam *hepar* tam maturè requiritur? Fœ-

tus enim, tuo arbitratu, necdum sanguinem ex chylo efformat; sed eum accipit ex vitello, in ovo; in viviparis autem, ab utero. Quænam etiam pars hepatis hoc sanguificandi munere donatur; non jam dico, in utero, sed etiam post natum scœtum? Parenchyma enim hepatis si (præ alio aliorum viscerum) privilegio aliquo ornetur; doce nos, quodnam illud sit: occulta profectò qualitas non suffecerit. Aut dic sodes, cur venæ hîc loci plus quàm alibi polleant? Quid multa? Ad oculum liquet, sanguinem in ovo (atque etiam in foetu) reperiri ante natum hepar. Quæ res sola *Plinium, Coiterum, Aquapendentem, Aldrovandum*, aliósque in *Aristotelis* sententiam pertraxit. Miror autem plurimum, te *lien*is hîc nusquam meminisse. Debebat enim, te censore, cor ex hujus sanguine non minùs ab initio progigni, quàm postea nutriri.

*Amplius, si priùs quàm cor, &c.* Sæpe diximus, cor è semine constitui, non autem è sanguine: nempe, quoad rationem formalem, quâ palpitat, & vitæ munia exequitur. Vesicula autem, quâ tegitur semineum illud principium, semet postmodum in arterias & venas explicat.

*Præterea, si cor ad agendum, &c.* Instrumenta illa, post constitutum cor, & ab



ab isto nascuntur. *Non nutritur membrum animalis* ( inquit *Avicenna* ) *in quo non est* 2,3. 11.1. c.2. *sustentatio vitæ cum calore naturali.* Cum ergo ita sit, ( addit ) *necesse est creetur membrum, à quo procedat calor naturalis, & spiritus vitalis, ante creationem nutrientis ipsum.*

*Ad hæc, si cor in sese mistas habet partes, &c.* Pessimè cordis parenchyma cum semineo ejus principio confundis. Quod etiam erroris hujus tui præcipuum fundamentum est.

*Quin supra ex Harvæi observationibus, &c.* Vesicula illa saliens, est cor : quod primis statim diebus, & toto gestationis, sive incubatûs tempore palpitat. Quamobrem præcipuum argumentum à te omissum est. Neque melius hæc à tè in *Exercitationibus tuis de Subtilit.* explicata sunt.

*Interim, priusquàm sanguine nutriantur, sanguinisque rubor aliquis inibi appareat, duæ minimæ bullæ sub obtutum cadunt, neutra tamen rubore prædita; & tunc simul cordis motus, nec non aortæ visitur; sed adeò rarus, & parvus; ut dubius tibi videaris, an moveantur, nec-ne: idque eò magis, quoniam aliquid album ( quod cor ) absque parenchymate & sanguine, extare, vivere, moveri, & agere, ex visu*

*tunc, & postea, fateri cogaris, &c.*

Quis non miretur, *Parisanum*, subtilitatum hyperaspisten, in eadem pericope tam dissidentanea loqui; atque proprio ore causam suam ire perditum? Enimvero quæ hîc attexuit, tam clarè nobiscum faciunt; ut meliùs vix potuerit, etiamsi defendendo *Aristoteli* operam suam locâset. Si enim cor pulsat ante natum parenchyma; cur illud in fœtu quiescere, toties ab eo dictum est? Si alba illa vesicula, ante exortum sanguinem, *cor* est; quorsum *hepar* prærequiritur, ut ex hujus calidiore sanguine cor nascatur? Reliqua similiter, iisdem rationibus rejecta, negotium nobis ulterius non faceissent. *Actæonem* comedant sui canes. Quod postremo loco ait, *Pisces venâ cavâ destitui, quia dextro cordis ventriculo carent*: falsa simul res, & ratio est. Iis enim vena cava immediatè ad sinistrum ventriculum pertingit; quia dexter ventriculus, ob pulmonum absentiam, deficit.

## S E C T. CXCI.

Rationes tuæ nec *sensatæ* sunt, ut loqueris; neque probè à te *subductæ*. *Harvæus* de jam nato animali loquitur; tu verò ad *embryonem* confugisti. In illo certè,

certè, secundùm tua dogmata, rationem nullam hujus discriminis reperire potuisti : neque etiam in embryone verisimilem aliquam commemoras. Quippe *vena arterialis* non accipit spiritus à matre, ut falsò arbitraris : & *arteria venosa*, utcunque unâ sui parte ( mediante nempe foramine ovali ) venæ cavæ adnectatur ; alterâ tamen cordi adnascitur : debuitque adeò hujus ( si non *propriâ* ) facultate pulsare. Hæc autem nostram sententiam dilucidè confirmant : pulsum scilicet fieri à sanguinis impulsu : qui cùm nullus è corde immediatè in arteriam venosam feratur ; sed sanguis leniter ac paulatim, sine ictu aliquo, in hanc per foramen ovale ; & ( in edito jam foetu ) trans pulmones permeet ; fit, ut nullus pulsus in eadem perſentiat. Contrà verò, quia, à sinistri ventriculi contractione, sanguis in dextro quoque ventriculo comprimitur, fursùmque in venam arteriosam raptim impellitur ; hæc ab ingrediente subsultim sanguine distenditur, atque aortæ pulsum æmulatur.

## S E C T. CXCIII.

L. 6. de usu.  
part. c. 12.

Quæstio, cur vena arteriosa tunicâ duplici, arteria verò venosa simplici tantùm induatur; variè multorum animos exercuit. *Asclepiadis* sententia, dicente *Galenô*, hæc erat: *Arteriæ pulmonis* (arteriam venosam intelligit) *sunt tenues*; quia, cum duplicem habeant motum, alterum ex se, quo pulsant; alterum ex accidenti, quo cum pulmonibus motis moventur; extenuantur ob continuos labores. *Venæ* contrà (venam arteriosam vult) *sunt crassæ*; quia, ob duplicem hunc motum, quasi exercitium duplex, crassescunt in illa alimenti copiâ. Sententia sanè ridicula, & indigna quæ refutetur.

L. 3. de Tho-  
race, c. 11.

*Riolanus*, atque etiam alii censent, hæc vasa talem substantiam in prima fœtus formatione obtinuisse; quia vena producitur ab aorta, ut arteriæ munere fungatur in fœtu; arteria autem à cava propagatur, ut venæ officium præstet: eandemque substantiam postea servari. Quod ego, ob dictas pridem rationes, aliter se habere arbitror.

*Hofmannus* hac de re sic statuit: *Vena arteriosa* cum exportare deberet sanguinem: non posset autem id præstare sine pulsu; præcipuè, quia via acclivis est; debuit non mi-  
nùs

nus valida esse, quàm arteria magna. Eâdem autem ratione, vena cava quoque pulsaret, & consimili crassitudine donaretur. Respondet ibidem, *propterea venam arteriosam nactam esse crassam tunicam; quia sanguis jam in ea multò tenuior, quàm in vena cava erat.* Neque alibi rectius ait, *Venam arteriosam habere crassam tunicam,* Com. in Gal. de us. part. *quia talis membrana investit dextrum ventriculum, ne sanguis per septum permeet in sinistrum.* Quæ res ab oculis meis assensum impetrare nequit. Ideoque *Harvæo* potius *ἐπιψηφίζω*, eique calculum meum libenter adjicio: dixique jamdudum, arterias venis crassiores esse, & potissimum juxta cor; tum ob vim, impetumque, quem sustinent; tum præcipue, ne calor, quem unà cum sanguine è corde deferunt, facile emigret; remotioresque adeò corporis partes suo genio defraudentur. Eodémque nomine sinister cordis ventriculus circumquaque crassiore pariete, quàm dexter, obvallatur. In extimis autem partibus, arteriæ tenues sunt, venisque similes; quia jam magna pars caloris dissipata est; tum etiam, ut commodius illíc venulis inoculentur. Quanam autem ratione tu velis, spiritum tuum, sive sanguinem in corde duntaxat agitatam, *tenues arteriarum tunicas transmeare*, equidem non in-

intelligo. Nec magis, cur prudens Natura arterias in extremis artubus tenuiores fecerit, *ut aerem facilius attrahant.* Cum sanguis ibi sæpe plus fatis frigeat ; & æstuans in corporis meditullio eodem magis indigeat ; si modò refrigerio aliquo opus esset.

S E C T. CXCIV.

Nil hîc, nisi pridiana & frigida fercula, quæ olim *Romæ* in peculiari foro vendebantur.

S E C T. CXCV.

Nec *se ipsum refutat* Harvæus, neque *abs re loquitur.* Tu verò utrumque facis. Negas enim, ullum esse sanguinis è corde in arterias impulsum : & tamen olim statuisti, sanguinem spirituosum è corde in extrema corporis momento expelli. Et à veritate remotum est, *aortam nullos spiritus per tunicas suas transmittere ; sed ramos illius duntaxat eos omnes effundere.* Spiritus enim, utpote igneæ naturæ, quoquoversum transvolant : etiamsi per densum corpus tam expeditè, tantæque copiâ transmeare nequeant.

Quid

Quid illud autem est, quòd negas, venam arterialem posse impetum sanguinis è dextro ventriculo irruentis sustinere ; quia *venæ* tunicâ induitur ? Num expecto id tibi excidit ; an dormitationi tuæ adscribendum ?

### S E C T. CXCVI.

Pulmonum quidem inexplebilem vorandi aviditatem alibi admirati sumus : jam verò mirum videtur, iisdem vitâ functis tantum sanguinis superesse. Quidni enim satò proximi lautum epulum sibi instruunt ; & ( quod de *corde* antehac fabulabaris ) sanguinem omnem affluentem abliguriunt ? Aut in quem finem illi plus attrahant, quàm ipsis ex usu sit ? præsertim, cùm à sanguinis copiâ suffocationis periculum impendeat. Unde igitur affluit ? *Dum* ( ais ) *cor ultimò moritur, sanguis eò loci confluit.* Quónam, obsecro ? An non ad cor, ejusdémque ventriculum sinistrum ? Quippe istîc ( ex tua quoque sententia ) vitæ sacrarium est. At quid istoc ad *pulmones* ? Putásne, sinistrum ventriculum ( cui aere eo tempore magnoperè opus est ) sanguinis gurgitem, per venosam arteriam ( renitentibus licèt valvulis ) transferre ; ut aerem advenientem, sibi que necessarium

cessarium arceat; mortuique jam pulmones diluvio insuper pereant? *Atqui arteriæ unâ cum corde ultimò supersunt.* Nulâmne illæ igitur sui curam habent, ut sanguinem spirituosum ac vitalem, pro more, ad se alliciant; sed jejuniæ, ac mœrore confectæ, dapes suas omnes pulmonibus transierunt? qui tamen, jam fato functi, ne gratias quidem, ob acceptum beneficium, agere queunt.

### S E C T. CXCVII.

Ain' verò, *spirituosum & purpureum sanguinem, ex febre, æstu, &c. absumptum esse?* Credebam, intensum calorem, frequentemque cordis agitationem, ex tua quidem sententia, gignendo sanguini spirituofo optimè conducere. Quænam autem tam immodica febris in homine subitò strangulato (siquidem etiam in illo sanguis ater conspicitur) ut sanguinem omnem spirituosum absumere possit, & *sæx solum sanguinis supersit?* Num etiam venosus sanguis (qui aliàs non nigricat) in auras avolvit? Nimirum sanguinis venosi & rubicundi pars crassior & melior (non autem sæx ejus) ad imum subsidens, ob aeris absentiam, nigrescit: qui, si pelvis margini incidisset, purpureo colore splenderet.



ret. Isque propterea, ab hujus rei ignaris, pro humore melancholico accipitur. Ea tamen pars prius dilutiori sanguini commixta, rubedinem præ se ferebat: eandemque iterum recuperat, si modò aeri aliquantisper exponatur.

### S E C T. CXCVIII.

Ais, *Vena arterialis ne constitutione quidem, siue tunicarum numero, arteriam refert.* Satin' tu sanus, qui oculis tam manifesta inficiaris? Imò verò etiam officio arteria est. Pulsat enim in edito fœtu, non minùs quàm in utero. Arteria autem venosa non est pulsatilis, licèt sanguinem è pulmonibus in cor deducat. Ejusque rei causas antehac diximus.

### S E C T. CXCIX.

Meritò quærit *Harvæus*, cur vena arteriosa tanto orificio in cor pateat; si non multò plus sanguinis deferat, quàm alendis pulmonibus sit necessarium? Enimverò (ut observârunt \* *Columbus* & † *Arantius*, omnibûsque facillè manifestum est) vena arteriosa vas est tantæ amplitudinis, ut duos digitos in adulto corpore facillè admittat. Et dici possit extracta esse in unius pulmonis

\* L. 7.

† *Observ.* 33.

nis gratiam ? Certè, pro vasis magnitudine, tantundem illi impenderetur sanguinis, quantum in eum finem, toti corpori sufficeret. *Parisanus* autem scitè respondet : *Venam arterialem amplum habere orificium, quia pulsanti & evomenti magno cordis ventriculo conjuncta est.* Quasi verò vasa non possint angustis osculis in amplam cavitatem aperiri, modò parum inde eliciendum sit ! Aliàs enim, quidni pariter venæ gastricæ & mesaraicæ (imò etiam lacteæ) amplis oribus in ventriculum, atque intestina hiant ?

#### S E C T. CC.

Penſitatis hæcenus æquâ lance inter ſerationibus, concludere demum licèt, *Circulationem ſanguinis* eſſe veriffimam : atque *Harvæo* immortales gratias à poſteris deberi, quòd ipſis rem adeò ſubtilem ac proficuam communicaverit ; eandemque firmiſſimis undiquaque conquiſitis rationibus ratam fecerit ; humaniter verò ignoſcendum, ſi alicubi (ut in re tenebri-coſa fieri ſolet,) ceſpitaverit : & quòd ipſemet *κατὰ δεινερὸν πλὴν* facile emendaturus fuerit. *Parifano* autem gratias quoque debitas eſſe, vel eo nomine ; quòd commentò ab *Ulmo* mutuato, reliquiſque elumbi-

clumbibus argumentis, veritatem eandem  
uberius confirmaverit.

*Ad Parisani Caput ultimum.*

Duxit nos *Harvæus* per ampla & amœ-  
na Naturæ spatia, nullis antea vestigiis  
trita; variorumque animalium diversas  
fabricas admirabili ingenio atque industriâ  
detexit. Eo fine omnia, ut summi exem-  
plaris (hominis, inquam) œconomiam ex-  
plicans, principis ejusdem partis, *cordis*  
nempe, fabricam expenderet. Ob quod in-  
signe beneficium,

——manibus date lilia plenis,  
*Purpureos spargam flores——*

Virg. *Æn.* 6.  
v. 83.

*Parisanus* autem unius *Lienis* paludi im-  
mersus, atque accuratiorem minorum ani-  
malium pervestigationem aspernatus (qua-  
si nihil lucis aliunde affulgere possit) uni  
homini operam suam omnem impendit.  
Quàm dextrè verò & feliciter eandem  
hactenus collocaverit, jam antea vidimus.  
Reliquum est ut *Nodis* ejus (quos *difficilli-  
mos* existimat) totidem cuneos paremus.  
Et quamvis in aliis quoque Physiologiæ  
negotiis vix quicquam invenias, quod in  
omni rationum conflictu consistere queat :  
arbitror

arbitror tamen, cuncta ab eo allata solutu adeò facilia esse, ut ense nullo opus habeant ; sed, prædictis ritè perpenſis, maximam partem sua sponte dissiliant.

*Nodi primi & secundi Solutio.*

Expectabam *novos* scrupulos. Tu verò imbelles solum & jampridem fugatos milites denuo in aciem produxisti. Venarum, reliquarumque partium attractio, quam memoras, imaginaria est : quicquid enim sanguinis affluit, id cordis operâ perficitur, quod in *fœtu* etiam ab initio præstò est. Reliquas tuas copias antehac protrivimus.

SOLUTIO. 3.

Quid opus erat rem eandem ad nauseam repetere ? Diximus pridem, *cor* in embryone moveri, etiamsi *pulmones* quiescant : idque fieri, quia ( necdum natâ flammulâ ) aere tunc nihil opus est. Negavimus etiam, sanguinem in arterias fœtûs à matre expelli. Et licèt, triconibus iis nugatoriis similis ( quos *Ariston* facètè cancris vescentibus similes esse ajebat, qui, ob minutum alimentum, circa non paucas

cas crustas occuparentur ) easdem minutias sæpe oggeras : quoniam tamen illis antehac responsum dedimus , ab ulteriore eorundem refutatione superfedebimus.

## S O L U T. 4.

Ubinam hic *nodus* lateat, equidem non intelligo. Ipsemet enim arbitraris, partes omnes à *solo venoso sanguine nutriri*. Quid autem mera sanguinis circulatio rei huic obesse possit, profectò non percipio. Verùm hac quoque de re fusiùs antehac à nobis dictum est, nec libet actum agere. Id nunc solùm addam, prægnantes mulieres sæpe lurido colore conspici ; quia sanguis, qui antea, statis temporibus, unà cum pravis humoribus egerebatur foras, jam in corpore restitat. Idemque iis quoque non rarò usu venit, quæ *tributum lunare* haud debite persolvunt. Næ tu verò insignis Dispensator es, qui partibus dignioribus dapalem, præ cæteris, cœnam exornas !

## S O L U T. 5.

*Nodus* iste verè stramineus est. Pro diverso enim à corde ( caloris fonte ) recessu,

cessu, vasorúmque copiâ & magnitudine, partes omnes majorem minorémve caliditatis gradum obtinent. Calor namque perpetuò exhalat.

## S O L U T. 6.

Arbitræ profectò *Parísano* dignæ ! Ego verò argumento tuo tribus verbis respondeo. Sanguis extra vasa ( veluti in utero, aliisque cavitatibus ) restagnat. Qui prægnationis tempore in utero est, ab arteriis fœtus progreditur ; nec omnis per embryonem circumit : quapropter restitans, pravisque humoribus commixtus, haud mirum si interdum malè oleat.

## S O L U T. 7.

*Durus nodus*, scilicet ! *Aliquando pars sanguinis effunditur, ergo reliquus non circumfluit.* Imò verò, licèt extimarum arteriarum ora interdum hient ; medio tamen itinere, pèrque alias semitas fit sanguinis circuitio.

## S O L U T. 8.

Solæ arteriæ sanguinem ad partes spermaticas deferunt, quem venæ denuo reducunt.

ducunt. Dum interea *Lymphæductus* serosum illum humorem, quem glandosi testes à semine segregarunt, aliorum derivant. Sume *conspicilla*, & vide sis an non hæc ita se habeant.

## S O L U T. 9.

Cantillas veterem fabellam: videaturque sanè ea res intercalare.

## S O L U T. 10.

*Harvæus* suprà docuit, ligatâ venâ, protrusôque sursum ultra valvulam sanguine, partem illam plurimum intumescere; quòd sanguis is deorsum trans valvulam retrogradi nequeat. Quod ibi ligatura, hîc (in varicibus) facit sanguinis alicujus crassioris obstructio. Tales varicum *nodî* nullum sanguinis circumlationi *nodum* injiciunt, quæ tunc alibi locorum celebratur.

## S O L U T. 11.

Iste *nodus* jam solutus est; nec placet *bis iterare, sat hîc sunt longæ fabulæ*. Non Plaut. Pseud. A. 1. sc. 3. putamus certè, sanguinem per varicosam venam circumvolvi: redit tunc per vicina

E e 2

vasa:

vafa : eadèmq̃ue hîc ratio eft, quæ in venis ligatis.

## S O L U T. 12.

Ut tibi jam largiar, *Chylum per venas mefaraicas ascendere* ; ( quod tamen aliter fe habere, certum arbitror ) dicemus, totas illas venas fimul *chylo* non impleri ; fed partem hujus aliquam in eas ingreffam, unà cum præterlabente ex arteriis fanguine, furfum ferri : idque toties fieri ; donec, quicquid illîc chyli aderat, abfumptum fuerit. *Chylum* autem fimul cum fanguine cor adire, adeò non absurdum cenfeo, ut maximè neceffarium exiftimem ; idque, ob caufas antehac à nobis commemoratas.

## S O L U T. 13.

Non fiunt, ne *Harvæi* quidem arbitratu, tam numeroſi circuitus ; noſtro autem, multò pauciores. Utcunque, obſtructione alicunde factâ, haud mirum, ſi tumores oboriantur : quos ego tamen, maximam partem, ſucco nutritio potiùs, quàm ſanguini, ortum ſuum debere arbitror.

S O L U T.



## S O L U T. 14.

Diximus, sanguinem frigescentem nigrescere. Haud mirum igitur, si loca cerebri frigida pertransiens, nigricans appareat; è calido autem pectore exiliens, purpureo colore splendeat. Veruntamen nec cerebri (opinor) sanguis magnopere nigricat, nisi in grumos densetur.

## S O L U T. 15.

Exhausto frequenter copiosèque sanguine; qui superest, ultimòve educitur, coruscus magis & splendidior apparet; quia à victu forbili (ut sæpe fit) aut potu liberaliore, factus est dilutior.

## S O L U T. 16.

Admissâ sanguinis circuitione, humores noxii faciliùs multò evacuantur, quàm si idem in vasis omnibus quiesceret. Non est enim verisimile, medicamentum ad remotas venas penetrare, ut humorem peccantem seligat, eundemque captivum secum ad intestina, ceu carcerem, deducat: sed rationi magis consonum videtur, medicamen tempore idoneo (à plenitu-

dine, molestiâ, aliisque indiciis cognoscendo) exhibitum, pravos humores, crebro circuitu ad loca evacuationi opportuna delatos, educere. Quanquam (ut dicam, quod sentio) existimo, humores pharmaco eliminatos, ad succi alibilis potius, quam sanguinis, familiam attinere: idque potissimum ob rationes in *Antididactica* meâ memoratas.

## S O L U T. 17.

Non crediderim, unam arteriosi sanguinis unciam venæsectione eductam plus incommodi afferre, quàm venosi selibram. Quòd autem plus nocimenti ex arteriosi sanguinis subitanâ educatione oboritur; id fit, quia cor ipsum proximè exhauritur, nec damnum inde illatum subito refarcitur, vicinæque partes calore magis destituuntur.

## S O L U T. 18.

*Nodus* hic te potius constringit. Non est enim dubium, quin vinum, liberaliter haustum, citius multò, unà cum circumfusa sanguine, ad cor pertingat, quàm si hic quieverit. Dicitur vinum *penetrator optimus*: partium quippe tenuitate angusta

gusta viarum pervadit ; & cùm impendiò sit inflammabile, haud mirum, si flammulam cordis adaugeat, pulsúmque acceleret. Potissima autem ejus vis in cerebrum se exerit : quippe illud ( præsertim generosius, ac musteum ) liberalius haustum, caput conturbat, & vertiginem inducit. Idem enim temulentis accidit, quod in gyrum crebro actis contingere solet. Videntur enim iis omnia circumagi ; nec pedes solitum officium faciunt. Quia nempe cerebrum à liquoris nondum defæcati, adeoque irrequieti, partibus percellitur : idémque in motum eundem verticosum ( cessante etiam priore circumgyratione ) aliquandiu paulum impellitur. Mihi quidem, post triduanam in mari jactationem ( irascente mari vento ) rotatio quædam cerebri remansit, postquam jam diei integri spatio in littus exscendissem. Quod *Helmontius* perperam usu venire credidit à *sordibus stomachi*, quibus *Idea illa rotans sit impressa*. Pari certè verisimilitudine dixisset, ebrios titubare, quia *Bacchus* è *Jovis* femore prognatus dicitur.

*Jus Duum videri  
ratum.*

## S O L U T. 19.

*Nodus* extricatu facilis. Sanguis enim parcior non minùs expeditè (immo verò celerius & crebrius) circumambulat, quàm si major illius adesset copia. Et vino permistus promptius in corde accenditur.

## S O L U T. 20.

Pulsus ab itinere & exercitio fit crebrior; quemadmodum & vigilantibus, præ iis, qui dormiunt. Motus enim circuitionem sanguinis adjuvat; sicut & iracundia, quæ sanguinem *inflammât*. Etenim verum est, *pro arbitrio nostro pulsum immutari posse*.

## S O L U T. 21.

Venæ magnopere tibi curæ sunt ne fame pereant, & pulmones tandem earum damnum luant. Hic autem nihil causæ est, cur de illis magnopere sis sollicitus. In timore enim, hysterico affectu, & similibus, dum cor tardè pulsât, sanguis propemodum quiescit; & quemadmodum parum ex arteriis elabitur, sic  
nihilò

nihilo amplius in illas è venis ingreditur :  
& perinde ( quod ad hanc rem attinet )  
omnia se habent, ac si solitâ pernecitate  
sanguis circumvolitaret.

## S O L U T. 22.

Sanguis, arterias capillares egressus, à  
consimilibus venarum ramulis excipitur :  
ut, nisi is ( ob crassitiem, pituitave in-  
farctum ) in itinere subsistat ; aut, ob  
acrimoniam alicunde advenientem, minu-  
ta vascula ( per quæ fertur ) erosa sint, at-  
que hoc pacto sanguinis circinatio inter-  
cipiatur ; *ecchymoses* nullæ fieri possint.  
Factâ autem vasorum laceratione, mayo-  
réque jam sanguinis copiâ in habitum  
corporis effusâ ; haud mirum equidem,  
si venularum oscula, omni sanguini con-  
festim regerendo, non sufficiant. Illa e-  
nim ita comparata sunt, ut excipiendo  
duntaxat sanguini ex arteriarum ramus-  
culis effluo, paria sint.

## S O L U T. 23.

Hoc ipsum circuituionis hujus veritatem  
luculenter confirmat. Cùm enim gan-  
græna plerumque ( si non semper ) à san-  
guinis restagnatione oriatur : indicium fa-  
cit,

cit, hunc aliàs perpetim vasa sua percurrere. Et frivolum est, quod quæris, utrum sanguis (viis solitis impeditis) per *arterias* remeet? Varii enim illius recursus cùm sint; is, unum aliquem locum pertransire nequiens, per alium revertitur.

## S O L U T. 24.

*Nodum* in scirpo quæris. Venæ tunicis tenuioribus vestiuntur, quia calor (cujus retinendi causâ arteriæ crassioribus indutæ sunt) maximam jam partem avolvit.

## S O L U T. 25.

Plures venæ, quàm arteriæ, in animali reperiuntur, ob causas olim dictas. Azygos autem non accipit sanguinem à *venis*, sed à subclaviæ *arteriæ* propaginibus.

## S O L U T. 26.

Venæ, *seminales* dictæ, arteriis *spermaticis* respondent: definitque earum altera (& interdum utraque) in emulgentem venam; ut simul cum hujus sanguine curriculum suum absolvat.

S O L U T.

## S O L U T. 27.

Pro concessio accipis, de quo nos potissimum litigamus. Venæ spermaticæ, inquam, sanguinem ad cor regerunt; non autem eundem deferunt è cava ad testes.

## S O L U T. 28.

Arbitror, præcipuum respirationis munus hæcenus incognitum esse. Quæ enim de cordis refrigerio narras, nugæ sunt: potuissetque Natura, minorem in corde focum extruendo, labori, impensisque suis parcere. Neque minùs à ratione alienum est, *lieni* hepatis munus transcribere.

## S O L U T. 29.

Cùm sanguis venosus (ex tua sententia) solus nutriat: tali aortæ pulsatione atque agitatione nihil opus est, ut eadem sanguis è *splene* attractus nutriendo cordi paratior sit. Imò verò ipsemet arteriæ motus sanguinem deorsum potius, quàm sursum pelleret. Ut verbo dicam, nihil hîc præter hesternæ cœnæ reliquias.

S O L U T.

S O L U T. 30.

Parturis, quod jam-dudum peperisti.

S O L U T. 31.

*Nodo* huic jampridem *cuneum* paravimus. Diximus enim, ob cordis arteriæque continuitatem, id aliter fieri non posse.

S O L U T. 32.

Gratis dicta omnia.

S O L U T. 33.

Cor, in ovo, statim ab incubationis initio movetur, & nutricatum præcipuè ab albumine (quemadmodum fœtus fucum alibilem ab utero) nanciscitur: idque (etiamnum quiescentibus pulmonibus) per vasa ei usui destinata. Sæpe hoc dicendum est, quia tu eandem cantilenam usque occinis.

S O L U T.



## S O L U T. 34.

Verba solùm das, dum nos rationes exposcimus. Docendum erat, quonam privilegio, quibúsvē virtutibus, sanguis venosus, præ arterioso, ad nutritum polleat. Ut autem te eā nunc molestiā liberem; dixi antehac, neutrum sanguinem ei muneri destinari. Quod addis, Cor ab explosa sanguinis parte refrigeratum iri, nec vitales spiritus procreaturum, frigidum planè commentum est.

## S O L U T. 35.

Existimas itaque, partes corporis varias, pro officii dignitate, usúsq̃ue amplitudine, *πλετίνδην* aut *ἀρετίνδην* epulari. Es tu scilicet elegans *τραπεζοποιὸς* mensarum structor: mirúmque adeò sit, ni in plantis etiam, pro radice, trunco, cortice, foliis, floribus, fructibúsq̃ue diversa fercula inveneris.

## S O L U T. 36.

Leve hoc argumentum tantopere tibi placuit, ut idem iteratò repetere volueris. Nobis autem responsio antehac allata suffecerit:

§. 113. fecerit : ubi tamen hoc addidero, *Imaginationem tuam, dum volantem asinum fingit, non debuisse Vulcani oblivisci.*

## S O L U T. 37.

Sanguis arteriosus argumento tuo similis est. Quamvis enim parvi ponderis, exiguaeque substantiae sit (comparatione habitâ ad venosum sanguinem ; qui, ob caloris aliquatenus abitum, compactior fit) magnopere tamen intumescit.

## S O L U T. 38.

Arteriosus sanguis venas ingreditur, quia præcedaneum in his ad cor propellit. Est hic *nodus* vindice indignus.

## S O L U T. 39.

Ad restim, funiculum ; ut est in adagio.

## S O L U T. 40.

Nihil difficultatis in hoc *nodo* reperio. Nôrunt omnes, sanguinem (apertâ arteriâ) quamvis haud adeò expeditè, fisti tamen posse. Coalito autem vulnere, inductâque

ductaque cicatrice ; quid, quæso, sanguinis circuitum impediat ? Putasne hîc simile quid effractis ossibus contingere ; atque enatum callum interiorem arteriæ ductum obstruere ? Sin autem vis, sanguinem per arteriam penitus discissam amplius permeare non posse ; est id certè verissimum : arteria enim cùm in corpore sit tensa, dissectæ illius orificia, utrinque recedentia, confidunt, & ab incumbentibus partibus occluduntur. Idémque hîc evenit, quod in amputato membro fieri solet, ubi tum sanguinis circumrotatio in partibus vicinis peragitur.

## S O L U T. 41.

Obortâ alicubi ingenti inflammatione, sanguis ibi haud statim progreditur ; verùm aliquantisper stagnans, sensim ad vicina loca pertransit. Phlegmone autem non continuè crescit ; quia, vel arte abducto è proximis locis sanguine ; vel eodem suâ sponte (negato illac transitu) ad propinqua loca divertente ; affluxio ad partem jam malè multatam paulatim cessat : pauloque post impactus sanguis discutitur ; amotoque repagulo, circuitio pristina redintegratur.

## S O L U T.

## S O L U T. 42.

Si tanta fuerit sanguinis extravasatio, ut brevè à venis absorberi nequeat ; stagnum interea exoritur ; vicinique sanguinis περιέλιξις proximis in locis perficitur.

## S O L U T. 43.

Sanguinem, è secta pollicis vena profluentem, *deorsum fluere*, non est perpetuæ veritatis ; sed, pro diverso pollicis situ, modò sursum, modò deorsum, & interdum ad latus effluit. Atque etiamsi aliter esset ; non magis id tamen sententiam tuam confirmaret ; quàm descensus similiter sanguinis è secta colli aut frontis-venâ, eandem jugularet. Quod autem addis, sanguinem non egredi, si superior venæ pars digito prematur ; id ego inter ficta reputandum scio ; nisi pressura illa tam valida sit, ut fluorem quoque sanguinis per subditam arteriam coerceat. Miror autem, te hîc doloris illius oblitum esse, unde sæpe antea velociorem sanguinis effluxum, nihil obstante ligaturâ, deduxisti.

S O L U T.

## S O L U T. 44.

*Harvæus* jure optimo frequentem sanguinis circuitiōnem statuit. Ille enim, horulæ spatio, quater minimū millies ad cor it, reditque. *Ophthalmia* contingit à sanguine in oculi tunica convasato ac restitante: prodéstque ei amoliendæ sectio *venæ cephalicæ* in brachio (modò larga satīs sanguinis copia educta fuerit) quoniam, depletis majoribus vasis, sanguis ad minora parcius decurrit. Rectius tamen fecerit, qui propriorem aliquam venam secuerit: si tamen eo auxilio opus sit.

## S O L U T. 45.

In *pleuritide* (quæ dicitur membranæ costas succingentis inflammatio, est tamen plerunque ipsius pulmonis affectus) idem contingit, quod suprà universè in phlegmone fieri diximus. Impedito nempe (à pituitoso infarctu, vasorum *polypo* dicto) per vasa pleuræ aut pulmonis, sanguinis libero transcursu, irruentēque jugiter sanguine novo è vena cava in ea loca; non fit illuc libera illius circumvectio. Dempto autem è locis vicinis sanguine,

F f                      ablata-

ablatâque plenitudine, incuneatus sanguis  
faciliùs propellitur. Aut si istoc, ob mor-  
bi pertinaciam, minùs prosperè successe-  
rit; fit ab admixtâ chylosâ materiâ ab-  
fcessus, purulentâque congeries in pulmo-  
nes, aut thoracem expellitur. Demum  
(modò æger supervixerit) consolidato ul-  
cere, circuitus, ut olim, renovatur.

## S O L U T. 46.

De angina idem dicimus.

## S O L U T. 47.

*Nodus* enodis. Sanguis è cava ad ca-  
put non ruit, sed fluxio illa fit per *arte-  
rias* cephalicas. Quomodo autem ad in-  
flammatum ac dolentem locum potentiùs  
affluat, jam pridem dictum est.

*Digres. 2.*

## S O L U T. 48.

Multò expeditiùs, meliùsque istæ om-  
nia fiunt circumeunte sanguine, quàm si  
idem perpetim restitaret: ut rem accu-  
ratè perpendentibus manifestum est.

S O L U T.

## S O L U T. 49.

Pugnas magis militum *numero*, quàm *virtute*; atque, ut plures videantur, quò imbellem hostem deterreas, eosdem sæpe in aciem producis. Diximus jam aliquoties, sanguinem haud adeò rapidè fluere, atque existimas: venas excipiendo sanguini arterioso pares esse, atque etiam amplius; motusque hujus veram rationem expeditivimus.

## S O L U T. 50.

Sanguis, in matrice inflammata, aut restagnat, aut testudineo gradu movetur; tantum abest, ut *sursum evolet*. Sectâ autem saphenâ, inflammationis incrementum tollitur; quia sanguis, qui per hypogastricas arterias ad uterum properabat, factâ jam revulsione, ad crurales arterias ubertim delabitur. Idémque fere præstant *balnea, frictions, & cucurbitulæ* inferioribus partibus admotæ. Sanguinem verò per arterias, non autem per venas, revelli; vel hinc constat, quia *Hippocrates, mulieri sanguinem vomenti, erumpentibus menstruis, solutionem fieri*, testatur. Hoc enim cum per revulsionem fieri debeat,

beat, nec venarum beneficio id contingere possit (quòd venæ ventriculi à *Porta*, uteri verò à *Cava* oriantur) non alius hîc consensus quærendus est, præter eum, qui fit per arterias: *hypogastrica* enim arteria non procul à *cæliaca* remota est.

## S O L U T. 51.

Parte aliquâ à gangræna obsessâ, non fit ampliùs ibidem sanguinis circuitus: imò verò ex hujus interceptione, illa plerunque exoritur. Sanguis autem tunc proximis partibus allabitur. Quòd si aliquando, toto crure siderato, omnibûsque partibus exesis, nulli ramuli transfere-  
rendo sanguini supersint, sed ampla solum vasa ab invicem semota remanserint: in ejusmodi infortunio, fateor nullam illîc sanguinis circuitionem fieri; verùm idem contingere; quod in amputato crure usu venit.

## S O L U T. 52.

Miror, te hîc *anastomoses* desiderare, qui antehac, ubi ex re tua videbantur, nimis quàm multas reperisti. Ego autem, ut *anastomoses* istas rejicio; ita fidenter assero, arterias & venas propagines de se  
passim



passim emittere, per quas conjunctas circuitus continuatur; licet majoribus earum truncis (cum membro aliquo) præfectis, extima eorum inter se non communificent.

## S O L U T. 53.

Intellectu haud arduum est, pus in pulmonibus aut arteriâ venosâ collectum, unâ cum fluente sanguine, per sinistrum cordis ventriculum in aortam, indeque per arterias emulgentes in renes efferri. Quomodo autem istuc, quiescente & immoto sanguine, per ignotas vias contingat; nemo, opinor, mente faciliè assequatur.

## S O L U T. 54.

Quâ tu fronte ais, *Lienem, ex Harvæi sententiâ, nullius usûs esse?* An quia illi tantopere in delitiis non erat, ut eum *cordis hepar* constitueret; propterea omnem ejus utilitatem abjecit? Dixit profectò *Harvæus* (idque expressè) chylum crudiores in lienem deferri, ut ibidem aliquantulum præparatus, ad hepar exinde transferatur. Ego autem addo, Arterias numerosè ad lienem accedere; non qui-

dem, ut inde (quemadmodum fingis) sanguinem eum motu retrogrado ad cor reducant ; verùm ut sanguinis sui curriculo, tenuem chylum, ex minutis interioris lienis membranæ fibrulis plurimis in cavitatem ejus depluentem, ad hepar primùm, deinde in venam cavam deducant. Adeoque lienem parenchymate donatum esse ; quia chylosi sanguinis est promptuarium ; unde cordi ( mediante hepate ) subinde nova vectigalia persolvantur. Ideoque Hippocrates ἡπαρ ἀεμερόν, & Plato ἡπαρ καμαγέον, vocarunt. Si enim omne parenchyma absolutæ coctionis munus præ se fert, cur *renes* eodem donati sunt ? An ut *sanguinem fabricent* ; quemadmodum *Beverovicium* temere voluisse video ? Viæ autem à liene ad hepar, indèque ad cavam, manifestiores sunt, quàm ut *Mercurio* indigeant.

*Deusingius* profectò egregiè hallucinatus est, cùm ait ; *Fibrarum nervosarum usum in liene hunc esse existimo, ut laxo spongiosoque visceri robur addant, ne ab influente sanguine dissolvatur ; simulque ad parenchymatis constrictionem faciant, quâ sanguis per arterias illatus, ac in laxum lienis parenchyma infusus, in venam splenicam adigatur.* Quasi verò lieni *vinculis* opus sit, ne ab irruente affatim humore dirumpatur ;

6. Epid.

In Timæo.

De Calculo.

De Nutritii  
succo commen-  
to novo, pag.  
225.

tur; aut ad hunc porrò adigendum, ille *calcari* indigeat.

Addo præterea, circuitum sanguinis per hæc viscera, ut & venam Portæ, non tam frequentem esse; atque is est, qui per cavam instituitur.

S O L U T. 55.

Suum cuique pulchrum. Ordo, quem Naturæ affingis, è tuo cerebro, ceu *nova Minerva*, profiliit. Nos in eo nihil elegans aut decorum cernimus. Et licèt *Galenus* de liene sententiam (quam *monstruosam* vocas) non admittimus, tua tamen multò magis erronea videtur. Nam quòd lienis ab hepate distantiam objicis, infirma ratio est: magis enim illa viscera inter se conveniunt, quàm lien & hæmorrhoidales venæ, in quas ab illo terrenum, crassum, & melancholicum humorem exturbari censes. Deceptus (puto) eorum conjecturis, qui crassum, atrumque sanguinem, *melancholicum* statim humorem esse arbitrantur: cùm tamen omnis sanguis spissior, & à fero secretus (præsertim, si aliquandiu resederit) tali facie compareat. Ejusmodi sanguis, phlebotomiâ eductus, in ima pelvi subsidit; éstque suavis, vel insipidus, non autem acer & mordax, qualis

atra bilis perhibetur, quæ proculdubio à corrosivis salibus progignitur. Melancholicus verò humor, quo hypochondriaci laborant; est vitriolatus & acidus. Verùm si, (ut arbitraris) splen singulis coctionibus melancholicum humorem ad hæmorrhoidas amandat; quid iis evenit, quibus illæ venæ nunquam sponte aperiuntur? Tantùmne melancholiæ accumulatur absque damno? Aut quonam tandem sese recipit? Forsitan eorum sententiam amplecteris, qui *melancholiam* in ultima intestina deponi autumant, quia sæces illíc plerunque nigricant: quod tamen à diuturnâ earum ibidem morâ solùm contingit. Scilicet nigra illa macula, quæ in *anatis Indicæ* ovi extremo reperitur, quàmque *melancholiæ portiunculam cum pituita commixtam* alibi ridiculè dixisti, in venis earum hæmorrhoidalibus stabulatur; nostræque *anates*, quibus ea macula deest, hilariores sunt!

Meam sententiam si requiras; crediderim potius, lienis recrementa (si quæ sint) cum urina simul expurgari. Quod verò addis, libenter accipimus; *chylum* nempe, *æquè purum ac impurum, qualis à venis mesaraicis conficitur* (ut cum vulgo arbitraris) *sursum ferri, & undiquaque à partibus excipi.* At hîc labitur decantata  
roties

toties Naturæ providentia ; quâ partes singulas idoneum sibi nutrimentum è massa sanguinis attrahere credidisti.

Ad pomposum illud tuum commentum, jam sæpius memoratum, *de valvularum aortæ adversâ fabricâ, ne sanguis splenicus confertim in cor irruat*, nihil jam dicam amplius, quoniam id antehac factum est satis, superque. Libet solum sanguinis, è splene in sinistrum cordis ventriculum illabentis, quantitatem, quam tu oculatus computator nobis exhibes, paulò accuratiùs introspicere. *Per minimum medium foramen*, inquis, *binæ ternæve simul guttæ sanguinis singulâ quaque diastole cor ingrediuntur*. Quapropter, cum quater mille (non solum *mille*, ut tu vis) pulsus, etiam in sano homine, unius horulæ spatio contingant ; octo minimum guttarum millia eodem temporis intervallo cor ingredientur ; unôque die, circiter centum nonaginta duo guttarum millia : quantum sanè sanguinis vix in toto corpore reperias. Qui itaque dies complures febricitant, pulsûmque adeò crebriorem habent, & à cibo abstinent ; unde, obsecro, sanguinem fabricandis spiritibus necessarium mutuantur ? Credisne, *splenem* cum omnibus mesaraicis venis, sufficientem

cientem fomitem suppeditare posse? Fortassis autem, *vena cava*, per anastomoses (quas nullas unquam reperisti) auxiliatum venit. At quidnam interea de pulmonibus fit? Haud mirum equidem, si, in tanta annonæ caritate, famelici atque anhelosi, velut ultimam animam trahant. Quid aliis quoque partibus evenit, quæ spirituoso sanguine (qui jam solus superest) nutriri nequeunt? Temerè scilicet faciunt, qui in febribus ardentibus, magnam venosi sanguinis copiam phlebotomiâ adimunt, spirituûmque (qui corpori reficiendo præstò adesse poterant) materiam præripiunt. Nec minùs inconsultè prudens Natura agit; dum largâ sæpe hæmorrhagiâ vitæ thesaurum exhaurit: mirumque fuerit, si, aperto ejusmodi cadavere, quicquam sanguinis in venis reperiatur. Nihilominus hæc ità à sapientissima Natura instituta sunt, quia *Parisa*no sic visum fuit.

*Sed unde digressa est, &c.* Cor vitæ conservator est: spiritus fabricat, unde sensus, & motus, cæteræque actiones vigent. *Lienis* usum, tantopere à te comprobatum, denuo rejicimus: est enim *Idolum specûs* (ut cum *Verulamio* loquar) non autem *Naturæ* opus. De *testibus*, alibi

alibi diximus, eos potissimum spermati dephlegmando, exaltandoque inservire. Ideoque *Eunuchi* molles sunt & enerves? quia eorum *semen* copioso nimis sero dilutum, minusque coctum est; ac propterea *orgasmo* illo destituuntur, qui toti corpori masculam virtutem imprimat.

Quæ de cordis *refrigeratione*, contra *Aristotelis* mentem, inculcas; similiter commentitia sunt: neque enim respiratio eo modo peragitur, quo tu arbitraris. Denique, omnia hæc, prout libitum tibi fuit, efficta sunt; nec quicquam Naturæ vestigiis respondet. Credat propemodum aliquis, se contueri *ædes Euclionis, inaniis oppletas, atque araneis*: adeoque cuncta ad *pannuceas Baucides* releganda censeo. Ut mirum non sit, *Harvæum* similibus aliorum objectiunculis vellicatum, ab optimè fundatâ sententiâ nihil recessisse; plurimisque quinetiam, re accuratius perpensâ, in sententiam suam pertraxisse.

Plaut. Aulul.  
A. I. sc. 2.

SOLUTIO

S O L U T I O *Ultima.*

Libens fateor, cordis parenchyma non esse in omnibus ad vitam simpliciter necessarium; idémque, efformato partim cerebro, demum adnasci, facilè concesserim. Cor tamen ipsum, sive vesicula statim ab initio palpitans, cerebro auxiliares copias affert; simulque motûs & sensûs (quatenus hi absque spiritibus, sive calore vivido, non fiunt) præcipuus auctor est. Quippe spirituum ille *triumviratus*, antiqua fabula est. Nec minùs vanum, *animal aliquod vivere posse sine corde*. In *vermibus* fortasse cor per omnia diffusum est: cerebrum autem (quod in illorum capite situm ais) haud facilè (opinor) inveneris. Hæc autem alterius sunt indaginis: mihi abunde satès est, si sanguinis in animali circuitiorem, ingeniosè, solidèque ab excellentissimo *Harvæo* excogitam, ingenuè assertum iverim. Quod numnam factum sit, penes Lectorem, à partium studio alienum, & cuja nihil interest utro modo hæc res sese habeat, iudicium esto. Etenim

Martial. l. 9.  
epigr. 83.

—— *cænæ fercula nostræ*  
*Malim convivis, quàm placuisse cocis.*

Ut-



Utcunque sit, nemo sibi vadam linguam  
meam habuit ; sed ( quantum potui ) ve-  
ritati uni litatum-ivi. Quam si aliquando  
( homo enim sum ) non attigerim ; vo-  
luntas tamen nunquam defuit : speroque  
fore, ut doctiores Viri, quibus præcordia  
sunt melioris luti, eandem aliquando lu-  
culentiùs exornent.

—*hæc spatiis ultima creta meis.*

---

*F I N I S.*

---